

Vinay Avasthi Sahib Bhuvan Vani Trust Donations

विनायक

Vinay Avasthi Sahib Bhuvan Vani Trust Donations

9
Vinay Avasthi Sahib Bhuvan Vani Trust Donations

Vinay Avasthi Sahib Bhuyan Vani Trust Donations

॥ श्रीः ॥

श्रीमद्गोस्वामी तुलसीदासजीविरचित

श्रीरामचरितमानस

[मूल-गुटका]



गंगा प्रेस, गोरखपुर

मुद्रक तथा प्रकाशक

Vinay Avasthi Sahib Bhuvan Vani Trust Donations
घनश्यामदास जालान

गीताप्रेस, गोरखपुर

सं० १९९६ से १९९९ तक १,६०,०००
सं० २०००, सप्तम संस्करण, ३०,०००
सं० २००२, अष्टम संस्करण, १५,०००

कुल २,०५०,०००

मूल्य ॥) आठ आना

मिलनेका पता—

गीताप्रेस, गोरखपुर

ध्यान

रक्ताम्भोजदलाभिरामनयनं पीताम्बरालङ्कृतं
श्यामाङ्गं द्विभुजं प्रसन्नवदनं श्रीसीतया शोभितम् ।
कारुण्यामृतसागरं प्रियगणैर्भ्रात्रादिभिर्भाषितं
वन्दे विष्णुशिवादिसेव्यमनिशं भक्तेष्टसिद्धिप्रदम् ॥

‘जो भक्तोंकी अभिलाषा पूर्ण करनेवाले हैं;
ब्रह्मा, विष्णु, शिव आदि निरन्तर जिनकी सेवा
किया करते हैं; हनुमान्, सुग्रीव एवं भरत आदि
भाई बड़े प्रेमसे जिनकी आराधनामें लगे रहते हैं;
जो अहैतुक और अनन्त करुणारूपी अमृतके सागर
हैं, जिनके साथ श्रीसीताजी शोभायमान हो रही हैं,
उन श्यामसुन्दर, द्विभुज, पीताम्बरधारी, प्रसन्न-
मुख, लाल कपलके दलके समान सुन्दर नेत्रवाले
भगवान् श्रीरामकी मैं वन्दना करता हूँ ।’

गीता और रामायणकी परीक्षा

सद्दिचारवान् सज्जनोंको श्रीमद्भगवद्गीता और श्रीरामचरितमानस (रामायण) का महत्त्व समझाना नहीं होगा। हर्षकी बात है, इनके प्रचारके लिये कई वर्षोंसे दो परीक्षा-समितियाँ अपना कार्य कर रही हैं। प्रतिवर्ष हजारों परीक्षार्थी परीक्षामें बैठते हैं। अतएव सब सज्जनोंसे प्रार्थना है कि वे अपने-अपने स्थानोंकी हिंदी-संस्कृत-पाठशालाओंमें तथा स्कूल-कालेजोंमें गीता और रामायणकी पढ़ाईकी व्यवस्था करावें और यथासाध्य अधिक-से-अधिक विद्यार्थियोंको परीक्षामें बैठनेके लिये उत्साहित करें। आशा है कि सभी बुद्धिमान् संजन इस कार्यमें हमारी सहायता करेंगे। नियमावलीके लिये नीचे लिखे पतेपर पत्र लिखनेकी कृपा करें।

संयोजक—

श्रीगीता-रामायण-परीक्षा-समिति,

गीताप्रेस, गोरखपुर

॥ श्रीहरिः ॥

नम्र निवेदन

गीताप्रेससे श्रीरामचरितमानसका एक सटीक एवं सचित्र संस्करण कुछ अन्य उपयोगी सामग्रीके साथ 'कल्याण' के विशेषाङ्कके रूपमें तेरहवें वर्षके प्रारम्भमें निकल चुका है। उसमें बहुत-सी त्रुटियाँ होनेपर भी मानसप्रेमी जनताने उसका कितना आदर किया, यह सब लोगोंको विदित ही है। केवल दो वर्षके अंदर ही उसकी ६११०० प्रतियाँ छप चुकी हैं। मानसाङ्क निकालते समय यह विचार था और उसे सम्पादकीय निवेदनमें व्यक्त भी कर दिया गया था कि इसके बाद जल्दी ही मानसका एक मूल संस्करण मोटे अक्षरोंमें अलग निकाला जाय, जिसमें पाठभेद वगैरह दिये जायँ तथा आवश्यक टिप्पणियाँ भी रहें और उसके बाद उसीके आधारपर मूल तथा सटीक, छोटे-बड़े कई संस्करण निकाले जायँ। परन्तु इच्छा रहनेपर भी कई कारणोंसे वह संस्करण जल्दी नहीं निकल सका। पहले तो यह आशा थी कि भगवान्‌की कृपासे शायद कहींसे गोस्वामीजीके

हाथकी लिखी हुई कोई पूरी प्रामाणिक प्रति मिल जाय, जिससे शुद्ध-से-शुद्ध पाठ मानसप्रेमियोंके पास पहुँचाया जा सके; परन्तु जब यह आशा जल्दी पूरी होती नहीं देखी गयी तो मानसाङ्कके पाठको ही एक बार फिरसे देखकर तथा मानसके कतिपय मर्मशोंका परामर्श लेकर उसीमें आवश्यक-तानुसार यत्र-तत्र कुछ संशोधन करके छपनेको दे दिया गया।

अभी वह संस्करण छप ही नहीं पाया था कि कई मित्रोंका यह अनुरोध हुआ कि नवीन संवत्सरारम्भके पहले ही श्रीरामचरितमानसका एक गुटका बहुत शीघ्र छापकर तैयार किया जाय, जिसमें नवरात्रमें होनेवाले मानस-पारायणके लिये (जिसकी सूचना कई माससे 'कल्याण' में छपी जा रही थी) मानसप्रेमियोंको एक पाठोपयोगी छोटा एवं सस्ता संस्करण मिल जाय। यद्यपि इसमें अड़चनें बहुत थीं, समय बहुत तंग था और इधर लड़ाईके कारण गुटका-साइजके उपयुक्त कागज भी इतनी जल्दी मिलनेमें बड़ी कठिनाई थी तथा कागज आदि सभी चीजोंका मूल्य भी बहुत बढ़ गया है, फिर भी मानसप्रेमियोंका उत्साह भङ्ग न हो और जिन लोगोंके पास 'मानसाङ्क' नहीं है अथवा जो उतना बड़ा संस्करण नहीं खरीद सकते और इस प्रकार पारायणमें शामिल होनेकी इच्छा रहनेपर भी पाठोपयोगी स्वेच्छावित्त संस्करणके अभावमें ऐसा नहीं कर

सकते, उनकी सुविधाके लिये बड़ी जल्दी, प्रेसका और काम रोककर तथा हाथमें लिये हुए पाठभेदोंवाले संस्करणकी छपाईका काम भी बीचहीमें बंद करके इस संस्करणको छापा गया है, जो मानसप्रेमी जनताकी सेवामें प्रस्तुत है।

यों तो हमारा साधा ही प्रयास भूलोंसे भरा है। पूज्य गोस्वामीजीके हाथकी लिखी हुई कोई पूरी प्रामाणिक प्रति प्रयास करनेपर भी न मिल सकनेके कारण शुद्ध पाठका दावा तो हमलोग कर ही नहीं सकते; इसके अतिरिक्त यह संस्करण बहुत शीघ्रतासे छापा गया है, इस कारण भी— अपनी समझसे पूरी सावधानी बरती जानेपर भी—इसमें प्रूफ आदिकी भूलें रह गयी हों तो कोई आश्चर्य नहीं है। आशा है, कृपालु पाठक हमारी कठिनाइयोंको समझकर इसके लिये हमें क्षमा करेंगे। पाठके सम्बन्धमें हमें इतना ही निवेदन करना है कि जो कुछ सामग्री हमें प्राप्त हो सकी, उसका हमलोगोंने अपनी समझसे ईमानदारीके साथ उपयोग किया है। प्रूफ आदिकी भूलें यदि कुछ रही हों तो वे अगले संस्करणमें सुधारी जा सकती हैं।

पाठके सम्बन्धमें हमें पूज्यपाद परमहंस श्रीअवध-
बिहारीदासजी महाराज (नागाबाबा), पूज्य पं० श्री-
विजयानन्दजी त्रिपाठी तथा पूज्य पं० श्रीजयरामदासजी
दीव' तथा अन्य महामुख्य परमर्षी प्राप्त हुए। इसके

लिये हम उनके हृदयसे कृतज्ञ हैं। पाठके निर्णयमें हमें 'मानसपीयूष' से तथा उसके सम्पादक महात्मा श्रीअंजनी-मन्दनशरण शीतलासहायजीसे भी काफी सहायता मिली है, जिनके लिये हम उनके भी विशेष कृतज्ञ हैं।

अन्तमें हम सब लोगोंसे अपनी त्रुटियोंके लिये क्षमा माँगते हैं और भगवान्की वस्तु भगवान्को ही समर्पित करते हैं।

महाशिवरात्रि, सं० १९९६ वि०]

—प्रकाशक

चतुर्थ संस्करण

इस संस्करणमें गोस्वामी तुलसीदासजीकी संक्षिप्त जीवनी भी जोड़ दी गयी है तथा उनके सादे चित्रके स्थानपर रंगीन चित्र लगा दिया गया है।

अष्टम संस्करण

सफेद कागजके खर्चपर सरकारी नियन्त्रण होनेके कारण यह संस्करण न्यूज प्रिंट कागजों पर छापा गया है जिनको इस काममें खर्च करनेके लिये सरकारने हमें विशेषरूपसे आज्ञा दी है।

—प्रकाशक

विषय-सूची

विषय	पृष्ठ	विषय	पृष्ठ
पारायण-विधि	... ११	अयोध्याकाण्ड	
नवाह्नपारायणके विश्राम- स्थान	... १५	मंगलाचरण	... २०५
मासपारायणके विश्राम- स्थान	... १६	राम-राज्याभिषेककी तैयारी	... २०६
रामशलाका प्रभावली	१७	श्रीसीता-राम-संवाद	... २३६
श्रीतुलसीदासजीकी जीवनी	२२	श्रीलक्ष्मण-सुमित्रा-संवाद	२४२
बालकाण्ड		वन-गमन	... २४५
मंगलाचरण	... १	केवटका प्रेम	... २५६
श्रीनामवन्दना	... १५	भरद्वाज-संवाद	... २५९
याज्ञवल्क्य-भरद्वाज-संवाद	३०	श्रीराम-वाल्मीकि-संवाद	२६८
सतीका मोह	... ३३	चित्रकूट-निवास	... २७३
शिव-पार्वती-संवाद	... ६५	दशरथ-मरण	... २८४
नारदका अभिमान	... ७४	भरत-कौसल्या-संवाद	२८९
मनु-शतरूपाका तप	... ८२	भरतका चित्रकूटके लिये प्रस्थान	... ३००
भानुप्रतापकी कथा	... ८८	भरत-भरद्वाज-संवाद	... ३१०
राम-जन्म	... १०९	राम-भरत-मिलन	... ३२७
विश्वामित्रकी यज्ञरक्षा	११९	जनकजीका आगमन	... ३४५
पुष्पवाटिका-निरीक्षण	१२८	श्रीराम-भरत-संवाद	... ३५६
धनुष-भंग	... १४७	भरतजीकी विदाई	... ३६७
श्रीसीता-राम-विवाह	... १७३	नन्दिग्राममें निवास	... ३७०

अरण्यकाण्ड

मंगलाचरण	...३७३
जयन्तकी कुटिलता	...३७४
श्रीसीता-अनुसूया-मिलन	३७७
सुतीक्ष्णजीका प्रेम	...३८०
पञ्चवटी-निवास	...३८१
खर-दूषण-वध	...३९१
मारीच-प्रसंग	...३९४
सीता-हरण	...३९७
शबरीपर कृपा	...४०२

किष्किन्धाकाण्ड

मंगलाचरण	...४१३
श्रीराम-हनुमान्-भेंट	...४१४
बालि-वध	...४१९
सीताजीकी खोजके लिये	
बंदरोंका प्रस्थान	...४२७
हनुमान्-जाम्बवन्त-	
संवाद	...४३२

सुन्दरकाण्ड

मंगलाचरण	...४३५
लंकामें प्रवेश	...४३८
सीता-हनुमान्-संवाद	...४४३
लंका-दहन	...४५०
श्रीराम-हनुमान्-संवाद	४५३
लंकाके लिये प्रस्थान	...४५५

विभीषणकी शरणागति	४६१
समुद्रपर कोप	...४६८

लंकाकाण्ड

मंगलाचरण	...४७३
सेतुबन्ध	...४७४
अंगद-रावण-संवाद	...४८५
लक्ष्मण-मेघनाद-युद्ध	५०६
श्रीरामकी प्रलापलीला	५१०
कुम्भकर्ण-वध	...५१४
मेघनाद-वध	...५२०
राम-रावण-युद्ध	...५३०
रावण-वध	...५४२
सीताजीकी अभि-परीक्षा	५४६
अवधके लिये प्रस्थान	...५५४

उत्तरकाण्ड

मंगलाचरण	...५५९
भरत-हनुमान्-मिलन	५६०
भरत-मिलाप	...५६३
रामराज्याभिषेक	...५६८
श्रीरामजीका प्रजाको	
उपदेश	...५८७
गरुड़-भुशुण्डि-संवाद	५९९
काकभुशुण्डि-लोमश-संवाद	६३०
राम-भक्ति-निरूपण	...६३४
रामायणकी आरती	६४९

॥ श्रीहरिः ॥

पारायण-विधि

श्रीरामचरितमानसका विधिपूर्वक पाठ करनेवाले महानुभावोंको पाठारम्भके पूर्व श्रीतुलसीदासजी, श्रीवाल्मीकिजी, श्रीशिवजी तथा श्रीहनुमान्जीका आवाहन-पूजन करनेके पश्चात् तीनों भाइयोंसहित श्रीसीतारामजीका आवाहन, षोडशोपचार पूजन और ध्यान करना चाहिये । तदनन्तर पाठका आरम्भ करना चाहिये । सबके आवाहन, पूजन और ध्यानके मन्त्र क्रमशः नीचे लिखे जाते हैं—

अथ आवाहनमन्त्रः

तुलसीक नमस्तुभ्यमिहागच्छ शुचिव्रत ।
नैर्ऋत्य उपविश्येदं पूजनं प्रतिगृह्यताम् ॥ १ ॥

ॐ तुलसीदासाय नमः

श्रीवाल्मीक नमस्तुभ्यमिहागच्छ शुभप्रद ।
उत्तरपूर्वयोर्मध्ये तिष्ठ गृहीर्ष्व मेऽर्चनम् ॥ २ ॥

ॐ वाल्मीकाय नमः

गौरीपते नमस्तुभ्यमिहागच्छ महेश्वर ।
पूर्वदक्षिणयोर्मध्ये तिष्ठ पूजां गृहाण मे ॥ ३ ॥

ॐ गौरीपतये नमः

श्रीलक्ष्मणाय नमस्तुभ्यमिहागच्छ सहप्रियः ।
 Vinay Avasthi Santh Bhuwan Vani Trust Donations

याम्यभागे समातिष्ठ पूजनं संगृहाण मे ॥ ४ ॥

ॐ श्रीसपत्नीकाय लक्ष्मणाय नमः

श्रीशत्रुघ्न नमस्तुभ्यमिहागच्छ सहप्रियः ।

पीठस्य पश्चिमे भागे पूजनं स्वीकुरुष्व मे ॥ ५ ॥

ॐ श्रीसपत्नीकाय शत्रुघ्नाय नमः

श्रीभरत नमस्तुभ्यमिहागच्छ सहप्रियः ।

पीठकस्योत्तरे भागे तिष्ठ पूजां गृहाण मे ॥ ६ ॥

ॐ श्रीसपत्नीकाय भरताय नमः

श्रीहनुमन्मस्तुभ्यमिहागच्छ कृपानिधे ।

पूर्वभागे समातिष्ठ पूजनं स्वीकुरु प्रभो ॥ ७ ॥

ॐ हनुमते नमः

अथ प्रधानपूजा च कर्तव्या विधिपूर्वकम् ।

पुष्पाञ्जलिं गृहीत्वा तु ध्यानं कुर्यात्परस्य च ॥ ८ ॥

रक्ताम्भोजदलाभिरामनयनं पीताम्बरालङ्कृतं

श्यामाङ्गं द्विभुजं प्रसन्नवदनं श्रीसीतया शोभितम् ।

कारुण्यामृतसागरं प्रियगणैर्भ्रात्रादिभिर्भावितं

वन्दे विष्णुशिवादिव्यमनिशं भक्तेष्टसिद्धिप्रदम् ॥ ९ ॥

आगच्छ जानकीनाथ जानक्या सह राघव ।

गृहाण मम पूजां च वीर्यपुत्रादिभिर्युत ॥ १० ॥

इत्यावाहनम् ।

सुवर्णरचितं राम दिव्यास्तरणशोभितम् ।

आसनं हि मया दत्तं गृहाण मणिचित्रितम् ॥ ११ ॥

इति षोडशोपचारैः पूजयेत्

ॐ अस्य श्रीमन्मानसरामायणश्रीरामचरितस्य श्री-
शिवकाकभुशुण्डियाज्ञवल्क्यगोस्वामितुलसीदासा ऋषयः
श्रीसीतारामो देवता श्रीरामनाम बीजं भवरोगहरी भक्तिः
शक्तिः, मम नियन्त्रिताशेषविघ्नतया श्रीसीतारामप्रीतिपूर्वक-
सकलमनोरथसिद्धयर्थं पाठे विनियोगः ॥

अथाचमनम्

श्रीसीतारामाय नमः । श्रीरामचन्द्राय नमः ।

श्रीरामभद्राय नमः ।

इति मन्त्रत्रितयेन आचमनं कुर्यात् ॥ श्रीयुगलबीज-
मन्त्रेण प्राणायामं कुर्यात् ॥

अथ करन्यासः

जग मंगल गुनग्राम राम के । दानि मुकुति धन धरम धाम के ॥

अङ्गुष्ठाभ्यां नमः

राम राम कहि जे जमुहार्हीं । तिन्हहि न पापपुंज समुहार्हीं ॥

तर्जनीभ्यां नमः

राम सकल नामन्ह ते अधिक । होउ नाथ अघ खग गन बधिका ॥

मध्यमाभ्यां नमः

उमा दारु जोषित की नाई । सबहि नचावत रामु गोसाईं ॥

अनामिकाभ्यां नमः

सन्मुख होइ जीव मोहि जबहीं । जन्म कोटि अघ नासहिं तबहीं ॥

कनिष्ठिकाभ्यां नमः

मामभिरक्षय रघुकुलनायक । धृत बर चाप रुचिर कर सायक ॥

करतलकरपृष्ठाभ्यां नमः

इति करन्यासः

अथ हृदयादिन्यासः

जग मंगल गुनग्राम राम के । दानि मुकुति धन धरम धाम के ॥
हृदयाय नमः ।

राम राम कहि जे जमुहाहीं । तिन्हहि न पापपुंज समुहाहीं ॥
शिरसे स्वाहा ।

राम सकल नामन्ह ते अधिका । होउ नाथ अघ खग गन बधिका ॥
शिखायै वषट् ।

उमा दारु जोषित की नाई । सबहि नचावत रामु गोसाईं ॥
कवचाय हुम् ।

सन्मुख होइ जीव मोहि जबहीं । जन्म कोटि अघ नासहिं तबहीं ॥
नेत्राभ्यां वौषट् ।

मामभिरक्षय रघुकुलनायक । धूत बर चाप रुचिर कर सायक ॥
अस्त्राय फट् । इति हृदयादिन्यासः

अथ ध्यानम्

मामवलोकय पंकजलोचन । कृपा बिलोकनि सोच विमोचन ॥
नील तामरस स्याम काम अरि । हृदय कंज मकरंद मधुप हरि ॥
जातुधान बरुथ बल भंजन । मुनि सज्जन रंजन अघ गंजन ॥
भूसुर ससि नव वृंद बलाहक । असरन सरन दीन जन गाहक ॥
भुजबल बिपुल भार महिखंडित । खर दूषन विराध बध पंडित ॥
रावनारि सुखरूप भूपवर । जय दसरथ कुल कुमुद सुधाकर ॥
सुजस पुरान विदित निगमागम । गावत सुर मुनि संत समागम ॥
कारुणीक ब्यलीक मद खंडन । सब बिधि कुसल कोसला मंडन ॥
कळि मल मथन नाम ममताहन । तुलसिदास प्रभु पाहि प्रनत जन ॥

इति ध्यानम्

नवाह्नपारायणके विश्राम-स्थान

	पृष्ठ		पृष्ठ
पहला विश्राम	... ७१	छठा विश्राम	... ३९८
दूसरा ,,	... १३५	सातवाँ ,,	... ४८१
तीसरा ,,	... २००	आठवाँ ,,	... ५६७
चौथा ,,	... २६४	नवाँ ,,	... ६४८
पाँचवाँ ,,	... ३२५		

मासपारायणके विश्राम-स्थान

दि	पृष्ठ		पृष्ठ
पहला विश्राम	... १८	सोलहवाँ विश्राम	... २६४
दूसरा ,,	... ३६	सत्रहवाँ ,,	... २७३
तीसरा ,,	... ५४	अट्ठारहवाँ ,,	... २९५
चौथा ,,	... ७१	उन्नीसवाँ ,,	... ३१५
पाँचवाँ ,,	... ८८	बीसवाँ ,,	... ३२५
छठा ,,	... १०४	इक्कीसवाँ ,,	... ३७१
सातवाँ ,,	... १२०	बाईसवाँ ,,	... ४१०
आठवाँ ,,	... १३५	तेईसवाँ ,,	... ४३३
नवाँ ,,	... १५०	चौबीसवाँ ,,	... ४७०
दसवाँ ,,	... १६७	पच्चीसवाँ ,,	... ५०३
ग्यारहवाँ ,,	... १८३	छब्बीसवाँ ,,	... ५३७
बारहवाँ ,,	... २०२	सत्ताईसवाँ ,,	... ५५७
तेरहवाँ ,,	... २२०	अट्ठाईसवाँ ,,	... ५९८
चौदहवाँ ,,	... २३६	उन्तीसवाँ ,,	... ६३४
पंद्रहवाँ ,,	... २५३	तीसवाँ ,,	... ६४८

श्रीरामशलाका प्रश्नावली

मानसानुरागी महानुभावोंको श्रीरामशलाका प्रश्नावलीका विशेष परिचय देनेकी कोई आवश्यकता नहीं प्रतीत होती, उसकी महत्ता एवं उपयोगितासे प्रायः सभी मानसप्रेमी परिचित होंगे । अतः नीचे उसका स्वरूपमात्र अङ्कित करके उससे प्रश्नोत्तर निकालनेकी विधि तथा उसके उत्तर-फलोंका उल्लेख कर दिया जाता है । श्रीरामशलाका प्रश्नावलीका स्वरूप इस प्रकार है—

सु	प्र	उ	वि	हो	सु	ग	व	सु	नु	वि	घ	धि	इ	द
र	रु	फ	सि	सि	रें	बस	है	मं	ल	न	ल	य	न	अं
सुज	सो	ग	सु	कुं	म	स	ग	त	न	ई	ल	धा	वे	नो
त्य	र	न	कु	जो	म	रि	र	र	अ	की	हो	सं	रा	य
पु	सु	थ	सी	जे	इ	ग	*म	सं	क	रे	हो	स	स	नि
त	र	त	र	स	इ	ह	व	व	प	चि	स	य	स	तु
म	का	।	र	र	मा	मि	मी	म्हा	।	जा	हू	ही	।	जू
ता	रा	रे	री	हृ	का	फ	खा	जि	ई	र	रा	पू	द	ल
नि	को	मि	गो	न	म	ज	य	ने	मनि	क	ज	प	ष	ल
हि	रा	म	स	रि	ग	द	न	प	म	खि	जि	मनि	त	जं
सिं	सु	न	न	कौ	मि	ज	र	ग	धु	ख	सु	का	स	र
गु	क	म	अ	ध	नि	म	ल	।	न	ब	ती	न	रि	भ
ना	पु	व	अ	ढा	र	ल	का	ए	तु	र	न	नु	व	थ
सि	ह	सु	म्ह	रा	इ	स	हिं	र	त	न	ष	।	जा	।
ह	सा	।	ला	धी	।	री	ज	ह	ही	पा	जू	ई	रा	रे

इस रामशलाका प्रश्नावलीके द्वारा जिस किसीको जब कभी अपने अभीष्ट प्रश्नका उत्तर प्राप्त करनेकी इच्छा हो तो सर्वप्रथम उस व्यक्तिको भगवान् श्रीरामचन्द्रजीका ध्यान करना चाहिये । तदनन्तर श्रद्धा-विश्वासपूर्वक मनसे अभीष्ट प्रश्नका चिन्तन करते हुए प्रश्नावलीके मनचाहे कोष्ठकमें अँगुली या कोई शलाका रख देना चाहिये और उस कोष्ठकमें जो अक्षर हो उसे अलग किसी कोरे कागज या स्लेटपर लिख लेना चाहिये । प्रश्नावलीके कोष्ठकपर भी ऐसा कोई निशान लगा देना चाहिये जिससे न तो प्रश्नावली गंदी हो और न प्रश्नोत्तर प्राप्त होनेतक वह कोष्ठक भूल जाय । अब जिस कोष्ठकका अक्षर लिख लिया गया है उससे आगे बढ़ना चाहिये तथा उसके नवें कोष्ठकमें जो अक्षर पड़े उसे भी लिख लेना चाहिये । इस प्रकार प्रति नवें अक्षरके नवें अक्षरको क्रमसे लिखते जाना चाहिये और तबतक लिखते जाना चाहिये, जबतक उसी पहले कोष्ठकके अक्षरतक अँगुली अथवा शलाका न पहुँच जाय । पहले कोष्ठकका अक्षर जिस कोष्ठकके अक्षरसे नवाँ पड़ेगा, वहाँतक पहुँचते-पहुँचते एक चौपाई पूरी हो जायगी, जो प्रश्नकर्ताके अभीष्ट प्रश्नका उत्तर होगी । यहाँ इस बातका ध्यान रखना चाहिये कि किसी-किसी कोष्ठकमें केवल 'आ' की मात्रा (।) और किसी-किसी कोष्ठकमें दो-दो अक्षर हैं, उक्त गिनते समय न तो

मात्राबाल कोष्ठकको छोड़ देना चाहिये और न दो अक्षरोंवाले कोष्ठकको दो बार गिनना चाहिये । जहाँ मात्राका कोष्ठक आवे वहाँ पूर्वलिखित अक्षरके आगे मात्रा लिख लेना चाहिये और जहाँ दो अक्षरोंवाला कोष्ठक आवे वहाँ दोनों अक्षर एक साथ लिख लेना चाहिये ।

अब उदाहरणके तौरपर इस रामशलाका प्रश्नावलीसे किसी प्रश्नके उत्तरमें एक चौपाई निकाल दी जाती है । पाठक ध्यानसे देखें । किसीने भगवान् श्रीरामचन्द्रजीका ध्यान और अपने प्रश्नका चिन्तन करते हुए यदि प्रश्नावलीके* इस चिह्नसे संयुक्त 'म' वाले कोष्ठकमें अँगुली या शलाका रक्खा और वह ऊपर बताये क्रमके अनुसार अक्षरोंको गिन-गिनकर लिखता गया तो उत्तरस्वरूप यह चौपाई बन जायगी—

हो इ है सो ई जो राम * र चि रा खा ।

को क रि त र क ब ढा व हिं सा षा ॥

यह चौपाई बालकाण्डान्तर्गत शिव और पार्वतीके संवादमें है । प्रश्नकर्ताको इस उत्तरस्वरूप चौपाईसे यह आशय निकालना चाहिये कि कार्य होनेमें सन्देह है, अतः उसे भगवान्पर छोड़ देना श्रेयस्कर है ।

इस चौपाईके अतिरिक्त श्रीरामशलाका प्रश्नावलीसे और

भी जितनी चौपाईयाँ बनती हैं, उन सबका स्थान और फलसहित उल्लेख नीचे किया जाता है ।

१-सुनु सिय सत्य असीस हमारी । पूजहि मन कामना तुम्हारी ॥

स्थान-यह चौपाई बालकाण्डमें श्रीसीताजीके गौरीपूजनके प्रसङ्गमें है । गौरीजीने श्रीसीताजीको आशीर्वाद दिया है ।

फल-प्रश्नकर्ताका प्रश्न उत्तम है, कार्य सिद्ध होगा ।

२-प्रविसि नगर कीजे सब काजा । हृदय राखि कोसलपुर राजा ॥

स्थान-यह चौपाई सुन्दरकाण्डमें हनुमान्जीके लंकामें प्रवेश करनेके समयकी है ।

फल-भगवान्का स्मरण करके कार्यारम्भ करो, सफलता मिलेगी ।

३-उघरें अंत न होइ निवाहू । कालनेम जिमि रावन राहू ॥

स्थान-यह चौपाई बालकाण्डके आरम्भमें सत्सङ्गवर्णनके प्रसङ्गमें है ।

फल-इस कार्यमें भलाई नहीं है । कार्यकी सफलतामें सन्देह है ?

४-विधि बस सुजन कुसंगत परहीं । फनि मनि सम निज गुन अनुसरहीं ॥

स्थान-यह चौपाई भी बालकाण्डके आरम्भमें ही सत्सङ्गवर्णनके प्रसङ्गकी है ।

फल—खोटे मनुष्योंका सङ्ग छोड़ दो । कार्य पूर्ण होनेमें सन्देह है ।

५—मुद मंगलमय संत समाजू । जिमि जग जंगम तीरथ राजू ॥
स्थान—यह चौपाई बालकाण्डमें संत-समाजरूपी तीर्थके वर्णनमें है ।

फल—प्रश्न उत्तम है । कार्य सिद्ध होगा ।

६—गरल सुधा रिपु करय मितार्ई । गोपद सिंधु अकल सितलाई ॥
स्थान—यह चौपाई श्रीहनुमान्जीके लंकामें प्रवेश करनेके समयकी है ।

फल—प्रश्न बहुत श्रेष्ठ है । कार्य सफल होगा ।

७—बरुन कुबेर सुरेस समीरा । रन सनमुख धरि काह न धीरा ॥
स्थान—यह चौपाई लंकाकाण्डमें रावणकी मृत्युके पश्चात् मन्दोदरीके विलापके प्रसङ्गमें है ।

फल—कार्य पूर्ण होनेमें सन्देह है ।


८—सुफल मनोरथ होहुँ तुम्हारे । रामु लखनु सुनि भए सुखारे ॥
स्थान—यह चौपाई बालकाण्डमें पुष्पवाटिकासे पुष्प लाने-पर विश्वामित्रजीका आशीर्वाद है ।

फल—प्रश्न बहुत उत्तम है । कार्य सिद्ध होगा ।

इस प्रकार रामशंलाका प्रश्नावलीसे कुल नौ चौपाइयाँ बनती हैं, जिनमें सभी प्रकारके प्रश्नोंके उत्तराशय सन्निहित हैं ।

गोस्वामी तुलसीदासजीकी संक्षिप्त जीवनी

प्रयागके पास बाँदा जिलेमें राजापुरनामक एक ग्राम है, वहाँ आत्माराम दूबे नामके एक प्रतिष्ठित सरयूपारीण ब्राह्मण रहते थे । उनकी धर्मपत्नीका नाम हुलसी था । संवत् १५५४ की श्रावण शुक्ला सप्तमीके दिन अमुक्तमूल नक्षत्रमें इन्हीं भाग्यवान् दम्पतिके यहाँ बारह महीनेतक गर्भमें रहनेके पश्चात् गोस्वामी तुलसीदासजीका जन्म हुआ । जन्मते समय बालक तुलसीदास रोये नहीं, किन्तु उनके मुखसे 'राम' का शब्द निकला । उनके मुखमें बत्तीसों दाँत मौजूद थे । उनका डील-डौल पाँच वर्षके बालकका-सा था । इस प्रकारके अद्भुत बालकको देखकर पिता अमङ्गलकी शङ्कासे भयभीत हो गये और उसके सम्बन्धमें कई प्रकारकी कल्पनाएँ करने लगे । माता हुलसीको यह देखकर बड़ी चिन्ता हुई । उन्होंने बालकके अनिष्टकी आशङ्कासे दशमीकी रातको नवजात शिशुको अपनी दासीके साथ उसके ससुराल भेज दिया और दूसरे दिन स्वयं इस असार संसारसे चल बसी । दासीने, जिसका नाम चुनियाँ था, बड़े प्रेमसे



गोस्वामी श्रीतुलसीदासजी

Vinay Avasthi Sahib Bhuvan Vani Trust Donations

बालकका पालन-पोषण किया। जब तुलसीदास लगभग साढ़े पाँच वर्षके हुए, चुनियाँका भी देहान्त हो गया, अब तो बालक अनाथ हो गया। वह द्वार-द्वार भटकने लगा। इसपर जगजननी पार्वतीको उस होनहार बालकपर दया आयी। वे ब्राह्मणीका वेष धारण कर प्रतिदिन उसके पास जातीं और उसे अपने हाथों भोजन करा जातीं।

इधर भगवान् शङ्करजीकी प्रेरणासे रामशैलपर रहनेवाले श्रीअनन्तानन्दजीके प्रिय शिष्य श्रीनरहर्यानन्दजीने इस बालकको ढूँढ़ निकाला और उसका नाम रामबोला रक्खा। उसे वे अयोध्या ले गये और वहाँ संवत् १५६१ माघ शुक्ल पञ्चमी शुक्रवारको उसका यज्ञोपवीत-संस्कार कराया। बिना सिखाये ही बालक रामबोलाने गायत्री मन्त्रका उच्चारण किया, जिसे देखकर सब लोग चकित हो गये। इसके बाद नरहरि स्वामीने वैष्णवोंके पाँच संस्कार करके रामबोलाको राम-मन्त्रकी दीक्षा दी और अयोध्याहीमें रहकर उन्हें विद्याध्ययन कराने लगे। बालक रामबोलाकी बुद्धि बड़ी प्रखर थी। एक बार गुरुमुखसे जो सुन लेते थे, उन्हें वह कण्ठस्थ हो जाता था। वहाँसे कुछ दिन बाद गुरु-शिष्य दोनों सूकरक्षेत्र (सोरों) पहुँचे। वहाँ श्रीनरहरिजीने तुलसीदासको रामचरित सुनाया। कुछ दिन बाद वे काशी चले आये। काशीमें शेष सदाचरणजीके पास रहकर तुलसीदासने पंद्रह वर्षतक वेद-

वेदाङ्गका अंगवस्त्र पहनाकर भुवनेश्वर की डोली में बैसना कुछ जाग्रत् हो उठी और अपने विद्यागुरुसे आज्ञा लेकर वे अपनी जन्मभूमिको लौट आये । वहाँ आकर उन्होंने देखा कि उनका परिवार सब नष्ट हो चुका है । उन्होंने विधिपूर्वक अपने पिता आदिका श्राद्ध किया और वहीं रहकर लोगोंको भगवान् रामकी कथा सुनाने लगे ।

संवत् २५८३ ज्येष्ठ शुक्ला १३ गुरुवारको भारद्वाज गोत्रकी एक सुन्दरी कन्याके साथ उनका विवाह हुआ और वे सुखपूर्वक अपनी नवविवाहिता वधूके साथ रहने लगे । एक बार उनकी स्त्री भाईके साथ अपने मायके चली गयी । पीछे-पीछे तुलसीदासजी भी वहाँ जा पहुँचे । उनकी पत्नीने इसपर उन्हें बहुत धिक्कारा और कहा कि 'मेरे इस हाड़-मांसके शरीरमें जितनी तुम्हारी आसक्ति है, उससे आधी भी यदि भगवान्में होती तो तुम्हारा बेड़ा पार हो गया होता ।'

तुलसीदासजीको ये शब्द लग गये । वे एक क्षण भी नहीं रुके, तुरन्त वहाँसे चल दिये ।

वहाँसे चलकर तुलसीदासजी प्रयाग आये । वहाँ उन्होंने गृहस्थवेषका परित्याग कर साधुवेष ग्रहण किया । फिर तीर्थाटन करते हुए काशी पहुँचे । मानसरोवरके पास उन्हें काकभुशुण्डिजीके दर्शन हुए । °

काशीमें तुलसीदासजी रामकथा कहने लगे । वहाँ उन्हें एक दिन एक प्रेत मिला, जिसने उन्हें हनुमान्जीका पता बतलाया । हनुमान्जीसे मिलकर तुलसीदासजीने उनसे श्रीरघुनाथजीका दर्शन करानेकी प्रार्थना की । हनुमान्जीने कहा 'तुम्हें चित्रकूटमें रघुनाथजीके दर्शन होंगे ।' इसपर तुलसीदासजी चित्रकूटकी ओर चल पड़े ।

चित्रकूट पहुँचकर रामघाटपर उन्होंने अपना आसन जमाया । एक दिन वे प्रदक्षिणा करने निकले थे । मार्गमें उन्हें श्रीरामके दर्शन हुए । उन्होंने देखा कि दो बड़े ही सुन्दर राजकुमार घोड़ोंपर सवार होकर धनुष-बाण लिये जा रहे हैं । तुलसीदासजी उन्हें देखकर मुग्ध हो गये, परन्तु उन्हें पहचान न सके । पीछेसे हनुमान्जीने आकर उन्हें सारा भेद बताया, तो वे बड़ा पश्चात्ताप करने लगे । हनुमान्जीने उन्हें सान्त्वना दी और कहा प्रातःकाल फिर दर्शन होंगे ।

संवत् १६०७ की मौनी अमावस्या बुधवारके दिन उनके सामने भगवान् श्रीराम पुनः प्रकट हुए । उन्होंने बालकरूपमें तुलसीदासजीसे कहा—बाबा ! हमें चन्दन दो । हनुमान्जीने सोचा, ये इस बार भी धोखा न खा जायँ, इसलिये उन्होंने तोतेका रूप धारण कर यह दोहा कहा—

चित्रकूट के घाट पर भई संतन की भीर ।

तुलसीदास चंदन घिसें तिलक देत रघुबीर ॥

तुलसीदासजी उस अद्भुत छविको निहारकर शरीरकी सुधि भूल गये । भगवान् ने अपने हाथसे चन्दन लेकर अपने तथा तुलसीदासजीके मस्तकपर लगाया और अन्तर्धान हो गये ।

संवत् १६२८ में ये हनुमान्जीकी आज्ञासे अयोध्याकी ओर चल पड़े । उन दिनों प्रयागमें माघमेला था । वहाँ कुछ दिन वे ठहर गये । पर्वके छः दिन बाद एक वटवृक्षके नीचे उन्हें भरद्वाज और याज्ञवल्क्य मुनिके दर्शन हुए । वहाँ उस समय वही कथा हो रही थी, जो उन्होंने सूकरक्षेत्रमें अपने गुरुसे सुनी थी । वहाँसे ये काशी चले आये और वहाँ प्रह्लादघाटपर एक ब्राह्मणके घर निवास किया । वहाँ उनके अंदर कवित्व-शक्तिका स्फुरण हुआ और वे संस्कृतमें पद्यरचना करने लगे । परन्तु दिनमें वे जितने पद्य रचते, रात्रिमें वे सब लुप्त हो जाते । यह घटना रोज घटती । आठवें दिन तुलसीदासजीको स्वप्न हुआ । भगवान् शङ्करने उन्हें आदेश दिया कि तुम अपनी भाषामें काव्य-रचना करो । तुलसीदासजीकी नींद उचट गयी । वे उठकर बैठ गये । उसी समय भगवान् शिव और पार्वती उनके सामने प्रकट हुए । तुलसीदासजीने उन्हें साष्टाङ्ग प्रणाम किया । शिवजीने कहा—‘तुम अयोध्यामें जाकर रहो । और हिंदीमें काव्य-रचना करो । मेरे आशीर्वादसे तुम्हारी कविता सामनेबड़े समान

फलवती होगी ।' इतना कहकर श्रीगौरीशङ्कर अन्तर्धान हो गये । तुलसीदासजी उनकी आज्ञा शिरोधार्य कर काशीसे अयोध्या चले आये ।

संवत् १६३१ का प्रारम्भ हुआ । उस साल रामनवमीके दिन प्रायः वैसा ही योग था जैसा त्रेतायुगमें रामजन्मके दिन था । उस दिन प्रातःकाल श्रीतुलसीदासजीने श्रीरामचरितमानसकी रचना प्रारम्भ की । दो वर्ष, सात महीने, छब्बीस दिनमें ग्रन्थकी समाप्ति हुई । संवत् १६३३ के मार्गशीर्ष शुक्लपक्षमें रामविवाहके दिन सातों काण्ड पूर्ण हो गये ।

इसके बाद भगवान्की आज्ञासे तुलसीदासजी काशी चले आये । वहाँ उन्होंने भगवान् विश्वनाथ और माता अन्नपूर्णाको श्रीरामचरितमानस सुनाया । रातको पुस्तक श्रीविश्वनाथजीके मन्दिरमें रख दी गयी । सबेरे जब पट खोला गया तो उसपर लिखा हुआ पाया गया—‘सत्यं शिवं सुन्दरम्’ और नीचे भगवान् शङ्करकी सही थी । उस समय उपस्थित लोगोंने ‘सत्यं शिवं सुन्दरम्’ की आवाज भी कानोंसे सुनी ।

इधर पण्डितोंने जब यह बात सुनी तो उनके मनमें ईर्ष्या उत्पन्न हुई । वे दल बाँधकर तुलसीदासजीकी निन्दा करने लगे और उस पुस्तकको भी नष्ट कर देनेका प्रयत्न करने

लगे । उन्होंने पुस्तक चुराने के लिये दो चोर भेजे । चोरों ने जाकर देखा कि तुलसीदासजीकी कुटीके आसपास दो वीर धनुष-बाण लिये पहरा दे रहे हैं । वे बड़े ही सुन्दर श्याम और गौर वर्णके थे । उनके दर्शनसे चोरोंकी बुद्धि शुद्ध हो गयी । उन्होंने उसी समयसे चोरी करना छोड़ दिया और भजनमें लग गये । तुलसीदासजीने अपने लिये भगवान्‌को कष्ट हुआ जन्म कुटीका सारा सामान लुटा दिया, पुस्तक अपने मित्र टोडरमलके यहाँ रख दीं । इसके बाद उन्होंने एक दूसरी प्रति लिखी । उसीके आधारपर दूसरी प्रतिलिपियाँ तैयार की जाने लगीं । पुस्तकका प्रचार दिनोंदिन बढ़ने लगा ।

इधर पण्डितोंने और कोई उपाय न देख श्रीमधुसूदन सरस्वतीजीको उस पुस्तकको देखनेकी प्रेरणा की । श्रीमधुसूदन सरस्वतीजीने उसे देखकर बड़ी प्रसन्नता प्रकट की और उसपर यह सम्मति लिख दी—

आनन्दकानने ह्यस्मिञ्जङ्गमस्तुलसीतरुः ।

कवितामञ्जरी भाति रामभ्रमरभूषिता ॥

‘इस काशीरूपी आनन्दवनमें तुलसीदास चलता-फिरता तुलसीका पौधा है । उसकी कवितारूपी मञ्जरी बड़ी ही सुन्दर है, जिसपर श्रीरामरूपी भँवरा सदा मँडराया करता है ।’

पण्डितोंको इसपर भी सन्तोष नहीं हुआ । तब पुस्तककी परीक्षाका एक उपाय और सोचा गया । भगवान् विश्वनाथके सामने सबके ऊपर वेद, उसके नीचे शास्त्र, शास्त्रोंके नीचे पुराण और सबके नीचे रामचरितमानस रख दिया गया । मन्दिर बंद कर दिया गया । प्रातःकाल जब मन्दिर खोला गया तो लोगोंने देखा कि श्रीरामचरितमानस वेदोंके ऊपर रखवा हुआ है । अब तो पण्डित लोग बड़े लज्जित हुए । उन्होंने तुलसीदासजीसे क्षमा माँगी और भक्तिसे उनका चरणोदक लिया ।

तुलसीदासजी अब असीघाटपर रहने लगे । रातको एक दिन कलियुग मूर्तरूप धारण कर उनके पास आया और उन्हें त्रास देने लगा । गोस्वामीजीने हनुमान्जीका ध्यान किया । हनुमान्जीने उन्हें विनयके पद रचनेको कहा; इसपर गोस्वामीजीने विनय-पत्रिका लिखी और भगवान्के चरणोंमें उसे समर्पित कर दी । श्रीरामने उसपर अपने हस्ताक्षर कर दिये और तुलसीदासजीको निर्भय कर दिया ।

संवत् १६८० श्रावण कृष्ण तृतीया शनिवारको असीघाटपर गोस्वामीजीने राम-राम करते हुए अपना शरीर-परित्याग किया ।

‘जो पै तुलसी न गावतो’

वेदमत सोधि, सोधि-सोधि कै पुरान सबै

संत औ असंतन को भेद को बतावतो ।

कपटी कुराही कूर कलि के कुचाली जीव

कौन रामनामहू की चरचा चलावतो ॥

‘बेनी’ कवि कहै मानो-मानो हो प्रतीति यह

प्राहन-हिये में कौन प्रेम उपजावतो ।

भारी भवसागर उतारितो कवन पार

जो पै यह रामायन तुलसी न गावतो ॥

—बेनी कवि



॥ श्रीरामाय नमः ॥

श्रीरामचरितमानस

बालकाण्ड



मायामुक्त नारदजी



तव मुनि अति सभीत हरि चरना ।

गहे पाहि प्रनतारति हरना ॥



श्रीगणेशाय नमः

श्रीजानकीवल्लभो विजयते

श्रीरामचरितमानस

प्रथम सोपान

(बालकाण्ड)

श्लोक

वर्णानामर्थसंघानी रसानां छन्दसामपि ।
मङ्गलानां च कर्तारौ वन्दे वाणीविनायकौ ॥ १ ॥

भवानीशङ्करौ वन्दे श्रद्धाविश्वासरूपिणौ ।

याभ्यां विना न पश्यन्ति सिद्धाः स्वान्तःस्थमीश्वरम् ॥ २ ॥

वन्दे बोधमयं नित्यं गुरुं शङ्कररूपिणम् ।

यमाश्रितो हि वक्रोऽपि चन्द्रः सर्वत्र वन्द्यते ॥ ३ ॥

सीतारामगुणग्रामपुण्यारण्यविहारिणौ ।

वन्दे विशुद्धविज्ञानौ कवीश्वरकपीश्वरौ

उद्भवस्थितिसहारकारिणां

कुशहारिणाम् ।

सर्वश्रेयस्करीं सीतां नतोऽहं रामवल्लभाम् ॥ ५ ॥

यन्मायावशवर्ति विश्वमखिलं ब्रह्मादिदेवासुरा
यत्सत्त्वादमृषैव भाति सकलं रज्जौ यथाहेर्भ्रमः ।यत्पादप्लवमेकमेव हि भवाग्भोधेस्तितीर्षावतां
वन्देऽहं तमशेषकारणपरं रामाख्यमीशं हृदिम् ॥ ६ ॥

नानापुराणनिगमागमसम्मतं यद्

रामायणे निगदितं क्वचिदन्यतोऽपि ।

स्वान्तःसुखाय तलसी रघुनाथगाथा-

भाषानिवन्धमतिमञ्जुलमातनोति ॥ ७ ॥

सो०-जो स्मिरत सिधि होइ गन नायक करिबर बदन ।

करउ अनुग्रह लोइ छि रसि सुभ गुन सदन ॥ १ ॥

मूक होइ बाचाल पंगु चढ़ि शिरिबर गहन ।

जासु कृपाँ सो दयाल द्रवउ सकल कलि गल दहन ॥ २ ॥

नील सरोरुह स्याम तरुन अरुन बारिज नयन ।

करउ सो मम उर धाम सदा छीरसागर सयन ॥ ३ ॥

कुंद इंदु सम देह उमा रमन करुना अथन ।

जाहि दीन पर नेह करउ कृपा मर्दन मयन ॥ ४ ॥

बंदउँ गुरु पद कंज कृपा सिंधु नररूप हरि ।

महामोह जम पूंज जासु बचन रवि कर निकर ॥ ५ ॥

बंदउँ गुरु पद पदुम परागा । सुराचि सुवास सरस अनुरागा ॥

अमिअ मूरिमय चूरन चारू । समन सकल भव रुज परिवारू ॥
सुकृति संभु तन विमल बिभूती । मंजुल मंगल मोद प्रसूती ॥
जनमन मंजु मुकुर मल हरनी । किएँ तिलक गुन गन बस करनी
श्रीगुरपद नख मनि गन जोती । सुमिरत दिव्य दृष्टि हियँ होती ॥
दलन मोह तम सो सप्रकासू । बड़े भाग उर आवइ जासू ॥
उघरहिं विमल विलोचन ही के । मिटहिं दोष दुख भव रजनी के ॥
सूझहिं राम चरित मनि मानिक । गुपुत प्रगट जहँ जो जेहि खानिक

दो०—जथा सुअंजन अंजि दृग साधक सिद्ध सुजान ।

कौतुक देखत सैल बन भूतल भूरि निधान ॥ १ ॥

गुरुपद रज मृदु मंजुल अंजन । नयन अमिअ दृग दोष विभंजन
तेहिं करि विमल विवेक विलोचन । गुरनउ राम चरित भव पेचन
बंदउँ प्रथम महीसुर चरना । मोह जनित संसय सब हरना ॥
सुजन समाज सफल गुन खानी । करउँ प्रनाम सप्रेम सुबानी ॥
साधु चरित सुभ चरित कपासू । निरस विसद गुनमय फल जासू
जो सहि दुख परछिद्र दुरावा । बंदनीय जेहिं जग जस पावा ॥
मुद मंगलमय संत समाजू । जो जग जंगम तीरथराजू ॥
राम भक्ति जहँ सुरसरि धारा । सरसइ ब्रह्म विचार प्रचारा ॥
विधि निषेधमय कलि मल हरनी । करम कथा रविनंदनि वरनी ॥
हरि हर कथा विराजति बेनी । सुनत सकल मुद मंगल देनी ॥

बटु बिस्यासि अवलनिज धरमा तीरथराज समाज सुकरमा ॥
 सबहि सुलभ सब दिन सब देसा । सेवत सादर समन कलेसा ॥
 अकथ अलौकिक तीरथराऊ । देइ सय फल प्रगट प्रभाऊ ॥
 दो०—सुनि समुझहिं जन मुदित मन मज्जहिं अति अनुराग ।

लहहिं चारि फल अछत तनु साधु समाज प्रयाग ॥ २ ॥
 मजन फल पेखिअ ततकाला । काक होहिं पिक बकउ मराला ॥
 सुनि आचरज करै जनि कोई । सतसंगति महिमा नहिं गोई ॥
 बालमीक नारद घटजोनी । निज निज मुखनि कही निज होनी ॥
 जलचर थलचर नभचर नाना । जे जड़ चेतन जीव जहाना ॥
 मति कीरति गति भूति भलाई । जव जेहिं जतन जहाँ जेहिं पाई ॥
 सो जानव सतसंग प्रभाऊ । लोकहुँ वेद न आन उपाऊ ॥
 बिनु सतसंग बिबेक न होई । राम कृपा बिनु सुलभ न सोई ॥
 सुसंगत मुद मंगल मूल । सोइ फल सिधि सब साधन फूला ॥
 सठ सुधरहिं सतसंगति पाई । पारस पारस कुधात सुहाई ॥
 बिधि बस सुजन कुसंगत परहीं । फनि मनि सम निज गुन अनुसरहीं ॥
 बिधि हरि हर कवि कोबिद बानी । कहत साधु महिमा सकुचानी ॥
 सो मो सन कहि जात न कैसैं । साक बनिक मनि गुन गन जैसैं ॥
 दो०—बंदउँ संत समान चित हित अनहित नहिं कोइ ।

अंजलि गत सुभ सुमन जिमि सम सुगंध कर दोइ ॥ ३ (क) ॥

संत सरल चित जगत हित जानि सुभाउ सनेहु ।

बालबिनय सुनि करि कृपा राम चरन रति देहु ॥ ३ (ख) ॥

बहुरि विदिखल जेन सति भए । जे विनु कज दाहिनेहु बाँए ॥
 पर हित हानि लाभ जिन्ह केरें । उजरें हरष विषाद बसेरें ॥
 हरि हर जस राकेस राहु से । पर अकाज भट सहसबाहु से ॥
 जे पर दोष लखहिं सहसाखी । पर हित धृत जिन्ह के मन माखी ॥
 तेज कृसानु रोष महिषेसा । अघ अवगुन धन धनी धनेसा ॥
 उदय केत सम हित सबही के । कुंभकरन सम सोवत नीके ॥
 पर अकाजु लगि तनु परिहरहीं । जिमि हिम उपल कृप्री दलि गरहीं ॥
 बंदउँ खल जस सेष सरोषा । सहस बदन बरनइ पर दोषा ॥
 पुनि प्रनवउँ पृथुराज समाना । पर अघ सुनइ सहस दस काना ॥
 बहुरि सक्र सम विनवउँ तेही । संतत सुरानीक हित जेही ॥
 वचन बज्र जेहि सदा पिआरु । सहस नयन पर दोष निहारा ॥

दो०—उदासीन अरि मीत हित जानि । जराह खल राति ।

जानि पानि जु जोरि जन विनती करइ सप्रीति ॥ ४ ॥

मैं अपनी दिसि कीन्ह निहोरा । तिन्ह निज ओर न लाउव भोरा
 बायस पलिअहिं अति अनुरागा । होहिं निरामिष कबहुँ कि कागा ॥
 बंदउँ संत असजन चरना । दुखप्रद उभय बीच कछु बरना
 बिछुरत एक प्राण हरि लेहीं । मिलत एक दुख दारुन देहीं ॥
 उपजहिं एक संग जग माहीं । जलज जौं क जिमि गुन बिलंगाहीं
 सुधा सुरा सम साधु असाधू । जनक एक जग जलधि अगाधू ॥
 भल अनभल निज निज करतूती । लहत सुजस अपलोक बिभूती ॥

Vinay Avasthi Sahib Bhuvan Vani Trust Donations

सुधा सुधाकर सुरसार साधू । गरल अनल कलमल सार व्याधू
 गुन अवगुन जानत सब कोई । जो जेहि भाव नीक तेहि सोई ॥
 दो०—भलो भलाइहि पै लहइ लहइ निचाइहि नीचु ।

सुधा सराहिअ अमरताँ गरल सराहिअ मीचु ॥ ५ ॥

खल अघ अगुन साधु गुन गाहा । उभय अपार उदधि अवगाहा ॥
 तेहि तें कछु गुन दोष बखाने । संग्रह त्याग न बिनु पहिचाने ॥
 भलेउ पोच सब विधि उपजाए । गनि गुन दोष वेद बिलगाए ॥
 कहहिं वेद इतिहास पुराना । विधि प्रपंचु गुन अवगुन साना ॥
 दुख सुख पाप पुन्य दिन राती । साधु असाधु सुजाति कुजाती ॥
 दानव देव ऊँच अरु नीचू । अमिअ सुजीवनु माहुरु मीचू ॥
 माया ब्रह्म जीव जगदीसा । लच्छि अलच्छि रंक अवनिसा ॥
 कासी मुग सुरसार कलसारी । मारव महिदेव गवासा ॥
 रारग नरक अनुराग विरागा निगमासु गुन दोष विभागा ॥
 दो०—जड़ चेतन गुन दोषमय बिस्व कीन्ह करतार ।

संत हंस गुन गहहिं पय परिहरि बारि ध्रिकार ॥ ६ ॥

अस बिबेक जब देइ विधाता । तब तजि दोष गुनहिं मनु राता ॥
 काल सुभाउ करम बरिआई । भलेउ प्रकृति बस चुकइ भलाई ॥
 सो सुधारि हरिजन जिमि लेहीं । दलि दुख दोष विमल जसु देहीं ॥
 खलउ करहिं भल पाइ सुसंगू । मिटइ न मलिन सुभाउ अभंगू ॥
 लखि सुबेष जग बंचक जेऊ । बेष प्रताप पूजिअहिं तेऊ ॥

उधरहिं अंत न होइ निवाहू । कालनेमि जिमि रावन राहू ॥
 किएहुँ कुवेषु साधु सनमानू । जिमि जग जामवंत हनुमानू ॥
 हानि कुसंग सुसंगति लाहू । लोकहुँ वेद विदित सब काहू ॥
 गगन चढ़इ रज पवन प्रसंगा । कीचहिं मिलइ नीच जल संगी ॥
 साधु असाधु सदन सुक सारीं । सुमिरहिं राम देहिं गनि गारीं ॥
 धूम कुसंगति कारिख होई । लिखिअ पुरान मंजु मसि सोई ॥
 सोइ जल अनल अनिल संघाता । होइ जलद जग जीवन दाता ॥

दो०—ग्रह भेषज जल पवन पट पाइ कुजोग सुजोग ।

होहिं कुबस्तु सुबस्तु जग लखहिं सुलच्छन लोग ॥७(क)॥

सम प्रकास तम पाख दुहुँ नाम भेद बिधि कीन्ह ।

ससि सोषक पोषक समुद्रि जग जस अपजस दीन्ह ॥७(ख)॥

जड़ चेतन जग जीव जट्ट सकल राममय जानि ।

बंदउँ सब के नद कमल सदा जोरि जुगपानि ॥७(ग)॥

देव दनुज नर नाग खग प्रेत पितर गंधर्व ।

बंदउँ किंनर रजनिचर कृपा करहु अब सर्व ॥७(घ)॥

आकर चारि लाख चौरासी । जाति जीव जल थल नभ बासी ॥

सीय राममय सब जग जानी । करउँ प्रनाम जोरि जुग पानी ॥

जानि कृपाकर किंकर मोहू । सब मिलि करहु छाड़ि छल छोहू ॥

निज बुधि बल भरोस मोहि नाहीं । तातें बिनय करउँ सब पाहीं ॥

करन चहुँ रघुपति शुन गाहा । लघु मति मोरि चरित अवगाहा ॥

सूझ म एकउ अंग उपाऊ । मन मति रंक मनोरथ राऊ ॥
 मति अति नीच ऊँचि रुचि आछी । चहिअ अमिअ जग जुरइ न छाछी ॥
 छमिहहिं सजन मोरि ठिठाई । सुनिहहिं बालबचन मन लाई ॥
 जौ बालक कह तोतरि बाता । सुनहिं मुदित मन पितु अरु माता ॥
 हंसिहहिं कूर कुटिल कुबिचारी । जे पर दूषन भूषनधारी ॥
 निज कवित्त केहि लाग न नीका । सरस होउ अथवा अति फीका ॥
 जे पर भनिति सुनत हरप्राहीं । ते बर पुरुष बहुत जग नाहीं ॥
 जग बहु नर सर सरि सम भाई । जे निज बाढ़ि बढ़हिं जल पाई ॥
 सजन सकृत् सिंधु सम कोई । देखि पूर बिधु बाढ़इ जोई ॥
 दो०—भाग छोट अभिलाषु बड़ करउँ एक बिस्वास ।

पैहहिं सुख सुनि सुजन सब खल करिहहिं उपहास ॥ ८ ॥

खल परिहास होइ हित मोरा । काक केहहिं कलकंठ कठोरा ॥
 हंसहि बक दादुर चातकही । हंसहिं मलिन खल विमल बतकही ॥
 कवित रसिक न राम पद नेहू । तिन्ह कहँ सुखद ह्यस रस एहू ॥
 भाषा भनिति भोरि मति मोरी । हंसिबे जोग हँसैं नहिं खोरी ॥
 प्रभु पद प्रीति न सामुझि नीकी । तिन्हहि कथा सुनि लागिहि फीकी ॥
 हरि हर पद रति मति न कुतरकी । तिन्ह कहँ मधुर कथा रघुबर की ॥
 राम भगति भूषित जियँ जानी । सुनिहहिं सुजन सराहि सुबानी ॥
 कवि न होउँ नहिं बचन प्रवीनू । सकल कला सब विद्या हीनू ॥

भाव भेद रस भेद अपारा । कवित दोष गुन विविध प्रकारा ॥
कवित विवेक एक नहीं मोरें । सत्य कहउँ लिखि कागद कोरें ॥

दो०—भनिति मोरि सब गुन रहित बिस्व बिदित गुन एक ।

सो बिचारि सुनिहहिं सुमति जिन्ह कें बिमल बिबेक ॥१॥

एहि मँहँ रघुपति नाम उदारा । अति पावन पुरान श्रुतिसारा ॥

मंगल भवन अमंगल हारी । उमा सहित जेहि जपत पुरारी ॥

भनिति बिचित्र सुकवि कृत जोऊ । राम नाम बिनु सोह न सोऊ ॥

विधुबदनी सब भाँति सँवारी । सोह न बसन बिना बर नारी ॥

सब गुन रहित कुकवि कृत बानी । राम नाम जस अंकित जानी ॥

सादर कहहिं सुनिहिं बुध ताही । मधुकर सरिस संत गुनग्राही ॥

जदपि कवित रस एकउ नाहीं । राम प्रताप प्रगट एहि माहीं ॥

सोइ भरोस मोरें मन आवा । किहिं न सुसंग बड़प्पनु पावा ॥

धूमउ तजइ सहज कुरुआई । अगरु प्रसंग सुगंध बसाई ॥

भनिति भदेस बस्तु भलि बरनी । राम कथा जग मंगल करनी ॥

छं०—मंगल करनि कलि मल हरनि तुलसी कथा रघुनाथ की ।

गति कूर कबिता सरित की ज्यों सरित पावन पाथ की ॥

प्रभु सुजस संगति भनिति भलि होइहि सुजन मन भावनी ।

भव अंग भूति मसान की सुमिरत सुहावनि पावनी ॥

दो०—प्रिय लागिहि अति सबहि मम भनिति राम जस संग ।

द्वारु बिचारु कि कइ कोउ बंदिअ मलय प्रसंग ॥१०(क)॥

स्याम सुरभि पय बिसद अति गुनद करहिं सब पान ।

गिरा ग्राम्य सिय राम जस गावहिं सुनहिं सुजान ॥ १० (ख) ॥

मनि मानिक मुकुता छवि जैसी । अहि गिरि गज सिर सोह न तैसी
नृप किरीट तरुनी तनु पाई । लहहिं सकल सोभा अधिकारि ॥
तैसेहिं सुकवि कवित बुध कहहीं । उपजहिं अनत अनत छवि लहहीं
भगति हेतु विधि भवन बिहाई । सुमिरत सारद आवति धाई ॥
राम चरित सर बिनु अन्हवाएँ । सो श्रम जाइ न कोटि उपाएँ ॥
कवि कोबिद अस हृदयँ विचारी । गावहिं हरि जस कलि मल हारी
कीन्हें प्राकृत जन गुन गाना । सिर धुनि गिरा लगत पछिताना ॥
हृदय सिंधु मति सीप समाना । स्वाति सारदा कहहिं सुजाना ॥
जौ बरषइ बर बारि विचारूँ होहिं कवित मुकुतामनि चारू ॥

दो०—जुगुति बेधि पुनि पोहिअहिं राम चरित बर ताग ।

पहिरहिं सजन बिमल उर सोभा अति अनुराग ॥ ११ ॥

जे जनमे कलिकाल कराला । करतब बायस बेष मराला ॥
चलत कुपंथ वेद मग छाँड़े । कपट कलेवर कलि मल भाँड़े ॥
बंचक भगत कहाइ राम के । किंकर कंचन कोह काम के ॥
तिन्ह महुँ प्रथम रेख जग मोरी । धौंग धरमध्वज धंधक घोरी ॥
जौ अपने अवगुन सब कहऊँ । बाढ़इ कथा पार नहिं लहऊँ ॥
ताते मै अति अल्प बखाने । थोरे महुँ जानिहहिं सयाने ॥

व्यास आदि कवि पुंगव नाना । जिन्ह सादर हरि सुजस बखाना
 चरन कमल बंदउँ तिन्ह केरे । पुरषहुँ सकल मनोरथ मेरे ॥
 कलि के कविन्ह करउँ परनामा । जिन्ह बरने रघुपति गुन ग्रामा ॥
 जे प्राकृत कवि परम सयाने । भाषाँ जिन्ह हरि चरित बखाने ॥
 भए जे अहहिं जे होइहहिं आगें । प्रनवउँ सबहि कपट सब त्यागें ॥
 होहु प्रसन्न देहु बरदानू । साधु समाज भनिति सनमानू ॥
 जो प्रबंध बुध नहिं आदरहीं । सो श्रम बादि बाल कवि करहीं ॥
 कीरति भनिति भूति भलि सोई । सुरसरि सम सब कहँ हित होई ॥
 राम सुकीरति भनिति भदेसा । असमंजस अस मोहि अँदेसा ॥
 तुम्हरी कृपाँ सुलभ सोउ मोरे । सिअनि सुहावनि टाट पटोरे ॥

दो०—सरल कवित कीरति बिमल सोइ आदरहिं सुजान ।
 सहज बयर बिसराइ रिपु जो सुनि करहिं बखान ॥ १४ (क) ॥

सो न होइ बिनु बिमल मति मोहि मति बल अति थोर ।
 करहु कृपा हरि जस कहउँ पुनि पुनि करउँ निहोर ॥ १४ (ख) ॥

कवि कोविद रघुवर चरित मानस मंजु मराल ।
 बालबिनय सुनि सुरुचि लखि मो पर होहु कृपाल ॥ १४ (ग) ॥

सो०—बंदउँ मुनि पद कंजु रामायन जेहिं निरमयउ ।
 सखर सुकोमल मंजु दोष रहित दूषन सहित ॥ १४ (घ) ॥

बंदउँ चारिउ बेद भव बारिधि बोहित सरिस ।

जिन्हहि न सपनेहुँ खेद बरनत रघुवर बिसद नख ॥ १४ (ङ) ॥

बंदउँ विधि पद रेनु भव सागर जेहि कीन्ह जहँ ।

संत सुधा ससि धेनु प्रगटे खल विष बारुनी ॥१४(च)॥

दो०—बिबुध विप्र बुध ग्रह चरन बंदि कहउँ कर जोरि।

होइ प्रसन्न पुरवहु सकल मंजु मनोरथ मोरि ॥१४(छ)॥

पुनि बंदउँ सारद सुरसरिता । जुगल पुनीत मनोहर चरिता ॥

मज्जन पान पाप हर एका । कहत सुनत एक हर अविवेका ॥

गुर पितु मातु महेस भवानी । प्रनवउँ दीनबंधु दिन दानी ॥

सेवक स्वामि सखा सिय पी के । हित निरुपधि सब विधितुलसी के

कलि बिलोकि जग हित हर गिरिजा । सावर मंत्र जाल जिन्ह सिरिजा

अनमिल आखर अरथं न जापू । प्रगट प्रभाउ महेस प्रतापू ॥

सो उमेस मोहि पर अनुकूल । करिहि कथा मुद मंगल मूला ॥

सुमिरि सिवा सिव पाइ पसाऊ । बरनउँ राम चरित चित चाँऊ ॥

भनिति मोरि सिव कृपा विभाती । ससि समाज मिलि मनहुँ सुराती

जे एहि कथहि सनेह समेता । कहिहहि सुनिहहि समुझि सचेता

होइहहि राम चरन अनुरागी । कलि मल रहित सुमंगल भागी ॥

दो०—सपनेहुँ साचेहुँ मोहि पर जौं हर गँधैर पसाउ ।

तौ फुर होउ जो कहेउँ सब भाषा भनिति प्रभाउ ॥१५॥

बंदउँ अवध पुरी अति पावनि । सरजू सरि कलि कलुष नसावनि ॥

प्रनवउँ पुर नर नारि बहोरी । ममता जिन्ह पर प्रभुहि न थोरी ॥

बंदउँ कौसल्या दिसि प्राची । कीरति जासु सकल जग माची ॥
 प्रगटेउ जहँ रघुपतिससि चारू । बिस्व सुखद खल कमल तुसारू ॥
 दसरथ राउ सहित सब रानी । सुकृत सुमंगल मूरति मानी ॥
 करउँ प्रनाम करम मन बानी । करहु कृपा सुत सेवक जानी ॥
 जिन्हहि विरचि बड़ भयउ बिधाता । महिमा अवधि राम पितु माता
 सो०—बंदउँ अवध भुआल सत्य प्रेम जेहि राम पद ।

बिछुरत दीन दयाल प्रिय तनु तृन इव परिहरेउ ॥१६॥

प्रनवउँ परिजन सहित विदेहू । जाहि राम पद गूढ़ सनेहू ॥
 जोग भोग महँ राखेउ गोई । राम बिलोकत प्रगटेउ सोई ॥
 प्रनवउँ प्रथम भरत के चरना । जासु नेमं व्रत जाइ न बरना ॥
 राम चरन पंकज मन जासू । लुधुध मधुप इव तजइ न पासू ॥
 बंदउँ लल्लिमन पद जलजाता । सीतल सुभग भगत सुख दाता ॥
 रघुपतिकीरति बिमल पताका । दंड समानं भयउ जस जाका ॥
 सेष सहस्रसीस जग कारन । जो अवतरेउ भूमि भय टारन ॥
 सदा सो सानुकूल रह मो पर । कृपासिंधु सौमित्रि गुनाकर ॥
 रिपुसूदन पद कमल नमामी । सूर सुसील भरत अनुगामी ॥
 महावीर विनवउँ हनुमाना । राम जासु जस आप बखाना ॥
 सो०—प्रनवउँ पवनकुमार खल बन पावक ग्यानघन ।

जासु हृदय आगार बसहिं राम सर चाप धर ॥१७॥

बंदउँ सब के चरन सुहाए । अधम सरीर राम जिन्ह पाए ॥
 रघुपति चरन उपासक जेते । खग मृग सुर नर असुर समेते ॥
 बंदउँ पद सरोज सब केरे । जे विनु काम राम के चरे ॥
 सुव सनकादि भगत मुनि नारद । जे मुनिवर विग्यान बिसारद ॥
 प्रनवउँ सबहि धरनि धरि सीसा । करहु कृपा जन जानि मुनीसा ॥
 जन्कसुता जग जननि जानकी । अतिसय प्रिय करुनानिधान की
 ताके जुग पद कमल मनावउँ । जासु कृपाँ निरमल मति पावउँ
 पुनि मन बचन कर्म रघुनायक । चरन कमल बंदउँ सब लायक
 राजिवनयन धरें धनु सायक । भगत विपति भंजन सुख दायक
 दो०—गिरा अरथ जल बीचि सम कहि अत भिन्न न भिन्न ।

बंदउँ सीता राम पद जिन्हहि परम प्रिय खिन्न ॥१८॥
 बंदउँ नाम राम रघुवर को । हेतु कृसानु भानु हिमकर को ॥
 विधि हरि हरमय वेद-प्रान सो । अगुन अनूपम गुन निधान सो ॥
 महामंत्र जोइ जपते महेसू । कासीं मुकुति हेतु उपदेसू ॥
 महिमा जासु जान गनराऊ । प्रथम पूजिअत नाम प्रभाऊ ॥
 जान आदिकवि नाम प्रतापू । भयउ सुद्ध करि उलटा जापू ॥
 सहस नाम सम मुनि सिव बानी । जपि जेई पिय संग भवानी ॥
 हरषे हेतु हेरि हर ही को । किय भूषन तिय भूषन ती को ॥
 नाम प्रभाउ जान सिव नीको । कालकूट फलु दीन्ह अमी को ॥
 दो०—बरषा रितु रघुपति भगति तुलसी सालि सुदास ।

राम नाम बर बरन जुग सावन भादव मास ॥१९॥

आखर मधुर मनोहर दोऊ । बरन बिलोचन जन जिय जोउ ॥
 सुमिरत सुलभ सुखद सब काहू । लोक लाहु परलोक निवाहू ॥
 कहत सुनत सुमिरत सुठि नीके । राम लखन सम प्रिय तुलसीके ॥
 बरनत बरन प्रीति बिलगाती । ब्रह्म जीव सम सहज सँघात ॥
 नर नारायन सरिस सुभ्राता । जग पालक बिसेषि जन त्रात ॥
 भगति सुतिय कल करन बिभूषन । जग हित हेतु बिमल बिधु प्पन
 स्वाद तोष सम सुगति सुधा के । कमठ सेष सम धर बसुधा के ॥
 जन मन मंजु कंज मधुकर से । जीह जसोमति हरि हलधर से ॥

दो०—एकु छत्रु एकु मुकुटमनि सब बरननि पर जोउ ।

तुलसी रघुबर नाम के बरन विराजत दोउ ॥२०॥

समुझत सरिस नाम अरु नामी । प्रीति परसपर प्रभु अनुगामी ॥
 नाम रूप दुइ ईस उपाधी । अकथ अनादि सुसामुझि साधी ॥
 को बड़ छोट कहत अपराधू । सुनि गुन भेदु समुझिहिहिं साधू ॥
 देखिअहिं रूप नाम आधीना । रूप ग्यान नहिं नाम बिहीना ॥
 रूप बिसेष नाम बिनु जानें । करतलगत न परहिं पहिचानें ॥
 सुमिरिअ नाम रूप बिनु देखें । आवत हृदयँ सनेह बिसेषें ॥
 नाम रूप गति अकथ कहानी । समुझत सुखद न परति बखानी ॥
 अगुन सगुन बिच नाम सुसाखी । उभय प्रबोधक चतुर दुभाषी ॥

दो०—राम नाम मनिदीप धरु जीह देहरीं द्वार ।

तुलसी भीतर बाहेरहुँ जौ चाहसि उजिआर ॥२१॥

नाम जीहँ जपि जागहिं जोगी । बिरति बिरंचि प्रपंच बियोगी ॥
 ब्रह्मसुखहि अनुभवहिं अनूपा । अकथ अनामय नाम न रूपा ॥
 जाना चहहिं गूढ़ गति जेऊ । नाम जीहँ जपि जानहिं तेऊ ॥
 साधक नाम जपहिं लय लाँ । होहिं सिद्ध अनिमादिक पाँ ॥
 जपहिं नामु जन आरत भारी । मिटहिं कुसंकट होहिं सुखारी ॥
 राम भगत जग चारि प्रकारा । सुकृती चारिउ अनघ उदारा ॥
 चहू चतुर कहूँ नाम अधारा । ग्यानी प्रभुहि बिसेषि पिआरा ॥
 चहुँ जुग चहुँ श्रुति नाम प्रभाऊ । कलि बिसेषि नहिं आन उपाऊ ॥

दो०—सकल कामना हीन जे राम भगति रस लीन ।

नाम सुप्रेम पियूष हृद तिन्हहुँ किए मन मीन ॥२२॥

अगुन सगुन दुइ ब्रह्म सरूपा । अकथ अगाध अनादि अनूपा ॥
 मोरें मत बड़ नामु दुहू तें । किए जेहिं जुग निज बस निज बूतें
 प्रौढ़ि सुजन जनि जानहिं जन की । कहउँ प्रतीति प्रीति रुचि मन की
 एकु दारुगत देखिअ एकू । पावक सम जुग ब्रह्म बिबेकू ॥
 उभय अगम जुग सुगम नाम तें । कहेउँ नामु बड़ ब्रह्म राम तें ॥
 व्यापकु एकु ब्रह्म अबिनासी । सत चेतन घन आनँद रासी ॥
 अस प्रभु हृदयँ अछत अविकारी । सकल जीव जग दीन दुखारी ॥
 नाम निरूपन नाम जतन तें । सोउ प्रगटत जिमि मोल रतन तें

दो०—निरगुन तें एहि भाँति बड़ नाम प्रभाउ अपार ।

कहउँ नामु बड़ राम तें निज बिचार अनुसार ॥२३॥

राम भगत हित नर तनु धारी । सहि संकट किए साधु सुखारी ॥
 नामु सप्रेम जपत अनयासा । भगत होहिं मुद मंगल बासा ॥
 राम एक तापस तिय तारी । नाम कोटि खल कुमति सुधारी ॥
 रिषि हित राम सुकेतुसुता की । सहित सेन सुत कीन्हि विवाकी ॥
 सहित दोष दुख दास दुरासा । दलइ नामु जिमि रवि निसि नासा
 भंजेउ राम आपु भव चापू । भव भय भंजन नाम प्रतापू ॥
 दंडक बनुं प्रभु कीन्ह सुहावन । जन मन अमित नाम किए पावन
 निसिचर निकर दले रघुनंदन । नामु सकल कलि कलुष निकंदन
 दो०—सबरी गीध सुसेवकनि सुगति दीन्हि रघुनाथ ।

नाम उधारे अमित खल बेद बिदित गुन गाथ ॥२४॥
 राम सुकंठ बिभीषन दोऊ । राखे सरन जान सबु कोऊ ॥
 नाम गरीब अनेक नेवाजे । लोक बेद बर बिरिद बिराजे ॥
 राम भालु कपि कटकु बटोरा । सेतु हेतु श्रमु कीन्ह न थोरा ॥
 नामु लेत भवसिंधु सुखाहीं । करहु बिचारु सुजन मन माहीं ॥
 राम सकुल रन रावनु मारा । सीय सहित निज पुर पगु धारा ॥
 राजा रामु अवध रजधानी । गावत गुन सुर मुनि बर बानी ॥
 सेवक सुमिरत नामु सप्रीती । विनु श्रम प्रबल मोह दलु जीती ॥
 फिरत सनेहँ मगन सुख अपनै । नाम प्रसाद सोच नहिं सपनै ॥
 दो०—ब्रह्म राम तें नामु बड़ बर दायक बर दानि ।

रामचरित सत कोटि महँ लिय महेश जियँ जानि ॥२५॥

मासपारायण, पहला विश्राम

नाम प्रसाद संभु अविनासी । साजु अमंगल मंगल रासी ॥
 सुक सनकादि सिद्ध मुनि जोगी । नाम प्रसाद ब्रह्मसुख भोगी ॥
 नारद जानेउ नाम प्रतापू । जग प्रिय हरि हरि हर प्रिय आपू
 नामु जपत प्रभु कीन्ह प्रसादू । भगत सिरोमनि भे प्रह्लादू ॥
 ध्रुव सगलानि जपेउ हरि नाऊँ । पायउ अचल अनूपम ठाऊँ ॥
 सुमिरि पवनसुत पावन नामू । अपने बस करि राखे रामू ॥
 अपतु अजामिलु गजु गनिकाऊ । भए मुकुत हरि नाम प्रभाऊ ॥
 कहाँ कहाँ लगि नाम बड़ाई । रामु न सकहि नाम गुन गाई ॥

दो०—नामु राम को कलपतरु कलि कल्यान निवासु ।

जो सुमिरत भयो भाँग तें तुलसी तुलसीदासु ॥२६॥

चहुँ जुग तीनि काल तिहुँ लोका । भए नाम जपि जीव बिसोका ॥
 वेद पुरान संत मत एहू । सकल सुकृत फल राम सनेहू ॥
 ध्यानु प्रथम जुग मख बिधि दूजें । द्वापर परितोषत प्रभु पूजें ॥
 कलि केवल मल मूल मलीना । पाप पयोनिधि जन मन मीना ॥
 नाम कामतरु काल कराला । सुमिरत समन सकल जग जाला ॥
 राम नाम कलि अभिमत दाता । हित परलोक लोक पितु माता ॥
 नहिं कलि करम न भगति विवेकू । राम नाम अवलंबन एकू ॥
 कालनेमि कलि कपट निधानू । नाम सुमति समरथ हनुमानू ॥

दो०—राम नाम नरकेसरी कनककसिपु कलिकाल ।

भायँ कुभायँ अनख आलसहूँ । नाम जपत मंगल दिसि दसहूँ ॥
 सुमिरि सो नाम राम गुन गाथा । करउँ नाइ रघुनाथहि माथा ॥
 मोरि सुधारिहि सो सब भाँती । जासु कृपा नहिं कृपाँ अघाती ॥
 राम सुखामि कुसेवकु मोसो । निज दिसि देखि दयानिधि पोसो
 लोकहुँ बेद सुसाहिब रीती । विनय सुनत पहिचानत प्रीती ॥
 गनी गरीब ग्रामनर नागर । पंडित मूढ़ मलीन उजागर ॥
 सुकवि कुकवि निज मति अनुहारी । नृपहि सराहत सब नर नारी ॥
 साधु सुजान सुसील नृपाला । ईस अंस भव परम कृपाला ॥
 सुनि सनमानहिं सबहि सुबानी । भनिति भगति नति गति पहिचानी
 यह प्राकृत महिपाल सुभाऊ । जान सिरोमनि कोसलराऊ ॥
 रीझत राम सनेह निसोतेँ । को जग मंद मलिनमति मोतेँ ॥

दो०—सठ सेवक की प्रीति रुचि रखि रहिं राम कृपालु ।
 उपल किए जलजान जेहिं सचिव सुमति कपि भालु ॥२८(क)॥
 हौंहु कहावत सबु कहत राम सहत उपहास ।
 साहिब सीतानाथ सो सेवक तुलसीदास ॥२८(ख)॥

अति बड़ि मोरि ढिठाई खोरी । सुनि अघ नरकहुँ नाक सकोरी ॥
 समुझि सहम मोहि अपडर अपनें । सो सुधि राम कीन्हि नहिं सपनें
 सुनि अवलोकि सुचित चख चाही । भगति मोरि मति स्वामि सराही
 कहत नसाइ होइ हियँ नीकी । रीझत राम जानि जन जी की ॥

जेहिं अघ बधेउ व्याध जिमि बाली। फिरि सुकंठ सोइ कीन्हि कुचाली
 सोइ करतूति बिभीषन केरी। सपनेहुँ सो न राम हियँ हेरी ॥
 ते भरतहि भेंटत सनमाने। राजसभाँ रघुवीर बखाने ॥
 दो०—प्रभु तरु तर कपि डार पर ते किए आपु समान ।
 तुलसी कहूँ न राम से साहिब सीलनिधान ॥२९(क)॥
 राम निकाई रावरी है सबही को नीक ।
 जों यह साँची है सदा तौ नीको तुलसीक ॥२९(ख)॥
 एहि बिधि निज गुन दोष कहि सबहि बहुरि सिरु नाइ ।
 बरनउँ रघुवर बिसद जसु सुनि कलि कलुष नसाइ ॥२९(ग)॥
 जागबलिक जो कथा सुहाई। भरद्वाज मुनिबरहि सुनाई ॥
 कहिहउँ सोइ संवाद बखानी। सुनहुँ सकल सजन सुखु मानी ॥
 संभु कीन्ह यह चरित सुहावा। बहुरि कृपा करि उमहि सुनावा ॥
 सोइ सिव कागभुसुंडिहि दीन्हा। राम भगत अधिकारी चीन्हा ॥
 तेहि सन जागबलिक पुनि पावा। तिन्ह पुनि भरद्वाज प्रति गावा ॥
 ते श्रोता बकता समसीला। सवँदरसी जानहिं हरिलीला ॥
 जानहिं तीनि काल निज ग्याना। करतल गत आमलक समाना ॥
 औरउ जे हरिभगत सुजाना। कहहिं सुनहिं समुझहिं बिधि नाना
 दो०—मैं पुनि निज गुर सन सुनी कथा सो सूकर खेत ।
 समुझी नहिं तसि बालपन तब अति रहेउँ अचेत ॥३०(क)॥
 श्रोता बकता ग्याननिधि कथा राम कै गूढ़ ।
 किमि समुझौ मैं जीवक बलि मल युसित विमल ॥३०(ख)॥

* रामचरितमानस *

तदपि कही गुर बारहिं बारा । समुझि परी कछु मति अनुसार ॥
 भाषाबद्ध करवि मैं सोई । मोरें मन प्रबोध जेहिं होई ॥
 जस कछु बुधि विवेक बल मेरें । तस कहिहउं हियँ हरि के प्रेरें ॥
 निज संदेह मोह भ्रम हरनी । करउँ कथा भव सरिता तरनी ॥
 बुध विश्राम सकल जन रंजनि । रामकथा कलि कलुष विभंजनि ॥
 रामकथा कलि पंनग भरनी । पुनि विवेक पावक कहूँ अरनी ॥
 रामकथा कलि कामद गाई । सुजन सजीवनि मूरि सुहाई ॥
 सोइ बसुधातल सुधा तरंगिनि । भय भंजनि भ्रम भेक भुअंगिनि
 असुर सेन सम नरक निकंदिनि । साधु विबुध कुल हित गिरिनंदिनि
 संत समाज पयोधि रमा सी । बिस्व भार भर अचल छमा सी ॥
 जम गन मुहँ मसि जग जमुना सी । जीवन मुकुति हेतु जनु कासी ॥
 रामहि प्रिय पावनि तुलसी सी । तुलसिदास हित हियँ हुलसी सी ॥
 सिवप्रिय मेकल सैल सुता सी । सकल सिद्धि सुख संपति रासी ॥
 सदगुन सुरगन अंब अदिति सी । रघुवर भगति प्रेम परमिति सी ॥

दो०—राम कथा मंदाकिनी चित्रकूट चित चारु ।

तुलसी सुभग सनेह बन सिय रघुबीर बिहारु ॥३१॥

रामचरित चिंतामनि चारु । संत सुमति तिय सुभग सिंगारु ॥
 जग मंगल गुनग्राम राम के । दानि मुकुति धन धरम धाम के ॥
 सदगुर ग्यान विराग जोग के । विबुध वैद भव भीम रोग के ॥

समन पाप संताप सोक के । प्रिय पालक परलोक लोक के ॥
 सचिव सुभट भूपति बिचार के । कुंभज लोभ उदधि अपार के ॥
 काम कोह कलिमल करिगन के । केहरि सावक जन मन बन के ॥
 अतिथि पूज्य प्रियतम पुरारि के । कामद धन दारिद दवारि के ॥
 मंत्र महामनि विषय ब्याल के । मेढत कठिन कुअंक भाल के ॥
 हरन मोह तम दिनकर कर से । सेवक सालि पाल जलधर से ॥
 अभिमत दानि देवतरु वर से । सेवत सुलभ सुखद हरि हर से ॥
 सुकवि सरद नभ मन उडगन से । रामभगत जन जीवन धन से ॥
 सकल सुकृत फल भूरि भोग से । जग हित निरुपधि साधु लोग से ॥
 सेवक मन मानस मराल से । पावन गंग तरंग माल से ॥

दो०—कुपथ कुतरक कुचालि कलि कपट दंभ पाषंड ।

दहन राम गुन ग्राम जिमि इंधन अनल प्रचंड ॥ ३२ (क) ॥

रामचरित राकेस कर सरिस सुखद सब काहु ।

सज्जन कुमुद चकोर चित हित बिसेषि बड़ लाहु ॥ ३२ (ख) ॥

कीन्हि प्रसन्न जेहि भाँति भवानी । जेहि बिधि संकर कहा बखानी ॥
 सो सब हेतु कहब मैं गाई । कथाप्रबंध बिचित्र बनाई ॥
 जेहिं यह कथा सुनी नहिं होई । जनि आचरजु करै सुनि सोई ॥
 कथा अलौकिक सुनहिं जे ग्यानी । नहिं आचरजु करहिं अस जानी ॥
 रामकथा कै मिति जग नाहीं । असि प्रतीति तिन्ह के मन माहीं ॥

कलपभेद हरिचरित सुहाए। भाँति अनेक मुनीसन्ह गाए ॥
 करिअ न संसय अस उर आनी। सुनिअ कथा सादर रति मानी ॥
 दो०—राम अनंत अनंत गुन अभित कथा बिस्तार।

सुनि आचरजु न मानिहहिं जिन्ह कैंबिमल बिचार ॥३३॥

एहि बिधि सब संसय करि दूरी। सिर धरि गुर पद पंकज धूरी ॥
 पुनि सबही बिनवउँ कर जोरी। करत कथा जेहिं लाग न खोरी ॥
 सादर सिवहि नाइ अब माथा। बरनउँ विसद राम गुन गाथा ॥
 संबत सोरह सै एकतीसा। करउँ कथा हरिपद धरि सीसा ॥
 नौमी भौम बार मधु मासा। अवधपुरीं यह चरित प्रकासा ॥
 जेहि दिन राम जनम श्रुति गावहिं। तीरथ सकल तहाँ चलि आवहिं ॥
 असुर नाग खग नर मुनि देवा। आइ करहिं रघुनायक सेवा ॥
 जन्म महोत्सव रचहिं सुजाना। करहिं राम कल कीरति गाना ॥
 दो०—मज्जहिं सज्जन बृंद बहु पावन सरजू नीर।

जपहिं राम धरि ध्यान उर सुंदर स्याम सरीर ॥३४॥

दरस परस मज्जन अरु पाना। हरइ पाप कह बेद पुराना ॥
 नदी पुनीत अभित महिमा अति। कहि न सकइ सारदा विमलमति ॥
 राम धामदा पुरी सुहावनि। लोक समस्त बिदित अति पावनि ॥
 चारि खानि जग जीव अपारा। अवध तजैं तनु नहिं संसारा ॥
 सब बिधि पुरी मनोहर जानी। सकल सिद्धिप्रद मंगल खानी ॥
 विमल कथा कर कीन्ह अरंभा। सुनत नसाहिं काम मद दंभा ॥

रामचरितमानस एहि नामा । सुनत श्रवन पाइअ विश्रामा ॥
 मन करि विषय अनल बन जरई । होइ सुखी जौं एहिं सर परई ॥
 रामचरितमानस सुनि भावन । बिरचेउ संभु सुहावन पावन ॥
 त्रिविध दोष दुख दारिद दावन । कलि कुचालि कुलि कलष नसावन
 रचि महेस निज मानस राखा । पाइ सुसमउ सिवा सन भाषा ॥
 तातें रामचरितमानस बर । धरेउ नाम हियँ हेरि हरषि हर ॥
 कहउँ कथा सोइ सुखद सुहाई । सादर सुनहु सुजन मन लाई ॥
 दो०—जस मानस जेहि विधि भयउ जग प्रचार जेहि हेतु ।

अब सोइ कहउँ प्रसंग सब सुमिरि उमा वृषकेतु ॥३५॥

संभु प्रसाद सुमति हियँ हुलसी । रामचरितमानस कबि तुलसी ॥
 करइ मनोहर मति अनुहारी । सुजन सुचित सुनि लेहु सुधारी ॥
 सुमति भूमि थल हृदय अगाधू । वेद पुरान उदधि घन साधू ॥
 बरषहिं राम सुजस बर बारी । मधुर मनोहर मंगलकारी ॥
 लीला सगुन जो कहहिं बखानी । सोइ स्वच्छता करइ मल हानी ॥
 प्रेम भगति जो बरनि न जाई । सोइ मधुरता सुसीतलताई ॥
 सो जल सुकृत सालि हित होई । राम भगत जन जीवन सोई ॥
 मेघा महि गत सो जल पावन । सकलि श्रवन मग चलेउ सुहावन
 भरेउ सुमानस सुथल थिराना । सुखद सीत रुचि चारु चिराना ॥

दो०—सुठि सुंदर संबाद बर बिरचे बुद्धि बिचारि ।

तेइ एहि पावन सुभग सर घाट मनोहर चारि ॥३६॥

सत प्रबंध सुभग सोपाना । ग्यान नयन निरखत मन माना ॥
 रघुपति महिमा अगुन अवाधा । वरनव सोइ वर वारि अगाधा ॥
 राम सीय जस सलिल सुधासम । उपमा वीचि बिलास मनोरम ॥
 पुरइनि सघन चारु चौपाई । जुगुति मंजु मनि सीप सुहाई ॥
 छंद सोरठा सुंदर दोहा । सोइ बहुरंग कमल कुल सोहा ॥
 अरथ अनूप सुभाव सुभासा । सोइ पराग मकरंद सुवासा ॥
 सुकृत पुंज मंजुल अलि माला । ग्यान बिराग बिचार मराला ॥
 धुनि अवरेब कवित गुन जाती । मीन मनोहर ते बहुभाँती ॥
 अरथ धरम कामादिक चारी । कहव ग्यान बिग्यान बिचारी ॥
 नव रस जप तप जोग विरागा । ते सब जलचर चारु तड़ागा ॥
 सुकृती साधु नाम गुन गाना । ते बिचित्र जलबिहग समाना ॥
 संतसभा चहुँ दिसि अँवँराई । श्रद्धा रितु बसंत सम गाई ॥
 भ्रगति निरूपन बिबिध बिधाना । छमा दया दम लता बिताना ॥
 सम जम नियम फूल फल ग्याना । हरि पद रति रस बेद बखाना ॥
 औरउ कथा अनेक प्रसंगा । तेइ सुक पिक बहुवरन बिहंगा ॥

दो०—पुलक बाटिका बाग बन सुख सुबिहंग बिहार ।

माली सुमन सनेह जल सींचत लोचन चारु ॥३७॥

जे गावहिं यह चरित सँभारे । तेइ एहि ताल चतुर रखवारे ॥
 सदा सुनहिं सादर नर नारी । तेइ सुरवर मानस अधिकारी ॥

अति खल जे बिषई बग कागा । एहि सर निकट न जाहिं अभागा ॥

Vinay Avasthi Sahib Bhuvan Vani Trust Donations

संबुक्त भेक सेवार समाना । इहा न विषय कथा रसनाना ॥
तेहि कारन आवत हियँ हारे । कामी काक बलाक बिचारे ॥
आवत एहिँ सर अति कठिनाई । राम कृपा बिनु आइ न जाई ॥
कठिन कुसंग कुपंथ कराला । तिन्ह के बचन बाध हरि ब्याला ॥
गृह कारज नाना जंजाला । ते अति दुर्गम सैल विसाला ॥
बन बहु विषम मोह मद माना । नदीँ कुतर्क भयंकर नाना ॥

दो०—जे श्रद्धा संबल रहित नहिँ संतन्ह कर साथ ।

तिन्ह कहँ मानस अगम अति जिन्हहि न प्रिय रघुनाथ ॥३८॥

जौँ करि कष्ट जाइ पुनि कोई । जातहिँ नीद जुड़ाई होई ॥
जड़ता जाड़ विषम उर लागा । गएहुँ न मज्जन पाव अभागा ॥
करि न जाइ सर मज्जन पाना । फिरि आवइ समेत अभिमाना ॥
जौँ बहोरि कोउ पूछन आवा । सर निंदा करि ताहि बुझावा ॥
सकल बिघ्न व्यापहिँ नहिँ तेही । राम सुकृपाँ बिलोकहिँ जेही ॥
सोइ सादर सर मज्जनु करई । महा घोर त्रयताप न जरई ॥
ते नर यह सर तजहिँ न काऊ । जिन्ह केँ राम चरन भल भाऊ ॥
जो नहाइ चह एहिँ सर भाई । सो सतसंग करउ मन लाई ॥
अस मानस मानस चख चाही । भइ कबि बुद्धि विमल अवगाही ॥
भयउ हृदयँ आनंद उछाहू । उमगेउ प्रेम प्रमोद प्रवाहू ॥
चली सुभग कविता सरिता सो । राम विमल जस जल भरिता सो ॥
सरजू नाम सुमंगल मूला । लोक बेद मत मंजुल कूला ॥

नदी पुनीत सुमानस नदीनि । कलमल तून तरु मूल निकदिनि ॥

दो०—श्रोता त्रिविध समाज पुर ग्राम नगर दुहुँ कूल ।

संतसभा अनुपम अवध सकल सुमंगल मूल ॥३९॥

रामभगति सुरसरितहि जाई । मिली सुकीरति सरजु सुहाई ॥

सानुज राम समर जसु पावन । मिलेउ महानदु सोन सुहावन ॥

जुग बिच भगति देवधुनि धारा । सोहति सहित सुबिरति विचारा ॥

त्रिविध ताप त्रासक तिमुहानी । राम सरूप सिंधु समुहानी ॥

मानस मूल मिली सुरसरिही । सुनत सुजन मन पावन करिही ॥

बिच बिच कथा बिचित्र बिभागा । जनु सरि तीर तीर बन बागा ॥

उमा महेस बिबाह बराती । ते जलचर अगनित बहुभाँती ॥

रघुबर जनम अनंद बधाई । भवँर तरंग मनोहरताई ॥

दो०—बालचरित चहु बंधु के बनज बिपुल बहुरंग ।

नृप रानी परिजन सुकृत मधुकैर बारिबिहंग ॥४०॥

सीय स्वयंवर कथा सुहाई । सरित सुहावनि सो छवि छाई ॥

नदी नाव पट्ट प्रसन्न अनेका । केवट कुसल उतर सबिवेका ॥

सुनि अनुकथन परस्पर होई । पथिक समाज सोह सरि सोई ॥

घोर धार भृगुनाथ रिसानी । घाट सुबद्ध राम बर बानी ॥

सानुज राम बिबाह उछाहू । सो सुभ उमग सुखद सब काहू ॥

कहत सुनत हरषहिँ पुलकाहीं । ते सुकृती मन मुदित नहाहीं ॥

राम तिलक हित मंगल साजा । परब जोग जनु जुरे समाजा ॥

काई कुमति केकई केरी। परी जासु फल बिपति घनेरी ॥

दो०—समन अमित उतपात सब भरतचरित जपजाग ।

कलि अघ खल अवगुन कथन ते जलमल बग काग ॥४१॥

कीरति सरित छहूँ रितु रूरी। समय सुहावनि पावनि भूरी ॥

हिम हिमसैलसुता सिव व्याहू। सिसिर सुखद प्रभु जनम उछाहू

बरनव राम बिबाह समाजू। सो मुद मंगलमय रितुराजू ॥

ग्रीष्म दुसह राम बनगवनू। पंथकथा खर आतप पवनू ॥

बरषा घोर निसाचर रारी। सुरकुल सालि सुमंगलकारी ॥

राम राज सुख विनय बड़ाई। विसद सुखद सोइ सरद सुहाई ॥

सती सिरोमनि सिय गुनगाथा। सोइ गुन अमल अनूपम पाथा ॥

भरत सुभाउ सुसीतलताई। सदा एकरस बरनि न जाई ॥

दो०—अवलोकनि बोलनि मिलनि प्रीति परसपर हास ।

भायप भलि चहुं बंधु की जल माधुरी सुबास ॥४२॥

आरति विनय दीनता मोरी। लघुता ललित सुवारि न थोरी ॥

अदभुत सलिल सुनत गुनकारी। आस पिआस मनोमल हारी ॥

राम सुप्रेमहि पोषत पानी। हरत सकल कलि कलुष गलानी ॥

भव श्रम सोषक तोषक तोषा। समन दुरित दुख दारिद दोषा ॥

काम कोह मद मोह नसावन। विमलबिबेक बिराग बढ़ावन ॥

सादर मज्जन पान किए तैं। मिटहिं पाप परिताप हिए तैं ॥

जिन्ह एहिं बारि न मानस धोए। ते कायर कलिकाल विगोए ॥

Vinay Avasthi Sahib Bhuvan Vani Trust Donations
 तृषित निराख रवि कर भव वारी । फारहहि मृग जिमि जीव दुखारी
 दो०—मति अनुहारि सुबारि गुन गन गनि मन अन्हवाइ ।

सुमिरि भवानी संकरहि कह कवि कथा सुहाइ ॥४३(क)॥

अब रघुपति पद पंकरुह हियँ धरि पाइ प्रसाद ।

कहउँ जुगल मुनिबर्य कर मिलन सुभग संवाद ॥४३(ख)॥

भरद्वाज मुनि बसहिं प्रयागा । तिन्हहि राम पद अति अनुरागा
 तापस सम दम दया निधाना । परमारथ पथ परम सुजाना ॥
 माघ मकरगत रवि जव होई । तीरथपतिहिं आव सब कोई ॥
 देव दनुज किंनर नर श्रेणी । सादर मज्जहिं सकल त्रिवेणी ॥
 पूजहिं माधव पद जलजाता । परसि अखय बटु हरषहिं गाता ॥
 भरद्वाज आश्रम अति पावन । परम रम्य मुनिवर मन भावन ॥
 तहाँ होइ मुनि रिषय समाजा । जाहिं जे मज्जन तीरथराजा ॥
 मज्जहिं प्रात समेत उछाहा । कहहिं परसपर हरि गुन गाहा ॥
 दो०—ब्रह्म निरूपन धरम बिधि बरनहिं तत्त्व विभाग ।

कहहिं भगति भगवंत कै संजुत ग्यान बिराग ॥४४॥

एहि प्रकार भरि माघ नहार्हीं । पुनि सब निज निज आश्रम जाहीं
 प्रति संवत अति होइ अनंदा । मकर मज्जि गवनहिं मुनिबृंदा ॥
 एक बार भरि मकर नहाए । सब मुनीस आश्रमन्ह सिधाए ॥
 जागबलिक मुनि परम बिवेकी । भरद्वाज राखे पद टेकी ॥
 सादर चरन सरोज पखारे । अति पुनीत आसन बैठारे ॥

लीन्ह नीच मारीचहि संगी । भयउ तुरत सोइ कपट कुरंगा ॥
 करि छल मूढ़ हरी बैदेही । प्रभु प्रभाउ तस बिदित न तेही ॥
 मृग बधि बंधु सहित हरि आए । आश्रमु देखि नयन जल छाए ॥
 विरह विकल नर इव रघुराई । खोजत बिपिन फिरत दोउ भाई ॥
 कवहुँ जोग वियोग न जाकैं । देखा प्रगट विरह दुखु ताकैं ॥

दो०—अति बिचित्र रघुपति चरित जानहि परम सुजान ।

जे मतिमंद बिमोह बस हृदय धरहि कछु आन ॥४९॥

संभु समय तेहि रामहि देखा । उपजा हियँ अति हरषु बिसेषा ॥
 भरि लोचन छबिसिंधु निहारी । कुसमय जानि न कीन्ह चिन्हारी ॥
 जय सच्चिदानंद जग पावन । अस कहि चलेउ मनोज नसावन ॥
 चले जात तिव सती समेता । पुनि पुनि पुलकत कृपानिकेता ॥
 सती सो दसा संभु कै देखी । उर उपजा संदेहु बिसेषी ॥
 संकरु जगतबंद्य जगदीसा । सुर नर मुनि सब नावत सीसा ॥
 तिन्ह नृपसुतहि कीन्ह परनामा । कहि सच्चिदानंद परधामा ॥
 भए मगन छवि तासु बिलोकी । अजहुँ प्रीति उर रहति न रोकी ॥
 दो०—ब्रह्म जो व्यापक बिरज अज अकल अनीह अभेद ।

सो कि देह धरि होइ नर जाहि न जानत बेद ॥ ५० ॥

बिष्णु जो सुर हित नरतनु धारी । सोउ सर्वग्य जया त्रिपुरारी ॥
 खोजइ सो कि अग्य इव नारी । ग्यानधाम श्रीपति असुरारी ॥
 संभुगिरा पुनि मृग न होई । सिव सर्वग्य जान सबु कोई ॥

अस संसय मन भयउ अपारा । होइ न हृदयँ प्रबोध प्रचारा ॥
 जद्यपि प्रगट न कहेउ भवानी । हर अंतरजामी सब जानी ॥
 सुनहि सती तव नारि सुभाऊ । संसय अस न धरिअ उर काऊ ॥
 जासु कथा कुंभज रिषि गाई । भगति जासु मैं मुनिहि सुनाई ॥
 सोइ मम इष्टदेव रघुवीरा । सेवत जाहि सदा मुनि धीरा ॥
 छं०—मुनि धीर जोगी सिद्ध संतत बिमल मन जेहि ध्यावहीं ।
 कहि नेति निगम पुरान आगम जासु कीरति गावहीं ॥
 सोइ रामु व्यापक ब्रह्म भुवन निकाय पति माया धनी ।
 अवतरेउ अपने भगत हित निजतंत्र नित रघुकुलमनी ॥
 सो०—लाग न उर उपदेसु जदपि कहेउ सिवँ बार बहु ।
 बोले बिहसि महेसु हरिमाया बलु जनि जियँ ॥५१॥
 जौं तुम्हरे मन अति संदेहू । तौ किन जाइ परीछा लेहू ॥
 तब लगि बैठ अहउँ बटछाहीं । जब लगि तुम्ह ऐहहु मोहि पाहीं ॥
 जैसैं जाइ मोह भ्रम भारी । करेहु सो जतनु बिवेक बिचारी ॥
 चलीं सती सिव आयसु पाई । करहिं बिचारु करौं का भाई ॥
 इहाँ संभु अस मन अनुमाना । दच्छसुता कहूँ नहिं कल्याना ॥
 मोरेहु कहें न संसय जाहीं । बिधि बिपरीत भलाई नाहीं ॥
 होइहि सोइ जो रामरचि राखा । को करि तर्क बढ़ावै साखा ॥
 अस कहि लगे जपन हरिनामा । गई सती जहँ प्रभु सुखधामा ॥
 दो०—पुनि पुनि हृदयँ बिचारु करि धरि सीता कर रूप ।

आगें होइ चलि पंथ तेहिं जेहि आवत नर भूप ॥५२॥

देखे जहँ तहँ रघुपति जेते । सक्तिन्ह सहित सकल सुर तेते ॥
 जीव चराचर जो संसारा । देखे सकल अनेक प्रकारा ॥
 पूजहिं प्रभुहि देव बहु बेषा । राम रूप दूसर नहिं देखा ॥
 अवलोके रघुपति बहुतेरे । सीता सहित न बेष घनेरे ॥
 सोइ रघुवर सोइ लछिमनु सीता । देखि सती अति भई सभीता ॥
 हृदय कंप तन सुधि कछु नाहीं । नयन मूदि बैठीं मग माहीं ॥
 बहुरि बिलोकेउ नयन उधारी । कछु न दीख तहँ दच्छ कुमारी ॥
 पुनि पुनि नाइ राम पद सीसा । चलीं तहाँ जहँ रहे गिरीसा ॥
 दो०—गई समीप महेस तब हँसि पूछी कुसलात ।

लीन्हि परीछा कवन बिधि कहहु सत्य सब बात ॥५५॥

मासपारायण, दूसरा विश्राम

सतीं समुझि रघुवीर प्रभाऊ । भयवसू सिव सन कीन्ह दुराऊ ॥
 कछु न परीछा लीन्हि गोसाईं । कीन्ह प्रनामु तुम्हारिहि नाई ॥
 जो तुम्ह कहा सो मृषा न होई । मोरें मन प्रतीति अति सोई ॥
 तब संकर देखेउ धरि ध्याना । सतीं जो कीन्ह चरित सबु जाना ॥
 बहुरि राममायहि सिरु नावा । प्रेरि सतिहि जेहिं झूठ कहावा ॥
 हरि इच्छा भावी बलवाना । हृदयँ विचारत संभु सुजाना ॥
 सती कीन्ह सीता कर बेषा । सिव उर भयउ त्रिपाद विसेषा ॥
 जौ अब करउँ सती सन प्रीती । मिटइ भगति पथु होइ अनीती ॥
 दो०—परम पुनीत न जाइ तजि किएँ प्रेम बड़ पापु ।

तब संकर प्रभु पद सिरु नावा । सुमिरत रामु हृदयँ अस आवा ॥
 एहिं तन सतिहि भेट मोहि नाहीं । सिव संकल्पु कीन्ह मन माहीं ॥
 अस विचारि संकरु मतिधीरा । चले भवन सुमिरत रघुवीरा ॥
 चलत गगन भै गिरा सुहाई । जय महेस भलि भगति दृढ़ाई ॥
 अस पन तुम्ह विनु करइ को आना । राम भगत समरथ भगवाना ॥
 सुनि नभ गिरा सती उर सोचा । पूछा सिवहि समेत सकोचा ॥
 कीन्ह कवन पन कहहु कृपाला । सत्यधाम प्रभु दीनदयाला ॥
 जदपि सतीं पूछा बहु भाँती । तदपिन कहेउ त्रिपुर आराती ॥
 दो०—सतीं हृदयँ अनुमान किय सबु जानेउ सर्वग्य ।

कीन्ह कपटु मै संभु सन नारि सहज जड़ अग्य ॥५७(क)॥

सो०—जलु पय सरिस बिकाइ देखहु प्रीति की रीति भलि ।

बिलग होइ रसु जाइ कपट खटाई परत पुनि ॥५७(ख)॥

हृदयँ सोचु समुझत निज करनी । चिंता अमित जाइ नहिं बरनी ॥
 कृपासिंधु सिव परम अगाधा । प्रगट न कहेउ मोर अपराधा ॥
 संकर रुख अवलोकि भवानी । प्रभु मोहि तजेउ हृदयँ अकुलानी
 निज अघ समुझि न कछु कहि जाई । तपइ अवाँ इव उर अधिकाई
 सतिहि ससोच जानि बृषकेतू । कहीं कथा सुंदर सुख हेतू ॥
 बरनत पंथ त्रिविध इतिहासा । विस्वनाथ पहुँचे कैलासा ॥
 तहँ पुनि संभु समुझि पन आपन । बैठे बट तर करि कमलासन ॥

संकर सहज सरुई सद्गारा । लागि समाधि अखंड अपारा ॥

दो०—सती बसहिं कैलास तब अधिक सोचु मन माहि ।

मरमु न कोऊ जान कछु जुग सम दिवस सिराहि ॥५८॥

नित नव सोचु सती उर भारा । कब जैहउँ दुख सागर पारा ॥
मैं जो कीन्ह रघुपति अपमाना । पुनि पतिबचनु मृषा करि जाना
सो फलु मोहि बिधाताँ दीन्हा । जो कछु उचित रहा सोइ कीन्हा ॥
अब बिधि अस बूझिअ नहिं तोही । संकर बिमुख जिआवसि मोही
कहि न जाइ कछु हृदय गलानी । मन महुँ रामहि सुमिर सयानी ॥
जौं प्रभु दीनदयालु कहावा । आरति हरन बेद जसु गावा ॥
तौ मैं बिनय करउँ कर जोरी । छूटउ बेगि देह यह मोरी ॥
जौं मोरें सिव चरन सनेहू । मन क्रम बचन सत्य व्रतु एहू ॥

दो०—तौ सबदरसी सुनिअ प्रभु करउ सो बेगि उपाइ ।

होइ मरनु जेहिं बिनहिं श्रम दुसह बिपत्ति बिहाइ ॥५९॥

एहि बिधि दुखित प्रजेसकुमारी । अकथनीय दारुन दुखु भारी ॥
बीतैं संबत सहस सतासी । तजी समाधि संभु अबिनासी ॥
राम नाम सिव सुमिरन लागे । जानेउ सतीं जगतपति जागे ॥
जाइ संभु पद बंदनु कीन्हा । सनमुख संकर आसनु दीन्हा ॥
लगे कहन हरिकथा रसाला । दच्छ प्रजेस भए तेहि काला ॥
देखाबिधि बिचारि सब लायक । दच्छहि कीन्ह प्रजापति नायक ॥
बड़ अधिकार दच्छ जब पावा । अति अभिमानु हृदयँ तब आवा

दो०—दच्छ लिए मुनि बोलि सब करन लगे बड़ जाग ।

नेवते सादर सकल सुर जे पावत मख भाग ॥६०॥

किंनर नाग सिद्ध गंधर्वा । बधुन्ह समेत चले सुर सर्वा ॥
 विष्णु विरंचि महेसु विहाई । चले सकल सुर जान बनाई ॥
 सतीं बिलोके व्योम विमाना । जात चले सुंदर बिधि नाना ॥
 सुर सुंदरी करहिं कल गाना । सुनत श्रवन छूटहिं मुनि ध्याना ॥
 पूछेउ तब सिवैं कहेउ बखानी । पिता जग्य मुनि कछु हरषानी ॥
 जौं महेसु मोहि आयसु देहीं । कछु दिन जाइ रहौं मिस एहीं ॥
 पति परित्याग हृदयँ दुखु भारी । कहइ न निज अपराध विचारी ॥
 बोली सती मनोहर बानी । भय संकोच प्रेम रस सानी ॥

दो०—पिता भवन उत्सव परम जौं प्रभु आयसु होइ ।

तौ मैं जाउँ कृपायतन सादर देखन सोइ ॥६१॥

कहेहु नीक मोरेहुँ मनं भावा । यह अनुचित नहिं नेवत पठावा ॥
 दच्छ सकल निज सुता बोलाई । हमरें बयर तुम्हउ विसराई ॥
 ब्रह्मसभाँ हम सन दुखु माना । तेहिं तैं अजहुँ करहिं अपमाना ॥
 जौं बिनु बोले जाहु भवानी । रहइ न सीलु सनेहु न कानी ॥
 जदपि मित्र प्रभु पितु गुर गेहा । जाइअ बिनु बोलेहुँ न सँदेहा ॥
 तदपि बिरोध मान जहँ कोई । तहाँ गएँ कल्याण न होई ॥
 भाँति अनेक संभु समुझावा । भावी बस न ग्यानु उर आवा ॥
 कह प्रभु जाहु जो बिनहिं बोलाएँ । नहिं भलि बात हमारे भाएँ ॥

दो०—कहि देखा हर जतन बहु रहइ न दच्छकुमारि ।

दिए मुख्य गन संग तब बिदा कीन्ह त्रिपुरारि ॥६२॥

पिता भवन जब गई भवानी । दच्छ त्रास काहुँ न सनमानी ॥
सादर भलेहि मिली एक माता । भगिनीं मिलीं बहुत मुसुकाता ॥
दच्छ न कछु पूछी कुसलाता । सतिहि बिलोकि जरे सब गाता ॥
सतीं जाइ देखेउ तब जागा । कतहुँ न दीख संभु कर भागा ॥
तब चित चढ़ेउ जो संकर कहेऊ । प्रभु अपमानु समुझि उर दहेऊ
पाछिल दुखु न हृदयँ अस व्यापा । जस यह भयउ महा परितापा ॥
जद्यपि जग दारुन दुख नाना । सब तैं कठिन जाति अवमाना ॥
समुझि सो सतिहि भयउ अतिक्रोधा । बहु विधि जननीं कीन्ह प्रबोधा
दो०—सिव अपमानु न जाइ सहि हृदयँ न होइ प्रबोध ।

सकल सभहि हठि हटक तब बोलीं बचन सक्रोध ॥६३॥

सुनहु सभासद सकल मुनिंदा । कही सुनी जिन्ह संकर निंदा ॥
सो फल तुरत लहव सब काहुँ । भली भाँति पछिताव पिताहुँ ॥
संत संभु श्रीपति अपवादा । सुनिअ जहाँ तहँ असि मरजादा
काटिअ तासु जीभ जो बसाई । श्रवन मूदिन त चलिअ पराई ॥
जगदातमा महेसु पुरारी । जगत जनक सब के हितकारी ॥
पिता मंदमति निंदत तेही । दच्छ सुक्र संभव यह देही ॥
तजिहउँ तुरत देह तेहि हेतू । उर धरि चंद्रमौलि वृषकेतू ॥

अस कहि जोग अगिनि तनु जारा । भयउ सकल मुख हाहाकारा ॥

दो०—सती मरनु सुनि संभु गन लगे करन मख खीस ।

जग्य बिधंस बिलोकि भृगु रच्छा कीन्हि मुनीस ॥६४॥

समाचार सब संकर पाए। वीरभट्टु करि कोप पठाए ॥

जग्य बिधंस जाइ तिन्ह कीन्हा। सकल सुरन्ह धिधिवत फलु दीन्हा

भै जगबिदित दच्छ गति सोई। जसि कछु संभु धिमुख कै होई ॥

यह इतिहास सकल जग जानी। ताते मैं संछेप बखानी ॥

सती मरत हरि सन बर मागा। जनम जनम सिव पद अनुरागा ॥

तेहि कारन हिमगिरि गृह जाई। जनमों पारवती तनु पाई ॥

जब तें उमा सैल गृह जाई। सकल सिद्धि संपति तहँ छाई ॥

जहँ तहँ मुनिन्ह सुआश्रम कीन्हे। उचित वास हिम भूधर दीन्हे ॥

दो०—सदा सुमन फल सहित सब द्रुम नव नाना जाति ।

प्रगटीं सुंदर सैल पर मनि आकर बहु भाँति ॥६५॥

सरिता सब पुनीत जलु बहहीं। खग मृग मधुप सुखी सब रहहीं ॥

सहज बयरु सब जीवन्ह त्यागा। गिरि पर सकल करहि अनुरागा ॥

सोह सैल गिरिजा गृह आएँ। जिमिजनु रामभगति के पाएँ ॥

नित नूतन मंगल गृह तासू। ब्रह्मादिक गावहिं जसु जासू ॥

नारद समाचार सब पाए। कौतुकीं गिरि गेह सिधाए ॥

सैलराज बड़ आदर कीन्हा। पद पखारि बर आसनु दीन्हा ॥

नारि सहित मुनि पद सिरु नावा। चरन सलिल सबु भवनु सिंचावा

निज सौभाग्य बहुत गिरि वरना। सुता बोलि मेली मुनि चरना ॥

दो०—त्रिकालग्य सर्वग्य तुम्ह गति सर्वत्र तुम्हारि ।

कहहु सुता के दोष गुन मुनिबर हृदयँ बिचारि ॥६६॥

कह मुनि विहसि गूढ़ मृदु बानी । सुता तुम्हारि सकल गुन खानी ॥
 सुंदर सहज सुसील सयानी । नाम उमा अंबिका भवानी ॥
 सब लच्छन संपन्न कुमारी । होइहि संतत पियहि पिआरी ॥
 सदा अचल एहि कर अहिवाता । एहि तें जसु पैहहिं पितु माता ॥
 होइहि पूज्य सकल जग माहीं । एहि सेवत कछु दुर्लभ नाहीं ॥
 एहि कर नामु सुमिरि संसारा । त्रिय चढ़िहहिं पतिव्रत असिधारा
 सैल सुलच्छन सुता तुम्हारी । सुनहु जे अब अवगुन दुइ चारी
 अगुन अमान मातु पितु हीना । उदासीन सब संसय छीना ॥

दो०—जोगी जटिल अकाम मन नगन असंगल वेष ।

अस स्वामी एहि कहँ मिलिहि परी हस्त असिरेख ॥६७॥

मुनि मुनि गिरा सत्य जियँ जानी । दुख दंपतिहि उमा हरषानी ॥
 नारदहूँ यह भेदु न जाना । दसा एक समुझबं बिलगाना ॥
 सकल सखीं गिरिजा गिरि मैना । पुलक सरीर भरे जल नैना ॥
 होइ न मृषा देवरिषि भाषा । उमा सो बचनु हृदयँ धरि राखा
 उपजेउ सिव पद कमल सनेहू । मिलन कठिन मन भा संदेहू ॥
 जानि कुअवसरु प्रीति दुराई । सखी उछँग बैठी पुनि जाई ॥
 झूठि न होइ देवरिषि बानी । सोचहिं दंपति सखीं सयानी ॥

दो०—कह मुनीस हिमवंत सुनु जो बिधि लिखा लिलार ।

देव दनुज नर नाग मुनि कोउ न मेटनिहार ॥६८॥

तदपि एक मैं कहउँ उपाई । होइ करै जौं दैउ सहाई ॥
जस बरु मैं बरनेउँ तुम्ह पाहीं । मिलिहि उमहि तस संसय नाहीं ॥
जे जे बर के दोष बखाने । ते सब सिव पहिं मैं अनुमाने ॥
जौं बिबाहु संकर सन होई । दोषउ गुन सम कह सबु कोई ॥
जौं अहि सेज सयन हरि करहीं । बुध कछु तिन्ह कर दोषु न धरहीं ॥
भानु कृसानु सर्व रस खाहीं । तिन्ह कहैं मंद कहत कोउ नाहीं ॥
सुभ अरु असुभ सलिल सब बहई । सुरसरि कोउ अपुनीत न कहई ॥
समरथ कहूँ नहिं दोषु गोसाई । रवि पावक सुरसरि की नाई ॥

दो०—जौं अस हिसिषा करहिं नर जड़ बिबेक अभिमान ।

परहिं कलप भरि नरक महुँ जीव कि ईस समान ॥६९॥

सुरसरि जल कृत वारुनिं जाना । कबहुँ न संत करहिं तेहि पाना ॥
सुरसरि मिलें सो पावन जैसैं । ईस अनीसहि अंतरु तैसैं ॥
संभु सहज समरथ भगवाना । एहि बिबाहँ सब बिधि कल्याना ॥
दुराराध्य पै अहहिं महेसू । आसुतोष पुनि किऐं कलेसू ॥
जौं तपु करै कुमारि तुम्हारी । भाविउ मेटि सकहिं त्रिपुरारी ॥
जद्यपि बर अनेक जग माहीं । एहि कहैं सिव तजि दूसर नाहीं ॥
बर दायक प्रनतारति भंजन । कृपासिंधु सेवक मन रंजन ॥

इच्छित फल बिनु सिव अवराधैं । लहिअ न कोटि जोग जप साधैं ॥

दो०-अस कहि नारद सुमिरि हरि गिरिजहि दीन्हि असीस।

होइहि यह कल्यान अब संसय तजहु गिरीस ॥७०॥

कहि अस ब्रह्मभवन मुनि गयऊ । आगिल चरित सुनहु जस भयऊ
पतिहि एकांत पाइ कह मैना । नाथ न मैं समुझे मुनि बैना ॥
जौं घरु बरु कुलु होइ अनूपा । करिअ विवाहु सुता अनुरूपा ॥
नत कन्या बरु रहउ कुआरी । कंत उमा मम प्रानपिआरी ॥
जौं न मिलिहि बरु गिरिजहि जोगू । गिरिजहु सहज कहिहि सबु लोगू
सोइ विचारिपति करेहु विवाहू । जेहिं न बहोरि होइ उर दाहू ॥
अस कहि परी चरन धरि सीसा । बोले सहित सनेह गिरीसा ॥
बरु पावक प्रगटै ससि माहीं । नारद बचनु अन्यथा नाहीं ॥

दो०-प्रिया सोचु परिहरहु सबु सुमिरहु श्रीभगवान ।

पारबतिहि निरमयउ जेहिं सोइ करिहि कल्यान ॥७१॥

अब जौं तुम्हहि सुता पर नेहू । तौ अस जाइ सिखावनु देहू ॥
करै सो तपु जेहिं मिलहिं महेसू । आन उपायँ न मिटिहि कलेसू ॥
नारद बचन सगर्भ सहेतू । सुंदर सब गुन निधि बृषकेतू ॥
अस विचारि तुम्ह तजहु असंका । सबहि भाँति संकरु अकलंका ॥
सुनिपति बचन हरषि मन माहीं । गई तुरत उठि गिरिजा पाहीं ॥
उमहि बिलोकि नयन भरे बारी । सहित सनेह गोद बैठारी ॥
बारहि बार लेति उर लाई । गदगद कंठ न कछु कहि जाई ॥

जगत मातु सर्वग्य भवानी । मातु सुखद बोलीं मूढ़ बानी ॥

दो०—सुनहि मातु मैं दीख अस सपन सुनावउँ तोहि ।

सुंदर गौर सुबिप्रवर अस उपदेसेउ मोहि ॥७२॥

करहि जाइ तपु सैलकुमारी । नारद कहा सो सत्य विचारी ॥
मातु पितहि पुनि यह मत भावा । तपु सुखप्रद दुख दोष नसावा ॥
तपबल रचइ प्रपंचु विधाता । तपबल बिष्णु सकल जग त्राता ॥
तपबल संभु करहिं संघारा । तपबल सेषुं धरइ महिभारा ॥
तप आधार सब सृष्टि भवानी । करहि जाइ तपु अस जियँ जानी ॥
सुनत बचन विसमित महतारी । सपन सुनायउ गिरिहि हँकारी ॥
मातु पितहि बहुविधि समुझाई । चलीं उमा तप हित हरषाई ॥
प्रिय परिवार पिता अरु माता । भए बिकल मुख आव न बाता ॥

दो०—बेदसिरा मुनि आइ तब सबहि कहा समुझाइ ।

पारबती महिमा सुनत रहे प्रबोधहि पाइ ॥७३॥

उर धरि उमा प्रानपति चरना । जाइ विपिन लागीं तपु करना ॥
अति सुकुमार न तनु तप जोगू । पतिपद सुमिरि तजेउ सबु भोगू
नित नव चरन उपज अनुरागा । विसरी देह तपहिं मनु लागा ॥
संवत सहस मूल फल खाए । सागु खाइ सत वरष गवाँए ॥
कछु दिन भोजनु बारि बतासा । किए कठिन कछु दिन उपवासा
बेल पाती महि परइ सुखाई । तीनि सहस संवत सोइ खाई ॥
पुनि परिहरे सुखानेउ परना । उमहि नामु तब भयउ अपरना ॥
देखि उमहि तप खीन सरीरा । ब्रह्मगिरा भै गगन गभीरा ॥

दो०—भयउ मनोरथ सुफल तव सुनु गिरिराजकुमारि ।

परिहर दुसह कलेस सब अब मिलिहहि त्रिपुरारि ॥७४॥

अस तपु काहुँ न कीन्ह भवानी । भए अनेक धीर मुनि ग्यानी ॥
अब उर धरहु ब्रह्म वर बानी । सत्य सदा संतत सुचि जानी ॥
आवै पिता बोलावन जबहीं । हठ परिहरि घर जाएहु तबहीं ॥
मिलहिं तुम्हहि जब सप्त रिषीसा । जानेहु तब प्रमान बागीसा ॥
सुनत गिरा बिधि गगन बखानी । पुलक गात गिरिजा हरषानी ॥
उमा चरित सुंदर मैं गावा । सुनहु संभु कर चरित सुहावा ॥
जब तैं सतीं जाइ तनु त्यागा । तब तैं सिव मन भयउ विरागा ॥
जपहिं सदा रघुनायक नामा । जहँ तहँ सुनहिं राम गुन ग्रामा ॥

दो०—चिदानंद सुखधाम सिव बिगत मोह मद काम ।

बिचरहिं महि धरि हृदयँ हरि सकल लोक अभिराम ॥७५॥

कतहुँ मुनिन्ह उपदेसहिं ग्याना । कतहुँ राम गुन करहिं बखाना ॥
जदपि अकाम तदपि भगवाना । भगत बिरह दुख दुखित सुजाना ॥
एहि बिधि गयउ कालु बहु बीती । नित नै होइ राम पद प्रीती ॥
नेमु प्रेमु संकर कर देखा । अबिचल हृदयँ भगति कै रेखा ॥
प्रगटे रामु कृतग्य कृपाला । रूप सील निधि तेज विसाला ॥
बहु प्रकार संकरहि सराहा । तुम्ह बिनु अस ब्रतु को निरबाहा ॥
बहुबिधि राम सिवहि समुझावा । पारबती कर जन्मु सुनावा ॥
अति पुनीत गिरिजा कै करनी । बिस्तर सहित कृपानिधि बरनी ॥

दो०—अब बिनती मम सुनहु सिव जौं मो पर निज नेहु।

जाइ विवाहहु सैलजहि यह मोहि मार्गें देहु ॥७६॥
कह सिव जदपि उचित अस नाही। नाथ बचन पुनि मेटि न जाहीं॥
सिर धरि आयसु करिअ तुम्हारा। परम धरमु यह नाथ हमारा॥
मातु पिता गुर प्रभु कै बानी। बिनहिं बिचार करिअ सुभ जानी
तुम्ह सब भाँति परम हितकारी। अग्या सिर पर नाथ तुम्हारी॥
प्रभु तोषेउ सुनि संकर बचना। भक्ति विवेक धर्म जुतरचना॥
कह प्रभु हर तुम्हार पन रहेऊ। अब उर राखेहु जो हम कहेऊ॥
अंतरधान भए अस भाषी। संकर सोइ मूरति उर राखी॥
तबहिं सप्तरिषि सिव पहिं आए। बोले प्रभु अति बचन सुहाए॥
दो०—पारबती पहिं जाइ तुम्ह प्रेम परिच्छा लेहु।

गिरिहि प्रेरि पठएहु भवन दूरि करेहु संदेहु ॥७७॥
रिषिन्ह गौरि देखी तहँ कैसी। मूरतिमंत तपस्या जैसी॥
बोले मुनि सुनु सैलकुमारी। करहु कवन कारन तपु भारी॥
केहि अवराधहु का तुम्ह चहहू। हम सन सत्य मरमु किन कहहू॥
कहत बचन मनु अति सकुचाई। हँसिहहु सुनि हमारि जड़ताई॥
मनु हठ परान सुनइ सिखावा। चहत बारि पर भीति उठावा॥
नारद कहा सत्य सोइ जाना। बिनु पंखन्ह हम चहहिं उड़ाना॥
देखहु मुनि अबिवेकु हमारा। चाहिअ सदा सिवहि भरतारा॥
दो०—सुनत बचन बिहसे रिषय गिरिसंभव तव देह।

दच्छ सुतन्ह उपदेसेन्हि जाई । तिन्ह फिरि भवनु न देखा आई ॥
 चित्रकेतु कर घरु उन घाला । कनककसिपु कर पुनि असहाला
 नारद सिख जे सुनहिं नर नारी । अवसि होहिं तजि भवनु भिखारी
 मन कपटी तन सजन चीन्हा । आपु सरिस सबही चह कीन्हा ॥
 तेहि कें बचन मानि बिस्वासा । तुम्ह चाहहु पति सहज उदासा ॥
 निर्गुन निलज कुवेष कपाली । अकुल अगेह दिगंबर ब्याली ॥
 कहहु कवन सुखु अस बरु पाएँ । भल भूलिहु ठग के बौराएँ ॥
 पंच कहें सिवैं सती बिवाही । पुनि अवडेरि मराएन्हि ताही ॥

दो०—अब सुख सोवत सोचु नहिं भीख मागि भव खाहिं ।

सहज एकाकिन्ह के भवन कबहुँ कि नारि खगहिं । ७९ ॥

अजहूँ मानहु कहा हमारा । हम तुम्ह कहूँ बरु नीक बिचारा ॥
 अति सुंदर सुचि सुखद सुसीला । गावहिं ब्रेद जासु जस लीला ॥
 दूषन रहित सकल गुन रासी । श्रीपति पुर बैकुंठ निवासी ॥
 अस बरु तुम्हहि मिलाउब आनी । सुनत बिहसि कह बचन भवानी
 सत्य कहेहु गिरिभव तनु एहा । हठ न छूट छूटै बरु देहा ॥
 कनकउ पुनि पषान तैं होई । जारेहुँ सहजु न परिहर सोई ॥
 नारद बचन न मैं परिहरऊँ । बसउ भवनु उजरउ नहिं डरऊँ
 गुर कें बचन प्रतीति न जेही । सपनेहुँ सुगम न सुख सिधि तेही ॥

दो०—महादेव अवगुन भवन बिष्णु सकल गुन धाम ।

जौं तुम्ह मिलतेहु प्रथम मुनीसा । सुनतिउँ सिख तुम्हारि धरि सीसा
 अब मैं जन्मु संभु हित हारा । को गुन दूषन करै विचारा ॥
 जौं तुम्हरे हठ हृदयँ बिसेषी । रहिन जाइ विनु किँ बरेषी ॥
 तौ कौतुकिअन्ह आलसु नाहीं । बर कन्या अनेक जग माहीं ॥
 जन्म कोटि लगि रगर हमारी । बरउँ संभु न तरहउँ कुआरी ॥
 तजउँ न नारद कर उपदेसू । आपु कहहिं सत बार महेसू ॥
 मैं पा परउँ कहइ जगदंबा । तुम्ह गृह गवनहु भयउ बिलंबा ॥
 देखि प्रेमु बोले मुनि ग्यानी । जय जय जगदंबिके भवानी ॥

दो०—तुम्ह माया भगवान सिव सकल जगत पितु मातु ।

नाइ चरन सिर मुनि चले पुनि पुनि हरषत गातु ॥८१॥
 जाइ मुनिन्ह हिमवंतु पठाए । करि बिनती गिरजाहिं गृह ल्याए
 बहुरि सप्तरिषि सिव पहिं जाई । कथा उमा कै सकल सुनाई ॥
 भए मगन सिव सुनत सनेहा । हरषि सप्तरिषि गवने गेहा ॥
 मनुथिर करि तब संभु सुजाना । लगे करन रघुनायक ध्याना ॥
 तारकु असुर भयउ तेहि काला । भुज प्रताप बल तेजं बिसाला ॥
 तेहिं सब लोक लोकपति जीते । भए देव सुख संपति रीते ॥
 अजर अमर सो जीति न जाई । हारे सुर करि विविध लराई ॥
 तब विरंचि सन जाइ पुकारे । देखे बिधि सब देव दुखारे ॥

दो०—सब सन कहा बुझाइ बिधि दनुज निधन तब होइ ।

संभु सुक संभत सुत एहि जीतइ रन सोइ ॥८२॥

मोर कहा सुनि करहु उपाई । होइहि ईस्वर कगिहि सहाई ॥
 सतीं जो तजी दच्छ मख देहा । जनमी जाइ हिमाचल गेहा ॥
 तेहिं तपु कीन्ह संभु पति लागी । सिव समाधि बैठे सबु त्यागी ॥
 जदपि अहइ असमंजस भारी । तदपि बात एक सुनहु हमारी ॥
 पठवहु कामु जाइ सिव पाहीं । करै छोभु संकर मन माहीं ॥
 तब हम जाइ सिवहि सिर नाई । करवाउब बिवाहु बरिआई ॥
 एहि बिधि भलेहिं देवहित होई । मत अति नीक कहइ संबु कोई ॥
 अस्तुति सुरन्ह कीन्हि अति हेतू । प्रगटेउ बिषमवान झषकेतू ॥

दो०—सुरन्ह कही निज बिपति सब सुनि मन कीन्ह बिचार ।

संभुबिरोध न कुसल मोहि बिहसि कहेउ अस मार ॥८३॥

तदपि करब मैं काजु तुम्हारा । श्रुति कह परम धरम उपकारा ॥
 पर हित लागि तजइ जो देही । संतत संत प्रसंसहिं तेही ॥
 अस कहि चलेउ सबहि सिरु नाई । सुमन धनुष कर सहित सहाई ॥
 चलत मार अस हृदयँ बिचारा । सिवबिरोध ध्रुवमरनु हमारा ॥
 तब आपन प्रभाउ बिस्तारा । निज बस कीन्ह सकल संसारा ॥
 कोपेउ जबहिं बारिचरकेतू । छन महुँ मिटे सकल श्रुति सेतू ॥
 ब्रह्मचर्ज व्रत संजम नाना । धीरज धरम ग्यान विग्याना ॥
 सदाचार जप जोग विरागा । सभय बिबेक कटकु सबु भागा ॥

छं०—भागेउ बिबेकु सहाय सहित सो सुभट संजुग महि मुरे ।

होनिहार का करतार को रखवार जग खरभरु परा ।

दुइ माथ केहि रतिनाथ जेहि कहूँ कोपि कर धनु सरु धरा॥

दो०—जे सजीव जग अचर चर नारि पुरुष अस नाम ।

ते निज निज मरजाद तजि भए सकल बस काम ॥८४॥

सब के हृदयँ मदन अभिलाषा । लता निहारि नवहिं तरु साखा ॥

नदीं उमगि अंबुधि कहूँ धाई । संगम करहिं तलाव तलाई ॥

जहँ असि दसा जड़न्ह कै बरनी । को कहि सकइ सचेतन करनी ॥

पसु पच्छी नभ जल थलचारी । भए कामबस समय बिसारी ॥

मदन अंध व्याकुल सब लोका । निसि दिनु नहिं अवलोकहिं कोका

देव दनुज नर किंनर ब्याला । प्रेत पिसाच भूत वेताला ॥

इन्ह कै दसान कहैउँ बखानी । सदा काम के चेरे जानी ॥

सिद्ध विरक्त महामुनि जोगी । तेपि कामबस भए ब्रियोगी ॥

छं०—भए कामबस जोगीस तापस पावँरन्हि की को कहै ।

देखहिं चराचर नारिमय जे ब्रह्ममय देखत रहे ॥

अबला बिलोकहिं पुरुषमय जगु पुरुष सब अबलामयं ।

दुइ दंड भरि ब्रह्मांड भीतर कामकृत कौतुक अयं ॥

सो०—धरी न काहूँ धीर सब के मन मनसिज हरे ।

जे राखे रघुबीर ते उबरे तेहि काल महुँ ॥८५॥

उभय घरी अस कौतुक भयऊ । जौ लगि कामु संभु पहिं गयऊ ॥

सिवहि बिलोकि ससंकेउ मारू । भयउ जथाथिति सबु संसारू ॥

भए तुरत सब जीव सुखारे । जिमि मद उतरि गएँ मतवारे ॥
 रुद्रहि देखि मदन भय माना । दुर्गाधरष दुर्गम भगवाना ॥
 फिरत लाज कछु करि नहिं जाई । मरनु ठानि मन रचेसि उपाई ॥
 प्रगटेसि तुरत रुचिर रितुराजा । कुसुमित नव तरु राजि बिराजा
 बन उपवन बापिका तड़ागा । परम सुभग सब दिसा विभागा ॥
 जहँ तहँ जनु उमगत अनुरागा । देखि मुएहुँ मन मनसिज जागा

छं०—जागइ मनोभव मुएहुँ मन बन सुभगता न परै कही ।

सीतल सुगंध सुमंद मारुत मदन अनल सखा सही ॥

बिकसे सरन्हि बहु कंज गुंजत पुंज मंजुल मधुकरा ।

कलहंस पिक सुक सरस रव करि गान नाचहिं अपछरा ॥

दो०—सकल कला करि कोटि बिधि हारेउ सेन समेत ।

चली न अचल समाधि सिव कोपेउ हृदयनिकेत ॥८६॥

देखि रसाल बिटप बर साखा । तेहि पर न्वढेउ मदन मन माखा
 सुमन चाप निज सर संधाने । अति रिस ताकि श्रवन लगि ताने
 छाड़े विषम बिसिख उर लागे । छूटि समाधि संभु तब जागे ॥
 भयउ ईस मन छोभु बिसेषी । नयन उधारि सकल दिसि देखी ॥
 सौरभ पल्लव मदन बिलोका । भयउ कोपु कंपेउ त्रैलोका ॥
 तब सिव तीसर नयन उधारा । चितवत कामु भयउ जरि छारा ॥
 हाहाकार भयउ जग भारी । डरपे सुर भए असुर सुखारी ॥

समुझि कामसुख सोचहिं भोगी । भए अकंटक साधक जोषी ॥

छं०—जोगी अकंटक भए पति गति सुनत रति मुरुछित भई ।
 रोदति बदति बहु भाँति करुना करति संकर पहिं गई ॥
 अति प्रेम करि विनती विविध विधि जोरि कर सन्मुख रही
 प्रभु आसुतोष कृपाल सिव अबला निरखि बोले सही ॥
 दो०—अब तैं रति तव नाथ कर होइहि नामु अनंगु ।

बिनु बपु व्यापिहि सबहि पुनि सुनु निज मिलन प्रसंगु ॥८७॥
 जब जदुबंस कृष्ण अवतारा । होइहि हरन महा महिभारा ॥
 कृष्ण तनय होइहि पति तोरा । बचनु अन्यथा होइ न मोरा ॥
 रति गवनी सुनि संकर बानी । कथा अपर अब कहउँ बखानी ॥
 देवन्ह समाचार सब पाए । ब्रह्मादिक बैकुण्ठ सिधाए ॥
 सब सुर बिष्णु विरंचि समेता । गए जहाँ सिव कृपानिकेता ॥
 पृथक पृथक तिन्ह कीन्हि प्रसंसा । भए प्रसन्न चंद्र अवतंसा ॥
 बोले कृपासिंधु वृषकेतू । कहहु अमर आए केहि हेतू ॥
 कह बिधि तुम्ह प्रभु अंतरजामी । तदपि भगति बस विनवउँ स्वामी
 दो०—सकल सुरन्ह के हृदयँ अस संकर परम उछाहु ।

निज नयनन्हि देखा चहहिं नाथ तुम्हार बिबाहु ॥८८॥
 यह उत्सव देखिअ भरि लोचन । सोइ कछु करहु मदन मद मोचन
 कामु जारि रति कहूँ बरु दीन्हा । कृपासिंधु यह अति भल कीन्हा ॥
 सासति करि पुनि करहिं पसाऊ । नाथ प्रभुन्ह कर सहज सुभाऊ ॥
 पारवती तपु कीन्ह अपारा । करहु तासु अब अंगीकारा ॥

सुनि विधि विनय समुझि प्रभु बानी । ऐसेइ होउ कहा सुखु मानी ॥
 तब देवन्ह दुंदुभीं बजाई । वरषि सुमन जय जय सुर साई ॥
 अवसर जानि सप्तर्षि आए । तुरतहिं विधि गिरिभवन पठाए
 प्रथम गए जहँ रहीं भवानी । बोले मधुर बचन छल सानी ॥
 दो०—कहा हमार न सुनेहु तब नारद कें उपदेस ।

अब भा झूठ तुम्हार पन जारेउ कामु महेस ॥८९॥

मासपारायण, तीसरा विश्राम

सुनि बोलीं मुसुकाइ भवानी । उचित कहेहु मुनिबर विग्यानी ॥
 तुम्हरें जान कामु अब जारा । अब लगि संभु रहे सबिकारा ॥
 हमरें जान सदा सिव जोगी । अज अनवद्य अकाम अभोगी ॥
 जौं मैं सिव सेये अस जानी । प्रीति समेत कर्म मन बानी ॥
 तौ हमार पन सुनहु मुनीसा । करिहहिं सत्य कृपानिधि ईसा ॥
 तुम्ह जो कहा हर जारेउ मारा । सोइ अति बड़ अबिवेकु तुम्हारा
 तात अनल कर सहज सुभाऊ । हिम तेहि निकट जाइ नहिं काऊ
 गएँ समीप सो अवसि नसाई । असि मन्मथ महेस की नाई ॥
 दो०—हियँ हरषे मुनि बचन सुनि देखि प्रीति बिस्वास ।

चले भवानिहि नाइ सिर गए हिमाचल पास ॥९०॥

सबु प्रसंगु गिरिपतिहि सुनावा । मदन दहन सुनि अति दुखु पावा
 बहुरि कहेउ रति कर बरदाना । सुनि हिमवंत बहुत सुखु माना ॥
 हृदयँ बिचारि संभु प्रभुताई । सादर मुनिबर लिए बोलाई ॥

सुदिनु सुनखतु सुघरी सोचाई । बेगि बेदबिधि लगन धराई ॥
 पत्नी सप्तरिषिन्ह सोइ दीन्ही । गहि पद बिनय हिमाचल कीन्ही
 जाइ बिधिहि तिन्ह दीन्ही सो पाती । वाचत प्रीति न हृदयँ समाती ॥
 लगन वाचि अज सबहि सुनाई । हरषे मुनि सब सुर समुदाई ॥
 सुमन वृष्टि नभ बाजन बाजे । मंगल कलस दसहुँ दिसि साजे ॥
 दो०—लगे सँवारन सकल सुर बाहन विविध बिमान ।

होहिं सगुन मंगल सुभद करहिं अपछरा गान ॥९१॥

सिवहि संभु गन करहिं सिंगारा । जटा मुकुट अहि मौरु सँवारा ॥
 कुंडल कंकन पहिरे ब्याला । तन बिभूति पट केहरि छाला ॥
 ससि ललाट सुंदर सिर गंगा । नयन तीनि उपबीत भुजंगा ॥
 गरल कंठ उर नर सिर माला । असिव बेष सिवधाम कृपाला ॥
 कर त्रिसूल अरु डमरु बिराजा । चले बसहँ चढ़ि बाजहिं बाजा ॥
 देखि सिवहि सुरत्रिय मुसुकाहीं । बर लायक दुलहिनि जग नाहीं ॥
 बिष्णु बिरंचि आदि सुरब्राता । चढ़ि चढ़ि बाहन चले बराता ॥
 सुर समाज सब भाँति अनूपा । नहिं बरात दूलह अनुरूपा ॥
 दो०—बिष्णु कहा अस बिहसि तब बोलि सकल दिसिराज ।

बिलग बिलग होइ चलहु सब निज निज सहित समाज ॥९२॥

बर अनुहारि बरात न भाई । हँसी करैहहु पर पुर जाई ॥
 बिष्णु बचन सुनि सुर मुसुकाने । निज निज सेन सहित बिलगाने ॥

अति प्रिय बचन सुनत प्रिय केरे । भृंगिहि प्रेरि सकल गन टेरे ॥
 सिव अनुसासन सुनि सब आए । प्रभु पद जलज सीस तिन्ह नाए
 नाना बाहन नाना वेषा । बिहसे सिव समाज निज देखा ॥
 कोउ मुखहीन बिपुल मुख काहू । बिनु पद कर कोउ बहु पद बाहू ॥
 बिपुल नयन कोउ नयन बिहीना । रिष्ट पुष्ट कोउ अति तनखीना ॥
 छं०-तन खीन कोउ अति पीन पावन कोउ अपावन गति धरें ।

भूषन कराल कपाल कर सब सद्य सोनित तन भरें ॥
 खर स्वान सुअर सृकाल मुख गन वेष अगनित को गनै ।
 बहु जिनस प्रेत पिसाच जोगि जमात बरनत नहिं बनै ॥

सो०-नाचहिं गावहिं गीत परम तरंगी भूत सब ।

देखत अति बिपरीत बोलहिं बचन बिचित्र बिधि ॥९३॥
 जस दूलहु तसि बनी बराता । कौतुक विविध होहिं मग जाता ॥
 इहाँ हिमाचल रचेउ बिताना । अति विचित्र नहिं जाइ बखाना ॥
 सैल सकल जहँ लगी जग माहीं । लघु विसाल नहिं बरनि सिराहीं ॥
 बन सागर सब नदीं तलावा । हिमगिरि सब कहूँ नेवत पठावा ॥
 कामरूप सुंदर तन धारी । सहित समाज सहित बर नारी ॥
 गए सकल तुहिनाचल गेहा । गावहिं मंगल सहित सनेहा ॥
 प्रथमहिं गिरि बहु गृह सँवराए । जथाजोगु तहँ तहँ सब छाए ॥
 पुर सोभा अवलोकि सुहाई । लागइ लघु विरंचि निपुनाई ॥
 छं०-लघु लाग बिधि की निपुनता अवलोकि पुर सोभा सही ।

बन बाग कूप तड़ाग सरिता सुभग सब सक को कही ॥

मंगल विपुल तोरन पताका केतु गृह गृह सोहहीं ।
बनिता पुरुष सुंदर चतुर छबि देखि मुनि मन मोहहीं ॥
दो०—जगदंबा जहँ अवतरी सो पुरु बरनि कि जाइ ।

रिद्धि सिद्धि संपत्ति सुख नित नूतन अधिकाइ ॥ ९४ ॥

नगर निकट बरात सुनि आई । पुर खरभरु सोभा अधिकाई ॥
करि बनाव सजि बाहन नाना । चले लेन सादर अगवाना ॥
हियँ हरषे सुर सेन निहारी । हरिहि देखि अति भए सुखारी ॥
सिव समाज जव देखन लागे । बिडरि चले बाहन सब भागे ॥
धरि धीरजु तहँ रहे सयाने । बालक सब लै जीव पराने ॥
गएँ भवन पूछहिं पितु माता । कहहिं बचन भय कंपित गाता ॥
कहिअकाह कहि जाइ न बाता । जम कर धार किधौं बरिआता ॥
बरु बौराह बसहँ असवारा । ब्याल कपाल बिभूषन छारा ॥

छं०—तन छार ब्याल कपाल भूषन नगन जटिल भयंकरा ।
सँग भूत प्रेत पिसाच जोगिनि बिकट मुख रजनीचरा ॥
जो जिअत रहिहि बरात देखत पुन्य बड़ तेहि कर सही ।
देखिहि सो उमा बिबाहु घर घर बात असि लरिकन्ह कही ॥

दो०—समुझि महेस समाज सब जननि जनक मुसुकाहिं ।

बाल बुझाए बिबिध बिधि निडर होहु डरु नाहिं ॥ ९५ ॥

लै अगवान बरातहि आए । दिए सबहि जनवास सुहाए ॥
मैनाँ सुभ आरती सँवारी । संग सुमंगल गावहिं नारी ॥

Vinay Avasthi Sahib Bhuvan Vani Trust Donations
 कंचन थार सहि बर पानी । परिछन चली हरहि हरषानी ॥
 बिकट बेष रुद्रहि जब देखा । अबलन्ह उर भय भयउ बिसेषा ॥
 भागि भवन पैठी अति त्रासा । गए महेसु जहाँ जनवासा ॥
 मैना हृदयँ भयउ दुखु भारी । लीन्ही बोलि गिरीसकुमारी ॥
 अधिक सनेहँ गोद बैठारी । स्याम सरोज नयन भरे वारी ॥
 जेहिं बिधि तुम्हहि रूपु अस दीन्हा । तेहिं जड़ वरु बाउर कस कीन्हा ॥

छं०—कस कीन्ह वरु बौराह बिधि जेहिं तुम्हहि सुंदरता दई ।
 जो फलु चहिअ सुरतरुहिं सो बरबस बबूरहिं लागई ॥
 तुम्ह सहित गिरि तें गिरौं पावक जरौं जलनिधि महुँ परौं ।
 घर जाउ अपजसु होउ जग जीवत बिबाहु न हौं करौं ॥

दो०—भई बिकल अबला सकल दुखित देखि गिरिनारि ।
 करि बिलापु रोदति बदति सुता सनेहु सँभारि ॥ ९६ ॥

नारद कर मैं काह बिगारा । भवनु मोर जिन्ह बसत उजारा ॥
 अस उपदेसु उमहि जिन्ह दीन्हा । बौरै बरहि लागि तपु कीन्हा ॥
 साचेहुँ उन्ह कै मोह न माया । उदासीन धनु धामु न जाया ॥
 पर घर घालक लाज न भीरा । बाँझ कि जान प्रसव कै पीरा ॥
 जननिहि बिकल बिलोकि भवानी । बोली जुत बिबेक मृदु बानी ॥
 अस बिचारि सोचहि मति माता । सो न टरइ जो रचइ बिधाता ॥
 करम लिखा जाँ बाउर नाहू । तौ कत दोसु लगाइअ काहू ॥
 तुम्ह सन मिटहिं कि बिधि के अंका । मातु व्यर्थ जनि लेहु कलंका ॥

छं०-जनि लेहु मातु कलंकु करुना परिहरहु अवसर नहीं ।
 दुखु सुखु जो लिखा लिलार हमरें जाब जहँ पाउब तहीं ॥
 सुनि उमा बचन बिनीत कोमल सकल अबला सोचहीं ।
 बहु भाँति बिधिहि लगाइ दूषन नयन बारि बिमोचहीं ॥

दो०-तेहि अवसर नारद सहित अरु रिषि सप्त समेत ।
 समाचार सुनि तुहिनगिरि गवने तुरत निकेत ॥१७॥

तब नारद सबही समुझावा । पूरुब कथाप्रसंगु सुनावा ॥
 मयना सत्य सुनहु मम बानी । जगदंबा तब सुता भवानी ॥
 अजा अनादि सक्ति अविनाशिनि । सदा संभु अरधंग निवासिनि ॥
 जग संभव पालन लय कारिनि । निज इच्छा लीला बपु धारिनि ॥
 जनमीं प्रथम दच्छ गृह जाई । नामु सती सुंदर तनु पाई ॥
 तहँहुँ सती संकरहि बिबाहीं । कथा प्रसिद्ध सकल जग माहीं ॥
 एक बार आवत सिव संगी । देखेउ रघुकुल कमल पतंगी ॥
 भयउ मोहु सिव कहा न कीन्हा । भ्रम बस बेषु सीय कर लीन्हा ॥

छं०-सिय वेषु सतीं जो कीन्ह तेहिं अपराध संकर परिहरिं ।
 हर बिरहँ जाइ बहोरि पितु कें जग्य जोगानल जरीं ॥
 अब जनमि तुम्हरे भवन निज पति लागि दारुन तपु किया ।
 अस जानि संसय तजहु गिरिजा सर्वदा संकर प्रिया ॥

दो०-सुनि नारद के बचन तब सब कर मिटा बिषाद ।

उन सहै व्यापेउ सकल पुर घर घर यह संवाद ॥१८॥

तब मयना हिमवंतु अनंदे । पुनि पुनि पारवती पद बंदे ॥
 नारि पुरुष सिसु जुवा सयाने । नगर लोग सब अति हरषाने ॥
 लगे होन पुर मंगलगाना । सजे सबहिं हाटक घट नाना ॥
 भाँति अनेक भई जेवनारा । सूपसास्त्र जस कछु व्यवहारा ॥
 सो जेवनार कि जाइ बखानी । बसहिं भवन जेहिं मातु भवानी ॥
 सादर बोले सकल बराती । विष्णु विरंचि देव सब जाती ॥
 विविधि पाँति बैठी जेवनारा । लागे परसन निपुन सुआरा ॥
 नारिबुंद सुर जेवँत जानी । लगीं देन गारीं मृदु बानी ॥

छं०—गारीं मधुर स्वर देहिं सुंदरि बिंग्य बचन सुनावहीं ।

भोजनु करहिं सुर अति बिलंबु बिनोदु सुनि सचु पावहीं ॥

जेवँत जो बढ्यो अनंदु सो मुख कोटिहूँ न परै कह्यो ।

अचवाँइ दीन्हे पान गवने बास जहँ जाको रह्यो ॥

दो०—बहुरि मुनिन्ह हिमवंत कहुँ लगन सुनाई आइ ।

समय बिलोकि बिबाह कर पठए देव बोलाइ ॥९९॥

बोलि सकल सुर सादर लीन्हे । सबहि जथोचित आसन दीन्हे ॥

बेदी बेद विधान सँवारी । सुभग सुमंगल गावहिं नारी ॥

सिंघासनु अति दिव्य सुहावा । जाइ न बरनि विरंचि बनावा ॥

बैठे सिव विप्रन्ह सिरु नाई । हृदयँ सुमिरि निज प्रभु रघुराई ॥

बहुरि मुनीसन्ह उमा बोलाई । करि सिंगारु सखीं लै आई ॥

देखत रूप सकल सुर मोहे । बरनै छवि अस जग कनि कोहे ॥

जगदंबिका जानि भव भामा । सुरन्ह मनहिं मन कीन्ह प्रनामा ॥
सुंदरता मरजाद भवानी । जाइ न कोटिहुं बदन बखानी ॥

छं०-कोटिहुं बदन नहिं बनै बरनत जग जननि सोभा महा ।
सकुचहिं कहत श्रुति सेष सारद मंदमति तुलसी कहा ॥
छबिखानि मातु भवानि गवनीं मध्य मंडप सिव जहाँ ।
अवलोकि सकहिं न सकुच पति पद कमल मनु मधुकरुतहाँ ॥

दो०-मुनि अनुसासन गनपतिहि पूजेउ संभु भवानि ।
कोउ सुनि संसय करै जनि सुर अनादि जियँ जानि ॥१००॥

जसि विवाह कै विधि श्रुति गाई । महामुनिन्ह सो सब करवाई ॥
गहि गिरीस कुस कन्या पानी । भवहि समरपीं जानि भवानी ॥
पानिग्रहन जब कीन्ह महेसा । हियँ हरषे तब सकल सुरेसा ॥
बेदमंत्र मुनिवर उच्चरहीं । जय जय जय संकर सुर करहीं ॥
वाजहिं वाजन विविध विधाना । सुमनबृष्टि नभ भै विधि नाना ॥
हर गिरिजा कर भयउ विवाहू । सकल भुवन भरि रहा उछाहू ॥
दासीं दास तुरग रथ नागा । धेनु बसन मनि बस्तु विभागा ॥
अन्न कनकभाजन भरि जाना । दाइज दीन्ह न जाइ बखाना ॥

छं०-दाइज दियो बहु भाँति पुनि कर जोरि हिमभूधर कह्यो ।
का देउँ पूरनकाम संकर चरन पंकज गहि रह्यो ॥
सिवँ कृपासागर ससुर कर संतोषु सब भाँतिहिं कियो ।
पुनि गहे पद पाथोज मयनाँ प्रेम परिपूरन हियो ॥

दो०—नाथ उमा मम प्रान सम गृहकिंकरी करेहु ।

छमेहु सकल अपराध अब होइ प्रसन्न बरु देहु ॥१०१॥

बहु बिधि संभु सासु समुझाई । गवनी भवन चरन सिरु नाई ॥
जननीं उमा बोलि तब लीन्ही । लै उछंग सुंदर सिख दीन्ही ॥
करेहु सदा संकर पद पूजा । नारिधरसु पति देउ न दूजा ॥
बचन कहत भरे लोचन बारी । बहुरि लाइ उर लीन्हि कुमारी ॥
कत बिधि सृजीं नारि जग माहीं । पराधीन सपनेहुँ सुखु नाहीं ॥
भै अति प्रेम बिकल महतारी । धीरजु कीन्ह कुसमय बिचारी ॥
पुनि पुनि मिलति परति गहि चरना । परम प्रेमु कछु जाइ न बरना ॥
सब नारिन्ह मिलि भेटि भवानी । जाइ जननि उर पुनि लपटानी ॥

छं०—जननिहि बहुरि मिलि चली उचित असीस सब काहूँ दई ।
फिरि फिरि बिलोकति मातु तन तब सखीं लै सिव पहिँ गई ॥
जाचक सकल संतोषि संकरु उमा सहित भवन चले ।
सब अमर हरषे सुमन बरषि निसान नभ बाजे भले ॥

दो०—चले संग हिमवंतु तब पहुँचावन अति हेतु ।
बिबिध भाँति परितोषु करि बिदा कीन्ह बृषकेतु ॥१०२॥

तुरत भवन आए गिरिराई । सकल सैल सर लिए बोलाई ॥
आदर दान विनय बहुमाना । सब कर बिदा कीन्ह हिमवाना ॥
जबहिं संभु कैलासहिं आए । सुर सब निज निज लोक सिधाए ॥
जगत मातु पितु संभु भवानी । तेहिं सिंगारु न कह्यो बसवानी ॥

करहिं विविध विधि भोग विलासा । गनन्ह समेत बसहिं कैलासा ॥
हर गिरिजा बिहार नित नयऊ । एहि विधि विपुल काल चलि गयऊ
तब जनमेउ षटबदन कुमारा । तारकु असुरु समर जेहिं मारा ॥
आगम निगम प्रसिद्ध पुराना । षन्मुख जन्मु सकल जग जाना ॥

छं०—जगु जान षन्मुख जन्मु कर्मु प्रतापु पुरुषारथु महा ।
तेहि हेतु मैं बृषकेतु सुत कर चरित संछेपहिं कहा ॥
यह उमा संभु बिबाह जे नर नारि कहहिं जे गावहीं ।
कल्यान काज बिबाह मंगल सर्वदा सुखु पावहीं ॥

दो०—चरित सिंधु गिरिजा रमन बेद न पावहिं पारु !

बरनै तुलसीदासु किमि अति मतिमंद गवाँरु ॥१०३॥

संभु चरित सुनि सरस सुहावा । भरद्वाज मुनि अति सुखु पावा ॥
बहु लालसा कथा पर बाढ़ी । नयनन्हि नीरु रोमावलि ठाढ़ी ॥
प्रेम बिबस मुख आव न बानी । दसा देखि हरषे मुनि ग्यानी ॥
अहो धन्य तव जन्मु मुनीसा । तुम्हहि प्रान सम प्रिय गौरीसा ॥
सिव पद कमल जिन्हहिरति नाहीं । रामहि ते सपनेहुँ न सोहाहीं ॥
बिनु छल बिस्वनाथ पद नेहू । राम भगत कर लच्छन एहू ॥
सिव सम को रघुपति व्रतधारी । बिनु अध तजी सती असि नारी ॥
पनु करि रघुपति भगति देखाई । को सिव सम रामहि प्रिय भाई ॥

दो०—प्रथमहिं मैं कहि सिव चरित बूझा मरमु तुम्हार ।

सुचि सेवक तुम्ह राम के रहित समस्त बिकार ॥१०४॥

मैं जाना तुम्हारे गुन सोला । कहउ सुनहु अब रघुपति लीला ॥
 सुनु मुनि आजु समागम तोरें । कहि न जाइ जस सुखु मन मोरें ॥
 राम चरित अति अमित मुनीसा । कहि न सकहिं सत कोटि अहीसा
 तदपि जथाश्रुत कहउँ बखानी । सुमिरि गिरापति प्रभु धनुपानी ॥
 सारद दारुनारि सम स्वामी । रामु सूत्रधर अंतरजामी ॥
 जेहि पर कृपा करहिं जनु जानी । कवि उर अजिरनचावहिं बानी ॥
 प्रनवउँ सोइ कृपाल रघुनाथा । बरनउँ बिसद तासु गुन गाथा ॥
 परम रम्य गिरिवरु कैलासू । सदा जहाँ सिव उमा निवासू ॥
 दो०—सिद्ध तपोधन जोगिजन सुर किंनर मुनिबृंद ।

बसहिं तहाँ सुकृती सकल सेवहिं सिव सुखकंद ॥ १०५॥

हरि हर विमुख धर्म रति नार्हीं । ते नर तहँ सपनेहुँ नहिं जाहीं ॥
 तेहि गिरि पर बट बिटप बिसाला । नित नूतन सुदर सब काला ॥
 त्रिविध समीर सुसीतलि छाया । सिव विश्राम बिटप श्रुति गाया ॥
 एक बार तेहि तर प्रभु गयऊ । तरु विलोकि उर अति सुखु भयऊ
 निज कर डासि नागरिपुछाला । बैठे सहजहिं संभु कृपाला ॥
 कुंद इंदु दर गौर सरीरा । भुज प्रलंब परिधन मुनिचीरा ॥
 तरुन अरुन अंबुज सम चरना । नख दुति भगत हृदय तम हरना
 भुजग भूति भूषन त्रिपुरागी । आननु सरद चंद छवि हारी ॥
 दो०—जटा मुकुट सुरसरित सिर लोचन नलिन बिसाल ।

नीलकंठ लावन्यनिधि सोह बालबिधु भाल ॥ १०६॥

बैठे सोह कामरिपु कैसें। धरें सरीर सांतरसु जैसें ॥
 पारवती भल अवसर जानी। गई संभु पहिं मातु भवानी ॥
 जानिप्रिया आदरु अतिकीन्हा। वाम भाग आसनु हर दीन्हा ॥
 बैठीं सिव समीप हरषाई। पूरुव जन्म कथा चित आई ॥
 पति हियँ हेतु अधिक अनुमानी। बिहसि उमा बोलीं प्रिय बानी ॥
 कथा जो सकल लोक हितकारी। सोइ पूछन चह सैलकुमारी ॥
 बिस्वनाथ मम नाथ पुरारी। त्रिभुवन महिमा बिदित तुम्हारी ॥
 चर अरु अचर नाग नर देवा। सकल करहिं पद पंकज सेवा ॥
 दो०—प्रभु समरथ सर्वग्य सिव सकल कला गुन धाम ।

जोग ग्यान बैराग्य निधि प्रनत कलपतरु नाम ॥ १०७ ॥

जौं मो पर प्रसन्न सुखरासी। जानिअ सत्य मोहि निज दासी ॥
 तौ प्रभु हरहु मोर अग्याना। कहि रघुनाथ कथा बिधि नाना ॥
 जासु भवनु सुरतर तर होई। सहि कि दरिद्र जनित दुखु सोई
 ससिभूषन अस हृदयँ बिचारी। हरहु नाथ मम मति भ्रम भारी ॥
 प्रभु जे मुनि परमारथवादी। कहहिं राम कहूँ ब्रह्म अनादी ॥
 सेस सारदा बेद पुराना। सकल करहिं रघुपति गुन गाना ॥
 तुम्ह पुनि राम राम दिन राती। सादर जपहु अनँग आराती ॥
 रामु सो अवध नृपति सुत सोई। कीअज अगुन अलखगति कोई
 दो०—जौं नृप तनय त ब्रह्म किमि नारि बिरहँ मति भोरि ।

देखि चरित महिमा सुनत भ्रमति बुद्धि अति मोरि ॥ १०८ ॥

जौ अनोह ब्यापक प्रभु कीऊ । कहहु बुझाइ नाथ मोहि सोऊ ॥
 अग्य जानि रिस उर जनि धरहू । जेहि विधि मोह भिटै सोइ करहू ॥
 मैं बन दीखि राम प्रभुताई । अति भय विकल न तुम्हहि सुनाई
 तदपि मलिन मन बोधु न आवा । सो फलु भली भाँति हम पावा ॥
 अजहूँ कछु संसउ मन मोरें । करहु कृपा विनवउँ कर जोरें ॥
 प्रभु तब मोहि बहु भाँति प्रबोधा । नाथ सो समुझि करहु जनि क्रोधा
 तब कर अस विमोह अब नाहीं । रामकथा पर रुचि मन माहीं ॥
 कहहु पुनीत राम गुन गाथा । भुजगराज भूपन सुरनाथा ॥
 दो०—बंदउँ पद धरि धरनि सिरु विनय करउँ कर जोरि ।

वरनहु रघुवर बिसद जसु श्रुति सिद्धांत निचोरि ॥ १०९ ॥

जदपि जोषिता नहि अधिकारी । दासी मन क्रम वचन तुम्हारी ॥
 गूढ़उ तत्त्व न साधु दुरावहि । आरत अधिकारी जहँ पावहि ॥
 अति आरति पूछउँ सुरराया । रघुपति कथा कहहु करि दाया ॥
 प्रथम सो कारन कहहु विचारी । निर्गुन ब्रह्म सगुन वपु धारी ॥
 पुनि प्रभु कहहु राम अवतारा । बालचरित पुनि कहहु उदारा ॥
 कहहु जथा जानकी विवाहीं । राज तजा सो दूपन काहीं ॥
 बन बसि कीन्हे चरित अपारा । कहहु नाथ जिमि रावन मारा ॥
 राज बैठि कीन्हीं बहु लीला । सकल कहहु संकर सुखसीला ॥
 दो०—बहुरि कहहु करुनायतन कीन्ह जो अचरज राम ।

प्रजा सहित रघुवंसमनि किमि गवने निज धाम ॥ ११० ॥

पुनि प्रभु कहहु सो तत्त्व बखानी । जेहिं विग्यान मगन मुनि ग्यानी
भगति ग्यान विग्यान विगागा । पुनि सब बरनहु सहित विभागा ॥
औरउ राम रहस्य अनेका । कहहु नाथ अति विमल शिबेका ॥
जो प्रभु मैं पूछा नहिं होई । सोउ दयाल राखहु जनि गोई ॥
तुम्ह विभुवन गुर वेद बखाना । आन जीव पाँवर का जाना ॥
प्रसन्न उमा कै सहज सुहाई । छल बिहीन सुनि सिव मन भाई ॥
हर हियँ रामचरित सब आए । प्रेम पुलक लोचन जल छाए ॥
श्रीरघुनाथ रूप उर आवा । परमानंद अमित सुख पावा ॥

दो०-मगन ध्यानरस दंड जुग पुनि मन बाहेर कीन्ह ।

रघुरति चरित महेस तब हरषित बरनै लीन्ह ॥१११॥

झूठेउ सत्य जाहि बिनु जानें । जिमि भुजंग बिनु रजु पहिचानें ॥
जेहि जानें जग जाइ । हेराई । जागें जथा सपन भ्रम जाई ॥
बंदउँ बालरूप सोइ रामू । सब सिधि सुलभ जपत जिसु नामू
मंगल भवन अमंगल हारी । द्रवउ सो दसरथ अजिर बिहारी ॥
करि प्रनाम रामहि त्रिपुरागी । हरपि सुधा सम गिरा उचारी ॥
धन्य धन्य गिरिराजकुमागी । तुम्ह समान नहिं कोउ उपकारी ॥
पूँछेंहु रघुपति कथा प्रसंगा । सकल लोक जग पावनि गंगा ॥
तुम्ह रघुवीर चरन अनुरागी । कीन्हहु प्रसन्न जगत हित लागी ॥

दो०-राम कृपा तें पारबति सपनेहुँ तव मन माहिं ।

सोक मोह संदेह भ्रम मम बिचार कछु नाहिं ॥११२॥

तदपि असंका कीन्हिहु सोई । कहत सुनत सब कर हित होई ॥
 जिन्ह हरिकथा सुनी नहिं काना । श्रवन रंघ्र अहिभवन समाना ॥
 नयनन्हि संत दरस नहिं देखा । लोचन मोरपंख कर लेखा ॥
 ते सिर कटु तुंवरि समतूला । जे न नमत हरि गुर पद मूला ॥
 जिन्ह हरिभगति हृदयँ नहिं आनी । जीवत सब समान तेइ प्रानी ॥
 जो नहिं करइ राम गुन गाना । जीह सो दादुर जीह समाना ॥
 कुलिस कठोर निठुर सोइ छाती । सुनि हरिचरित न जो हरषाती ॥
 गिरिजा सुनहु राम कै लीला । सुर हित दनुज त्रिमोहनसीला ॥

दो०—रामकथा सुरधेनु सम सेवत सब सुख दानि ।

सतसमाज सुरलोक सब को न सुनै अस जानि ॥११३॥

रामकथा सुंदर कर तारी । संसय बिहग उड़ावनिहारी ॥
 रामकथा कलि बिटप कुटारी । सांदर सुनु गिरिराजकुमारी ॥
 राम नाम गुन चरित सुहाए । जनमकरम अगनित श्रुति गाए ॥
 जथा अनंत राम भगवाना । तथा कथा कीरति गुन नाना ॥
 तदपि जथा श्रुत जसि मति मोरी । कहिहहुँ देखि प्रीति अति तोरी ॥
 उमा प्रसन्न तव सहज सुहाई । सुखद संतसंमत मोहि भाई ॥
 एक बात नहिं मोहि सोहानी । जदपि मोह बस कहेहु भवानी ॥
 तुम्ह जो कहा राम कोउ आना । जेहि श्रुति गाव धरहिं मुनि ध्याना ॥

दो०—कहहिं सुनहिं अस अधम नर ग्रसे जो मोह पिसाच ।

पाषंडी हरि पद बिमुख जानहिं झूठ न साच ॥११४॥

अग्य अकोविद अंध अभागी । काई विषय मुकुर मन लागी ॥
 लंपट कपटी कुटिल विसेपी । सपनेहुँ संतसभा नहिं देखी ॥
 कहहिं ते वेद असंमत बानी । जिन्ह केँ सूझ लाभ नहिं हानी ॥
 मुकुर मलिन अरु नयन बिहीना । राम रूप देखहिं किमि दीना ॥
 जिन्ह केँ अगुन न सगुन विवेका । जल्पहिं कल्पित बचन अनेका ॥
 हरिमाया बस जगत भ्रमाहीं । तिन्हहि कहत कछु अघटित नाहीं ॥
 बातुल भूत बिवस मतवारे । ते नहिं बोलहिं बचन बिचारे ॥
 जिन्ह कृत महामोह मद पाना । तिन्ह कर कहा करिअ नहिं काना ॥
 सो०—अस निज हृदयँ विचारि तजु संसय भजु राम पद ।

सुनु गिरिराज कुमारि भ्रम तम रबि कर बचन मम ॥ ११५ ॥

सगुनहि अगुनहि नहिं कछु भेदा । गाँवहिं मुनि पुरान बुध वेदा ॥
 अगुन अरूप अलख अज जोई । भगत प्रेम बस सगुन सो होई ॥
 जो गुन रहित सगुन सोइ कैसैं । जलु हिम उपल बिलग नहिं जैसैं ॥
 जामु नाम भ्रम तिमिर पतंगा । तेहि किमि कहिअ विमोह प्रसंगा ॥
 राम सच्चिदानंद दिनेसा । नहिं तहँ मोह निमा लवलेसा ॥
 सहज प्रकासरूप भगवाना । नहिं तहँ पुनि विग्यान बिहाना ॥
 हरष विषाद ग्यान अग्याना । जीव धर्म अहमिति अभिमाना ॥
 राम ब्रह्म व्यापक जग जाना । परमानंद परेस पुराना ॥

दो०—पुरुष प्रलिद्ध प्रकास निधि प्रगट परावर नाथ ।

रघुकुलमनि मम स्वामि सोइ कहि सिव नायउ माथ ॥ ११६ ॥

निज भ्रम नहिं समुझहिं अग्यानी । प्रभु पर मोह धरहिं जड़ प्रानी ॥
 जथा गगन घन पटल निहारी । झाँपेउ भानु कहहिं कुबिचारी ॥
 चितव जो लोचन अंगुलि लाँएँ । प्रगट जुगल समि तेहि के भाँएँ ॥
 उमा राम बिषइक अस मोहा । नभ तम धूम धूरि जिमि सोहा ॥
 बिषय करन सुर जीव समेता । सकल एरु तें एक सचेता ॥
 सब कर परम प्रकासक जोई । राम अनादि अवधपति सोई ॥
 जगत प्रकास्य प्रकासक रानू । मायाधीस ग्यान गुन धामू ॥
 जासु सत्यता तें जड़ माया । भास सत्य इव मोह सहाया ॥
 दो०—रजत सीप महुँ भास जिमि जथा भानु कर बारि ।

जदपि मृषा तिहुँ काल सोइ भ्रम न सकइ कोउ टारि ॥ ११७ ॥
 एहि बिधि जग हरि आश्रित रहई । जदपि असत्य देत दुख अहई
 जौं सपनें सिर काटै कोई । बिनु जागें न दूरि दुख होई ॥
 जासु कृपाँ अस भ्रम मिटि जाई । गिरिजा सोइ कृपाल रघुराई ॥
 आदि अंत कोउ जासु न पावा । मति अनुमानि निगम अस गावा
 बिनु पद चलइ सुनइ बिनु काना । कर बिनु करम करइ बिधि नाना
 आनन रहित सकल रस भोगी । बिनु बानी ब्रकता बड़ जोगी ॥
 तन बिनु परस नयन बिनु देखा । ग्रहइ घ्रान बिनु बास असेषा ॥
 असि सब भाँति अलौकिक करनी । महिमा जासु जाइ नहिं बरनी ॥
 दो०—जेहि इमि गावहिं बेद बुध जाहि धरहिं मुनि ध्यान ।

सोइ दसरथ सुत भगत हित कोसलपति भगवान ॥ ११८ ॥

सोइ प्रभु मेर चराचर स्वामी । रघुवर सब उर अंतरजामी ॥
 बिबसहुँ जासु नाम नर कहहीं । जनम अनेक रचित अघ दहहीं ॥
 सादर सुमिन जे नर करहीं । भव बारिधि गोपद इव तरहीं ॥
 राम सो परमात्मा भवानी । तहँ भ्रम अति अविहित तव बानी ॥
 अस संसय आनत उर माहीं । ग्यान विगग सकल गुन जाहीं ॥
 सुनिसिव के भ्रम भंजन बचना । मिटि गै सब कुतरक कै रचना ॥
 भइ रघुपति पद प्रीति प्रतीती । दारुन असंभावना बीती ॥
 दो०- पुनि पुनि प्रभु पद कमल गहि जोरि पंकरुह पानि ।

बोलीं गिरिजा बचन बर मनहुँ प्रेम रस सानि ॥११९॥
 ससि कर सम सुनि गिरा तुम्हारी । मिटा मोह सरदातप भागी ॥
 तुम्ह कृपाल सबु संसउ हरेऊ । राम स्वरूप जानि मोहि परेऊ ॥
 नाथ कृपाँ अब गयउ विषादा । सुखी भयउँ प्रभु चरन प्रसादा ॥
 अब मोहि आपनि किंकरि जानी । जदपि सहज जड़ नारि अयानी ॥
 प्रथम जो मैं पूछा सोइ कहहू । जौं मो पर प्रसन्न प्रभु अहहू ॥
 राम ब्रह्म चिनमय अविनासी । सर्व रहित सब उर पुर बासी ॥
 नाथ धरेउ नरतनु केहि हेतू । मोहि समझाइ कहहु बृषकेतू ॥
 उमा बचन सुनि परम विनीता । रामकथा पर प्रीति पुनीता ॥
 दो०- हियँ हरषे कामारि तब संकर सहज सुजान ।

बहु बिधि उमहि प्रसंसि पुनि बोले कृपानिधान ॥१२०(क)॥

नवाह्नारायण, पहला विश्राम

मासपारायण, चौथा विश्राम

सो०—सुनु सुभ कथा भवानि रामचरितमानस बिमल ।

कहा भुसुंढि बखानि सुना बिहग नायक गरुड़ ॥ १२० (ख)॥

सो संवाद उदार जेहि बिधि भा आगें कहब ।

सुनहु राम अवतार चरित परम सुंदर अनघ ॥ १२० (ग)॥

हरि गुन नाम अपार कथा रूप अगनित अमित ।

मैं निज मति अनुसार कहउँ उमा सादर सुनहु ॥ १२० (घ)॥

सुनु गिरिजा हरि चरित सुहाए । विपुल बिसद निगमागम गाए ॥

हरि अवतार हेतु जेहि होई । इदमित्थं कहि जाइ न सोई ॥

राम अतर्क्य बुद्धि मन बानी । मत हमार अस सुनहि सयानी ॥

तदपि संत मुनि वेद पुराना । जस कछु कहहिं स्वमति अनुमाना ॥

तस मैं सुमुखि सुनावउँ तोही । समुझि परइ जस कारन मोही ॥

जब जब होइ धरम कै हानी । बाढ़हिं असुर अधम अभिमानी ॥

करहिं अनीति जाइ नहिं बरनी । सीदहिं विप्र धेनु सुर धरनी ॥

तब तब प्रभु धरि विविध सरीरा । हरहिं कृपानिधि सज्जन पीरा ॥

दो०—असुर मारि थापहिं सुरन्ह राखहिं निज श्रुति सेतु ।

जग बिस्तारहिं बिसद जस राम जन्म कर हेतु ॥ १२१॥

सोइ जस गाइ भगत भव तरेहीं । कृपासिंधु जन हित तनु धरहीं ॥

राम जनम के हेतु अनेका । परम विचित्र एक तैं एका ॥

जनम एक दुइ कहउँ बखानी । सावधान सुनु सुमति भवानी ॥

CC-0. Nanaaji Deshmukhi Library, D. P. Jamma. An eGangotri Initiative

विप्र श्राप तें दूनउ भाई । तामस असुर देह तिन्ह पाई ॥
 कनककसिपु अरु हाटकलोचन । जगत विदित सुरपति मद मोचन
 बिजई समर बीर बिख्याता । धरि बराह वपु एक निपाता ॥
 होइ नरहरि दूसर पुनि मारा । जन प्रह्लाद सुजस बिस्तारा ॥
 दो०—भए निसाचर जाइ तेइ महाबीर बलवान ।

कुंभकरन रावन सुभट सुर बिजई जग जान ॥१२२॥
 मुकुत न भए हते भगवाना । तीनि जनम द्विजवचन प्रवाना ॥
 एक बार तिन्ह के हित लागी । धरेउ सरीर भगत अनुरागी ॥
 कस्यप अदिति तहाँ पितु माता । दसरथ कौसल्या बिख्याता ॥
 एक कल्प एहि बिधि अवतारा । चरित पवित्र किए संसारा ॥
 एक कल्प सुर देखि दुखारे । समर जलंधर सन सब हारे ॥
 संभु कीन्ह संग्राम अपारा । दनुज महाबल मरइ न मारा ॥
 परम सती असुराधिप नारी । तेहिं बल ताहि न जितहिं पुरारी ॥
 दो०—छल करि टारेउ तासु व्रत प्रभु सुर कारज कोन्ह ।

जब तेहिं जानेउ मरम तब श्राप कोप करि दीन्ह ॥१२३॥
 तासु श्राप हरि दीन्ह प्रमाना । कौतुकनिधि कृपाल भगवाना ॥
 तेहाँ जलंधर रावन भयऊ । रन हतिराम परम पद दयऊ ॥
 एक जनम कर कारन एहा । जेहि लागि राम धरी नरदेहा ॥
 प्रति अवतार कथा प्रभु केरी । सुनु मुनि बरनी कबिन्ह घनेरी ॥
 नारद श्राप दीन्ह एक बारा । कल्प एक तेहि लागि अवतारा ॥

गिरिजा चकित भई सुनि बानी । नारद विष्णुभगत पुनि ग्यानी ॥
कारन कवन श्राप मुनि दीन्हा । का अपराध रमापति कीन्हा ॥
यह प्रसंग मोहि कहहु पुरारी । मुनि मन मोह आचरज भारी ॥

दो०—बोले बिहसि महेस तब ग्यानी मूढ़ न कोइ ।

जेहि जस रघुपति करहि जब सो तस तेहि छन होइ ॥१२४(क)॥

सो०—कहउँ राम गुन गाथ भरद्वाज सादर सुनहु ।

भव भंजन रघुनाथ भजु तुलसी तजि मान मद ॥१२४॥(ख)॥

हिमगिरि गुहा एक अतिपावनि । वह समीप सुरसरी सुहावनि ॥

आश्रम परम पुनीत सुहावा । देखि देवरिषि मन अति भावा ॥

निरखि सैल सरि विपिन विभागा । भयउ रमापति पद अनुरागा ॥

सुमिरत हरिहि श्राव गति बाधी । सहज विमल मन लागि समाधी ॥

मुनि गति देखि सुरेस डेराना । कामहि बोलि कीन्ह सनमाना ॥

सहित सहाय जाहु मम हेतू । चलेउ हरषि द्वियँ जलचरकेतू ॥

सुनासीर मन महुँ असि त्रासा । चहत देवरिषिमम पुर बासा ॥

जे कामी लोलुप जग माहीं । कुटिल काक इव सबहि डेराहीं ॥

दो०—सूख हाड़ लै भाग सउ स्वान निरखि मृगराज ।

छोनि लेइ जनि जान जड़ तिमि सुरपतिहि न लाज ॥१२५॥

तेहि आश्रमहिं मदन जब गयऊ । निज मायाँ बसंत निरमयऊ ॥

कुसुमित विविध विटप बहुरंगा । कूजहिं कोकिल गुंजहिं भृंगा ॥

चली सुहावनि विविध बग्यानी । काम भूषावु गवधपतिहारी ॥

रंभादिक सुरनारि नवीना । सकल असमसर कला प्रवीना ॥
 करहिं गान बहु तान तरंगा । बहुविधि क्रीडहिं पानि पतंगा ॥
 देखि सहाय मदन हरषाना । कीन्हैसि पुनि प्रपंच विधि नाना
 काम कला कछु मुनिहि न व्यापी । निज भयँ डरेउ मनोभव पागी ॥
 सीम कि चाँपि सकइ कोउ तामू । बड़ रखवार रमापति जासू ॥
 दो०—सहित सहाय समीत अति मानि हारि मन मैन ।

गहेसि जाइ मुनि चरन तब कहि सुठि आरत बैन ॥ १२६ ॥

भयउ न नारद मन कछु रोषा । कहि प्रिय बचन काम परितोषा
 नाइ चरन सिरु आयसु पाई । गयउ मदन तब सहित सहाई ॥
 मुनि सुसीलता आपनि करनी । सुरपति सभाँ जाइ सब वरनी ॥
 मुनि सब कैं मन अचरजु आवा । मुनिहि प्रसंसि हरिहि सिरु नावा
 तब नारद गवने सिव पाहीं । जिता काम अहमिति मन माहीं
 मार चरित संकरहि सुनाए । अतिप्रिय जानि महेस सिखाए ॥
 बार बार त्रिनवउँ मुनि तोही । जिमि यह कथा सुनायहु मोही ॥
 तिमि जनि हरिहि सुनावहु कवहूँ । चलेहुँ प्रसंग दुराएहु तबहूँ ॥
 दो०—संभु दीन्ह उपदेस हित नहिं नारदहि सोहान ।

भरद्वाज कौतुक सुनहु हरि इच्छा बलवान ॥ १२७ ॥

राम कीन्ह चाहहिं सोइ होई । करै अन्यथा अम नहिं कोई ॥
 संभु बचन मुनि मन नहिं भाए । तब विरंचि केलोक सिधाए ॥

पक नाह करतल वर बीना । गावत हरि गुन गान प्रवीना ॥

छीरसिंधु गवने मुनिनाथा । जहँ बस श्रीनिवास श्रुतिमाथा ॥
 हरषि मिले उठि रमानिकेता । बैठे आसन रिषिहि समेता ॥
 बोले बिहसि चराचर राया । बहुते दिनन कीन्हि मुनि दाया ॥
 काम चरित नारद सब भाषे । जद्यपि प्रथम बरजि सिवँ राखे ॥
 अति प्रचंड रघुपति कै माया । जेहि न मोह अस को जग जाया ॥
 दो०—रूख बदन करि बचन मृदु बोले श्रीभगवान ।

तुम्हरे सुमिरन तें मिटहिं मोह मार मद मान ॥१२८॥

सुनु मुनि मोह होइ मन ताकें । ग्यान विराग हृदय नहिं जाकें ॥
 ब्रह्मचरज व्रत रत मतिधीरा । तुम्हहि कि करइ मनोभव पीरा ॥
 नारद कहे उ सहित अभिमाना । कृपा तुम्हारि सकल भगवाना ॥
 करुनानिधि मन दीख विचारी । उर अंकुरे उ गरब तरु भारी ॥
 बेगि सो मैं डारिहउँ उवारी । पन हमार सेवक हितकारी ॥
 मुनि कर हित मम कौतुक होई । अवसि उपाय करबि मैं सोई ॥
 तब नारद हरि पद सिर नाई । चले हृदयँ अहमिति अधिकाई ॥
 श्रीपति निज माया तब प्रेरी । सुनहु कठिन करनी तेहि केरी ॥
 दो०—बिरचेउ मग महुँ नगर तेहिं सन जोजन बिस्तार ।

श्रीनिवासपुर तें अधिक रचना बिबिध प्रकार ॥१२९॥

बसहिं नगर सुंदर नर नारी । जनु बहु मनसिज रति तनुधारी ॥
 तेहिं पुर बसइ सीलनिधि राजा । अगनित हय गय सेन समाजा ॥

विस्वमोहनी तासु कुमारी । श्री विमोह जिसु रूपु निहारी ॥
 सोइ हरिमाया सब गुन खानी । सोभा तासु कि जाइ बखानी ॥
 करइ स्वयंवर सो नृपबाला । आए तहँ अगनित महिपाला ॥
 मुनि कौतुकी नगर तेहिं गयऊ । पुरवासिन्ह सब पूछत भयऊ ॥
 सुनि सब चरित भूपगृहँ आए । करि पूजा नृप मुनि बैठाए ॥
 दो०—आनि देखार्इ नारदहि भूपति राजकुमारि ।

कहहु नाथ गुन दोष सब एहि के हृदयँ बिचारि ॥१३०॥

देखि रूप मुनि विरति बिसारी । बड़ी बार लगि रहे निहारी ॥
 लच्छन तासु बिलोकि भुलाने । हृदयँ हरष नहिं प्रगट बखाने ॥
 जो एहि बरइ अमर सोइ होई । समरभूमि तेहि जीत न कोई ॥
 सेवहिं सकल चराचर ताही । बरइ सीलनिधि कन्या जाही ॥
 लच्छन सब बिचारि उर राखे । कछुक बनाइ भूप सन भाषे ॥
 सुता सुलच्छन कहि नृप पाहीं । नारद चले सोच मन माहीं ॥
 करौं जाइ सोइ जतन बिचारी । जेहि प्रकार मोहि बरै कुमारी ॥
 जप तप कछु न होइ तेहि काला । हे विधि मिलइ कवन विधि बाला ॥
 दो०—एहि अवसर चाहिअ परम सोभा रूप बिसाल ।

जो बिलोकि रीझै कुअँरि तब मेलै जयमाल ॥१३१॥

हरि सन मागौं सुंदरताई । होइहि जात गहर अति भाई ॥
 मोरें हित हरि सम नहिं कोऊ । एहि अवसर सहाय सोइ होऊ ॥

नहुविधि विनय कीन्हि तेहि काला । प्रगटेउ प्रभु कौतुकी कृपाला ॥

प्रभु बिलोकि मुनि नयन जुड़ाने । होइहि काजु हिँ हारपाने ॥
 अति आरति कहि कथा सुनाई । करहु कृपा करि होहु सहाई ॥
 आपन रूप देहु प्रभु मोही । आन भौंति नहिँ पायौ ओही ॥
 जेहि बिधि नाथ होइ हित मोरा । करहु सो बेगि दास मैं तोरा ॥
 निज माया बल देखि बिसाळा । हियँ हँसि बोले दीनदयाला ॥
 दो०-जेहि बिधि होइहि परम हित नारद सुनहु तुम्हार ।

सोइ हम करब न आन कछु बचन न मृषा हमार ॥१३२॥

कुपथ माग रुज व्याकुल रोगी । बैद न देइ सुनहु मुनि जोगी ॥
 एहि बिधि हित तुम्हार मैं ठयऊ । कहि अस अंतरहित प्रभु भयऊ
 माया बिस भए मुनि मूढ़ा । समुझी नहिँ हरि गिरा निगूढ़ा ॥
 गवने तुरत तहाँ रिपिराई । जहाँ स्वयंवर भूमि बनाई ॥
 निज निज आसन बैठे राजा । बहु बनाव करि सहित समाजा ॥
 मुनि मन हरप रूप अति मोरें । मोहि तजि आनहि बरिहि न भोरें
 मुनि हित कारन कृपानिधाना । दीन्ह कुरूप न जाइ बखाना ॥
 सो चरित्र लखि काहुँ न पावा । नारद जानि सबहिँ सिर नावा ॥
 दो०-रहे तहाँ दुइ रुद्र गन ते जानहि सब भेउ ।

बिप्रबेष देखत फिरहिँ परम कौतुकी तेउ ॥१३३॥

जेहिँ समाज बैठे मुनि जाई । हृदयँ रूप अहमिति अधिकारि ॥
 तहँ बैठे महेस गन दोऊ । बिप्रबेष गति लखइ न कोऊ ॥
 करहिँ कूटि नारदहि सुनाई । नीकि दीन्हि हरि सुंदरताई ॥

रीझिहि राजकुँरि छवि देखी । इन्हहि बरिहि हरि जानि बिसेपी
मुनिहि मोह मन हाथ पराएँ । हँसहि संभु गन अति सचु पाएँ ॥
जदपि सुनिहि मुनि अटपटि बानी । समुझि न परइ बुद्धि भ्रम सानी
काहुँ न लखा सो चरित बिसेपा । सो सरूप नृप कन्याँ देखा ॥
मर्कट बदन भयंकर देही । देखत हृदयँ क्रोध भा तेही ॥
दो०--सखीं संग लै कुँरि तब चलि जनु राजमराल ।

देखत फिरइ महीप सब कर सरोज जयमाल ॥१३४॥

जेहि दिनि बैठे नारद फूली । सो दिसि तेहिं न बिलोकी भूली ॥
पुनि पुनि मुनि उकसहि अकुलाहीं । देखि दसा हर गन मुसुकाहीं
धरि नृपतनु तहँ गयउ कृपाला । कुँरि हरपि मेलेउ जयमाला ॥
दुलहिनि लै गे लच्छिनिवासा । नृपसमाज सब भयउ निरासा ॥
मुनि अति बिकल मोहँ मति नाठी । मनि गिरि गई छूटि जनु गाँठी
तब हर गन बोले मुसुकाई । निज मुख मुकुर बिलोकहु जाई ॥
अस कहि दोउ भागे भयँ भारी । बदन दीख मुनि बारि निहारी ॥
बेषु बिलोकि क्रोध अति बाढ़ा । तिन्हहि सराप दीन्ह अति गाढ़ा ॥

दो०--हीहु निसाचर जाइ तुम्ह कपटी पापी दोउ ।

हँसेहु हमहि सो लेहु फल बहुरि हँसेहु मुनि कोउ ॥१३५॥

पुनि जल दीख रूप निज पावा । तदपि हृदयँ संतोष न आवा ॥
फरकत अधर कोप मन माहीं । सपदि चले कमलापति पाहीं ॥
देहुँ श्राव कि मरिहुँ जाई । जगत मोरि उपहास कराई ॥

बीचहिं पंथ मिले दनुजारी । संग रमा सोइ राजकुमारी ॥
 बोले मधुर वचन सुरसाई । मुनि कहँ चले विकल कीनाई ॥
 सुनत वचन उपजा अति क्रोधा । माया बस न रहा मन बोधा ॥
 पर संपदा सकहु नहिं देखी । तुम्हरे इरिषा कपट विसेषी ॥
 मथत सिंधु रुद्रहि बौरायहु । सुरन्ह प्रेरे विष पान करायहु ॥
 दो०—असुर सुरा विष संकरहि आपु रमा मनि चारु ।

स्वारथ साधक कुटिल तुम्ह सदा कण्ठ व्यवहारु ॥१३६॥

परम स्वतंत्र न सिर पर कोई । भावइ मनहि करहु तुम्ह सोई ॥
 भलेहि मंद मंदेहि भल करहु । विसमय हरष न हियँ कछु धरहु ॥
 डहकि डहकि परिचेहु सब काहु । अति असंक मन सदा उछाहु ॥
 करम सुभासुभ तुम्हहि न याधा । अवल गि तुम्हहि न काहूँ साधा ॥
 भले भवन अब बायन दीन्हा । पावहुगे फल आपन कीन्हा ॥
 बंचेहु मोहि जवनि धरि देहा । सोइ तनु धरहु श्राप मम एहा ॥
 कपि आकृति तुम्ह कीन्हि हमारी । करिहहिं कीस सहाय तुम्हारी ॥
 मम अपकार कीन्ह तुम्ह भारी । नारि बिरहँ तुम्ह होव दुखारी ॥
 दो०—श्राप सोस धरि हरषि हियँ प्रभु बहु बिनती कीन्हि ।

निज माया कै प्रबलता करषि कृपानिधि लीन्हि ॥१३७॥

जब हरि माया दूर निवारी । नहिं तहँ रमा न राजकुमारी ॥
 तब मुनि अति सभित हरि चरना । गहे पाहि प्रनतारति हरना ॥
 मृषा होउ मम श्राव कृपाला । मम इच्छा कह दीनदयाला ॥

मैं दुर्बचन कहे बहुतेरे । कह मुनि पाप मिटिहि किमि मेरे ॥
जपहु जाइ संकर सत नामा । होइहि हृदयँ तुरत विश्रामा ॥
कोउ नहिं सिव समान प्रिय मोरें । असि परतीति तजहु जनि भोरें ॥
जेहि पर कृपा न करहिं पुरारी । सो न पाव मुनि भगति हमारी ॥
अस उर धरि महि बिचरहु जाई । अब न तुम्हहि माया निअराई ॥
दो०—बहुबिधि मुनिहि प्रबोधि प्रभु तब भए अंतरधान ।

सत्यलोक नारद चले करत राम गुन गान ॥१३८॥
हर गन मुनिहि जात पथ देखी । बिगतमोह मन हरष बिसेषी ॥
अति सभित नारद पहिं आए । गहि पद आरत बचन सुनाए ॥
हर गन हम न बिप्र मुनिराया । बड़ अपराध कीन्ह फल पाया ॥
श्राप अनुग्रह करहु कृपाला । बोले नारद दीनदयाला ॥
निसिचर जाइ होहु तुम्ह दोऊ । बैभव बिपुल तेज बल होऊ ॥
भुजबल बिस्व जितव तुम्ह जहिआ । धरिहहिं बिष्णु मनुज तनु तहिआ ॥
समर मरन हरि हाथ तुम्हारा । होइहहु मुकुन न पुनि संसारा ॥
चले जुगल मुनिपद सिर नाई । भए निसाचर कालहि पाई ॥
दो०—एक कल्प एहि हेतु प्रभु लीन्ह मनुज अवतार ।

सुर रंजन सज्जन सुखद हरि भंजन भुबि भार ॥१३९॥
एहि विधि जनम करम हरि केरे । सुंदर सुखद बिचित्र घनेरे ॥
कल्प कल्प प्रति प्रभु अवतरहीं । चारु चरित नानाविधि करहीं ॥
तब तब कथा मुनीसन्ह गाई । परम पुनीत प्रबंध बनाई ॥

त्रिविध प्रसंग अनूर बखाने । करहिं न सुनि आचरजु सदाने ॥
 हरि अनंत हरिकथा अनंता । कहहिं सुनिहि बहुविधि सब संता
 रामचंद्र के चरित सुहाए । कल्प कौटिलि जाहिं न गाए ॥
 यह प्रसंग मैं कहा भवानी । हरिमायाँ मोहहिं मुनि ग्यानी ॥
 प्रभु कौतुकी प्रनत हितकारी । सेवत सुलभ सकल दुख हारी ॥
 सो०—सुर नर मुनि कोउ नाहिं जेहि न मोह माया प्रबल ।

अस बिचारि मन माहिं भजिअ महामाया पतिहि ॥१४०॥

अपर हेतु सुनु सैलकुमारी । कहउँ विचित्र कथा विस्तारी ॥
 जेहि कारन अज अगुन अरूपा । ब्रह्म भयउ कोसलपुर भूपा ॥
 जो प्रभु विपिन फिरत तुम्ह देखा । बंधु समेत धरें मुनिबंषा ॥
 जासु चरित अवलोकि भवानी । सती सरीर रहिहु बौरानी ॥
 अजहुँ न छाया मिटति तुम्हारी । तासु चरित सुनु भ्रम रुज हारी
 लीला कीन्हि जो तेहिं अवतारा । सो सब कहिहउँ मति अनुसारा ॥
 भरद्वाज सुनि संकर बानी । सकुचि सप्रेम उमा मुसुकानी ॥
 लगे बहुरि बरनै वृषकेतू । सो अवतार भयउ जेहि हेतू ॥
 दो०—सो मैं तुम्ह सन कहउँ सब सुनु मुनोस मन लाइ ।

राम कथा कलि मल हरनि मंगल करनि सुहाइ ॥१४१॥

स्वायंभू मनु अरु सतरूपा । जिन्ह तें भै नरसृष्टि अनूपा ॥
 दंपति धरम आचरन नीका । अजहुँ गाव श्रुति जिन्ह कै लीका
 नृप उत्तानपाद सुत तासु । भुव हरि भगत भयउ सुत जासु

लघु सुत नाम प्रियव्रत ताही । वेद पुगन प्रसंसहिं जाही ॥
 देवहूति पुनि तासु कुमारी । जो मुनि कर्म कै प्रिय नारी ॥
 आदिदेव प्रभु दीनदयाला । जठर धरेउ जेहिं कपिल कृपाला
 सांख्य सास्त्र जिन्ह प्रगट बखाना । तत्त्व विचार निपुन भगवाना ॥
 तेहिं मनु राज कीन्ह बहु काला । प्रभु आयसु सब विधि प्रतिपाला
 सो०-होइ न बिषय बिराग भवन बसत भा चौथपन ।

हृदय बहुत दुख लाग जनम गयउ हरिभगति बिनु ॥ १४२ ॥

वरवस राज सुतहि तब दीन्हा । नारि समेत गवन बन कीन्हा ॥
 तीरथ वर नैमिष विख्याता । अति पुनीत माधक सिधि दाता ॥
 बसहिं तहाँ मुनि सिद्ध समाजा । तँहिं हरि चलेउ मनु राजा ॥
 पंथ जात सोहहिं मतिधीरा । ग्यान भगति जनु धरें सरीरा ॥
 पहुँचे जाइ धेनुमति तीरा । हरि नहाने निरमल नीरा ॥
 आए मिलन सिद्ध मुनि ग्यानी । धरम धुरंधर नृपरिषि जानी ॥
 जहँ जहँ तीरथ रहे सुहाए । मुनिन्ह सकल सादर करवाए ॥
 कृस सरीर मुनिपट परिधाना । सत समाज नित सुनहिं पुगना ॥
 दो०-द्वादस अच्छर मंत्र पुनि जपहिं सहित अनुराग ।

बासुदेव पद पंकरुह दंपति मन अति लाग ॥ १४३ ॥

करहिं अहार साक फल कंदा । सुमिरहिं ब्रह्म सच्चिदानंदा ॥
 पुनि हरि हेतु करन तप लागे । बारि आधार मूल फल त्यागे ॥
 उर अभिलाष निरंतर होई । देखिअ नयन परम प्रभु सोई ॥

अगुन अखंड अनंत अनादी । जेहि चिंतहिं परमारथवादी ॥
 नेति नेति जेहि वेद निरूपा । निजानंद निरूपाधि अनूपा ॥
 संभु विरंचि विष्णु भगवाना । उपजहिं जासु अंस तें नाना ॥
 ऐसेउ प्रभु सेवक बस अहई । भगत हेतु लीलातनु गहई ॥
 जौ यह बचन सत्य श्रुति भाषा । तौ हमार पूजहिं अभिलाषा ॥
 दो०—एहि विधि बीते बरष षट सहस बारि आहार ।

संबत सप्त सहस्र पुनि रहे समोर अघार ॥१४४॥
 बरष सहस दस त्यागेउ सोऊ । ठाढ़े रहे एक पद दोऊ ॥
 विधि हरि हर तप देखि अपारा । मनु समीप आए बहु बारा ॥
 मागहु बर बहु भाँति लोभाए । परम धीर नहिं चलहिं चलाए ॥
 अस्थिमात्र होइ रहे सरीरा । तदपि मनाग मनहिं नहिं पीरा ॥
 प्रभु सर्वग्य दास निज जानी । गति अनन्य तापस नृप रानी ॥
 मागु मागु बरु भै नभ बानी । परम गभीर कृपामृत सानी ॥
 मृतक जिआवनि गिरा सुहाई । श्रवन रंघ्र होइ उर जब आई ॥
 दृष्टपुष्ट तन भए सुहाए । मानहुँ अबहिं भवन ते आए ॥
 दो०—श्रवन सुधा सम बचन सुनि पुलक प्रफुल्लित गात ।

बोले मनु करि दंडवत प्रेम न हृदयँ समात ॥१४५॥
 सुनु सेवक सुरतरु सुरधेनू । विधि हरि हर बंदित पद रेनू ॥
 सेवत सुलभ सकल सुखदायक । प्रनतपाल सचराचर नायक ॥
 जौ अनाथ हित हम पर नेहू । तौ प्रसन्न होइ यह बर देहू ॥

जो सरूप बस सिव मन माहीं । जेहि कारन मुनि जतन कराहीं ॥
जो भुमुंडि मन मानस हंसा । सगुन अगुन जेहि निगम प्रसंसा ॥
देखहिं हम सो रूप भरि लोचन । कृपा करहु प्रनतारति मोचन ॥
दंति वचन परम प्रिय लागे । मृदुल विनीत प्रेम रस पागे ॥
भगत बछल प्रभु कृपानिधाना । बिस्ववास प्रगटे भगवाना ॥
दो०—नील सरोरुह नील मनि नील नीरधर स्याम ।

लाजहिं तन सोभा निरखि कोटि कोटि सतकाम ॥१४६॥

सरद मयंक बदन छवि सींवा । चारु कपोल चिबुक दर ग्रीवा ॥
अधर अरुन रद सुंदर नासा । विधु कर निकर विनिंदक हासा ॥
नव अंबुज अंबक छवि नीकी । चितवनि ललित भावँती जी की ॥
भृकुटि मनोज चाप छवि हारी । तिलक ललाट पटल दुतिकारी ॥
कुंडल मकर मुकुट सिर भ्राजा । कुटिल केस जनु मधुप समाजा ॥
उर श्रीवत्स रुचिर बनमाला । पदिक हार भूषन मनिजाला ॥
केहरि कंधर चारु जनेऊ । बाहु विभूषन सुंदर तेऊ ॥
करि कर सरिस सुभग भुजदंडा । कटि निपंग कर सर कोदंडा ॥

दो०—तड़ित विनिंदक पीत पट उदर रेख बर तीनि ।

नाभि मनोहर लेति जनु जमुन भवँर छवि छोनि ॥१४७॥

पद राजीव बरनि नहिं जाहीं । मुनि मन मधुप बसहिं जेन्ह माहीं ॥
बाम भाग सोभति अनुकूला । आदिसक्ति छविनिधि जगमूला ॥
जामु अंस उपजहिं गुन खानी । अगनित लच्छि उमा ब्रह्मानी ॥

भृकुटि विलास जासु जग होई । राम बाम दिसि सीता सोई ॥
 छविसमुद्र हरि रूप बिलोकी । एकटक रहे नयन पट रोकी ॥
 चितवहिं सादर रूप अनूपा । तृप्त न मानहिं मनु सतरूपा ॥
 हरष वियस तन दसा भुलानी । परे दंड इव गहि पद पानी ॥
 सिर परसे प्रभु निज कर कंजा । तुरत उठाए करुनापुंजा ॥
 दो०-बोले कृपानिधान पुनि अति प्रसन्न मोहि जानि ।

मागहु बर जोइ भाव मन महादानि अनुमानि ॥१४८॥

सुनि प्रभु बचन जोरि जुग पानी । धरि धोरजु बोली मृदु बानी ॥
 नाथ देखि पद कमल तुम्हारे । अब पूरे सब काम हमारे ॥
 एक लालसा बड़ि उर माहीं । सुगम अगम कहि जाति सो नाहीं ॥
 तुम्हहि देत अति सुगम गोसाईं । अगम लाग मोहि निज कृपनाई ॥
 जथा दरिद्र बिबुधतरु पाई । बहु संपति मागत सकुचाई ॥
 त्रासु प्रभाउ जान नहिं सोई । तथा हृदयें मम संसय होई ॥
 सो तुम्ह जानहु अंतरजामी । पुरवहु मोर मनोरथ स्वामी ॥
 सकुच बिहाइ मागु नृप मोही । मोरें नहिं अदेय कछु तोही ॥

दो०-दानि सिरोमनि कृपानिधि नाथ कहउँ सतिभाउ ।

चाहउँ तुम्हहि समान सुत प्रभु सन कवन दुराउ ॥१४९॥

देखि प्रीति सुनि बचन अमोले । एवमस्तु करुनानिधि बोले ॥
 आपु सरिस खोजौ कहैं जाई । नृप तव तनय होव मैं आई ॥
 सतरूपहि बिलोकि कर जोरें । देवि मागु बर जो रुचि तोरें ॥

जो बरु नाथ चतुर नृप मागा । सोइ कृपाल मोहि अति प्रिय लागा
प्रभु परंतु सुठि होति दिठाई । जदपि भगत हित तुम्हहि सोहाई ॥
तुम्ह ब्रह्मादि जनक जग स्वामी । ब्रह्म सकल उर अंतरजामी ॥
अस समुझत मन संसय होई । कहा जो प्रभु प्रवान पुनि सोई ॥
जे निज भगत नाथ तव अहहीं । जो सुख पावहिं जो गति लहहीं ॥
दो०—सोइ सुख सोइ गति सोइ भगति सोइ निज धरन सनेहु ।

सोइ बिबेक सोइ रहनि प्रभु हमहि कृपा करि देहु ॥ १५० ॥

सुनि मृदु गूढ़ रुचिर वर रचना । कृपासिंधु बोले मृदु बचना ॥
जो कछु रुचि तुम्हरे मन माहीं । मै सो दीन्ह सब संसय नाहीं ॥
मातु बिबेक अलौकिक तारें । कबहुँ न मिटिहि अनुग्रह मोरें ॥
बंदि चरन मनु कहेउ बहोरी । अवर एक बिनती प्रभु मोगी ॥
सुन भिषइक तव पद रति होऊँ । मोहि बड़ मूढ़ कहै बिन कोऊ ॥
मनि बिनु फनि जिनि जल बिनु मीना । मम जीवन तिमि तुम्हहि अधीना ॥
अस बरु मागि चरन गहि रहेऊ । एवमस्तु करुनानिधि कहेऊ ॥
अब तुम्ह मम अनुमासन मानी । बसहु जाइ सुरपति रजधानी ॥

सो०—तहँ करि भोग बिसाल तात गएँ कछु काल पुनि ।

होइहहु अवध भुआल तब मैं होव तुम्हार सुत ॥ १५१ ॥

इच्छामय नरवेष सँवारें । होइहउँ प्रगट निकेत तुम्हारें ॥
अंसन्ह सहित देह धरि ताता । करिहउँ चरित भगत सुखदाता
जे सुनि सादर नर बड़भागी । भव तरिहहिं ममता मद त्यागी

आदिसक्ति जेहिं जग उपजाया । सोउ अवतरिहि मोरि यह माया
 पुरउत्र मैं अभिचाष तुम्हारा । सत्य सत्य पन सत्य हमारा ॥
 पुनि पुनि अस कहि कृपानिधाना । अंतरधान भए भगवाना ॥
 दंपति उर धरि भगत कृ गला । तेहिं आश्रम निवसे कछु काला ॥
 समय पाइ तनु तजि अनयासा । जाइ कीन्ह अमरावति वासा ॥
 दो०—यह इतिहास पुनीत अति उमहि कही वृषकेतु ।

भरद्वाज सुनु अपर पुनि राम जनम कर हेतु ॥१५२॥

मासपारायण, पाँचवाँ विश्राम

सुनु मुनि कथा पुनीत पुरानी । जो गिरिजा प्रति संभु बखानी ॥
 विस्व विदित एक कैकय देसू । सत्यकेतु तहँ बसइ नरेसू ॥
 धरम धुरंधर नीति निधाना । तेज प्रताप सील बलवाना ॥
 तेहि कैं भए जुगल सुत वीरा । सब गुन धाम महा रनधीरा ॥
 राज धनी जो जेठ सुत आही । नाम प्रतापभानु अस ताही ॥
 अपर सुतहि अरिमर्दन नामा । भुजबल अतुल अचल संग्रामा ॥
 भाइहि भाइहि परम समीती । सकल दोष छल बरजित प्रीती ॥
 जेठे सुतहि राज नृप दीन्हा । हरि हित आपु गवन बन कीन्हा ॥
 दो०—जब प्रतापरवि भयउ नृप फिरो दोहाई देस ।

प्रजा पाल अति बेदबिधि कतहुँ नहीं अघलेस ॥१५३॥

नृप हितकारक सचिव सयाना । नाम धरमरुचि सुक समाना ॥
 सचिव सयान बंधु बलवीरा । आप प्रतापपुंज रनधीरा ॥

सेन संग चतुरंग अपारा । अमित सुभट सब समर जुझारा ॥
 सेन बिलोकि राउ हरपाना । अरु बाजे गइगहे निसाना ॥
 विजय हेतु कटकई बनाई । मुदिन साधि नृप चलेउ बजाई ॥
 जहँ तहँ परीं अनेक लराई । जीते सकल भूप बरिआई ॥
 सप्त दीप भुजबल बस कीन्हे । लै लै दंड छाड़ि नृप दीन्हे ॥
 सकल अवनि मंडल तेहि काला । एक प्रतापभानु महिपाला ॥

दो०—स्वबस बिस्व करि बाहुबल निज पुर कीन्ह प्रबेसु ।

अरथ धरम कामादि सुख सेवइ समयँ नरेसु ॥१५४॥

भूप प्रतापभानु बल पाई । कामधेनु भै भूमि सुहाई ॥
 सब दुख बरजित प्रजा सुखारी । धरमसील सुंदर नर नारी ॥
 सचिव धरमरुचि हरि पद प्रीती । नृप हित हेतु सिखव नित नीती ॥
 गुर सुर संत पितर महिदेवा । करइ सदा नृप सब कै सेवा ॥
 भूप धरम जे वेद बखाने । सकल करइ सादर सुख माने ॥
 दिन प्रति देइ विविध विधि दाना । सुनइ सास्त्र वर वेद पुराना ॥
 नाना बापीं कूप तड़ागा । सुमन बाटिका सुंदर बागा ॥
 विप्रभवन सुरभवन सुहाए । सब तीरथन्ह विचित्र बनाए ॥

दो०—जहँ लगि कहे पुरान श्रुति एक एक सब जाग ।

बार सहस्र सहस्र नृप किए सहित अनुराग ॥१५५॥

हृदयँ न कछु फल अनुरुंधाना । भूप बिबेकी परम सुजाना ॥
 करइ जे धरम करम मन बानी । वासुदेव अर्पित नृप ग्यानी ॥

चढ़ि बर बाजि बार एक राजा । मृगया कर सब साजिसमाजा ॥
 बिंध्याचल गभीर बन गयऊ । मृग पुनीत बहु मारत भयऊ ॥
 फिरत बिभिन्न नृप दीख बराहू । जनु बन दुरेउ ससिहि ग्रसि राहू ॥
 बड़ बिधु नहिं समात मुख माहीं । मनहुँ क्रोध बस उगिलत नाहीं ॥
 कोल कसाल दसन छवि गाई । तनु बिसाल पीवर अधिकाई ॥
 घुरुघुरात हय आरो पाएँ । चकित बिलोकत कान उठाएँ ॥
 दो०—नील महीधर सिखर सम देखि बिसाल बराहू ।

चपरि चलेउ हय सुदुकि नृप हाँकि न होइ निबाहु ॥ १५६ ॥

आवत देखि अधिक रव बाजी । चलेउ बराह मरुत गति भाजी ॥
 तुरत कीन्ह नृप सर संधाना । महि मिलि गयउ बिलोकत बाना ॥
 तकि तकि तीर महीस चलावा । करि छल सुअरसरीर बचावा ॥
 प्रगटत दुरत जाइ मृग भागा । रिस बस भूप चलेउ रँग लागा ॥
 गयउ दूरि घन गहन बराहू । जहँ नाहिन राज बाजि निबाहू ॥
 अति अकेल बन बिपुल कलेसू । तदपि न मृग मग तजइ नरेसू ॥
 कोल बिलोकि भूप बड़ धीरा । भागि पैठ गिरिगुहाँ गभीरा ॥
 अगम देखि नृप अति पछिताई । फिरेउ महावन परेउ भुलाई ॥
 दो०—खेद खिन्न छुद्धित तृषित राजा बाजि समेत ।

खोजत व्याकुल सरित सर जल बिनु भयउ अचेत ॥ १५७ ॥

फिरत बिभिन्न आश्रम एक देखा । तहँ बस नृपति कपट मुनिवेपा ॥
 जासु देस नृप लीन्ह छड़ाई । समर सेन तजि गयउ पराई ॥

समय प्रतापभानु कर जानी । आपन अति असमय अनुमानी ॥
 गयउ न गृह मन बहुत गलानी । मिला न राजहि नृप अभिमानी ॥
 रिस उर मारि रंक जिमि राजा । विपिन बसइ तास कें साजा ॥
 तासु समीप गवन नृप कीन्हा । यह प्रतापरवि तेहिं तव चीन्हा ॥
 राउ वृषित नहिं सौं पहिचाना । देखि सुवेष महामुनि जाना ॥
 उतरि तुरग तें कीन्ह प्रनामा । परम चतुर न कहेउ निज नामा ॥
 दो०—भूपति वृषित बिलोकि तेहिं सरबरु दीन्ह देखाइ ।

मज्जन पान समेत हय कीन्ह नृपति हरषाइ ॥१५८॥
 गै श्रम सकल सुखी नृप भयऊ । निज आश्रम तापस लै गयऊ ॥
 आसन दीन्ह अस्त रवि जानी । पुनि तास बालेउ मृदु बानी ॥
 को तुम्ह कस बन फिरहु अकेलें । सुंदर जुवा जीव परहेलें ॥
 चक्रवर्ति के लच्छन तोरें । देखत दया लागि अति मोरें ॥
 नाम प्रतापभानु अवनीसा । तासु सचिव मैं सुनहु मुनीसा ॥
 फिरत अहेरें परेउँ भुलाई । बड़ें भाग देखेउँ पद आई ॥
 हम कहँ दुर्लभ दरस तुम्हारा । जानत हौं कछु भल होनिहारा ॥
 कह मुनि तात भयउ अँधिआरा । जो जन सत्तरि नगर तुम्हारा ॥

दो०—निसा घोर गंभीर बन पंथ न सुनहु सुजान ।

बसहु आजु अस जानि तुम्ह जाएहु होत बिहान ॥१५९(क)॥

तुलसी जसि भवतव्यता तैसी मिलइ सहाइ ।

आपुनु आवइ ताहि पहिं ताहि तहाँ लै जाइ ॥१५९(ख)॥

भलेहिं नाथ आयसु धरि सीसा । बाँधि तुरग तरु बैठ महीसा ॥
 नृप बहु भाँति प्रसंसेउ ताही । चरन बंदि निज भाग्य सराही ॥
 पुनि बोलेउ मृदु गिरा सुहाई । जानि पिता प्रभु करउँ ढिठाई ॥
 मोहि मुनीस सुत सेवक जानी । नाथ नाम निज कहहु बखानी ॥
 तेहि न जान नृप नृपहि सो जाना । भूप सुहृद सो कपट सयाना ॥
 बैरी पुनि छत्री पुनि राजा । छल बल कीन्ह चहइ निज काजा ॥
 समुझि राजसुख दुखित अराती । अवाँ अनल इव सुलगइ छाती ॥
 सरल बचन नृप के सुनि काना । बयर सँभारि हृदयँ हरषाना ॥
 दो०—कपट बोरि बानी मृदुल बोलेउ जुगुति समेत ।

नाम हमार भिखारि अब निर्धन रहित निकेत ॥१६०॥

कह नृप जे विग्यान निधाना । तुम्ह सारिखे गलित अभिमाना ॥
सदा रहहिं अपनपौ दुःख । सर्व विधि कुसल कुबेध बनाएँ ॥
तेहि तें कहहिं संत श्रुति टेरें । परम अकिंचन प्रिय हरि केरें ॥
तुम्ह सम अधन भिखारि अगेहा । होत बिरंचि सिवहि संदेहा ॥
जोसि सोसि तव चरन नमामी । मो पर कृपा करिअ अब स्वामी ॥
सहज प्रीति भूपति कै देखी । आपु विषय विस्वास विसेषी ॥
सब प्रकार राजहि अपनाई । बोलेउ अधिक सनेह जनाई ॥
सुनु सतिभाउ कहउँ महिपाला । इहाँ बसत बीते बहु काला ॥

दो०—अब लगि मोहि न मिलेउ कोउ मैं न जनावउँ काहु ।

लोकमान्यता अनल सम कर तप कानन दाहु ॥१६१(क)॥

सो०—तुलसी देखि सुबेषु भूलहि मूढ़ न चतुर नर ।

सुंदर केकिहि पेखु बचन सुधा सम असन अहि॥१६१(ख)॥

ताते गुपुतरहुँ जग माहीं । हरि तजि किमपि प्रयोजन नाहीं ॥
प्रभु जानत सब विनहि जनाएँ । कहहु कवनि सिधि लोक रिझाएँ ॥
तुम्ह सुचि सुमति परम प्रिय मोरें । प्रीति प्रतीति मोहि पर तोरें ॥
अब जौ तात दुरावउँ तोही । दारुन दोष घटइ अति मोही ॥
जिमि जिमि तापसु कथइ उदासा । तिमि तिमि नृपहि उपज विस्वासा
देखा स्वयस कर्म मन बानी । तब बोला तापस बगध्यानी ॥
नाम हमार एकतनु भाई । सुनि नृप बोलेउ पुनि सिरु नाई ॥
कहहु नाम कर अरथ बखानी । मोहि सेवक अति आपन जानी ॥
दो०—आदिसृष्टि उपजी जबहिँ तब उत्पति भै मोरि ।

नाम एकतनु हेतु तेहिँ देह न धरी बहोरि ॥१६२॥

जनि आचरजु करहु मन माहीं । सुत तप तें दुर्लभ कछु नाहीं ॥
तपबल तें जग सृजइ विधाता । तपबल विष्णु भए परित्राता ॥
तपबल संभु करहिँ संघारा । तप तें अगम न कछु संसारा ॥
भयउ नृपहि सुनि अति अनुरागा । कथा पुरातन कहै सो लागा ॥
करम धरम इतिहास अनेका । करइ निरूपन बिरति विवेका ॥
उदभव पालन प्रलय कहानी । कहेसि अमित आचरज बखानी
सुनि महीप तापस बस भयऊ । आपन नाम कहन तब लयऊ ॥
कह तापस नृप जानउँ तोही । कीन्हेहु कपट लाग भल मोही ॥

सो०—सुनु महीस असि नीति जहँ तहँ नाम न कहहिं नृपा

मोहि तोहि पर अति प्रीति सोइ चतुरता विचारि तव ॥१६३॥

नाम तुम्हार प्रताप दिनेसा । सत्यकेतु तव पिता नरेसा ॥
गुर प्रसाद सब जानिअ राजा । कइअ न आपन जानि अकाजा ॥
देखि तान तव सहज सुधाई । प्रीति प्रतीति नीति निपुनाई ॥
उपजि परी ममता मन मोरें । कहउँ कथा निज पूछे तोरें ॥
अब प्रसन्न मैं संसय नाहीं । मागु जो भूप भाव मन माहीं ॥
सुनि सुवचन भूपति हरपाना । गहि पद बिनय कीन्हि विधि नाना
कृपासिंधु मुनि दरसन तोरें । चारि पदारथ करतउ मोरें ॥
प्रभुहि तथापि प्रसन्न बिलोकी । मागि अगम बर होउँ असोकी ॥
दो०—जरा मरन दुख रहित तनु समर जितै जनि कोउ ।

एकछत्र रिपुहीन महि राज कल्प सत होउ ॥१६४॥

कह तापस नृप ऐसेइ होऊ । कारन एक कठिन सुनु सोऊ ॥
कालउ तुअ पद नाइहि सीसा । एक विप्रकुल छाड़ि महीसा ॥
तपबल विप्र सदा बरिआरा । तिन्ह के कोप न कोउ रखवारा ॥
जौ विप्रन्ह बस करहु नरेसा । तौ तुअ बस विधि विष्नु महेमा ॥
चलन ब्रह्मकुल सन बरिआई । सत्य कहउँ दोउ भुजा उटाई ॥
विप्र श्राप बिनु सुनु महिपाला । तोर नास नहिं कवनेहुँ काला ॥
हरषेउ राउ बचन सुनि तासू । नाथ न होइ मोर अब नासू ॥
तव प्रसाद प्रभु कृपानिधाना । मो कहूँ सर्व काल कल्याणा ॥

दो०—एवमस्तु कहि कपटमुनि बोला कुटिल बहोरि ।

मिलब हमार भुलाब निज कहहु तहमहि न खोरि॥१६५॥

ताते मैं तोहि बरजउँ राजा । कहें कथा तव परम अकाजा ॥
छटें श्रवन यह परत कहानी । नास तुम्हार सत्य मम बानी ॥
यह प्रगटें अथवा द्विजश्रापा । नास तोर सुनु भानुप्रतापा ॥
आन उपायँ निधन तव नाहीं । जौं हरि हर कोगहि मन माहीं ॥
सत्य नाथ पद गहि नृप भाषा । द्विज गुर कोप कहहु को राखा ॥
राखइ गुर जौं कोप विधाता । गुर विरोध नहिं कोउ जग वाता ॥
जौं न चलब हम कहे तुम्हारें । होउ नास नहिं सोच हमारें ॥
एकहिं डर डरपत मन मोरा । प्रभु महिदेव श्राव अति घोरा ॥
दो०—होहिं बिप्र बस कवन बिधि कहहु कृपा करि सोउ ।

तुम्ह तजि दीनदयाल निजै हितू न देखउँ कोउ ॥१६६॥

सुनु नृप विविध जतन जग माहीं । कष्टसाध्य पुनि होहिं कि नाहीं ॥
अहइ एक अति सुगम उगई । तहाँ पंगुतु एक कठिनाई ॥
मम आधीन जुगुति नृप सोई । मोर जाव तव नगर न होई ॥
आजु लगे अरु जव तें भयऊँ । काहू के गृह ग्राम न गयऊँ ॥
जौं न जाउँ तव होइ अकाजू । वना आइ असमंजस आजू ॥
सुनि महीस ब्रलेउ मृदु बानी । नाथ निगम असि नीति बखानी
बड़े सनेह लघुन्ह पर करहीं । गिरि निज सिरनि सदा तृन घरहीं
जलधि अगाध मौलि बह फेनू । संतत धरनि धरत सिर रेनू ॥

दो०—अस कहि गहे नरेस पद स्वामी होहु कृपाल ।

मोहि लागि दुख सहिअ प्रभु सज्जन दीनदयाल ॥१६७॥

जानि नृपहि आपन आधीना । बोला तापस कपट प्रवीना ॥
 सत्य कहउँ भूपति सुनु तोही । जग नाहिन दुर्लभ कछु मोही ॥
 अवसि काज मैं करिहउँ तोरा । मन तन वचन भगत तैं मोरा ॥
 जोग जुगुति तप मंत्र प्रभाऊ । फलइ तवहिं जव करिअ दुराऊ
 जौं नरेस मैं करौं रसोई । तुम्ह परसहु मोहि जानन कोई ॥
 अन्न सो जोइ जोइ भोजन करई । सोइ सोइ तव आयसु अनुसरई ॥
 पुनि तिन्ह के गृह जेइ जोक । तव बस होइ भूप सुनु सोऊ ॥
 जाइ उपाय रचहु नृप एहू । संवत भरि संकल्प करेहू ॥

दो०—नित नूतन द्विज सहससतं बरेहु सहित परिवार ।

मैं तुम्हरे संकल्प लागि दिनहिं करबि जेवनार ॥१६८॥

एहि विधि भूप कष्ट अति थोरें । होइहहिं सकल विप्र बस तोरें ॥
 करिहहिं विप्र होम मख सेवा । तेहिं प्रसंग सहजेहिं बस देवा ॥
 और एक तोहि कहउँ लखाऊ । मैं एहिं बेषन आउब काऊ ॥
 तुम्हरे उपरोहित कहूँ राया । हरि आनन मैं करि निज माया ॥
 तपबल तेहि करि आपु समाना । रखिहउँ इहाँ वरष परवाना ॥
 मैं धरि तासु बेषु सुनु राजा । सब विधि तोर सँवारव काजा ॥
 गै निसि बहुत सयन अन्न कीजे । मोहि तोहि भूप भेंट दिन तीजे ॥
 मैं तपबल तोहि तुरग समेता । पहुँचैइउँ सोवतहि निकेता ॥

दो०—मैं आउब सोइ बेपु धरि पहिचानेहु तब मोहि ।

जब एकांत बोलाइ सब कथा सुनावौ तोहि ॥१६९॥

सयन कीन्ह नृप आयसु मानी । आसन जाइ बैठ छलग्यानी ॥
श्रमित भूप निद्रा अति आई । सो किमि सोव सोच अधिकाई ॥
कालकेतु निसिचर तहँ आवा । जेहिं सूकर होइ नृपहि भुलावा ॥
परम मित्र तापस नृप केरा । जानइ सो अति कपट घनेरा ॥
तेहि के सत सुत अरु दस भाई । खल अति अजय देव दुखदाई ॥
प्रथमहिं भूप समर सब मारे । विप्र संत सुर देखि दुखारे ॥
तेहिं खल पाछिल वयरु सँभारा । तापस नृप मिलि मंत्र विचारा ॥
जेहिं रिपु छय सोइ रचेन्हि उपाऊ । भावी बस न जान कछु राऊ ॥

दो०—रिपु तेजसी अकेल अपि लघु करि गनिअ न ताहु ।

अजहुँ देत दुख रबि ससिहि सिर अवसेषित राहु ॥१७०॥

तापस नृप निज सखहि निहारी । हरषि मिलेउ उठि भयउ सुखारी
मित्रहि कहि सब कथा सुनाई । जातुधान बोला सुख पाई ॥
अब साधेउँ रिपु सुनहु नरेसा । जौ तुम्ह कीन्ह मोर उपदेसा ॥
परिहरि सोच रहहु तुम्ह सोई । विनु औषध विआधि विधि खोई
कुल समेत रिपु मूल बहाई । चौथें दिवस मिलब मैं आई ॥
तापस नृपहि बहुत परितोषी । चला महाकपटी अतिरोषी ॥
भानुप्रतापहि बाजि समेता । पहुँचाएसि छन माझ निकेता ॥
रूपहि नारि पहिं सयन कराई । हयगृहँ बाँधेसि बाजि बनाई ॥

दो०—राजा के उपरोहितहि हरि लै गयउ बहोरि ।

लै राखेसि गिरि खोह महुँ मायाँ करि मति भोरि ॥१७१॥

आपु विरचि उपरोहित रूपा । परेउ जाइ तेहि सेज अनूपा ॥
जागेउ नृप अनभएँ विहाना । देखि भवन अति अचरजु माना
मुनि महिमा मन महुँ अनुमानी । उठेउ गवँहिं जेहिं जान न रानी ॥
कानन गयउ बाजि चढ़ि तेहीं । पुर नर नारि न जानेउ केहीं ॥
गएँ जाम जुग भूपति आवा । घर घर उत्सव बाज बधावा ॥
उपरोहितहि देख जव राजा । चकित विलोक सुमिरि सोइ काजा
जुग सम नृपहि गए दिन तीनी । कपटी मुनि पद रह मति लीनी ॥
समय जानि उपरोहित आवा । नृपहि मते सब कहि समुझावा ॥

दो०—नृप हरषेउ पहिचानि गुरु भ्रम बसरहा न चेत ।

बरे तुरत सत सहस बर विप्र कुटुंब समेत ॥१७२॥

उपरोहित जेवनार बनाई । छरस चारिविधि जसि श्रुति गाई
मायामय तेहि कीन्हि रसोई । विंजन बहु गनि सकइ न कोई ॥
विविध मृगन्ह कर आमिष राँधा । तेहि महुँ विप्र माँसु खल साँधा ॥
भोजन कहुँ सब विप्र बोलाए । पद पखारि सादर बैठाए ॥
परुसन जवहिं लाग महिपाला । भै अकासवानी तेहि काला ॥
विप्रबृंद उठि उठि गृह जाहू । है बड़ि हानि अन्न जनि खाहू ॥
भयउ रसोई भूसुर माँसू । सब द्विज उठे मानि बिस्वासू ॥
भूप बिकल मति मोहँ भुलानी । भावी बस न आव मुख बानी ॥

दो०—बोले बिप्र सकोप तब नहिं कछु कीन्ह बिचार ।

जाहू निसाचर होहु नृप मूढ़ सहित परिवार ॥१७१॥

छत्रबंधु तैं बिप्र बोलाई । घालै लिए सहित समुदाई ॥
ईस्वर राखा धरम हमारा । जैहसि तैं समेत परिवारा ॥
संवत मध्य नास तब होऊ । जलदाता न रहिहि कुल कोऊ ॥
नृप सुनि श्राप बिकल अति त्रासा । भै बहोरि बर गिरा अक्राणा ॥
बिप्रहु श्राप बिचारि न दीन्ह । नहिं अपराध भूप कछु कीन्ह ॥
चकित बिप्र सब सुनि नभवानी । भूप गयउ जहँ भोजन खानी ॥
तहँ न असन नहिं बिप्र सुआरा । फिरेउ राउ मन सोच अपारा ॥
सब प्रसंग महिसुरन्ह सुनाई । त्रसित परेउ अवनीं अकुलाई ॥

दो०—भूपति भावी मिटइ नहिं जदपि न दूषन तोर ।

किँँ अन्यथा होइ नहिं बिप्रश्राप अति घोर ॥१७४॥

अस कहि सब महिदेव सिधाए । समाचार पुरलोगन्ह पाए ॥
सोचहिं दूषन दैवहि देहीं । बिरचत हंस काग किय जेहीं ॥
उपरोहितहि भवन पहुँचाई । असुर तापसहि खवरि जनाई ॥
तेहिं खल जहँ तहँ पत्र पठाए । सजि सजि सेन भूप सब धाए ॥
घेरोन्ह नगर निसान बजाई । विविध भाँति नित होइ लराई ॥
जूझे सकल सुभट करि करनी । बंधु समेत परेउ नृप धरनी ॥
सत्यकेतु कुल कोउ नहिं बाँचा । बिप्रश्राप किमि होइ असाँचा ॥
रिपु जिति सब नृप नगर बसाई । निज पुर गवने जय जसु पाई ॥

दो०—भरद्वाज सुनु जाहि जब होइ विधाता ब्राम ।

धूरि मेरुसम जनक जस ताहि व्यालसस दाम ॥१७५॥

काल पाइ मुनि सुनु सोइ राजा । भयउ निपाचर सहित समाजा ॥
दस सिर ताहि वीस भुजदंडा । रावन नाम वीर बरिवंडा ॥
भूप अनुज अरिमर्दन नामा । भयउ सो कुंभकरन बलधामा ॥
सचिव जो रहा धरमरुचि जासू । भयउ विमात्र बंधु लघु तासू ॥
नाम बिभीषन जेहि जग जाना । विष्णुभगत विग्यान निधाना ॥
रहे जे सुत सेवक नृप केरे । भए निसाचर घोर घनेरे ॥
कामरूप खल जिनस अनेका । कुटिल भयंकर विगत बिवेका ॥
कृपा रहित हिंसक सब पापी । वरनि न जाहिं बिस्व परितापी ॥

दो०—उपजे जदपि पुलस्त्यकुल पावन अमल अनूप ।

तदपि महीसुर श्राप बस भए सकल अघरूप ॥१७६॥

कीन्ह विविध तप तीनिहुँ भाई । परम उग्र नहिं वरनि सो जाई ॥
गयउ निकट तप देखि विधाता । मागहु बर प्रसन्न मैं ताता ॥
करि बिनती पद गहि दससीसा । बोलेउ वचन सुनहु जगदीसा ॥
हम काहू के मरहिं न मारें । बानर मनुज जाति दुइ वारें ॥
एवमस्तु तुम्ह बड़ तप कीन्हा । मैं ब्रह्माँ मिलि तेहि बर दीन्हा ॥
पुनि प्रभु कुंभकरन पहिं गयऊ । तेहि बिलोकि मन विसमय भयऊ ॥
जौ एहिं खलनित करब अहारू । होइहि सब उजारि संसारू ॥
सारद प्रेरि तासु मति फेरी । मागेसि नीद मास षट केरी ॥

दो०-गए बिभीषन पास पुनि कहेउ पुत्र बर मागु ।

तेहि मागेउ भगवंत पद कमल अमल अनुरागु ॥१७७॥

तिन्हहि देइ बर ब्रह्म सिधाए । हरषित ते अपने गृह आए ॥
मय तनुजा मंदोदरि नामा । परम सुंदरी नारि ललामा ॥
सोइ मयँ दीन्हि रावनहि आनी । होइहि जातुधानपति जानी ॥
हरषित भयउ नारि भलि पाई । पुनि दोउ बंधु बिआहेसि जाई ॥
गिरि त्रिकूट एक सिंधु मझारी । बिधि निर्मित दुर्गम अति भारी ॥
सोइ मय दानवँ बहुरि सँवारा । कनक रचित मनिभवन अपारा ॥
भोगावति जसि अहिकुल बासा । अमरावति जसि सक्रनिवासा ॥
तिन्ह तें अधिक रम्य अति बंका । जग बिख्यात नाम तेहि लंका ॥

दो०-खाई सिंधु गभीर अति चारिहुँ दिसि फिरि आव ।

कनक कोट मनि खचित दंड बरनि न जाइ बनाव ॥१७८(क)॥

हरि प्रेरित जेहि कलप जोइ जातुधानपति होइ ।

सूर प्रतापी अतुलबल दल समेत बस सोइ ॥१७८(ख)॥

रहे तहाँ निसिचर भट भारे । ते सब सुरन्ह समर संघारे ॥
अब तहँ रहहिँ सक्र के प्रेरे । रच्छक कोटि जच्छपति केरे ॥
दसमुख कतहुँ खबरि असि पाई । सेन साजि गढ़ घेरेसि जाई ॥
देखि बिकट भट बड़ि कटकाई । जच्छ जीव लै गए पराई ॥
फिरि सब नगर दसानन देखा । गयउ सोच सुख भयउ बिसेषा ॥
सुंदर सहज अगम अनुमानी । कीन्हि तहाँ रावन रजधानी ॥

जेहि जस जोग बाँटि गृह दीन्है । सुखी सकल रजनीचर कीन्है ॥
 एक बार कुबेर पर धावा । पुष्पक जान जीति लै आवा ॥
 दो०—कौतुकहीं कैलास पुनि लीन्हैसि जाइ उठाइ ।

मनहुँ तौलि निज बाहुबल चला बहुत सुख पाइ ॥१७९॥

सुख संपति सुत सेन सहाई । जय प्रताप बल बुद्धि बढ़ाई ॥
 नित नूतन सब बाढ़त जाई । जिमि प्रतिलाभ लोभ अधिकाई ॥
 अतिबल कुंभकरन अस भ्राता । जेहिं कहूँ नहिं प्रतिभट जग जाता
 करइ पान सोवइ पट मासा । जागत होइ तिहूँ पुर त्रासा ॥
 जौं दिन प्रति अहार कर सोई । बिस्व बेगि सब चौपट होई ॥
 समर धीर नहिं जाइ बखाना । तेहि मम अमित वीर बलवाना ॥
 बारिदनाद जेठ सुत ताम्र । भट महुँ प्रथम लोक जग जाम्र ॥
 जेहि न होइ रन सनमुख कोई । सुरपुर नितहिं परावन होई ॥

दो०—कुमुख अकंपन कुलिसरद धूमकेतु अतिकाय ।

एक एक जग जोति सक ऐसे सुभट निकाय ॥१८०॥

कामरूप जानहिं सब माया । सपनेहुँ जिन्ह कें धरम न दाया ॥
 दसमुख पैठ सभाँ एक बारा । देखि अमित आपन परिवारा ॥
 सुत समूह जन परिजन नाती । गनै को पार निसाचर जाती ॥
 सेन बिलोकि सहज अभिमानी । बोला वचन क्रोध मद सानी ॥
 सुनहु सकल रजनीचर जूथा । हमरे बैरी विबुध बरूथा ॥
 ते सनमुख नहिं करहिं लराई । देखि सबल रिपु जाहिं पराई ॥

तेन्ह कर मरन एक बिधि होई । कहउँ बुझाइ सुनहु अब सोई ॥
द्विजभोजन मख होम सराधा । सब कै जाइ करहु तुम्ह बाधा ॥
दो०—छुधा छीन बलहीन सुर सहजेहि मिलिहहि आइ ।

तब मारिहउँ कि छाड़िहउँ भली भाँति अपनाइ ॥ १८१ ॥

मेघनाद कहूँ पुनि हँकवावा । दीन्ही सिख बलु बयरु बढावा ॥
जे सुर समर धीर बलवाना । जिन्ह कें लरिवे कर अभिमाना ॥
तिन्हहि जीतिरन आनेसु बाँधी । उठि सुत पितु अनुसासन काँधी
एहि बिधि सबही अग्या दीन्ही । आपुनु चलेउ गदा कर लीन्ही
चलत दसानन डोलति अवनी । गर्जत गर्भ स्रवहिँ सुर रवनी ॥
रावन आवत सुनेउ सकोहा । देवन्ह तके मेरु गिरि खोहा ॥
दिगपालन्ह के लोक सुहाए सूने सकल दसानन पाए ॥
पुनि पुनि सिंघनाद करि भारी । देइ देवतन्ह गारि पचारी ॥
रन मद मत्त फिरइ जग धावा । प्रतिभट खोजत कतहुँ न पावा ॥
रबिससि पवन बरुन धनधारी । अगिनि काल जम सब अधिकारी
किंनर सिद्ध मनुज सुर नागा । हठि सबही के पंथहिँ लगा ॥
ब्रह्मसृष्टि जहँ लगि तनुधारी । दसमुख बसवर्ती नर नारी ॥
आयसु करहिँ सकल भयभीता । नवहिँ आइ नित चरन बिनीता ॥
दो०—भुजबल बिस्व बस्य करि राखेसि कोउ न सुतंत्र ।

मंडलीक मनि रावन राज करइ निज मंत्र ॥१८२(क)॥

देव जच्छ गंधर्व नर किंनर नाग कुमारि ।

जीति बरीं निज बाहुबल बहु सुंदर बर नारि ॥१८२(ख)॥

इंद्रजीत सन जो कछु कहेऊ । सो सब जनु पहिलेहिं करि रहेऊ ॥
 प्रथमहिं जिन्ह कहूँ आयसु दीन्हा । तिन्ह कर चरित सुनहु जो कीन्हा
 देखत भीमरूप सब पापी । निसिचर निकर देव परितापी ॥
 करहिं उग्रद्वज असुर निकाया । नाना रूप धरहिं करि माया ॥
 जेहि विधि होइ धर्म निर्मूला । सो सब करहिं बेद प्रतिकूला ॥
 जेहिं जेहिं देस धेनु द्विज पावहिं । नगर गाउँ पुर आगि लगावहिं ॥
 सुभ आचरन कतहुँ नहिं होई । देव विप्र गुरु मान न कोई ॥
 नहिं हरि भगति जग्य तप ग्याना । सपनेहुँ सुनिअ न बेद पुराना ॥

छं०—जप जोग बिरागा तप मख भागा श्रवन सुनइ दससीसा ।
 आपुनु उठि धावइ रहै न पावइ धरि सब घालइ खीसा ॥
 अस भ्रष्ट अचारा भा संसारा धर्म सुनिअ नहिं काना ।
 तेहि बहुबिधि त्रासइ देस निकासइ जो कह बेद पुराना ॥

सो०—बरनि न जाइ अनीति घोर निसाचर जो करहिं ।

हिंसा पर अति प्रीति तिन्ह के पापहि कवनि मिति ॥ १८३ ॥

मासपारायण, छठा विधाम

बाढ़े खल बहु चोर जुआरा । जे लंपट परधन परदारा ॥
 मानहिं मातु पिता नहिं देवा । साधुन्ह सन करवावहिं सेवा ॥
 जिन्ह के यह आचरन भवानी । ते जानेहु निसिचर सब प्राणी ॥
 अतिसय देखि धर्म कै ग्लानी । परम समीत धरा अकुलानी ॥
 गिरि सरि सिंधु भार नहिं मोही । जस मोहि गरुअ एक परद्रोही ॥

सकल धर्म देखइ विपरीता । कहि न सकइ रावन भय भीता ॥
धेनु रूप धरि हृदयँ विचारी । गई तहाँ जहँ सुर मुनि झारी ॥
निज संताप सुनाएसि रोई । काहू तें कछु काज न होई ॥

छं०—सुर मुनि गंधर्वा मिलि करि सर्वा गे बिरंचि के लोका ।

सँग गोतनुधारी भूमि विचारी परम बिकल भय सोका ॥

ब्रह्माँ सब जाना मन अनुमाना मोर कछु न बसाई ।

जा करि तैं दासी सो अबिनासी हमरेउ तोर सहाई ॥

सो०—धरनि धरहि मन धीर कह बिरंचि हरिपद सुमिर ।

जानत जन की पीर प्रभु भंजिहि दारुन बिपति ॥१८४॥

बैठे सुर सब करहिं विचारा । कहँ पाइअ प्रभु करिअ पुकारा ॥

पुर बैकुंठ जान कह कोई । कोउ कह पयनिधि बस प्रभु सोई

जाके हृदयँ भगति जसि प्रीती । प्रभु तहँ प्रगट सदा तेहिं रीती ॥

तेहिं समाज गिरिजा मैं रहेऊँ । अवसर पाइ बचन एक कहेऊँ ॥

हरि व्यापक सर्वत्र समाना । प्रेम तैं प्रगट होहिं मैं जाना ॥

देस काल दिसि बिदिसिहु माहीं । कहहु सो कहाँ जहाँ प्रभु नाहीं ॥

अग जगमय सब रहित विरागी । प्रेम तैं प्रभु प्रगटइ जिमि आगी ॥

मोर बचन सब के मन माना । साधु साधु करि ब्रह्म बखाना ॥

दो०—सुनि बिरंचि मन हरष तन पुलकि नयन बह नीर ।

अस्तुति करत जोरि कर सावधान मतिधोर ॥१८५॥

छं०-जय जय सुरनायक जन सुखदायक प्रनतपाल भगवंता ।
 गो द्विज हितकारी जय असुरारी सिंधुसुता प्रिय कंता ॥
 पालन सुर धरनी अद्भुत करनी मरम न जानइ कोई ।
 जो सहज कृपाला दीनदयाला करउ अनुग्रह सोई ॥
 जय जय अविनासी सब घट बासी व्यापक परमानंदा ।
 अबिगत गोतीतं चरित पुनीतं मायारहित मुकुंदा ॥
 जेहि लागि विरागी अति अनुरागी बिगतमोह मुनिवृंदा ।
 निसि बासर ध्यावहिं गुन गन गावहिं जयति सच्चिदानंदा ॥
 जेहिं सृष्टि उपाई त्रिविध बनाई संग सहाय न दूजा ।
 सो करउ अघारी चित हमारी जानिअ भगति न पूजा ॥
 जो भव भय भंजन मुनि मन रंजन गंजन बिपति बरूथा ।
 मन बच क्रम बानी छाड़ि सयानी सरन सकल सुर जूथा ॥
 सारद श्रुति सेवा रिषय असेषा जा कहूँ कोउ नहिं जाना ।
 जेहि दीन पिआरे बेद पुकारे द्रवउ सो श्रीभगवाना ॥
 भव बारिधि मंदर सब बिधि सुंदर गुनमंदिर सुखपुंजा ।
 मुनि सिद्ध सकल सुर परम भयातुर नमत नाथ पद कंजा ॥

दो०-जानि सभय सुर भूमि मुनि बचन समेत सनेह ।

गगनगिरा गंभीर भइ हरनि सोक संदेह ॥१८६॥

जनि डरपहु मुनि सिद्ध सुरेसा । तुम्हहि लागि धरिहउँ नर बेसा ॥

अंसन्ह सहित मनुज अवतारा । लेहउँ दिनकर बंस उदारा ॥

कस्य अदिति महातप कीन्हा । तिन्ह कहूँ मैं पूरव वर दीन्हा ॥
 ते दमरथ कौसल्या रूपा । कोसलपुरी प्रगट नरभूपा ॥
 तिन्ह केँ गृह अवतरिहउँ जाई । रघुकुलतिलक सो चारिउ भाई ॥
 नारद वचन सत्य सब करिहउँ । परम सत्ते समेत अवतरिहउँ ॥
 हरिहउँ सकल भूमि गरुआई । निर्भय होहु देव समुदाई ॥
 गगन ब्रह्मवानी सुनि काना । तुरत फिरे सुर हृदय जुड़ाना ॥
 तब ब्रह्माँ धरनिहि समुझावा । अभय भई भरोस जियँ आवा ॥
 दो०-निज लोकहि बिरंचि गे देवन्ह इहइ सिखाइ ।

बानर तनु धरि धरि माँहे हरि पद सेवहु जाइ ॥१८७॥

गए देव सब निज निज धामा । भूमि सहित मन कहूँ विश्रामा ॥
 जो कछु आयसु ब्रह्माँ दीन्हा । हरषे देव विलंब न कीन्हा ॥
 वनचर देह धरी छिति माहीं । अनुलित बल प्रताप तिन्ह पाहीं ॥
 गिरितरु नख आयु सब वीरा । हरि मारग चितवहिँ मतिधीरा ॥
 गिरि कानन जहँ तहँ भरि पूरी । रहे निज निज अनीकर बिरूरी ॥
 यह सब रुचिर चरित मैं भाषा । अब सो सुनहु जो बीचहिँ राखा ॥
 अवधपुरी रघुकुलमनि राऊ । वेद विदित तेहि दसरथ नाऊँ ॥
 धरम धुरंधर गुननिधि ग्यानी । हृदयँ भगति मति सारँगपानी ॥
 दो०-कौसल्यादि नारि प्रिय सब आचरन पुनीत ।

पति अनुकूल प्रेम दइ हरि पद कमल बिनीत ॥१८८॥

एक बार भूपति मन माहीं । भै गलानि मोरें सुत नाहीं ॥

गुर गृह गयउ तुरत सहिपाला । चरन लागि करि विनय विसाला
 निज दुख सुख सब गुरहि सुनायउ । कहि बसिष्ठ बहुविधि समुझायउ
 धरहु धीर होइहहिं सुत चारी । त्रिभुवन विदित भगत भयहारी॥
 संगी रिषिहि बसिष्ठ बोलावा । पुत्रकाम सुभ जग्य करावा॥
 भगति सहित मुनि आहुति दीन्हें । प्रगटे अग्नि चरु कर लीन्हें॥
 जो बसिष्ठ कछु हृदयँ विचारा । सकल काजु भा सिद्ध तुम्हारा॥
 यह हवि बाँटि देहु नृप जाई । जथा जोग जेहि भाग बनाई॥
 दो०-तब अदस्य भए पावक सकल सभहि समुझाइ ।

परमानंद मगन नृप हरष न हृदयँ समाइ ॥१८९॥
 तबहिं रायँ प्रिय नारि बोलाई । कौसल्यादि तहाँ चलि आई॥
 अर्ध भाग कौसल्यहि दीन्हा । उभय भाग आधे कर कीन्हा॥
 कैकेई कहँ नृप सो दयऊ । रह्यो सो उभय भाग पुनि भयऊ॥
 कौसल्या कैकेई हाथ धरि । दीन्ह सुमित्रहि मन प्रसन्न करि॥
 एहि विधि गर्भसहित सब नारी । भई हृदयँ हरषित सुख भारी॥
 जा दिन तें हरि गर्भहिं आए । सकल लोक सुख संपति छाए॥
 मंदिर मँहँ सब राजहिं रानीं । सोभा सील तेज की खानीं॥
 सुख जुत कलुक काल चलि गयऊ । जेहि प्रभु प्रगट सो अवसर भयऊ
 दो०-जोग लगन ग्रह बार तिथि सकल भए अनुकूल ।

चर अरु अचर हर्षजुत राम जनम सुखमूल ॥१९०॥

नौमी तिथि मधु मास पुनीता । सुकल पच्छ अभिजित हरिप्रीता

मध्यदिवस अति सीत न घामा । पावन काल लोक विश्रामा ॥
 सीतल मंद सुगभि बह बाऊ । हरषित सुर संतन मन चाऊ ॥
 वन कुसुमित गिरिगन मनिआरा । स्रवहिं सकल सरिताऽमृतधारा
 सो अवसर विरंचि जव जाना । चले सकल सुर साजि विमाना ॥
 गगन विमल संकुल सुर जूथा । गावहिं गुन गंधर्व बरूथा ॥
 बरषहिं सुमन सुअंजुलि साजी । गहगहि गगन दुंदुभी बाजी ॥
 अस्तुति करहिं नाग मुनि देवा । बहुविधि लावहिं निज निज सेवा ॥
 दो०—सुर समूह बिनती करि पहुँचे निज निज धाम ।

जगनिवास प्रभु प्रगटे अखिल लोक बिश्राम ॥१९१॥

छं०—भए प्रगट कृपाला दीनदयाला कौसल्या हितकारी ।
 हरषित महतारी मुनि मन हारी अद्भुत रूप बिचारी ॥
 लोचन अभिरामा तनु घनस्यामा निज आयुध भुज चारी ।
 भूषन वनमाला नयन बिसाला सोभासिंधु खरारो ॥
 कह दुइ कर जोरी अस्तुति तोरी केहि बिधि करौं अनंता ।
 माया गुन ग्यानातीत अमाना बेद पुरान भनंता ॥
 करुना सुख सागर सब गुन आगर जेहि गावहिं श्रुति संता ।
 सो मम हित लागी जन अनुरागी भयउ प्रगट श्रीकंता ॥
 ब्रह्मांड निकाया निर्मित माया रोम रोम प्रति बेद कहै ।
 मम उर सो बासी यह उपहासी सुनत धीर मति थिर न रहै ॥

उपजा जब ग्याना प्रभु मुसुकाना चरित बहुत बिधि कीःह चहै ।

कहि कथा सुहाई मातुं बुझाई जेहि प्रकार सुत प्रेम लहै ॥
 माता पुनि बोली सो भति डोली तजहु तात यह रूपा ।
 कीजै सिसुलोला अति प्रियसीला यह सुख परम अनूपा ॥
 सुनि बचन सुजाना रोदन ग्रना होइ बालक सुरभूपा ।
 यह चरित जे गावहिं हरिपद पावहिं ते न परहिं भवकृपा ॥

दो०—बिप्र धेनु सुर संत हित लीन्ह मनुज अवतार ।

निज इच्छा निर्मित तनु माया गुन गो पार ॥१९२॥

सुनि सिसु रुदन परम प्रिय बानी । संभ्रम चलि आई सब रानी ॥
 हरषित जहँ तहँ धाई दासी । आनंद मगन सकल पुरबासी ॥
 दसरथ पुत्रजन्म सुनि काना । मानहुँ ब्रह्मानंद समाना ॥
 परम प्रेम मन पुलक सरीरा । चाहत उठन करत मति धीरा ॥
 जाकर नाम सुनत सुभ होई । मोरैं गृह आवा प्रभु सोई ॥
 परमानंद पूरि मन राजा । कहा बोलाइ बजावहु बाजा ॥
 गुर बसिष्ठ कहँ गयउ हँकारा । आए द्विजन सहित नृपद्वारा ॥
 अनुपम बालक देखेन्हि जाई । रूप रासि गुन कहि न सिराई ॥
 दो०—नंदीमुख सराध करि जातकरम सब कीन्ह ।

हाटक धेनु बसन मनि नृप बिप्रन्ह कहँ दीन्ह ॥१९३॥

ध्वज पताक तोरन पुर छावा । कहि न जाइ जेहि भाँति बनावा ॥
 सुमनवृष्टि अकास तैं होई । ब्रह्मानंद मगन सब लोई ॥
 बूंद बूंद मिलि चलीं लोगाई । सहज सिंगार किएँ उठि धाई ॥

कनक कलस मंगल भरि थारा । गावत पैठहिं भूप दुआरा ॥
 करि आरति नेवछावरि करहीं । बार बार सिसु चरनन्हि परहीं ॥
 मागध सूत बंदिगन गायक । पावन गुन गावहिं रघुनायक ॥
 सर्वस दान दीन्ह सब काहू । जेहिं पावा राखा नहिं ताहू ॥
 मृगमद चंदन कुंकुम कीचा । मची सकल बीथिन्ह बिच बीचा
 दो०—गृह गृह बाज बधाव सुभ प्रगटे सुप्रभा कंद ।

हरषवंत सब जहँ तहँ नगर नारि नर बृंद ॥१९४॥
 कैकयसुता सुमित्रा दोऊ । सुंदर सुत जनमत मै ओऊ ॥
 वह सुख संपति समय समाजा । कहि न सकइ सारद अहिराजा ॥
 अवधपुरी सोहइ एहि भाँती । प्रभुहि मिलन आई जनु राती ॥
 देखि भानु जनु मन सकुचानी । तदपि बनी संध्या अनुमानी ॥
 अगर धूप बहु जनु अँधिआरी । उड़इ अवीर मनहुँ अरुनारी ॥
 मंदिर मनि समूह जनु तारा । नृप गृह कलस सो इंदु उदारा ॥
 भवन बेदधुनि अति मृदु बानी । जनु खग मुखर समयँ जनु सानी ॥
 कौतुक देखि पतंग भुलाना । एक मास तेहँ जात न जाना ॥
 दो०—मास दिवस कर दिवस भा मरम न जानइ कोइ ।

रथ समेत रबि थाकेउ निसा कवन बिंध होइ ॥१९५॥
 यह रहस्य काहूँ नहिं जाना । दिनमनि चले करत गुन गाता ॥
 देखि महोत्सव सुर मुनि नागा । चले भवन बरनत निज भागा ॥
 औरउ एक कहउँ निज चोरी । सुनु गिरिजा अति दृढ़ मति तोरी

काकभुसुंडि संग हम दोऊ । मनुजरूप जानइ नहिं कोऊ ॥
 परमानंद प्रेमसुख फूले । वीथिन्ह फिरहिं मगन मन भूले ॥
 यह सुभ चरित जान पै सोई । कृपा राम कै जापर होई ॥
 तेहि अवसर जो जेहि विधि आवा । दीन्ह भूप जो जेहि मन भावा ॥
 गज रथ तुरग हेम गो हीरा । दीन्हे नृप नानाविधि चीरा ॥
 दो०—मन संतोषे सबन्हि के जहँ तहँ देहिं असीस ।

सकल तनय चिर जीवहुँ तुलसिदास के ईस ॥१९६॥

कछुक दिवस बीते एहि भाँती । जात न जानिअ दिन अरु राती ॥
 नामकरन कर अवसर जानी । भूप बोलि पठए मुनि ग्यानी ॥
 करि पूजा भूपति अस भाषा । धरिअ नाम जो मुनि गुनि राखा ॥
 इन्ह के नाम अनेक अनूपा । मैं नृप कहव स्वमति अनुरूपा ॥
 जो आनंद सिंधु सुख रासी । सीकर तैं त्रैलोक सुपासी ॥
 सो सुख धाम राम अस नामा । अखिल लोक दायक विश्रामा ॥
 बिस्व भरन पोषन कर जोई । ताकर नाम भरत अस होई ॥
 जाके सुमिरन तैं रिपु नासा । नाम सत्रुहन बेद प्रकासा ॥
 दो०—लच्छन धाम राम प्रिय सकल जगत आधार ।

गुरु बसिष्ट तेहि राखा लछिमन नाम उदार ॥१९७॥

धरे नाम गुर हृदयँ बिचारी । वेद तत्व नृप तव सुत चारी ॥
 मुनि धन जन सरबस सिव प्राणा । बाल केलि रस तेहिं सुख माना ॥
 बारेहि ते निज हित पति जानी । लछिमन राम चरन रति मानी ॥

भरत सत्रुहन दूनउ भाई । प्रभु सेवक जसि प्रीति बड़ाई ॥
 स्याम गौर सुंदर दोउ जोरी । निरखहिँ छवि जननीं तृन तोरी ॥
 चारिउ सील रूप गुन धामा । तदपि अधिक सुखसागर रामा ॥
 हृदयँ अनुग्रह इंदु प्रकासा । सूचत किरन मनोहर हासा ॥
 कबहुँ उछंग कबहुँ बर पलना । मातु दुलारइ कहि प्रिय ललना ॥
 दो०—व्यापक ब्रह्म निरंजन निर्गुन बिगत बिनोद ।

सो अज प्रेम भगति बस कौसल्या कें गोद ॥१९८॥
 काम कोटि छवि स्याम सरीरा । नील कंज वारिद गंभीरा ॥
 अरुन चरन पंकज नख जोती । कमल दलन्हि बैठे जनु मोती ॥
 रेख कुलिस ध्वज अंकुस सोहे । नूपुर धुनि सुनि मुनि मन मोहे ॥
 कटि किंकिनी उदर त्रय रेखा । नाभि गभीर जान जेहिँ देखा ॥
 भुज बिसाल भूषन जुत भूरी । हियँ हरि नख अति सोभा रूरी ॥
 उर मनिहार पदिक की सोभा । बिप्र चरन देखत मन लोभा ॥
 कंबु कंठ अति चिबुक सुहाई । आनन अमित मदन छवि छाई ॥
 दुइ दुइ दसन अधर अरुनारे । नासा तिलक को बरनै पारे ॥
 सुंदर श्रवन सुचारु कपोला । अति प्रिय मधुर तोतरे बोला ॥
 चिक्कन कच कुंचित गभुआरे । बहु प्रकार रचि मातु सँवारे ॥
 पीत झगुलिआ तनु पहिराई । जानुपानि बिचरनि मोहि भाई ॥
 रूप सकहिँ नहिँ कहि श्रुति सेषा । सो जानइ सपनेहुँ जेहिँ देखा ॥
 दो०—सुख संदोह मोहपर ग्यान गिरा गोतीत ।

दंपति परम प्रेम बस कर सिसुचरित पुनीत ॥१९९॥

एहि विधि राम जगत पितु माता । कोसलपुर बासिन्ह सुख दाता ॥
 जिन्ह रघुनाथ चरन रति मानी । तिन्ह की यह गति प्रगट भवानी
 रघुपति विमुख जतन कर कोरी । कवन सकइ भव बंधन छोरी ॥
 जीव चराचर बस कै राखे । सो माया प्रभु सों भय भाखे ॥
 भृकुटि बिलास नचावइ ताही । अस प्रभु छाड़ि भजिअ कहु कही
 मन क्रम बचन छाड़ि चतुराई । भजत कृपा करिहहिं रघुराई ॥
 एहि विधि सिसुबिनोद प्रभु कीन्हा । सकल नगरबासिन्ह सुख दीन्हा
 लै उछंग कवहुँक हलरावै । कवहुँ पालनै घालि झुलावै ॥

दो०—रेम मगन कौसल्या निसि दिन जात न जान ।

सुत सनेह बस माता बालचरित कर गान ॥२००॥

एक बार जननीं अन्हवाए । करि सिंगार पलनाँ पौढ़ाए ॥
 निज कुल इष्टदेव भगवाना । पूजां हेतु कीन्ह अस्नाना ॥
 करि पूजा नैवेद्य चढ़ावा । आपु गई जहँ पाक बनावा ॥
 बहुरि मातु तहवाँ चलि आई । भोजन करत देख सुत जाई ॥
 गै जननी सिसु पहिं भयभीता । देखा बाल तहाँ पुनि सूता ॥
 बहुरि आइ देखा सुत सोई । हृदयँ कंप मन धीर न होई ॥
 इहाँ उहाँ दुइ बालक देखा । मतिभ्रम मोर कि आन विशेषा ॥
 देखि राम जननी अकुलानी । प्रभु हँसि दीन्ह मधुर मुसुकानी ॥

दो०—देखरावा मातहि निज अद्भुत रूप अखंड ।

रोम रोम प्रति लागे कोटि कोटि ब्रह्मंड ॥२०१॥

अगनित रवि ससि सिव चतुरानन। बहु गिरि सरित सिंधु महि कानन
काल कर्म गुन ग्यान सुभाऊ। सोउ देखा जो सुना न काऊ ॥
देखी माया सब विधि गाढ़ी। अति समीत जोरें कर टाढ़ी ॥
देखा जीव नचावइ जाही। देखी भगति जो छोरइ ताही ॥
तन पुलकित मुख बचन न आवा। नयन मूदि चरननि सिरु नावा ॥
विसमयवंत देखि महतारी। भए बहुरि सिसुरूप खरारी ॥
अस्तुति करि न जाइ भय माना। जगत पिता मैं सुत करि जाना ॥
हरि जननी बहुविधि समुझाई। यह जनि कतहुँ कहसि सुनु भाई ॥
दो०—बार बार कौसल्या विनय करइ कर जोरि ।

अब जनि कबहुँ व्यापै प्रभु मोहि माया तोरि ॥२०२॥
बालचरित हरि बहुविधि कीन्हा। अति अनंद दासन्ह कहँ दीन्हा ॥
कछुक काल बीतें सब भाई। बड़े भए परिजन सुखदाई ॥
चूड़ाकरन कीन्ह गुरु जाई। विप्रन्ह पुनि दछिना बहु पाई ॥
परम मनोहर चरित अपारा। करत फिरत चारिउ मुकुमारा ॥
मन क्रम बचन अगोचर जोई। दसरथ अजिर विचर प्रभु सोई ॥
भोजन करत बोल जब राजा। नहिँ आवत तजि बाल समाजा ॥
कौसल्या जब बोलन जाई। ठुमुकु ठुमुकु प्रभु चलहिँ पराई ॥
निगम नेति सिव अंत न पावा। ताहि धरै जननी हठि धावा ॥
धूसर धूरि भरें तनु आए। भूपति बिहसि गोद बैठाए ॥
दो०—भोजन करत चपल चित इत उत अवसरु पाइ ।

भाजि चले किलकत मुख दधि ओदन लपटाइ ॥२०३॥

दो०—देहु भूप मन हरषित तजहु मोह अग्यान ।

धर्मसु नस प्रभु तुम्ह कौं इन्ह कहँ अति कल्यान ॥२०७॥

सुनि राजा अति अप्रिय बानी । हृदय कंप मुख दुति कुमुलानी ॥
चौथेंपन पायउँ सुत चारी । विप्र बचन नहिं कहेहु विचारी ॥
मागहु भूमि धेनु धन कोसा । सर्वस देउँ आजु सहरोसा ॥
देह प्रान तैं प्रिय कछु नाहीं । सोउ मुनि देउँ निमिष एक माहीं
सब सुत प्रिय मोहि प्रान कि नाई । राम देत नहिं बनइ गोसाई ॥
कहँ निसिचर अति घोर कठोरा । कहँ सुंदर सुत परम किसोरा ॥
सुनि नृप गिरा प्रेम रस सानी । हृदयँ हरष माना मुनि ग्यानी ॥
तब बसिष्ठ बहुबिधि समुझावा । नृप संदेह नास कहँ पावा ॥
अति आदर दोउ तनय बोलाए । हृदयँ लाइ बहु भाँति सिखाए ॥
मेरे प्रान नाथ सुत दोऊ । तुम्ह मुनि पिता आन नहिं कोऊ ॥
दो०—सौंपे भूप रिषिहि सुत बहुबिधि देइ असीस ।

जननी भवन गए प्रभु चले नाइ पद सीस ॥२०८(क)॥

सो०—पुरुषसिंह दोउ बीर हरषि चले मुनि भय हरन ।

कृपासिंधु मतिधोर अखिल बिस्व कारन करन ॥२०८(ख)॥

अरुन नयन उर बाहु बिसाला । नील जञ्ज तनु स्याम तमाला ॥
कटि पट पीत कसैं बर भाथा । रुचिर चाप सायक दुहुँ हाथा ॥
स्याम गौर सुंदर दोउ भाई । बिस्वामित्र महानिधि पाई ॥
प्रभु ब्रह्मन्यदेव मैं जाना । मोहि निति पिता तजेउ भगवाना ॥

चले जात मुनि दीन्हि देखाई । सुनि ताड़का क्रोध करि धाई ॥
 एकहिं बान प्रान हरि लीन्हा । दीन जानि तेहि निज पद दीन्हा ॥
 तवरिषि निज नाथहि जिपँ चीन्ही । विद्यानिधि कहँ विद्या दीन्ही ॥
 जाते लाग न छुधा पिपासा । अतुलित बल तनु तेज प्रकासा ॥
 दो०—आयुध सर्व समर्पि कै प्रभु निज आश्रम आनि ।

कंद मूल फल भोजन दीन्ह भगति हित जानि ॥२०९॥

प्रात कहा मुनि सन रघुराई । निर्भय जग्य करहु तुम्ह जाई ॥
 होम करन लागे मुनि झारी । आपु रहे मख कीं रखवारी ॥
 मुनि मारीच निसाचर क्रोही । लै सहाय धावा मुनिद्रोही ॥
 बिनु फरवान राम तेहि मारा । सत जोजन गा सागर पारा ॥
 पावक सर सुबाहु पुनि मारा । अनुज निसाचर कटकु सँधारा ॥
 मारि असुर द्विज निर्भयकारी । अस्तुति करहिं देव मुनि झारी ॥
 तहँ पुनि कछुक दिवस रघुराया । रहे कीन्हि विप्रन्ह पर दाया ॥
 भगति हेतु बहु कथा पुराना । कहे विप्र जद्यपि प्रभु जाना ॥
 तत्र मुनि सादर कहा बुझाई । चरितै एक प्रभु देखिअ जाई ॥
 धनुषजग्य सुनि रघुकुल नाथा । हरषि चले मुनिवर के साथ ॥
 आश्रम एक दीख मग माहीं । खग मृग जीव जंतु तहँ नाहीं ॥
 पूछा मुनिहि सिला प्रभु देखी । सकल कथा मुनि कहा विसेषी ॥

दो०—गौतम नारि श्राप बस उपल देह धरि धीर ।

चरन कमल रज चाहति कृपा करहु रघुबीर ॥२१०॥

छं०-परसत पद पावन सोक नसावन प्रगट भई तपपुंज सही ।
 देखत रघुनायक जन सुख दायक सनमुख होइ कर जोरि रही ॥
 अति प्रेम अधीरा पुलक सरोरा मुख नहि आवइ बचन कही ।
 अतिसय बड़भागी चरनन्हि लागी जुगल नयन जलधार बही ॥
 धीरजु मन कीन्हा प्रभुकहुँ चीन्हा रघुपति कृपाँ भगति पाई ।
 अति निर्मल बानीं अस्तुति ठानी ग्यानगम्य जय रघुराई ॥
 मैं नारि अपावन प्रभु जग पावन रावन रिपु जन सुखदाई ।
 राजीव बिलोचन भव भय मोचन पाहि पाहि सरन हें आई ॥
 मुनि श्राप जो दीन्हा अति भल कोन्हा परम अनुग्रह मैं माना ।
 देखेउँ भरि लोचन हरि भवमोचन इहइ लाभ संकर जाना ॥
 बिनती प्रभु मोरी मैं मति भोरी नाथ न मागउँ बर आना ।
 पद कमल परागा रस अनुरागा मम मन मधुप करै पाना ॥
 जेहि पद सुरसरिता परम पुनीता प्रगट भई सिव सीस धरी ।
 सोई पद पंकज जेहि पूजत अज मम सिर धरेउ कृपाल हरो ॥
 एहि भाँति सिधारी गौतम नारो बार बार हरि चरन परी ।
 जो अति मन भावा सो बरु पावा गै पतिलोक अनंद भरी ॥
 दो०-अस प्रभु दीनबंधु हरि कारन रहित दयाल ।

तुलसिदास सठ तेहि भजु छाड़ि कपट जंजाल ॥२११॥

मासपारायण, सातवाँ विश्राम

चले राम लछिमन मुनि संगी । गए जहाँ जग पावनि गंगा ॥

गाधिसूनु सब कथा सुनाई । जेहि प्रकार सुरसरि महि आई ॥

तव प्रभु रिषिन्ह समेत नहाए । विविध दान महिदेवन्हि पाए ॥
हरषि चले मुनि वृंद सहाया । वेगि विदेह नगर निअराया ॥
पुर रम्यता राम जव देखी । हरषे अनुज समेत विसेयी ॥
बापीं कूप सरित सर नाना । सलिल सुधासम मनि सोपाना ॥
गुंजत मंजु मत्त रस भृंगा । कूजत कल बहुवरन बिहंगा ॥
वरन वरन विकसे बनजाता । त्रिविध समीर सदा सुखदाता ॥

दो०—सुमन बाटिका बाग बन विपुल बिहंग निवास ।

फूलत फलत सुपल्लवत सोहत पुर चहुँ पास ॥२१२॥

बनइन वरनत नगर निकाई । जहाँ जाइ मन तँई लोभाई ॥
चारु बजारु विचित्र अँवारी । मनिमय विधि जनु स्वकर सँवारी
धनिक बनिक वर धनद समाना । बैठे सकल वस्तु लै नाना ॥
चौहट सुंदर गलीं सुहाई । संतत रहहिं सुगंध सिँचाई ॥
मंगलमय मंदिर सब केरें । चित्रित जनु रतिनाथ चितेरें ॥
पुर नर नारि सुभग सुचि संता । धरमसील ग्यानी गुनवंता ॥
अति अनूप जहँ जनक निवासू । बिथकहिं विबुध बिलोकि बिलासू
होत चकित चित कोट बिलोकी । सकल भुवन सोभा जनु रोकी ॥

दो०—धवल धाम मनि पुरट पट सुघटित नाना भाँति ।

सिय निवास सुंदर सदन सोभा किमि कहि जाति ॥२१३॥

सुभग द्वार सब कुलिस कपाटा । भूप भीर नट मागध भाटा ॥
बनी बिसाल बाजि गज साला । हय गय रथ संकुल सब काला ॥

सूर सचिव सेनप बहुतेरे । नृपगृह सरिस सदन सब केरे ॥
 पुर बाहेर सर सरित समीपा । उतरे जहँ तहँ विपुल महीपा ॥
 देखि अनूप एक अँवगाई । सब सुपास सब भाँति सुहाई ॥
 कौसिक कहेउ मोर मनु माना । इहाँ रहिअ रघुवीर सुजाना ॥
 भलेहिँ नाथ कहि कृपानिकेता । उतरे तहँ मुनिबृंद समेता ॥
 बिस्वामित्र महामुनि आए । समाचार मिथिलापति पाए ॥

दो०—संग सचिव सुचि भूरि भट भूसुर बर गुर ग्याति ।

चले मिलन मुनिनाथ कहि मुदित राउ एहि भाँति ॥२१४॥

कीन्ह प्रनामु चरन धरि माया । दीन्हि असीस मुदित मुनिनाथा ॥
 विप्रबृंद सब सादर बंदे । जानि भाग्य बड़ राउ अनंदे ॥
 कुसल प्रस्न कहि बारहिँ बारा । बिस्वामित्र नृपहि बैठारा ॥
 तेहि अवसर आए दोउ भाई । गए रहे देखन फुलवाई ॥
 स्याम गौर मृदु बयस किसोरा । लोचन सुखद बिस्व चित चोरा ॥
 उठे सकल जय रघुपति आए । बिस्वामित्र निकट बैठाए ॥
 भए सब सुखी देखि दोउ भ्राता । बारि बिलोचन पुलकित गाता ॥
 मूरति मधुर मनोहर देखी । भयउ बिदेहु बिदेहु बिसेषी ॥

दो०—प्रेम मगन मनु जानि नृपु करि बिबेकु धरि धीर ।

बोलेउ मुनि पद नाइ सिरु गदगद गिरा गभीर ॥२१५॥

कहहु नाथ सुंदर दोउ बालक । मुनिकुल तिलक कि नृपकुल पालक ॥
 ब्रह्म जो निगम नेति कहि गावा । उभय बेप धरि की सोइ आवा ॥

सहज विरागरूप मनु मोरा । थकित होत जिमि चंद चकोरा ॥
ताते प्रभु पूछउँ सतिभाऊ । कहहु नाथ जनि करहु दुराऊ ॥
इन्हहि विलोकत अति अनुरागा । बरबस ब्रह्मसुखहि मन त्यागा ॥
कह मुनि विहसि कहेहु नृप नीका । बचन तुम्हार न होइ अलीका ॥
ये प्रिय सबहि जहाँ लगि प्रानी । मन मुसुकाहिं रामु सुनि बानी ॥
रघुकुल मनि दसरथ के जाए । मम हित लागि नरेस पठाए ॥

दो०—रामु लखनु दोउ बंधुवर रूप सील बल धाम ।

मख राखेउ सबु साखि जगु जिते असुर संग्राम ॥२१६॥

मुनि तव चरन देखि कह राऊ । कहि न सकउँ निज पुन्य प्रभाऊ
सुंदर स्याम गौर दोउ भ्राता । आनँदहू के आनँद दाता ॥
इन्ह कै प्रीति परसपर पावनि । कहि न जाइ मन भाव सुहावनि ॥
सुनहु नाथ कह मुदित विदेहू । ब्रह्म जीव इव सहज सनेहू ॥
पुनि पुनि प्रभुहि चितव नरनाहू । पुलक गात उर अधिक उछाहू
मुनिहि प्रसंसि नाइ पद सीमू । चलेउ लवाइ नगर अवनीमू ॥
सुंदर सदन सुखद सब काला । तहाँ बासु लै दीन्ह मुआया ॥
करि पूजा सब विधि सेवकाई । गयउ राउ गृह विदा कराई ॥

दो०—रिषय संग रघुवंस मनि करि भोजनु बिभ्रामु ।

बैठे प्रभु भ्राता सहित दिवसु रहा भरि जामु ॥२१७॥

लखन हृदयँ लालसा बिसेषी । जाइ जनकपुर आइअ देखी ॥

प्रभु भय बहुरि मुनिहि सकुचाहीं । प्रगट न कहहिं मनहिं मुसुकाहीं

राम अनुज मन की गति जानी । भगत बछलता हियँ हुलसानी ॥
 परम विनीत सकुचि मुसुकाई । बोले गुर अनुसासन पाई ॥
 नाथ लखनु पुरु देखन चहहीं । प्रभु सकोच डर प्रगट न कहहीं ॥
 जौं राउर आयसु मैं पावौं । नगर देखाइ तुरत लै आवौं ॥
 सुनि मुनीसु कह बचन सप्रतीती । कस न राम तुम्ह राखहु नीती ॥
 धरम सेनु पालक तुम्ह ताता । प्रेम विवस सेवक सुखदाता ॥

दो०—जाइ देखि आवहु नगर सुख निधान दोउ भाइ ।

करहु सुफल सब के नयन सुंदर बदन देखाइ ॥२१८॥

मुनि पद कमल बंदि दोउ भ्राता । चले लोक लोचन मुख दाता ॥
 बालक बंद देखि अति सोभा । लगे संग लोचन मनु लोभा ॥
 पीत वसन परिकर कटि भाथा । चारु चाप सर सोहत हाथा ॥
 तन अनुहरत मुचंदन खोरी । स्यामल गौर मनोहर जोरी ॥
 केहरि कंधर बाहु बिसाला । उर अति रुचिर नाग मनि माला ॥
 सुभग सोन सरसीरुह लोचन । वदन मयंक तापत्रय मोचन ॥
 कानन्हि कनक फूल छवि देहीं । चितवत चितहि चोरि जनु लेहीं ॥
 चितवनि चारु भृकुटि बर बाँकी । तिलकरेख सोभा जनु चाँकी ॥

दो०—रुचिर चौतनीं सुभग सिर मेचक कुंचित केस ।

नख सिख सुंदर बंधु दोउ सोभा सकल सुदेस ॥२१९॥

देखन नगर भूपसुत आए । समाचार पुरवासिन्ह पाए ॥
 धाए धाम काम सब त्यागी । मनहुँ रंक निधि लूटन लागी ॥

निरखि सहज सुंदर दोउ भाई । होहिं सुखी लोचन फल पाई ॥
 जुवतीं भवन झरोखन्हि लागीं । निरखहिं राम रूप अनुरागीं ॥
 कहहिं परसपर बचन सप्रीती । सखि इन्ह कोटि काम छवि जीती
 सुर नर असुर नाग मुनि माहीं । सोभा असि कहूँ सुनिअति नाहीं
 । बिष्णु चारि भुज विधि मुख चारी । बिकट बेष मुख पंच पुरारी ॥
 अपर देउ अस कोउ न आही । यह छवि सखी पटतरिअ जाही ॥

दो०—बय किसोर सुषमा सदन स्याम गौर सुख धाम ।

अंग अंग पर वारिअहिं कोटि कोटि सत काम ॥२२०॥

कहहु सखी अस को तनुधारी । जो न मोह यह रूप निहारी ॥
 कोउ सप्रेम बोली मृदु बानी । जो मैं सुना सो सुनहु सयानी ॥
 ए दोऊ दसरथ के ढोटा । बाल मरालन्हि के कल जोटा ॥
 मुनि कौसिक मख के रखवारे । जिन्ह रन अजिर निसाचर मारे ॥
 स्याम गात कल कंज बिलोचन । जो मारीच सुभुज मदु मोचन ॥
 कौसल्या सुत सो सुख खानी । नामु रामु धनु सायक पानी ॥
 गौर किसोर बेषु बर काछें । कर सर चाप राम के पाछें ॥
 लछिमनु नामु रामलघु भ्राता । सुनु सखि तासु सुमित्रा माता ॥

दो०—बिप्रकाजु करि बंधु दोउ मग मुनिबधू उधारि ।

आए देखन चापमख सुनि हरषीं सब नारि ॥२२१॥

देखि राम छवि कोउ एक कहई । जोगु जानकिहियह बरु अहई ॥
 जौं सखि इन्हहि देख नरनाहू । पन परिहरि हठि करइ बिबाहू ॥

कोउ कह ए भूपति पहिचाने । मुनि समेत सादर सनमाने ॥
 सखि परंतु पनु राउ न तजई । विधि बस हठि अविवेकहि भजई
 कोउ कह जौं भल अहइ विधाता । सब कहँ सुनिअ उचित फल दाता
 तौ जानकिहि मिलिहि बरु एहू । नाहिन आलि इहाँ संदेहू ॥
 जौं विधि बस अस बनै सँजोगू । तौ कृतकृत्य होइ सब लोगू ॥
 सखि हमरें आरति अति तातें । कबहुँक ए आवहिं एहि नातें ॥
 दो०-नाहिं त हम कहँ सुनहु सखि इन्ह कर दरसनु दूरि ।

यह संघट्ट तब होइ जब पुन्य पुराकृत भूरि ॥२२२॥
 बोली अपर कहेहु सखि नीका । एहिं विआह अति हित सबही का
 कोउ कह संकर चार कठारा । ए स्यामल मृदुगात किसोरा ॥
 सबु असमंजस अहइ सयानी । यह सुनि अपर कहइ मृदु बानी ॥
 सखि इन्ह कहँ कोउ कोउ अस कहहीं । बड़ प्रभाउ देखत लघु अहहीं
 परसि जासु पद पंकज धूरी । तरी अहल्या कृत अघ भूरी ॥
 सो कि रइहि विनु सिव धनु तोरें । यह प्रतीति परिहरिअ न भोरें ॥
 जेहिं बिंरं चि रचि सीय सँवारी । तेहिं स्यामल बरु रचेउ विचारी ॥
 तासु बचन सुनि सब हरषानीं । ऐसेइ होउ कहहिं मृदु बानीं ॥
 दो०-हियँ हरषहिं बरषहिं सुमन सुमुखि सुलोचनि बृंद ।

जाहिं जहाँ जहँ बंधु दोउ तहँ तहँ परमानंद ॥२२३॥
 पुर पूरव दिसि गे दोउ भाई । जहँ धनुमख हित भूमि बनाई ॥
 अति बिस्तार चारु गच ढारी । विमल बेदिका रुचिर सँवारी ॥

चहुँदिसि कंचन मंच बिसाला । रचे जहाँ बैठहिं महिपाला ॥
 तेहि पाछें समीप चहुँ पोसा । अपर मंच मंडली बिलासा ॥
 कछुक ऊँचि सब भाँति सुहाई । बैठहिं नगर लोग जहँ जाई ॥
 तिन्ह के निकट बिसाल सुहाए । धवल धाम बहुवरन बनाए ॥
 जहँ बैठें देखहिं सब नारी । जथाजोगु निज कुल अनुहारी ॥
 पुर बालक कहि कहि मृदु बचना । सादर प्रभुहि देखावहिं रचना ॥

दो०—सब सिसु एहि भिस प्रेमबस परसि मनोहर गात ।

तन पुलकहिं अति हरषु हियँ देखि देखि दोउ भ्रात ॥ २२४ ॥

सिसु सब राम प्रेमबस जाने । प्रीति समेत निकेत बखाने ॥
 निज निज रुचि सब लेहिं बोलाई । सहित सनेह जाहिं दोउ भाई ॥
 राम देखावहिं अनुजहि रचना । कहि मृदु मधुर मनोहर बचना ॥
 लव निमेष महुँ भुवन निकाया । रचइ जासु अनुसासन माया ॥
 भगति हेतु सोइ दीनदयाला । चितवत चकित धनुष मखसाला ॥
 कौतुक देखि चले गुरु पाहीं । जानि बिलंबु त्रास मन माहीं ॥
 जासु त्रास डर कहुँ डर होई । भजन प्रभाउ देखावत सोई ॥
 कहि बातें मृदु मधुर सुहाई । किए बिदा बालक बरिआई ॥

दो०—सभय सप्रेम बिनीत अति सकुच सहित दोउ भाइ ।

गुर पद पंकज नाइ सिर बैठे आयसु पाइ ॥ २२५ ॥

निसि प्रवेस मुनि आयसु दीन्हा । सबहीं संध्याबंदनु कीन्हा ॥
 कहत कथा इतिहास पुरानी । रुचिर रजनि जुग जाम सिरानी ॥

मुनिवर सयन कीन्हि तब जाई । लगे चरन चापन दोउ भाई ॥
 जिन्ह के चरन सरोरुह लागी । करत विविध जप जोग विरागी ॥
 तेइ दोउ बंधु प्रेम जनु जीते । गुर पद कमल पलोटत प्रीते ॥
 बार बार मुनि अग्या दीन्ही । रघुवर जाइ सयन तब कीन्ही ॥
 चापत चरन लखनु उर लाएँ । सभय सप्रेम परम सचु पाएँ ॥
 पुनि पुनि प्रभु कह सोवहु ताता । पौढ़े धरि उर पद जलजाता ॥
 दो०-उठे लखनु निसि बिगत मुनि अहनसिखा धुनि कान ।

गुर तें पहिलेहि जगतपति जागे रामु सुजान ॥२२६॥

सकल सौच करि जाइ नहाए । नित्य निवाहि मुनिहि सिर नाए ॥
 समय जानि गुर आयसु पाई । लेन प्रसून चले दोउ भाई ॥
 भूप बागु बर देखेउ जाई । जँहँ बसंत रितु रही लोभाई ॥
 लागे बिटप मनोहर नाना । बरन बरन बर बेलि विताना ॥
 नव पल्लव फल सुमन सुहाए । निज संपति सुर रूख लजाए ॥
 चातक कोकिल कीर चकोरा । कूजत बिहग नटत कल मोरा ॥
 मध्य बाग सरु सोह सुहावा । मनि सोपान विचित्र बनावा ॥
 विमल सलिलु सरसिज बहुरंगा । जलखग कूजत गुंजत भृंगा ॥
 दो०-बागु तड़ागु बिलोकि प्रभु हरषे बंधु समेत ।

परम रम्य आरामु यहु जो रामहि सुख देत ॥२२७॥

चहुँद्रिसि चितइ पूँछि मालीगन । लगे लेन दल फूल मुदित मन ॥
 तेहि अवसर सीता तहँ आई । गिरिजा पूजन जननि पढाई ॥

संग सखीं सब सुभग सयानीं । गावाहि गीत मनीहर बानीं ॥
 सर समीप गिरिजा गृह सोहा । वरनि न जाइ देखि मनु मोहा ॥
 मज्जन करि सर सखिन्ह समेता । गई मुदित मन गौरि निकेता ॥
 पूजा कीन्हि अधिक अनुरागा । निज अनुरूप सुभग बर मागा ॥
 एक सखी सिय संगु बिहाई । गई रही देखन फुलवाई ॥
 तेहिं दोउ बंधु बिलोके जाई । प्रेम बिस सीता पहिं आई ॥
 दो०—तासु दसा देखी सखिन्ह पुलक गात जलु नैन ।

कहु कारनु निज हरष कर पूछहिं सब मृदु बैन ॥२२८॥
 देखन बागु कुअँर दुइ आए । बय किसोर सब भाँति सुहाए ॥
 स्याम गौर किमि कहौ बखानी । गिरा अनयन नयन बिनु बानी ॥
 सुनि हरषीं सब सखीं सयानी । सिय हियँ अति उतकंठा जानी ॥
 एक कहइ नृपसुत तेइ आली । सुने जे मुनि सँग आए काली ॥
 जिन्ह निज रूप मोहनी डारी । कीन्हे स्ववस नगर नर नारी ॥
 वरनत छवि जहँ तहँ सब लोगू । अवसि देखिअहिं देखन जोगू ॥
 तासु बचन अति सियहि सोहाने । दरस लागि लोचन अकुलाने ॥
 चली अग्र करि प्रिय सखि सोई । प्रीति पुरातन लखइ न कोई ॥
 दो०—सुमिरि सीय नारद बचन उपजी प्रीति पुनीत ।

चकित बिलोकति सकल दिसि जनु सिसु मृगी सभीत ॥२२९॥
 कंकन किंकिनि नूपुर धुनि सुनि । कहत लखन सन रामु हृदयँ गुनि ।
 मानहुँ मदन दुंदुभी दीन्ही । मनसा बिस्व विजय कहँ कीन्ही ॥

अस कहि फिरि चितए तेहि ओरा। सिय मुख ससि भए नयन चकोरा
 भए बिलोचन चारु अचंचल। मनहुँ सकुचि निमि तजे दिगंचल
 देखि सीय सोभा सुख पावा। हृदयँ सराहत बचनु न आवा ॥
 जनु बिरंचि सब निज निपुनाई। बिरचि बिस्व कहँ प्रगटि देखाई
 सुंदरता कहँ सुंदर करई। छविगृहँ दीपसिखा जनु बरई ॥
 सब उपमा कबि रहे जुठारी। केहि पटतरौं बिदेहकुमारी ॥

दो०—सिय सोभा हियँ बरनि प्रभु आपनि दसा बिचारि ।

बोले सुचि मन अनुज सन बचन समय अनुहारि ॥२३०॥

तांत जनकतनया यह सोई। धनुषजग्य जेहि कारन होई ॥
 पूजन गौरि सखीं लै आई। करत प्रकासु फिरइ फुलवाई ॥
 जासु बिलोकि अलौकिक सोभा। सहज पुनीत मोर मनु छोभा ॥
 सो सबु कारन जान बिधाता। फरकहिं सुभद अंग सुनु भ्राता ॥
 रघुवंसिन्ह कर सहज सुभाऊ। मनु कुपंथ पगु धरइ न काऊ ॥
 मोहि अतिसय प्रतीति मन केरी। जेहिं सपनेहुँ परनारि न हेरी ॥
 जिन्ह कै लहहिं न रिपु रन पीठी। नहिं पावहिं परतिय मनु डीठी ॥
 मंगन लहहिं न जिन्ह कै नाहीं। ते नरवर थोरे जग माहीं ॥

दो०—करत बतकही अनुज सन मन सिय रूप लोभान ।

मुख सरोज मकरंद छवि करइ मधुप इव पान ॥२३१॥

चितवति चकित चहुँ दिसि सीता। कहँ गए नृपकिसोर मनु चिंता ॥

जहँ बिलोक मृग सावक नैनी। जनु तहँ बरिस कमल सित श्रेणी ॥

लता ओट तव सखिन्ह लखाए । स्यामल गौर किसोर सुहाए ॥
देखि रूप लोचन ललचाने । हरषे जनु निज निधि पहिचाने ॥
थके नयन रघुपति छवि देखें । पलकन्हिहूँ परिहरीं निमेषें ॥
अधिक सनेहँ देह भै भोरी । सरद ससिहि जनु चितव चकोरी
लोचन मग रामहि उर आनी । दीन्हे पलक कपाट सयानी ॥
जव सिय सखिन्ह प्रेमवस जानी । कहि न सकहिं कछु मन सकुचानी
दो०—लताभवन तें प्रगट भे तेहि अवसर दोउ भाइ ।

निकसे जनु जुग विमल बिधु जलद पटल बिलगाइ ॥२३२॥
सोभा सीवँ सुभग दोउ बीरा । नील पीत जलजाभ सरीरा ॥
मोरपंख सिर सोहत नीके । गुच्छ बीच बिच कुसुम कली के
भाल तिळक श्रमविंदु सुहाए । श्रवन सुभग भूषन छवि छाए ॥
विकट भृकुटि कच घूघरवारे । नव सरोज लोचन रतनारे ॥
चारु चिबुक नासिका कपोल । हास विलास लेत मनु मोला ॥
मुखछवि कहि न जाइ मोहि पाहीं । जो बिलोकि बहु काम लजाहीं ॥
उर मनि माल कंबु कल गीवा । काम कलभ कर भुज बलसीवा ॥
सुमन समेत बाम कर दोना । सावँर कुअँर सखी सुठि लोना ॥
दो०—केहरिकटि पट पीत धर सुषमा सील निधान ।

देखि भानुकुलभूषनहि बिसरा सखिन्ह अपान ॥२३३॥
धरि धीरजु एक आलि सयानी । सीता सन बोली गहि पानी ॥
बहुरि गौरि कर ध्यान करेहू । भूपकिसोर देखि किन लेहू ॥

सकुचि सीयँ तब नयन उधारे । सनमुख दोउ रघुसिंघ निहारे ॥
 नख सिख देखि राम कै सोभा । सुमिरि पिता पनु मनु अति छोभा
 पर बस सखिन्ह लखी जब सीता । भयउ गहरु सब कहहिं सभीता ॥
 पुनि आउब एहि बेरि आँ काली । अस कहि मन बिहसी एक आली
 गूढ़ गिरा सुनि सिय सकुचानी । भयउ बिलंबु मातु भय मानी ॥
 धरि बड़ि धीर रामु उर आने । फिरी अपनपउ पितु बस जाने ॥
 दो०—देखन मिस मृग बिहग तरु फिरइ बहोरि बहोरि ।

निरखि निरखि रघुबीर छबि बाढ़इ प्रीति न थोरि ॥२३४॥

जानि कठिन सिवचाप विसूरति । चली राखि उर स्यामल मूरति ॥
 प्रभु जब जात जानकी जानी । सुख सनेह सोभा गुन खानी ॥
 परम प्रेममय मृदु मसि कीन्ही । चारु चित्त भीतीं लिखि लीन्ही ॥
 गई भवानी भवन बहोरी । बंदि चरन बोली कर जोरी ॥
 जय जय गिरिवरराज किसोरी । जय महेस मुख चंद चकोरी ॥
 जय गजबदन षडानन माता । जगत जननि दामिनि दुति गाता
 नहिं तव आदि मध्य अवसाना । अमित प्रभाउ वेद नहिं जाना ॥
 भव भव बिभव पराभव कारिनि । बिस्व बिमोहनि स्वबस बिहारिनि
 दो०—पतिदेवता सुतीय महुँ मातु प्रथम तव रेख ।

महिमा अमित न सकहिं कहि सहस सारदा सेष ॥२३५॥

सेवत तोहि सुलभ फल चारी । बरदायनी पुरारि पिआरी ॥
 देवि पूजि पद कमल तुम्हारे । सुर नर मुनि सब होहिं सुखारे ॥

मोर मनोरथु जानहु नीकें। बमहु सदा उर पुर सबही कें ॥
कीन्हे उँ प्रगट न कारन तेहीं। अस कहि चरन गहे वैदेहीं ॥
बिनय प्रेम बस भई भगानी। खसी माल मूरति सुसुकानी ॥
सादर सियँ प्रसादु सिर धरेऊ। बोली गौरि हरषु हियँ भरेऊ ॥
सुनु सिय सत्य असीस हमारी। पूजिहि मन कामना तुम्हारी ॥
नारद बचन सदा सुचि साचा। सो बर मिलिहि जाहिँ मनु राचा ॥

छं०—मनु जाहिँ राचेउ मिलिहि सो बर सहज सुंदर साँवरो।
करुना निधान सुजान सीलु सनेहु जानत रावरो ॥
एहि भौँति गौरि असीस सुनि सिय सहित हियँ हरषीं अली।
तुलसी भवानिहि पूजि पुनि पुनि मुदित मन मंदिर चली ॥
सो०—जानि गौरि अनुकूल सिय हिय हरषु न जाइ कहि।

मंजुल मंगल मूल बाम अंग फरकन लगे ॥२३६॥

हृदयँ सराहत सीय लोनाई। गुर समीप गवने दोउ भाई ॥
राम कहा सबु कौसिक पाहीं। सरल सुभाउ छुअत छल नाहीं ॥
सुमन पाइ मुनि पूजा कीन्ही। पुनि असीस दुहु भाइन्ह दीन्ही ॥
सुफल मनोरथ होहुँ तुम्हारे। रामु लखनु सुनि भए सुखारे ॥
करि भोजनु मुनिवर विग्यानी। लगे कहन कछु कथा पुरानी ॥
विगत दिवसु गुरु आयसु पाई। संध्या करन चले दोउ भाई ॥
प्राची दिसि ससि उयउ सुहावा। सिय मुख सरिस देखि सुखु गावा ॥
बहुरि विचार कीन्ह मन माहीं। सीय बदन सम हिमकर नाहीं ॥

दो०—जनसु सिंधु पुनि बंधु विपु दिन मलीन सकलंक ।

सिय मुख ससता पाव किमि चंदु बापुरो रंक ॥२३७॥

घटइ बढइ विरहिनि दुखदाई । असइ राहु निज संधिहिं पाई ॥
 कोक सोकप्रद पंकज द्रोही । अवगुन बहुत चंद्रमा तोही ॥
 बैदेही मुख पटतर दीन्हे । होइ दोषु बड़ अनुचित कीन्हे ॥
 सिय मुख छवि विधु व्याज बखानी । गुर पहिं चले निसा बड़ि जानी
 करि मुनि चरन सरोज प्रनामा । आयसु पाइ कीन्ह विश्रामा ॥
 बिगत निसा रघुनायक जागे । बंधु बिलोकि कहन अस लागे ॥
 उयउ अरुन अवलोकहु ताता । पंकज कोक लोक सुखदाता ॥
 बोले लखनु जोरि जुग पानी । प्रभु प्रभाउ सूचक मृदु बानी ॥

दो०—अरुनोदयँ सकुचे कुमुद उडंगन जोति मलीन ।

जिमि तुम्हार आगमन सुनि भए नृपति बलहीन ॥२३८॥

नृप सब नखत करहिं उजिआरी । टारि न सकहिं चाप तम भारी ॥
 कमल कोक मधुकर खग नाना । हरषे सकल निसा अवसाना ॥
 ऐसेहिं प्रभु सब भगत तुम्हारे । होइहिं दूटें धनुष सुखारे ।
 उयउ भानु बिनु श्रम तम नासा । दुरे नखत जग तेजु प्रकासा ॥
 रवि निज उदय व्याज रघुराया । प्रभु प्रतापु सब नृपन्ह दिखाया ॥
 तव भुज बल महिमा उदघाटी । प्रगटी धनु बिघटन परिपाटी ॥
 बंधु बचन सुनि प्रभु मुसुकाने । होइ सुचि सहज पुनीत नहाने ॥
 नित्यक्रिया करि गुरु पहिं आए । चरन सरोज सुभग सिर नाए ॥

सतानंदु तव जनक बोलाए । कौसिक मुनि पहिं तुरत पठाए ॥
जनक विनय तिन्ह आइ सुनाई । हरषे बोलि लिए दोउ भाई ॥
दो०—सतानंद पद बंदि प्रभु बैठे गुर पहिं जाइ ।

चलहु तात मुनि कहेउ तव पठवा जनक बोलाइ ॥२३९॥

मासपारायण, आठवाँ विश्राम

नवाह्नपारायण, दूसरा विश्राम

सीय स्वयंवर देखिअ जाई । ईसु काहि धौं देइ बड़ाई ॥
लखन कहा जस भाजनु सोई । नाथ कृपा तव जापर होई ॥
हरषे मुनि सब मुनि बर बानी । दीन्हि असीस सबहिं सुखु मानी ॥
पुनि मुनिबृंद समेत कृपाला । देखन चले धनुषमख साला ॥
रंगभूमि आए दोउ भाई । असि सुधि सब पुरवासिन्ह पाई ॥
चले सकल गृह काज बिसारी । बाल जुवान जरठ नर नारी ॥
देखी जनक भीर भै भारी । सुचि सेवक सब लिए हँकारी ॥
तुरत सकल लोगन्ह पहिं जाहू । आसन उचित देहु सब काहू ॥
दो०—कहि मृदु वचन विनीत तिन्ह बैठारे नरनारि ।

उत्तम मध्यम नीच लघु निज निज थल अनुहारि ॥२४०॥

राजकुँअर तेहि अवसर आए । मनहुँ मनोहरता तन छाए ॥
गुन सागर नागर बर बीरा । सुंदर स्यामल गौर सरीरा ॥
राज समाज बिराजत रूरे । उडगन महुँ जनु जुग विधु पूरे ॥
जिन्ह कें रही भावना जैसी । प्रभु मूरति तिन्ह देखी तैसी ॥

देखहिं रूप महा रनधीरा । मनहुँ वीर रसु धरें सरीरा ॥
 डरे कुटिल नृप प्रभुहि निहारी । मनहुँ भयानक मूरति भारी ॥
 रहे असुर छल छोनिप वेपा । तिन्ह प्रभु प्रगट कालसम देखा
 पुरबासिन्ह देखे दोउ भाई । नरभूषन लोचन सुखदाई ॥
 दो०—नारि बिलोकहिं हरषि हियँ निज निज रुचि अनुरूप ।

जनु सोहत सिंगार धरि मूरति परम अनूप ॥२४१॥

बिदुषन्ह प्रभु विराटमय दीसा । बहु मुख कर पग लोचन सीसा ॥
 जनक जाति अवलोकहिं कैसैं । सजन सगे प्रिय लागहिं जैसैं ॥
 सहित विदेह बिलोकहिं रानी । सिसु सम प्रीति न जाति बखानी
 जोगिन्ह परम तत्त्वमय भामा । सांत सुद्ध सम सहज प्रकासा ॥
 हरि भगतन्ह देखे दोउ भ्राता । इष्टदेव इव सब सुख दाता ॥
 रामहि चितव भायँ जेहि सीया । सो सनेहु सुखु नहिं कथनीया ॥
 उर अनुभवति न कहि सक सोऊ । कवन प्रकार कहै कवि कोऊ ॥
 एहि विधि रहा जाहि जस भाऊ । तेहिं तस देखेउ कोसलराऊ ॥
 दो०—राजत राज समाज महुँ कोसलराज किसोर ।

सुंदर स्यामल गौर तन बिख बिलोचन चोर ॥२४२॥

सहज मनोहर मूरति दोऊ । कोटि काम उपमा लघु सोऊ ॥
 सरद चंद निंदक मुख नीके । नीरज नयन भावते जी के ॥
 चितवनि चारु मार मनु हरनी । भावति हृदय जाति नहिं बरनी
 कल कपोल श्रुति कुंडल लोला । चिबुक अधर सुंदर मृदु बोला ॥

कुमुदबन्धु कर निंदक हाँसा। भृकुटी विकट मनोहर नासा ॥
भाल बिसाल तिलक झलकाहीं। कच बिलोकि अलि अवलि लजाहीं
पीत चौतर्नीं सिरन्हि सुहाई। कुसुम कलीं बिच बीच बनाई ॥
रेखें रुचिर कंबु कल गीवाँ। जनु त्रिभुवन सुप्रमा की सीवाँ ॥
दो०—कुंजर मनि कंठा कलित उरन्हि तुलसिका माल ।

वृषभ कंध केहरि ठवनि बल निधि बाहु बिसाल ॥२४३॥
कटि तूनीर पीत पट बाँधें। कर सर धनुष बाम वर काँधें ॥
पीत जग्य उपवीत सुहाए। नख सिख मंजु महाछवि छाए ॥
देखि लोग सब भए सुखारे। एकटक लोचन चलत न तारे ॥
हरषे जनकु देखि दोउ भाई। मुनिपद कमल गहे तब जाई ॥
करि बिनती निज कथा सुनाई। रंग अवनि सब मुनिहि देखाई ॥
जहँ जहँ जाहिँ कुअँर वर दोऊ। तहँ तहँ चकित चितव सबु कोऊ ॥
निज निज रुख रामहि सबु देखा। कोउ न जान कछु मरमु बिसेषा ॥
भलि रचना मुनि नृप सन कहेऊ। राजाँ मुदित महासुख लहेऊ ॥
दो०—सब मंचन्ह तें मंचु एक सुंदर बिसद बिसाल ।

मुनि समेत दोउ बंधु तहँ बैठारे महिपाल ॥२४४॥
प्रभुहि देखि सब नृप हियँ हारे। जनु राकेस उदय भएँ तारे ॥
असि प्रतीति सब के मन माहीं। राम चाप तोरव सक नाहीं ॥
बिनु भंजेहुँ भव धनुषु बिसाल। मेलिहि सीय राम उर माला ॥
अस बिचारि गवनहु घर भाई। जसु प्रतापु बलु तेजु गवाँई ॥

बिहसे अपर भूप सुनि बानी । जे अबिवेक अंध अभिमानी ॥
तोरेहुँ धनुषु ब्याहु अवगाहा । बिनु तोरें को कुअँरि बिआहा ॥
एक बार कालउ किन होऊ । सिय हित समर जितव हम सोऊ ॥
यह सुनि अवर महिप मुसुकाने । धरमसील हरिभगत सयाने ॥
सो०—सीय बिआहबि राम गरब दूरि करि नृपन्ह के ।

जीति को सक संग्राम दसरथ के रन बाँकुरे ॥२४५॥
ब्यर्थ मरहु जनि गाल बजाई । मन मोदकन्हि कि भूख बुताई ॥
सिख हमारि सुनि परम पुनीता । जगदंबा जानहु जियँ सीता ॥
जगत पिता रघुपतिहि बिचारी । भरि लोचन छवि लेहु निहारी ॥
सुंदर सुखद सकल गुन रासी । ए दोउ बंधु संभु उर बासी ॥
सुधा समुद्र समीप बिहाई । मृगजलु निरखि मरहु कत धाई ॥
करहु जाइ जा कहूँ जोइ भावा । हम तौ आजु जनम फलु पावा ॥
अस कहि भले भूप अनुरागे । रूप अनूप बिलोकन लागे ॥
देखहिँ सुर नभ चढ़े बिमाना । बरषहिँ सुमन करहिँ कल गाना ॥
दो०—जानि सुअवसरु सीय तब पठई जनक बोलाइ ।

चतुर सखीं सुंदर सकल सादर चलीं लवाइ ॥२४६॥

सिय सोभा नहिँ जाइ बखानी । जगदंबिका रूप गुन खानी ॥
उपमा सकल मोहि लघु लागीं । प्राकृत नारि अंग अनुरागीं ॥
सिय बरनिअ तेइ उपमा देई । कुकवि कहाइ अजसु को लेई ॥

गिरा मुखर तन अरध भवानी । रति अति दुखित अतनु पति जानी
 बिष बारुनी बंधु प्रिय जेही । कहिअ रमासम किमि वैदेही ॥
 जौ छवि सुधा पयोनिधि होई । परम रूपमय कच्छपु सोई ॥
 सोभा रजु मंदरु सिंगारु । मथै पानि पंकज निज मारु ॥
 दो०—एहि बिधि उपजै लच्छि जब सुंदरता सुख मूल ।

तदपि सकोच समेत कबि कहहिं सीय समतूल ॥२४७॥

चलीं संग लै सखीं सयानी । गावत गीत मनोहर बानी ॥
 सोह नवल तनु सुंदर सारी । जगत जननि अनुलित छवि भारी
 भूषन सकल सुदेस सुहाए । अंग अंग रचि सखिन्ह बनाए ॥
 रंगभूमि जब सिय पगु धारी । देखि रूप मोहे नर नारी ॥
 हरषि सुरन्ह दुंदुर्भां बजाई । वरषि प्रसून अपछरा गाई ॥
 पानि सरोज सोह जयमाला । अवचट चितए सकल भुआला ॥
 सीय चकित चित रामहि चाहै । भए मोहवस सब नरनाहा ॥
 मुनि समीप देखे दोउ भाई । लगे ललकि लोचन निधि पाई ॥
 दो०—गुरजन लाज समाजु बड़ देखि सीय सकुचानि ।

लागि बिलोकन सखिन्ह तन रघुबीरहि उर आनि ॥२४८॥

राम रूपु अरु सिय छवि देखें । नर नारिन्ह परिहरीं निमेषें ॥
 सोचहिं सकल कहत सकुचाहीं । बिधि सन विनय करहिं मन माहीं
 हरु बिधि बेगि जनक जड़ताई । मति हमारि असि देहि सुहाई ॥
 बिनु बिचार पनु तजि नरनाहू । सीय राम कर करै बिबाहू ॥

जगु भल कहिहि भाव सब काहू । हठ कीन्हें अंतहुँ उर दाहू ॥
 एहिं लालसाँ मगन सब लोगू । बरु साँवरो जानकी जोगू ॥
 तब बंदीजन जनक बोलाए । बिरिदावली कहत चलि आए ॥
 कह नृपु जाइ कहहु पन मोरा । चले भाट हियँ हरषु न थोरा ॥
 दो०—बोले बंदी बचन बर सुनहु सकल महिपाल ।

पन बिदेह कर कहहिं हम भुजा उठाइ विसाल ॥२४९॥

नृप भुजबलु बिधु सिवधनु राहू । गरुअ कठोर बिदित सब काहू ॥
 रावनु बानु महाभट भारे । देखि सरासन गवँहिं सिधारे ॥
 सोइ पुरारि कोदंडु कठोरा । राज समाज आजु जोइ तोरा ॥
 त्रिभुवन जय समेत बैदेही । बिनहिं बिचार बरइ हठि तेही ॥
 सुनि पन सकल भूप अभिलाषे । भटमानी अतिसय मन माखे ॥
 परिकर बाँधि उठे अकुलाई । चले इष्टदेवन्ह सिर नाई ॥
 तमकि ताकि तकि सिवधनु धरहीं । उठइ न कोटि भाँति बलु करहीं ॥
 जिन्ह के कछु बिचारु मन माहीं । चाप समीप महीप न जाहीं ॥
 दो०—तमकि धरहिं धनु मूढ़ नृप उठइ न चलहिं लजाइ ।

मनहुँ पाइ भट बाहु बलु अधिकु अधिकु गरुआइ ॥२५०॥

भूप सहस दस एकहि बारा । लगे उठावन टरइ न टारा ॥
 डगाइ न संभु सरासनु कैसैं । कामी बचन सती मनु जैसैं ॥
 सब नृप भए जोगु उपहासी । जैसैं बिनु बिराग संन्यासी ॥

श्रीहत भए हारि हियँ राजा । बैठे निज निज जाइ समाजा ॥
नृपन्ह बिलोकि जनकु अकुलाने । बोले बचन रोष जुनु साने ॥
दीप दीप के भूपति नाना । आए सुनि हमजो पनु ठाना ॥
देव दनुज धरि मनुज सरीरा । विपुल बीर आए रनधीरा ॥
दो०—कुअँरि मनोहर बिजय बड़ि कीरति अति कमनीय ।

पावनिहार बिरंचि जुनु रचेउ न धनु दमनीय ॥२५१॥

कहहु काहि यहु लाभुन भावा । काहुँ न संकर चाप चढ़ावा ॥
रहउ चढ़ाउव तोरव भाई । तिलु भरि भूमि न सके छड़ाई ॥
अब जनि कोउ माखै भट मानी । बीर बिहीन मही मैं जानी ॥
तजहु आस निज निज गृह जाहू । लिखान विधि बैदेहि बिबाहू ॥
सुकृतु जाइ जौ पनु परिहरऊँ । कुअँरि कुआरि रहउ का करऊँ ॥
जौ जनतेऊँ बिनु भट भुवि भाई । तौ पनु करि होतेऊँ न हँसाई ॥
जनक बचन सुनि सब नर नारी । देखि जानकिहि भए दुखारी ॥
माखे लखनु कुटिल भई भौहैं । रदपट फरकत नयन रिसौहैं ॥
दो०—कहि न सकत रघुबीर डर लगे बचन जुनु बान ।

नाइ राम पद कमल सिरु बोले गिरा प्रमान ॥२५२॥

रघुबंसिन्ह महुँ जहँ कोउ होई । तेहि समाज अस कहइ न कोई ॥
कही जनक जसि अनुचित बानी । बिद्यमान रघुकुल मनि जानी ॥
सुनहु भानुकुल पंकज भानू । कहउँ सुभाउ न कछु अभिमानू ॥
जौ तुम्हारि अनुसासन पावौ । कंदुक इव ब्रह्मांड उठावौ ॥

१४२

* रामचरितमानस *

काचे घट जिमि डारौं फोरी । सकउँ मेरु मूलक जिमि तोरी ॥
तव प्रताप महिमा भगवाना । को बापुरो पिनाक पुराना ॥
नाथ जानि अस आयसु होऊ । कौतुकु करौं बिलोकिअ सोऊ ॥
कमल नाल जिमि चाप चढ़ावौं । जोजन सत प्रमान लै धावौं ॥
दो०-तोरौं छत्रक दंड जिमि तव प्रताप बल नाथ ।

जौं न करौं प्रभु पद सपथ कर न धरौं धनु भाथ ॥२५२॥
लखन सकोप बचन जे बोले । डगमगानि महि दिग्गज डोले ॥
सकल लोग सब भूप डेराने । सिय हियँ हरषु जनकु सकुचाने ॥
गुर रघुपति सब मुनि मन माहीं । मुदित भए पुनि पुनि पुलकाहीं ॥
सयनहिं रघुपति लखनु नेवारे । प्रेम समेत निकट बैठारे ॥
बिस्वामित्र समय सुभ जानी । बोले अति सनेहमय बानी ॥
उठहु राम भंजहु भवचापा । मेटहु तात जनक परितापा ॥
मुनि गुरु बचन चरन सिरु नागा । हरषु त्रिषादु न कछु उर आवा ॥
ठाढ़े भए उठि सहज सुभाएँ । ठवनि जुवा मृगराजु लजाएँ ॥
दो०-उदित उदयगिरि मंच पर रघुबर बालपतंग ।

बिकसे संत सरोज सब हरषे लोचन भुंग ॥२५४॥
नृपन्ह केरि आसा निसि नासी । बचन नखत अवली न प्रकासी ॥
मानी महिष कुमुद सकुचाने । कपटी भूप उलूक लुकाने ॥
भए बिसोक कोक मुनि देवा । बरिसहिं सुमन जनावहिं सेवा ॥

गुर पद बंदि सहित अनुरागा । राम मुनिन्ह सन आयसु सागा ॥
CC-0. Nanaji Deshmukh Library, BJP, Jammu. An eGangotri Initiative

सहजहिं चले सकल जग स्वामी । मत्त मंजु बर कुंजर गामी ॥
चलत राम सब पुर नर नारी । पुलक पूरि तन भए सुखारी ॥
बंदि पितर सुर सुकृत सँभारे । जौं कछु पुन्य प्रभाउ हमारे ॥
तौ सिवधनु मृनाल की नाई । तोरहुँ रामु गनेस गोसाईं ॥
दो०—रामहि प्रेम समेत लखि सखिन्ह समीप बोलाइ ।

सीता मातु सनेह बस बचन कहइ बिलखाइ ॥२५५॥
सखि सब कौतुक देखनिहारे । जेउ कहावत हितू हमारे ॥
कोउ न बुझाइ कहइ गुर पाहीं । ए बालक असि हठ भलि नाहीं ॥
रावन बान छुआ नहिं चापा । हारे सकल भूप करि दापा ॥
सो धनु राजकुअँर कर देहीं । बाल मराल कि मंदर लेहीं ॥
भूप सयानप सकल सिरानी । सखि बिधि गति कछु जाति न जानी ॥
बोली चतुर सखी मृदु बानी । तेजवंत लघु गनिअ न रानी ॥
कहँ कुंभज कहँ सिंधु अपारा । सोषेउ सुजसु सकल संसारा ॥
रवि मंडल देखत लघु लागा । उदयँ तासु तिभुवन तम भागा ॥
दो०—मंत्र परम लघु जासु बस बिधि हरि हर सुर सर्व ।

महामत्त गजराज कहँ बस कर अंकुस खँब ॥२५६॥
काम कुसुम धनु सायक लीन्हे । सकल भुवन अपनै बस कीन्हे ॥
देवि तजिअ संसउ अस जानी । भंजव धनुषु राम सुनु रानी ॥
सखी बचन सुनि भै परतीती । मिटा विषादु बढी अति प्रीती ॥
तब रामहि बिलोकि बैदेही । सभय हृदयँ विनवति जेहि तेही ॥

मनहीं मन मनाव अकुलानी । होहु प्रसन्न महेस भवानी ॥
 करहु सफल आपनि सेवकाई । करि हितु हरहु चाप गरुआई ॥
 गननायक बरदायक देवा । आजु लों कीन्हिउँ तुअ सेवा ॥
 बार बार विनती सुनि मोरी । करहु चाप गुरुता अति थोरी ॥
 दो०—देखि देखि रघुबीर तन सुर मनाव धरि धीर ।

भरे बिलोचन प्रेम जल पुलकावली सरीर ॥२५७॥

नीकें निरखि नयन भरि सोभा । पितु पनु सुमिरि बहुरि मनु छोभा
 अहह तात दारुनि हठ ठानी । समुझत नहिं कछु लाभु न हानी ॥
 सचिव सभय सिख देइ न कोई । बुध समाज बड़ अनुचित होई ॥
 कहँ धनु कुलिसहु चाहि कठोरा । कहँ स्यामल मृदुगात किसोरा ॥
 बिधि केहि भाँति धरौं उर धीरा । सिरस सुमन कन बेधिअ हीरा ॥
 सकल सभा कै मति भै भोरी । अब मोहि संभु चाप गति तोरी ॥
 निज जड़ता लोगन्ह पर डारी । होहि हरुअ रघुपतिहि निहारी ॥
 अति परिताप सीय मन माहीं । लव निमेष जुग सय सम जाहीं ॥
 दो०—प्रभुहि चितइ पुनि चितव महि राजत लोचन लोल ।

खेलत मनसिज मीन जुग जनु बिधु मंडल डोल ॥२५८॥

गिरा अलिनि मुख पंकज रोकी । प्रगट न लाज निसा अवलोकी ॥
 लोचन जलु रह लोचन कोना । जैसें परम कृपन कर सोना ॥
 सकुची ब्याकुलता बड़ि जानी । धरि धीरजु प्रतीति उर आनी ॥
 तन मन बचन मोर पनु साचा । रघुपति पद सरोज चित राचा ॥

तौ भगवानु सकल उर वासी । करिहि मोहि रघुवर कै दासी ॥
 जेहि कैं जेहि पर सत्य सनेहू । सो तेहि मिलइ न कछु संदेहू ॥
 प्रभु तन चितइ प्रेम तन ठाना । कृपानिधान राम सबु जाना ॥
 सियहि बिलोकि तकेउ धनु कैसैं । चितव गरु लघु ब्यालहि जैसैं
 दो०—लखन लखेउ रघुवंसमनि ताकेउ हर कोदंडु ।

पुलकि गात बोले बचन चरन चापि ब्रह्मांडु ॥२५९॥
 दिसि कुंजरहु कमठ अहि कोला । धरहु धरनि धरि धीर न डोला ॥
 रामु चहहिं संकर धनु तोरा । होहु सजग सुनि आयसु मोरा ॥
 चाप समीप रामु जब आए । नर नारिन्ह सुर सुकृत मनाए ॥
 सब कर संसउ अरु अग्यानु । मंद महीपन्ह कर अभिमानू ॥
 भृगुपति केरि गरब गरुआई । सुर मुनिवरन्ह केरि कदराई ॥
 सिय कर सोचु जनक पछितावा । रानिन्ह कर दारुन दुख दावा ॥
 संभुचाप बड़ बोहितु पाई । चढ़े जाइ सब संगु बनाई ॥
 राम बाहुबल सिंधु अपारु । चहत पारु नहिं कोउ कड़हारु ॥
 दो०—राम बिलोके लोग सब चित्र लिखे से देखि ।

चितई सीय कृपायतन जानी बिकल बिसेषि ॥२६०॥
 देखी विपुल बिकल बैदेही । निमिष विहात कल्प सम तेही ॥
 तृषित बारि बिनु जो तनु त्यागा । मुएँ करइ का सुधा तड़ागा ॥
 का बरषा सब कृषी सुखानैं । समय चुकैं पुनि का पछितानैं ॥
 अस जियँ जानि जानकी देखी । प्रभु पुलके लखि प्रीति बिसेषी ॥

गुरहि प्रनामु मनहिं मन कीन्हा । अति लाघवँ उठाइ धनु लीन्हा ॥
दमकेउ दामिनि जिमि जब लयऊ । पुनि नभ धनु मंडलसम भयऊ
लेत चढ़ावत खँचत गाढ़ें । काहुँ न लखा देख सबु ठाढ़ें ॥
तेहि छन राम मध्य धनु तोरा । भरे भुवन धुनि घोर कठोरा ॥

छं०—भरे भुवन घोर कठोर रव रबि बाजि तजि मारगु चले ।
चिक्करहिं दिग्गज डोल महि अहि कोल कूरुम कलमले ॥
सुर असुर मुनि कर कान दीन्हें सकल बिकल बिचारहीं ।
कोदंड खंडेउ राम तुलसी जयति बचन उचारहीं ॥

सो०—संकर चापु जहाजु सागरु रघुबर बाहुबलु ।
बूड़ सो सकल समाजु चढ़ा जो प्रथमहिं मोह बस ॥२६१॥

प्रभु दोउ चापखंड महि डारे । देखि लोग सब भए सुखारे ॥
कौसिकरूप पयोनिधि पावन । प्रेम बारि अवगाहु सुहावन ॥
रामरूप राकेसु निहारी । बढ़त बीचि पुलकावलि भारी ॥
बाजे नभ गहगहे निसाना । देववधू नाचहिं करि गाना ॥
ब्रह्मादिक सुर सिद्ध मुनीसा । प्रभुहि प्रसंसहिं देहिं असीसा ॥
बरिसहिं सुमन रंग बहु माला । गावहिं किंनर गीत रसाला ॥
रही भुवन भरि जय जय बानी । धनुषभंग धुनि जात न जानी ॥
मुदित कहहिं जहँ तहँ नर नारी । भंजेउ राम संभुधनु भारी ॥

दो०—बंदी मागध सूतगन बिरुद बदहिं मतिधीर ।

करहिं निछावरि लोग सब हय गय धनु मनि चीर ॥२६२॥

झाँझि मृदंग संख सहनाई। भेरि ढोल दुंदुभी सुहाई ॥
 बाजहिं बहु बाजने सुहाए। जहँ तहँ जुवतिन्ह मंगल गाए ॥
 सखिन्ह सहित हरषी अति रानी। सूखत धान परा जनु पानी ॥
 जनक लहेउ सुखु सोचु बिहाई। पैरत थकें थाह जनु पाई ॥
 श्रीहत भए भूप धनु दूटे। जैसें दिवस दीप छवि छूटे ॥
 सीय सुखहि बरनिअ केहि भाँती। जनु चातकी पाइ जलु स्वाती ॥
 रामहि लखनु बिलोकत कैसें। ससिहि चकोर किसोरकु जैसें ॥
 सतानंद तब आयसु दीन्हा। सीताँ गमनु राम पहिं कीन्हा ॥
 दो०—संग सखीं सुंदर चतुर गावहिं मंगलचार ।

गवनी बाल मराल गति सुषमा अंग अपार ॥२६३॥
 सखिन्ह मध्य सिय सोहति कैसें। छविगन मध्य महाछवि जैसें ॥
 कर सरोज जयमाल सुहाई। बिस्व विजय सोभा जेहिं छाई ॥
 तन सकोचु मन परम उछाहू। गूढ़ प्रेम लखि परइ न काहू ॥
 जाइ समीप राम छवि देखी। रहि जनु कुँअरि चित्र अवरखी ॥
 चतुर सखीं लखि कहा बुझाई। पहिरावहु जयमाल सुहाई ॥
 सुनत जुगल कर माल उठाई। प्रेम बिगस पहिराइ न जाई ॥
 सोहत जनु जुग जलज सनाला। ससिहि सभीत देत जयमाला ॥
 गावहिं छवि अवलोकि सहेली। सियँ जयमाल राम उर मेली ॥
 सो०—रघुवर उर जयमाल देखि देव बरिसहिं सुमन ।

सकुचे सकल भुआल जनु बिलोकि रवि कुमुदगन ॥२६४॥

पुर अरु व्योम बाजने बाजे । खल भए मलिन साधु सब राजे ॥
 सुर किंनर नर नाग मुनीसा । जय जय जय कहि देहिं असीसा ॥
 नाचहिं गावहिं विबुध बधूटीं । बार बार कुसुमांजलि छूटीं ॥
 जहँ तहँ विप्र बेदधुनि करहीं । बंदी विरिदावलि उच्चरहीं ॥
 महि पाताल नाक जसु व्यापा । राम बरी सिय भंजेउ चापा ॥
 करहिं आरती पुर नर नारी । देहिं निछावरि बित्त बिसारी ॥
 सोहति सीय राम कै जोरी । छवि सिंगारु मनहुँ एक ठोरी ॥
 सखीं कहहिं प्रभुपद गहु सीता । करति न चरन परस अति भीता ॥
 दो०—गौतम तिय गति सुरति करि नहिं परसति पग पानि ।

मन बिहसे रघुवंसमनि प्रीति अलौकिक जानि ॥२६५॥

तब सिय देखि भूप अभिलाषे । कूर कपूत मूढ़ मन माखे ॥
 उठि उठि पहिरि सनाह अभागो । जहँ तहँ गाल बजावन लागे ॥
 लेहु छड़ाइ सीय कह कोऊ । धरि बाँधहु नृप बालक दोऊ ॥
 तोरें धनुषु चाड़ नहिं सरंई । जीवत हमहि कुअँरि कोबरई ॥
 जौ बिदेहु कछु करै सहाई । जीतहु समर सहित दोउ भाई ॥
 साधु भूप बोले सुनि बानी । राजसमाजहि लाज लजानी ॥
 बलु प्रतापु बीरता बड़ाई । नाक पिनाकहि संग सिधाई ॥
 सोइ सूरता कि अब कहूँ पाई । असि बुधि तौ बिधि मुहँ मसि लाई
 दो०—देखहु रामहि नयन भरि तजि इरिषा मदु कोहु ।

लखन रोषु पावकु प्रबल जानि सलभ जनि होहु ॥२६६॥

बैनतेय बलि जिमि चह कागू । जिमि ससु चहै नाग अरि भागू ॥
 जिमि चह कुसल अकारन कोही । सब संपदा चहै सिवद्रोही ॥
 लोभी लोलुप कल कीरति चहई । अकलंकता कि कामी लहई ॥
 हरि पद त्रिमुख परम गति चाहा । तस तुम्हार लालचु नरनाहा ॥
 कोलाहलु सुनि सीय सकानी । सखीं लवाइ गईं जहँ रानी ॥
 रामु सुभायँ चले गुरु पाहीं । सिय सनेहु बरनत मन माहीं ॥
 रानिन्ह सहित सोचवस सीया । अब धौं विधिहि काह करनीया ॥
 भूप वचन सुनि इत उत तकहीं । लखनु राम डर बोलि न सकहीं ॥
 दो०—अरुन नयन भृकुटी कुटिल चितवत नृपन्ह सकोप ।

मनहुँ मत्त गजगन निरखि सिंघकिसोरहि चोप ॥२६७॥

खरभरु देखि बिकल पुर नारीं । सब मिलि देहिं महीपन्ह गारीं ॥
 तेहिं अवसर सुनि सिवधनु भंगा । आयउ भृगुकुल कमल पतंगा ॥
 देखि महीप सकल सकुचाने । बाज झपट जनु लवा लुकाने ॥
 गौरि सरीर भूति भल भ्राजा । भाल बिसाल त्रिपुंड बिराजा ॥
 सीस जटा ससिबदनु सुहावा । रिस बस कछुक अरुन होइ आवा ॥
 भृकुटी कुटिल नयन रिस राते । सहजहुँ चितवत मनहुँ रिसाते ॥
 वृषभ कंध उर बाहु बिसाला । चारु जनेउ माल मृगछाला ॥
 कटि मुनिबसन तून दुइ बाँधें । धनु सर कर कुठार कल काँधें ॥

दो०—सांत बेषु करनी कठिन बरनि न जाइ सरूप ।

धरि मुनितनु जनु बीर रसु आयउ जहँ सब भूप ॥२६८॥

देखत भृगुपति त्रेषु कराला । उठे सकल भय त्रिकल भुआला ॥
 पितु समेत कहि कहि निज नामा । लगे करन सब दंड प्रनामा ॥
 जेहि सुभायँ चितवहिँ हितु जानी । सो जानइ जनु आइ खुटानी ॥
 जनक बहोरि आइ सिरु नावा । सीय बोलाइ प्रनामु करावा ॥
 आसिष दीन्हि सखीं हरषानी । निज समाज लै गई सयानी ॥
 बिस्वामित्रु मिले पुनि आई । पद सरोज मेले दोउ भाई ॥
 रामु लखनु दसरथ के ढोटा । दीन्हि असीस देखि भल जोटा ॥
 रामहि चितइ रहे थकि लोचन । रूप अपार मार मद मोचन ॥
 दो०—बहुरि बिलोकि बिदेह सन कहहु काह अति भीर ।

पूँछत जानि अजान जिमि व्यापेउ कोपु सरीर ॥२६९॥
 समाचार कहि जनक सुनाए । जेहि कारन महीप सब आए ॥
 सुनत बचन फिरि अनत निहारे । देखे चारखंड महि डारे ॥
 अति रिस बोले बचन कठोरा । कहु जड़ जनक धनुष कै तोरा ॥
 बेगि देखाउ मूढ़ न त आजू । उलटउँ महि जहँ लहितवराजू ॥
 अति डरु उतरु देत नृपु नाहीं । कुटिल भूप हरषे मन माहीं ॥
 सुर मुनि नाग नगर नर नारी । सोचहिँ सकल त्रास उर भारी ॥
 मन पछिताति सीय महतारी । बिधि अब सँवरी बात बिगारी ॥
 भृगुपति कर सुभाउ सुनि सीता । अरध निमेष कल्प सम बीता ॥
 दो०—सभय बिलोके लोग सब जानि जानकी भीरु ।

हृदयँ न हरषु बिषादु कछु बोले श्रीरघुबीरु ॥२७०॥

नाथ संभुधनु भंजनिहारा । होइहि केउ एक दास तुम्हारा ॥
 आयसु काह कहिअ किन मोही । सुनि रिसाइ बोले सुनि कोही ॥
 सेवकु सो जो करै सेवकाई । अरि करनी करि करिअ लराई ॥
 सुनहु राम जेहिं सिवधनु तोरा । सहसबाहु सम सो रिपु मोरा ॥
 सो बिलगाउ बिहाइ समाजा । न त मारे जैहहिं सब राजा ॥
 सुनि मुनिबचन लखन मुसुकाने । बोले परसुधरहि अपमाने ॥
 बहु धनुहीं तोरीं लरिकाई । कवहुँ न असिरिस कीन्ह गोसाईं ॥
 एहि धनु पर ममता केहि हेतू । सुनि रिसाइ कह भृगुकुलकेतू ॥
 दो०—रे नृप बालक काल बस बोलत तोहि न सँभार ।

धनुही सम तिपुरारि धनु विदित सकल संसार ॥२७१॥

लखन कहा हँसि हमरें जाना । सुनहु देव सब धनुष समाना ॥
 का छति लाभु जून धनु तोरें । देखा राम नयन कैं भोरें ॥
 छुअत दूट रघुपतिहु न दोसू । मुनि बिनु काज करिअ कत रोसू ॥
 बोले चितइ परसु की ओरा । रे सठ सुनेहि सुभाउ न मोरा ॥
 बालकु बोलि बधउँ नहिं तोही । केवल मुनि जड़ जानहि मोही ॥
 बाल ब्रह्मचारी अति कोही । बिस्व विदित छत्रिय कुलद्रोही ॥
 भुजबल भूमि भूप बिनु कीन्ही । विपुल बार महिदेवन्ह दीन्ही ॥
 सहसबाहु भुज छेदनिदारा । परसु बिलोकु महीपकुमारा ॥

दो०—मातु पितहि जनि सो बस करसि महीसकिसोर ।

गर्भन्ह के अर्भक दलन परसु मोर अति घोर ॥२७२॥

बिहसि लखनु बोले मृदु बानी । अहो मुनीसु महा भटमानी ॥
 पुनि पुनि मोहि देखाव कुठारू । चहत उड़ावन फूँकि पहारू ॥
 इहाँ कुम्हड़वति या कोउ नाहीं । जे तरजनी देखि मरि जाहीं ॥
 देखि कुठारु सरासन बाना । मैं कछु कहा सहित अभिमाना ॥
 भृगुसुत समुझि जनेउ बिलोकी । जो कछु कहहु सहउँ रिस रोकी ॥
 सुर महिसुर हरिजन अरु गाई । हमरें कुल इन्ह पर न सुराई ॥
 बधे पापु अक्कीरति हारें । मारतहूँ पा परिअ तुम्हारें ॥
 कोटि कुलिस सम बचनु तुम्हारा । व्यर्थ धरहु धनु बान कुठारा ॥
 दो०—जो बिलोकि अनुचित कहेउँ छमहु महामुनि धीर ।

सुनि सरोष भृगुबंसमनि बोले गिरा गभीर ॥२७३॥

कौसिक सुनहु मंद यहु बालकु । कुटिल कालवस निज कुल घालकु
 भानु बंस राकेस कलंकू । निपट निरंकुस अबुध असंकू ॥
 काल कवलु होइहि छन माहीं । कहउँ पुकारि खोरि मोहि नाहीं ॥
 तुम्ह हटकहु जौं चहहु उबारा । कहि प्रतापु बलु रोषु हमारा ॥
 लखन कहेउ मुनि सुजसु तुम्हारा । तुम्हहि अछत को बरनै पारा ॥
 अपने मुँह तुम्ह आपनि करनी । बार अनेक भाँति बहु बरनी ॥
 नहिं संतोषु त पुनि कछु कहहू । जनि रिस रोकि दुमह दुख सहहू ॥
 बीरवती तुम्ह धीर अछोभा । गारी देत न पावहु सोभा ॥

दो०—सूर समर करनी करहिं कहि न जनावहिं आपु ।

बिद्यमान रत पाइ रिपु कायर कथहिं प्रतापु ॥२७४॥

तुम्ह तौ कालु हाँक जनु लावा । बार बार मोहि लागि बोलावा ॥
 सुनत लखन के बचन कठोरा । परसु सुधारि धरेउ कर घोरा ॥
 अब जनि देइ दोसु मोहि लोगू । कटुवादी बालकु बधजोगू ॥
 बाल विलोकि बहुत मैं बाँचा । अब यहु मरनिहार भा साँचा ॥
 कौसिक कहा छमिअ अपराधू । बाल दोष गुन गनहिं न साधू ॥
 खर कुठार मैं अकरुन कोही । आगें अपराधी गुरुद्रोही ॥
 उतर देत छोड़ुँ बिनु मारें । केवल कौसिक सील तुम्हारें ॥
 न त एहि काटि कुठार कठोरें । गुरहि उरिन होतेउँ श्रम थोरें ॥

दो०—गाधिसूनु कह हृदयँ हँसि मुनिहि हरिअरइ सूझ ।

अयमय खाँड़ न ऊखमय अजहुँ न बूझ अबूझ ॥२७५॥

कहेउ लखन मुनि सीलु तुम्हारां । को नहिं जान त्रिदित संसारा ॥
 माता पितहि उरिन भए नीकें । गुर रिनु रहा सोचु बड़ जीकें ॥
 सो जनु हमरेहि माथे काढ़ा । दिन चलि गए व्याज बड़ बाढ़ा ॥
 अब आनिअ व्यवहरिआ बोली । तुरत देउँ मैं थैली खोली ॥
 सुनि कटु बचन कुठार सुधारा । हाय हाय सब सभा पुकारा ॥
 भृगुवर परसु देखावहु मोही । विप्र विचारि बचउँ नृद्रोही ॥
 मिले न कवहुँ सुभट रन गाढ़े । द्विज देवता घरहि के बाढ़े ॥
 अनुचित कहि सब लोग पुकारे । रघुगति सयनहिं लखनु नेवारे ॥

दो०—लखन उतर आहुति सरिस भृगुवर कोपु कृसानु ।

बढ़त देखि जल सम बचन बोले रघुकुलभानु ॥२७६॥

नाथ करहु बालक पर छोहू । सूध दूधमुख करिअ न कोहू ॥
 जौ पै प्रभु प्रभाउ कछु जाना । तौ कि बराबरि करत अयाना ॥
 जौ लरिका कछु अचगारि करहीं । गुर पितु मातु मोद मन भरहीं ॥
 करिअ कृपा सिसु सेवक जानी । तुम्ह सम सील धीर मुनि ग्यानी ॥
 राम बचन सुनि कछुक जुड़ाने । कहि कछु लखनु बहुरि मुसुकाने ॥
 हँसत देखि नख सिख रिस व्यापी । राम तोर भ्राता बड़ पापी ॥
 गौर सरीर स्याम मन माहीं । कालकूटमुख पयमुख नाहीं ॥
 सहज टेढ़ अनुहरइ न तोही । नीचु मीचु सम देख न मोही ॥
 दो०—लखन कहेउ हँसि सुनहु मुनि क्रोधु पाप कर मूल ।

जेहि बस जन अनुचित करहिं चरहिं बिस्व प्रतिकूल ॥२७७॥

मैं तुम्हार अनुचर मुनिराया । परिहरि कोपु करिअ अब दाया ॥
 दूट चाप नहिं जुरिहि रिसाने । बैठिअ होइहिं पाय पिराने ॥
 जौ अति प्रिय तौ करिअ उपाई । जोरिअ कोउ बड़ गुनी बोलाई ॥
 बोलत लखनहिं जनकु डेराहीं । मष्ट करहु अनुचित भल नाहीं ॥
 थर थर काँपहिं पुर नर नारी । छोट कुमार खोट बड़ भारी ॥
 भृगुपति सुनि सुनि निरभय बानी । रिस तन जरइ होइ बल हानी ॥
 बोले रामहि देइ निहोरा । बचउं विचारि बंधु लघु तोरा ॥
 मनु मलीन तनु सुंदर कैसैं । बिष रस भरा कनक घटु जैसैं ॥

दो०—सुनि लछिमन बिहसे बहुरि नयन तरेरे राम ।

गुर समीप गवने सकुचि परिहरि बानी बाम ॥२७८॥

अति विनीत मृदु सीतल दानी । बोले रामु जोरि जुग पानी ॥
 सुनहु नाथ तुम्ह सहज सुजाना । बालक बचनु करिअ नहिं काना
 बररै बालकु एकु सुभाऊ । इन्हहि न संत विदूषहिं काऊ ॥
 तेहिं नार्ही कछु काज भिगारा । अपराधी मैं नाथ तुम्हारा ॥
 कृपा कोपु बधु बंधव गोसाईं । मो पर करिअ दास की नाई ॥
 कहिअ बेगि जेहि विधिरिस जाई । मुनिनायक सोइ करौं उपाई ॥
 कह मुनि राम जाइ रिस कैसें । अजहुँ अनुज तव चितव अनैसैं ॥
 एहि कें कंठ कुठारु न दीन्हा । तौ मैं काह कोपु करि कीन्हा ॥

दो०—गर्भ स्त्रवहिं अवनिप रवनि सुनि कुठार गति घोर ।

परसु अच्छत देखउँ जिअत बैरी भूपकिसोर ॥२७९॥

बहइ न हाथु दहइ रिस छाती । भा कुठारु कुंठित नृपघाती ॥
 भयउ बामविधिफिरेउ सुभाऊ । मोरे हृदयँ कृपा कसि काऊ ॥
 आजु दया दुखु दुसह सहावा । सुनि सौमित्रि बिहसि सिरु नावा
 बाउ कृपा मूरति अनुकूल । बोलत बचन झरत जनु फूला ॥
 जाँ पै कृपाँ जरिहिं मुनि गाता । क्रोध भएँ तनु राख बिधाता ॥
 देखु जनक हठि बालकु एहू । कीन्ह चहत जड़ जमपुर गेहू ॥
 बेगि करहु किन आँखिन्ह ओटा । देखत छोट खोट नृप ढोटा ॥
 बिहसे लखनु कदा मन माहीं । मूदें आँखि कतहुँ कोउ नाहीं ॥

दो०—परसुरामु तब राम प्रति बोले उर अति क्रोधु ।

संभु सरासनु तोरि सठ करसि हमार प्रबोधु ॥२८०॥

बंधु कहइ कटु संमत तोरें। तू छल बिनय करसि कर जोरें ॥
 करु परितोषु मोर संग्रामा। नाहिं त छाड़ कहाउब रामा ॥
 छलु तजि करहि समरु सिवद्रोही बंधु सहित न त मारउँ तोही ॥
 भृगुपति बक्रहिं कुठार उठाएँ। मन मुसुकाहिं रामु सिर नाएँ ॥
 गुनह लखन कर हम पर रोषू। कतहुँ सुधाइहु ते बड़ दोषू ॥
 टेढ़ जानि सब बंदइ काहू। बक्र चंद्रमहि ग्रसइ न राहू ॥
 राम कहेउ रिस तजिअ मुनीसा। कर कुठारु आगें यह सीसा ॥
 जेहिं रिस जाइ करिअ सोइ स्वामी। मोहि जानिअ आपन अनुगामी

दो०—प्रभुहि सेवकहि समरु कस तजहु बिप्रवर रोसु।

बेषु बिलोकें कहेसि कछु बालकहू नहिं दोसु ॥२८१॥

देखि कुठार बान धनु धारी। भैलरिकहि रिस बीरु बिचारी ॥
 नामु जान पै तुम्हहि न चीन्हा। वंस सुभायँ उतरु तेहिं दीन्हा ॥
 जौं तुम्ह औतेहु मुनि की नाई। पद रजसिर सिसु धरत गोसाईं ॥
 छमहु चूक अनजानत केरी। चहिअ बिप्र उर कृपा घनेरी ॥
 हमहि तुम्हहि सरिवरि कसि नाथा। कहहु न कहाँ चरन कहँ माथा ॥
 राम मात्र लघु नाम हमारा। परसु सहित बड़ नाम तोहारा ॥
 देव एकु गुनु धनुष हमारें। नव गुन परम पुनीत तुम्हारें ॥
 सब प्रकार हम तुम्ह सन हारे। छमहु बिप्र अपराध हमारे ॥

दो०—बार बार मुनि बिप्रवर कहा राम सन राम।

बोले भृगुपति सरूप हसि तहूँ बंधु सम बाम ॥२८२॥

निपटहिं द्विज करि जानहि मोही । मैं जस बिप्र सुनावउँ तोही ॥
 चाप सुवा सर आहुति जानू । कोपु मोर अति घोर कृसानू ॥
 समिधि सेन चतुरंग सुहाई । महा महीप भए पसु आई ॥
 मैं एहिं परसु काटि बलि दीन्हे । समर जग्य जप कोटिन्ह कीन्हे ॥
 मोर प्रभाउ बिदित नहिं तोरें । बोलसि निदरि बिप्र के भोरें ॥
 भंजेउ चापु दापु बड़ बाढ़ा । अहमिति मनहुं जीति जगु ठाढ़ा
 राम कहा मुनि कहहु बिचारी । रिस अति बड़ि लघु चूक हमारी
 छुअतहिं दूट पिनाक पुराना । मैं केहि हेतु करौं अभिमाना ॥
 दो०-जौं हम निदरहिं बिप्र बदि सत्य सुनहु भृगुनाथ ।

तौ अस को जग सुभटु जेहि भय बस नावहिं माथ ॥२८३॥

देव दनुज भूपति भट नाना । समबल अधिक होउ बलवाना ॥
 जौं रन हमहि पचारै कोऊ । लरहिं सुखेन कालु किन होऊ ॥
 छत्रिय तनु धरि समर सकाना । कुल कलंकु तेहिं पावैर आना ॥
 कहउँ सुभाउ न कुलहि प्रसंसी । कालहु डरहिं न रन रघुवंसी ॥
 बिप्रवंस कै असि प्रभुताई । अभय होइ जो तुम्हहि डेराई ॥
 सुनि मृदु गूढ़ बचन रघुपति के । उघरे पटल परसुधर मति के ॥
 राम रमापति कर धनु लेहू । खैंचहु मिटै मोर संदेहू ॥
 देत चापु आपुहिं चलि गयऊ । परसुराम मन बिसमय भयऊ ॥

दो०-जाना राम प्रभाउ तब पुलक प्रफुल्लित गात ।

जोरि पानि बोले बचन हृदयँ न प्रेसु अमात ॥२८४॥

जय रघुवंस बनज बन भानू । गहन दनुज कुल दहन कृसानू ॥
 जय सुर बिप्र धेनु हितकारी । जय मद मोह कोह भ्रम हारी ॥
 विनय सील करुना गुन सागर । जयति वचन रचना अति नागर ॥
 सेवक सुखद सुभग सब अंगा । जय सरीर छवि कोटि अनंगा ॥
 करौं काह मुख एक प्रसंसा । जय महेस मन मानस हंसा ॥
 अनुचित बहुत कहेउँ अग्याता । छमहु छमामंदिर दोउ भ्राता ॥
 कहि जय जय जय रघुकुलकेतू । भृगुपति गए बनहि तप हेतू ॥
 अपभयँ कुटिल महीप डेराने । जहँ तहँ कायर गवँहिं पराने ॥
 दो०—देवन्ह दीन्हीं दुंदुभीं प्रभु पर वरषहिं फूल ।

हरषे पुर नर नारि सब मिटी मोहमय सूल ॥२८५॥

अति गहगहे बाजने बाजे । सबहिं मनोहर मंगल साजे ॥
 जूथ जूथ मिलि सुमुखि सुनयनीं । करहिं गान कल कोकिल बयनीं ॥
 सुखु बिदेह कर बरनि न जाई । जन्मदरिद्र मनहुँ निधि पाई ॥
 विगत त्रास भइ सीय सुखागी । जनु बिधु उदयँ चकोरकुमारी ॥
 जनक कीन्ह कौसिकहि प्रनामा । प्रभु प्रसाद धनु भंजेउ रामा ॥
 मोहि कृतकृत्य कीन्ह दुहुँ भाई । अब जो उचित सो कहिअ गोसाईं ॥
 कह मुनि सुनु नरनाथ प्रवीना । रहा बिबाहु चाप आधीना ॥
 टूटतहीं धनु भयउ बिबाहु । सुरनर नाग विदित सब काहु ॥

दो०—तदपि जाइ तुम्ह करहु अब जथा बंस व्यवहार ।

बूझि बिप्र कुलवृद्ध गुर बेद विदित आचार ॥२८६॥

दूत अवधपुर पठबहु जाई । आनहिं नृप दसरथहि बोलाई ॥
 सुदित राउ कहि भलेहिं कृपाला । पठए दूत बोलि तेहि काला ॥
 बहुरि महाजन सकल बोलाए । आइ सवन्हि सादर सिर नाए ॥
 हाट बाट मंदिर सुरबासा । नगरु सँवारहु चारिहुँ पासा ॥
 हरषि चले निज निज गृह आए । पुनि परिचारक बोलि पठाए ॥
 रचहु विचित्र बितान बनाई । सिर धरि बचन चले सचु पाई ॥
 पठए बोलि गुनी तिन्ह नाना । जे बितान विधि कुसल सुजाना ॥
 विधिहि बंदि तिन्ह कीन्ह अरंभा । विरचे कनक कदलि के खंभा ॥
 दो०—हरित मनिन्ह के पत्र फल पदुमराग के फूल ।

रचना देखि विचित्र अति मनु विरंचि कर भूल ॥२८७॥

बेनु हरित मनिमय सब कीन्हे । सरल सपरव परहिं नहिं चीन्हे ॥
 कनक कलित अहिबेलि बनाई । लखि नहिं परइ सपरन सुहाई ॥
 तेहि के रचि पचि बंध बनाए । विच विच मुकुता दाम सुहाए ॥
 मानिक मरकत ललिस पिरोजा । चीरि कोरि पचि रचे सरोजा ॥
 किए भृंग बहुरंग विहंगा । गुंजहिं कूजहिं पवन प्रसंगा ॥
 सुर प्रतिमा खंभन गढ़ि काढ़ी । मंगल द्रव्य लिएँ सब ठाढ़ी ॥
 चौकें भाँति अनेक पुराई । सिंधुर मनिमय सहज सुहाई ॥

दो०—सौरभ पल्लव सुभग सुठिकिए नीलमनि कोरि ।

हेम बौर मरकत घवरि लसत पाटमय डोरि ॥२८८॥

रचे रुचिर बर बंदनिवारे । मनहुँ मनोभव फंद सँवारे ॥

मंगल कलस अनेक बनाए । ध्वज पताक पट चमर सुहाए ॥
 दीप मनोहर मनिमय नाना । जाइ न बरनि बिचित्र बिताना ॥
 जेहिं मंडप दुलहिनि बैदेही । सो बरनै असि मति कबि केही ॥
 दूलहु रामु रूप गुन सागर । सो बितानु तिहुँ लोक उजागर ॥
 जनक भवन कै सोभा जैसी । गृह गृह प्रति पुर देखि अतैसी ॥
 जेहिं तेरहुति तेहि समय निहारी । तेहि लघु लगहिं भुवन दस चारी
 जो संपदा नीच गृह सोहा । सो बिलोकि सुरनायक मोहा ॥
 दो०—बसइ नगर जेहिं लच्छि करि कपट नारि बर बेषु ।

तेहि पुर कै सोभा कहत सकुचहिं सारद सेषु ॥२८९॥

पहुँचे दूत राम पुर पावन । हरषे नगर बिलोकि सुहावन ॥
 भूप द्वार तिन्ह खबरि जनाई । दसरथ नृप सुनि लिए बोलाई ॥
 करि प्रनामु तिन्ह पाती दीन्ही । मुदित महीप आपु उठि लीन्ही ॥
 बारि बिलोचन बाँचत पाती । पुलक गात आई भरि छाती ॥
 रामु लखनु उर कर बर चीठी । रहि गए कहत न खाटी मीठी ॥
 पुनि धरि धीर पत्रिका बाँची । हरषी सभा बात सुनि साँची ॥
 खेलत रहे तहाँ सुधि पाई । आए भरतु सहित हित भाई ॥
 पूछत अति सनेहँ सकुचाई । तात कहाँ तें पाती आई ॥
 दो०—कुसल प्रानप्रिय बंधु दोउ अहहिं कहहु केहिं देस ।

सुनि सनेह साने बचन बाची बहुरि नरेस ॥२९०॥

सुनि पाती पुलके दोउ भ्राता । अधिक सनेहु समात न गाता ॥

प्रीति पुनीत भरत कै देखी । सकल सभाँ सुख लहेउ बिसेषी ॥
 तव नृप दूत निकट बैठारे । मधुर मनोहर बचन उचारे ॥
 भैया कहहु कुसल दोउ बारे । तुम्ह नीकें निज नयन निहारे ॥
 स्यामल गौर धरें धनु भाथा । बय किसोर कौसिक मुनि साथा ॥
 पहिचानहु तुम्ह कहहु सुभाऊ । प्रेम बिसस पुनि पुनि कह राऊ ॥
 जा दिन तैं मुनि गए लवाई । तब तैं आजु साँचि सुधि पाई ॥
 कहहु बिदेह कवन विधि जाने । मुनि प्रिय बचन दूत मुसुकाने ॥
 दो०—सुनहु महीपति मुकुट मनि तुम्ह सम धन्य न कोउ ।

रामु लखनु जिन्ह के तनय बिस्व बिभूषन दोउ ॥२९१॥

पूछन जोगु न तनय तुम्हारे । पुरुषसिंघ तिहु पुर उजिआरे ॥
 जिन्ह के जस प्रताप कैं आगे । ससि मलीन रबि सीतल लागे ॥
 तिन्ह कहैं कहिअ नाथ किमि चीन्हे । देखिअ रबि कि दीप कर लीन्हे
 सीय स्वयंवर भूप अनेका । समिटे सुभट एक तैं एका ॥
 संभु सरासनु काहुँ न टारा । हारे सकल वीर वरिआरा ॥
 तीनि लोक महुँ जे भटमानी । सभ कै सकति संभु धनु भानी ॥
 सकइ उठाइ सरासुर मेरू । सोउ हियँ हारि गयउ करि फेरू ॥
 जेहिँ कौतुक सिवसैलु उठावा । सोउ तेहि सभाँ पराभउ पावा ॥

दो०—तहाँ राम रघुवंस मनि सुनिअ महा महिपाल ।

भंजेउ चाप प्रयास विनु जिमि गज पंकज नाल ॥२९२॥

सुनि सरोष भृगुनायकु आए । बहुत भाँति तिन्ह आँखि देखाए ॥

देखि राम बलु निज धनु दीन्हा । करि बहु विनय गवनु बन कीन्हा
 राजन रामु अतुलबल जैसें । तेज निधान लखनु पुनि तैसें ॥
 कंपहिं भूप बिलोकत जाकें । जिमि गज हरि किसोर के ताकें ॥
 देव देखि तव बालक दोऊ । अब न आँखि तर आवत कोऊ ॥
 दूत बचन रचना प्रिय लागी । प्रेम प्रताप वीर रस पागी ॥
 सभा समेत राउ अनुरागे । दूतन्ह देन निछावरि लागे ॥
 कहि अनीति ते मूढ़हिं काना । धरमु बिचारि सबहिं सुखु माना ॥
 दो०—तब उठि भूप बसिष्ठ कहूँ दीन्हि पत्रिका जाइ ।

कथा सुनाई गुरहि सब सादर दूत बोलाइ ॥२९३॥

सुनि बोले गुर अति सुखु पाई । पुन्य पुरुष कहूँ महि सुख छाई ॥
 जिमि सरिता सागर महुँ जाहीं । जद्यपि ताहि कामना नाहीं ॥
 तिमि सुख संपति विनहिं बोलाएँ । धरमसील पहिं जाहिं सुभाएँ ॥
 तुम्ह गुर विप्र धेनु सुर सेबी । तसि पुनीत कौसल्या देबी ॥
 सुकृती तुम्ह समान जग माहीं । भयउ न है कोउ होनेउ नाहीं ॥
 तुम्ह ते अधिक पुन्य बड़ काकें । राजन राम सरिस सुत जाकें ॥
 वीर विनीत धरम व्रत धारी । गुन सागर वर बालक चारी ॥
 तुम्ह कहूँ सर्व काल कल्याना । सजहु वरात बजाइ निसाना ॥
 दो०—चलहु बेगि सुनि गुर बचन भलेहिं नाथ सिरु नाइ ।

भूपति गवने भवन तब दूतन्ह बासु देवाइ ॥२९४॥

राजा सबु रनिवास बोलाई । जनक पत्रिका बाचि सुनाई ॥

सुनि संदेसु सकल हरषानीं । अपर कथा सब भूप बखानीं ॥
 प्रेम प्रफुल्लित राजहिं रानी । मनहुँ सिखनि सुनि वारिद बानी ॥
 मुदित असीस देहिं गुर नारीं । अति आनंद मगन महतारीं ॥
 लेहिं परस्पर अति प्रिय पाती । हृदयँ लगाइ जुड़ावहिं छाती ॥
 राम लखन कै कीरति करनी । वारहिं वार भूपवर बरनी ॥
 मुनि प्रसादु कहि द्वार सिधाए । रानिन्ह तब महिदेव बोलाए ॥
 दिए दान आनंद समेता । चले विप्रवर आसिष देता ॥

सो०—जाचक लिणु हँकारि दीन्हि निछावरि कोटि विधि ।

चिर जीवहुँ सुत चारि चक्रवर्ति दसरत्थ के ॥२९५॥

कहत चले पहिरें पट नाना । हरषि हने गहगहे निसाना ॥
 समाचार सब लोगन्ह पाए । लागे घर घर होन बधाए ॥
 भुवन चारि दस भरा उछाहू । जनकसुता रघुबीर बिआहू ॥
 सुनि सुभ कथा लोग अनुरागे । मग गृह गलीं सँवारन लागे ॥
 जद्यपि अवध सदैव सुहावनि । रामपुरी मंगलमय पावनि ॥
 तदपि प्रीति कै प्रीति सुहाई । मंगल रचना रची बनाई ॥
 ध्वज पताक पट चामर चारू । छावा परम विचित्र बजारू ॥
 कनक कलस तोरन मनि जाला । हरद दूव दधि अच्छत माला ॥

दो०—मंगलमय निज निज भवन लोगन्ह रचे बनाइ ।

बीथीं सींचीं चतुरसम चौकें चारु पुराइ ॥२९६॥

जहँ तहँ जूथ जूथ मिलि भामिनि । सजिनव सप्त सकल दुति दामिनि

बिधुबदनीं मृग सावक लोचनि । निज सरूप रति मानु विमोचनि
गावहिं मंगल मंजुल बानीं । सुनि कल रव कलकंठि लजानीं ॥
भूप भवन किमि जाइ बखाना । बिस्व विमोहन रचेउ बिताना ॥
मंगल द्रव्य मनोहर नाना । राजत बाजत विपुल निसाना ॥
कतहुँ बिरिद बंदी उच्चरहीं । कतहुँ वेद धुनि भूसुर करहीं ॥
गावहिं सुंदरि मंगल गीता । लै लै नामु रामु अरु सीता ॥
बहुत उछाहु भवनु अति थोरा । मानहुँ उमगि चला चहु ओरा ॥
दो०—सोभा दसरथ भवन कइ को कबि बरनै पार ।

जहाँ सकल सुर सीस मनि राम लीन्ह अवतार ॥२९७॥

भूप भरत पुनि लिए बोलाई । हय गय स्यंदन साजहु जाई ॥
चलहु बेगि रघुबीर बराता । सुनत पुलक पूरे दोउ भ्राता ॥
भरत सकल साहनी बोलाए । आयसु दीन्ह मुदित उठि धाए ॥
रचि रुचि जीन तुरग तिन्ह साजे । बरन बरन बर बाजि बिराजे ॥
सुभग सकल सुठि चंचल करनी । अय इव जरत धरत पग धरनी ॥
नाना जाति न जाहिं बखाने । निदरि पवनु जनु चहत उड़ाने ॥
तिन्ह सब छयल भए असवारा । भरत सरिस बय राजकुमारा ॥
सब सुंदर सब भूषनधारी । कर सर चाप तून कटि भारी ॥
दो०—छरे छबीले छयल सब सूर सुजान नबीन ।

जुग पदचर असवार प्रति जे असिकला प्रबीन ॥२९८॥

बाँधें बिरद बीर रन गाढ़े । निकसि भए पुर बाहेर दाढ़े ॥

फेरहिं चतुर तुरग गति नाना । हरषहिं सुनि सुनि पनव निसाना ॥
 रथ सारथिन्ह विचित्र बनाए । ध्वज पताक मनि भूषन लाए ॥
 चवँर चारु किंकिनि धुनि करहीं । भानु जान सोभा अपहरहीं ॥
 सावँकरन अगनित हय होते । ते तिन्ह रथन्ह सारथिन्ह जोते ॥
 सुंदर सकल अलंकृत सोहे । जिन्हहि बिलोकत मुनि मन मोहे ॥
 जे जल चलहिं थलहि की नाई । टाप न बूड़ वेग अधिकाई ॥
 अस्त्र सस्त्र सबु साजु बनाई । रथी सारथिन्ह लिए बोलाई ॥
 दो०—चढ़ि चढ़ि रथ बाहेर नगर लागी जुरन बरात ।

होत सगुन सुंदर सबहि जो जेहि कारज जात ॥२९९॥

कलित करिवरन्हि परीं अँवारीं । कहि न जाहिं जेहि भाँति सँवारीं ॥
 चले मत्त गज घंट बिराजी । मनहुँ सुभग सावन घन राजी ॥
 बाहन अपर अनेक विधाना । सिबिका सुभग सुखासन जाना ॥
 तिन्ह चढ़ि चले विप्रवर बृंदा । जनु तनु धरें सकल श्रुति छंदा ॥
 मागध सूत बंदि गुनगायक । चले जान चढ़ि जो जेहि लायक ॥
 बेसर ऊँट वृषभ बहु जाती । चले वस्तु भरि अगनित भाँती ॥
 कोटिन्ह काँवरि चले कहारा । विविध वस्तु को बरनै पारा ॥
 चले सकल सेवक समुदाई । निज निज साजु समाजु बनाई ॥
 दो०—सब कें उर निर्भर हरषु पूरित पुलक सरीर ।

कबहिं देखिवे नयन भरि रामु लखनु दोउ बीर ॥३००॥

गरजहिं गज घंटा धुनि घोरा । रथ रव बाजि हिंस चह ओरा ॥

निदरि घनहि घुम्भरहिं निसाना । निज पराइ कछु सुनिअ न काना
 महा भीर भूपति के द्वारें । रज होइ जाइ पषान पवारें ॥
 चढ़ी अटारिन्ह देखहिं नारीं । लिऐं आरती मंगल थारीं ॥
 गावहिं गीत मनोहर नाना । अति आनंदु न जाइ बखाना ॥
 तब सुमंत्र दुइ स्यंदन साजी । जोते रबि हय निंदक बाजी ॥
 दोउ रथ रुचिर भूप पहिं आने । नहिं सारद पहिं जाहिं बखाने ॥
 राज समाजु एक रथ साजा । दूसर तेज पुंज अति भ्राजा ॥
 दो०—तेहिं रथ रुचिर बसिष्ठ कहूँ हरषि चढ़ाइ नरेसु ।

आपु चढ़ेउ स्यंदन सुमिरि हर गुर गौरि गनेसु ॥३०१॥
 सहित बसिष्ठ सोह नृप कैसैं । सुर गुर संग पुरंदर जैसैं ॥
 करि कुल रीति बेद विधि राज । देखि सबहि सब भाँति बनाऊ ॥
 सुमिरि रामु गुर आयसु पाई । चले महीपति संख बजाई ॥
 हरषे बिबुध बिलोकि बराता । बरषहिं सुमन सुमंगल दाता ॥
 भयउ कोलाहल हय गय गाजे । व्योम बरात बाजने बाजे ॥
 सुर नर नारि सुमंगल गाई । सरस राग बाजहिं सहनाई ॥
 घंट घंटी धुनि बरनि न जाहीं । सरव करहिं पाइक फहराहीं ॥
 करहिं बिदूषक कौतुक नाना । हास कुसल कल गान सुजाना ॥
 दो०—तुरग नचावहिं कुअँर बर अकनि मृदंग निसान ।

नागर नट चितवहिं चकित डगहिं न ताल बंधान ॥३०२॥

बनइ न बरनत बनी बराता । होहिं सगुन सुंदर सुभदाता ॥

चारा चाषु बाम दिसि लेई । मनहुँ सकल मंगल कहि देई ॥
 दाहिन काग सुखेत सुहावा । नकुल दरसु सब काहूँ पावा ॥
 सानुकूल बह त्रिविध बयारी । सघट सवाल आव बर नारी ॥
 लोवा फिरि फिरि दरसु देखावा । सुरभी सनमुख सिसुहि पिआवा ॥
 मृगमाला फिरि दाहिनि आई । मंगल गन जनु दीन्हि देखाई ॥
 छेमकरी कह छेम बिसेषी । स्यामा बाम सुतरु पर देखी ॥
 सनमुख आयउ दधि अरु मीना । कर पुस्तक दुइ विप्र प्रवीना ॥
 दो०—मंगलमय कल्याणमय अभिमत फल दातार ।

जनु सब साचे होन हित भए सगुन एक बार ॥३०३॥

मंगल सगुन सुगम सब ताकें । सगुन ब्रह्म सुंदर सुत जाकें ॥
 राम सरिस बरु दुलहिनि सीता । समधी दसरथु जनकु पुनीता ॥
 सुनि अस ब्याहु सगुन सब नाचे । अब कीन्हे विरंचि हम साँचे ॥
 एहि विधि कीन्ह बरात पयाना । हय गय गाजहिं हने निसाना ॥
 आवत जानि भानुकुल केतू । सरितन्हि जनक बँधाए सेतू ॥
 बीच बीच बर बास बनाए । सुरपुर सरिस संपदा छाए ॥
 असन सयन बर बसन सुहाए । पावहिं सब निज निज मन भाए ॥
 नित नूतन सुख लखि अनुकूले । सकल बरातिन्ह मंदिर भूले ॥
 दो०—आवत जानि बरात बर सुनि गहगहे निसान ।

सजि गज रथ पदचर तुरग लेन चले अगवान ॥३०४॥

मासपारावण, दसवाँ विश्राम

कनक कलस भरि कोपर थारा । भाजन ललित अनेक प्रकारा ॥
 भरे सुधासम सब पकवाने । नाना भाँति न जाहिं बखाने ॥
 फल अनेक बर वस्तु सुहाई । हरषि भेंट हित भूप पठाई ॥
 भूषन वसन महामनि नाना । खग मृग हय गय बहुविधि जाना ॥
 मंगल सगुन सुगंध सुहाए । बहुत भाँति महिपाल पठाए ॥
 दधि चिउरा उपहार अपारा । भरि भरि काँवरि चले कहारा ॥
 अगवानन्ह जब दीखि बराता । उर आनंदु पुलक भर गाता ॥
 देखि बनाव सहित अगवाना । मुदित बरातिन्ह हने निसाना ॥
 दो०—हरषि परसपर मिलन हित कछुक चले बगमेल ।

जनु आनंद समुद्र दुइ मिलत बिहाइ सुबेल ॥३०५॥
 वरषि सुमन सुर सुंदरि गावहिं । मुदित देव दुंदुभीं बजावहिं ॥
 वस्तु सकल राखीं नृप आगें । विनय कीन्हि तिन्ह अति अनुरागें ॥
 प्रेम समेत रायँ सबु लीन्हा । भै बकसीस जाचकन्हि दीन्हा ॥
 करि पूजा मान्यता बड़ाई । जनवासे कहूँ चले लवाई ॥
 बसन विचित्र पाँवड़े परहीं । देखि धनदु धन मदु परिहरहीं ॥
 अति सुंदर दीन्हेउ जनवासा । जहँ सब कहूँ सब भाँति सुपासा ॥
 जानी सियँ बरात पुर आई । कछु निज महिमा प्रगटि जनाई ॥
 हृदयँ सुमिरि सब सिद्धि बोलाई । भूप पहुनई करन पठाई ॥
 दो०—सिधि सब सिय आयसु अकनि गई जहाँ जनवास ।

लिउँ संपदा सकल सुख सुरपुर भोग बिलास ॥३०६॥

निज निज बास बिलोकि वराती । सुर सुख सकल सुलभ सब भाँती ॥
 विभव भेद कछु कोउ न जाना । सकल जनक कर करहिं बखाना ॥
 सिय महिमा रघुनायक जानी । हरषे हृदयँ हेतु पहिचानी ॥
 पितु आगमनु सुनत दोउ भाई । हृदयँ न अति आनंदु अमाई ॥
 सकुचन्ह कहि न सकत गुरु पाहीं । पितु दरसन लालचु मन माहीं ॥
 विस्वामित्र विनय बड़ि देखी । उपजा उर संतोषु विसेषी ॥
 हरषि बंधु दोउ हृदयँ लगाए । पुलक अंग अंबक जल छाए ॥
 चले जहाँ दसरथु जनवासे । मनहुँ सरोवर तकेउ पिआसे ॥

दो०—भूप बिलोके जबहिं मुनि आवत सुतन्ह समेत ।

उठे हरषि सुखसिंधु महुँ चले थाह सी लेत ॥३०७॥

मुनिहि दंडवत कीन्ह महीसा । बार बार पद रज धरि सीसा ॥
 कौसिक राउ लिए उर लाई । कहि असीस पूछी कुसलाई ॥
 पुनि दंडवत करत दोउ भाई । देखि नृपति उर सुखु न समाई ॥
 सुत हियँ लाइ दुसह दुख मेटे । मृतक सरीर प्राण जनु भेंटे ॥
 पुनि वसिष्ठ पद सिर तिन्ह नाए । प्रेम मुदित मुनिवर उर लाए ॥
 विप्र बृंद बंदे दुहुँ भाई । मनभावती असीसें पाई ॥
 भरत सहानुज कीन्ह प्रनामा । लिए उठाइ लाइ उर रामा ॥
 हरषे लखन देखि दोउ भ्राता । मिले प्रेम परिपूरित गाता ॥

दो०—पुरजन परिजन जातिजन जाचक मंत्री सीत ।

मिले जथाविधि सबहि प्रभु परम कृपाल विनीत ॥३०८॥

रामहि देखि बरात जुझानी । प्रीति कि रीति न जाति बखानी
 नृप समीप सोहहिं सुत चारी । जनु धन धरमादिक तनुधारी ॥
 सुतन्ह समेत दसरथहि देखी । मुदित नगर नर नारि बिसेषी ॥
 सुमन बरिसि सुर हनहिं निसाना । नाकनटीं नाचहिं करि गाना ॥
 सतानंद अरु बिप्र सचिव गन । मागध सूत बिदुष बंदीजन ॥
 सहित बरात राउ सनमाना । आयसु मागि फिरे अगवाना ॥
 प्रथम बरात लगन तें आई । तातें पुर प्रमोदु अधिकाई ॥
 ब्रह्मानंदु लोग सब लहहीं । बढहुँ दिवस निसि बिधि सन कहहीं
 दो०—रामु सीय सोभा अवधि सुकृत अवधि दोउ राज ।

जहँ तहँ पुरजन कहहिं अस मिलि नर नारि समाज ॥ ३०९ ॥

जनक सुकृत मूरति बैदेही । दसरथ सुकृत रामु धरें देही ॥
 इन्ह सम काहुँ न सिव अवराधे । काहुँ न इन्ह समान फल लाधे ॥
 इन्ह सम कोउ न भयउ जग माहीं । है नहिं कतहुँ होनेउ नाहीं ॥
 हम सब सकल सुकृत कै रासी । भए जग जनमि जनकपुर बासी ॥
 जिन्ह जानकी राम छवि देखी । को सुकृती हम सरिस बिसेषी ॥
 पुनि देखव रघुवीर बिआहू । लेव भली बिधि लोचन लाहू ॥
 कहहिं परस्पर कोकिलवयनी । एहि बिआहूँ बड़ लाभु सुनयनी ॥
 बड़ें भाग बिधि बात बनाई । नयन अतिथि होइहहिं दोउ भाई

दो०—बारहिं बार सनेह बस जनक बोलाउब सीय ।

लेन आइहहिं बंधु दोउ कोटि काम कमनीय ॥ ३१० ॥

विविध भाँति होइहि पहुनाई । प्रिय न काहि अस सासुर माई ॥
 तब तब राम लखनहि निहारी । होइइहिं सब पुर लोग सुखारी ॥
 सखि जस राम लखन कर जोटा । तैसेइ भूप संग दुइ दोटा ॥
 स्याम गौर सब अंग सुहाए । ते सब कहहिं देखि जे आए ॥
 कहा एक मैं आजु निहारे । जनु बिरंचि निज हाथ सँवारे ॥
 भरतु रामही की अनुहारी । सहसा लखि न सकहिं नर नारी ॥
 लखनु सत्रुसूदनु एकरूपा । नख सिख ते सब अंग अनूपा ॥
 मन भावहिं मुख बरनि न जाहीं । उपमा कहूँ त्रिभुवन कोउ नाहीं ॥

छं०—उपमा न कोउ कह दास तुलसी कतहुँ कबि कोबिद कहैं ।
 बल बिनय बिद्या सील सोभा सिंधु इन्ह से एइ अहैं ॥
 पुर नारि सकल पसारि अंचल विधिहि बचन सुनावहीं ।
 ब्याहिअहुँ चारिउ भाइ एहिं पुर हम सुमंगल गावहीं ॥

सो०—कहहिं परस्पर नारि बारि बिलोचन पुलक तन ।
 सखि सबु करब पुरारि पुन्य पयोनिधि भूप दोउ ॥३११॥

एहि विधि सकल मनोरथ करहीं । आनंद उमगि उमगि उर भरहीं
 जे नृप सीय स्वयंबर आए । देखि बंधु सब तिन्ह सुख पाए ॥
 कहत राम जसु विसद बिसाला । निज निज भवन गए महिपाला ॥
 गए वीति कछु दिन एहि भाँती । प्रमुदित पुरजन सकल बराती ॥
 मंगल मूल लगन दिनु आवा । हिम रितु अगहनु मासु सुहावा ॥
 ग्रह तिथि नखतु जोगु बर बारू । लगन सोधि विधि कीन्ह बिचारू

पठै दीन्हि नारद सन सोई । गनी जनक के गनकन्ह जोई ॥
 सुनी सकल लोगन्ह यह वाता । कहहिं जोतिषी आहिं बिधाता ॥
 दो०—धेनुधूरि बेला बिसल सकल सुमंगल मूल ।

बिप्रन्ह कहेउ बिदेह सन जानि सगुन अनुकूल ॥३१२॥

उपरोहितहि कहेउ नरनाहा । अब बिलंब कर कारनु काहा ॥
 सतानंद तब सचिव बोलाए । मंगल सकल साजि सब ल्याए ॥
 संख निसान पनव बहु बाजे । मंगल कलस सगुन सुभ साजे ॥
 सुभग सुआसिनि गावहिं गीता । करहिं वेद धुनि बिप्र पुनीता ॥
 लेन चले सादर एहि भाँती । गए जहाँ जनवास बराती ॥
 कोसलपति कर देखि समाजू । अति लघु लाग तिन्हहि सुरराजू ॥
 भयउ समउ अब धारिअ पाऊ । यह सुनि परा निसानहिं घाऊ ॥
 गुरहि पूछि करि कुल बिधि राजा । चले संग मुनि साधु समाजा ॥

दो०—भाग्य बिभव अवधेस कर देखि देव ब्रह्मादि ।

लगे सराहन सहस मुख जानि जनम निज बादि ॥३१३॥

सुरन्ह सुमंगल अवसरु जाना । वरषहिं सुमन बजाइ निसाना ॥
 सिव ब्रह्मादिक बिबुध बरूया । चढ़े विमानन्हि नाना जूया ॥
 प्रेम पुलक तन हृदयँ उछाहू । चले विलोकन राम बिआहू ॥
 देखि जनकपुरु सुर अनुरागे । निज निज लोक सबहिं लघु लागे
 चितवहिं चकित बिचित्र बिताना । रचना सकल अलौकिक नाना
 नगर नारि नर रूप निभाना । सुधर सुधरम सुसील सुजाना ॥

तिन्हहि देखि सब सुर सुरनारी । भए नखत जनु विधु उजिआरी ।
विधिहि भयउ आचरजु बिसेषी । निज करनी कछु कतहुँ न देखी
दो०—सिवँ समुझाए देव सब जनि आचरज भुलाहु ।

हृदयँ बिचारहु धीर धरि सिय रघुबीर बिआहु ॥३१४॥

जिन्ह कर नामु लेत जग माहीं । सकल असंगल मूल नसाहीं ॥
करतल होहि पदारथ चारी । तेइ सिय रामु कहेउ कामारी ॥
एहि विधि संभु सुरन्ह समुझावा । पुनि आगें वर बसह चलावा ॥
देवन्ह देखे दसरथु जाता । महामोद मन पुलकित गाता ॥
साधु समाज संग महिदेवा । जनु तनु धरें करहिँ सुख सेवा ॥
सोहत साथ सुभग सुत चारी । जनु अपवरग सकल तनुधारी ॥
मरकत कनक वरन वर जोरी । देखि सुरन्ह भै प्रीति न थोरी ॥
पुनि रामहि विलोकि हियँ हरषे । नृपहि सराहि सुमन तिन्ह वरषे ॥
दो०—राम रूपु नख सिख सुभग बारहिँ बार निहारि ।

पुलक गात लोचन सजल उमा समेत पुरारि ॥३१५॥

केकि कंठ दुति स्यामल अंगा । तड़ित विनिंदक बसन सुरंगा ॥
व्याह विभूषन विविध बनाए । मंगल सब सब भाँति सुहाए ॥
सरद विमल विधु बदन सुहावन । नयन नवल राजीव लजावन ॥
सकल अलौकिक सुंदरताई । कहि न जाइ मनहीं मन भाई ॥
बंधु मनोहर सोहहिँ संग । जात नचावत चपल तुरंगा ॥
राजकुअँर वर बाजि देखावहिँ । बंस प्रसंसक विरिद सुनावहिँ ॥

जेहि तुरंग पर रामु बिराजे । गति बिलोकि खगनायकु लाजे ॥

कहि न जाइ सब भाँति सुहावा । बाजि वेषु जनु काम बनावा ॥

छं०—जनु बाजि वेषु बनाइ मनसिजु राम हित अति सोहई ।

आपनै बय बल रूप गुन गति सकल भुवन बिमोहई ॥

जगमगत जीनु जराव जोति सुमोति मनि मानिक लगे ।

किंकिनि ललाम लगामु ललित बिलोकि सुर नर मुनि ठगे ॥

दो०—प्रभु मनसहिं लयलीन मनु चलत बाजि छबि पाव ।

भूषित उड़गन तड़ित घनु जनु बर बरहि नचाव ॥३१६॥

जेहिं बर बाजि रामु असवारा । तेहि सारदउ न बरनै पारा ॥

संकरु राम रूप अनुरागे । नयन पंचदस अति प्रिय लागे ॥

हरि हित सहित रामु जव जोहे । रमा समेत रमापति मोहे ॥

निरखि राम छवि विधि हरषाने । आठइ नयन जानि पछिताने ॥

सुर सेनप उर बहुत उछाहू । विधि ते डेवद लोचन लाहू ॥

रामहि चितव सुरेस सुजाना । गौतम श्रापु परम हित माना ॥

देव सकल सुरपतिहि सिहाहीं । आजु पुरंदर सम कोउ नाहीं ॥

मुदित देवगन रामहि देखी । नृपसमाज दुहुँ हरषु बिसेषी ॥

छं०—अति हरषु राजसमाज दुहु दिसि दुंदुभीं बाजहिं घनी ।

बरषहिं सुमन सुर हरषि कहि जय जयति जय रघुकुलमनी ॥

एहि भाँति जानि बरात आवत बाजने बहु बाजहीं ।

रानी सुआसिनि बोलि परिछनि हेतु मंगल साजहीं ॥

दो०—सजि आरती अनेक बिधि मंगल सकल सँवारि ।

चलीं मुदित परिछनि करन गजगामिनि बर नारि ॥३१७॥

विधुवदनीं सब सब भृगलोचनि । सब निज तन छविरति मदु मोचनि
पहिरें बरन बरन बर चीरा । सकल विभूषन सजें सरीरा ॥
सकल सुमंगल अंग बनाएँ । करहिं गान कलकंठि लजाएँ ॥
कंकन किंकिनि नूपुर बाजहिं । चालि बिलोकि काम गज लाजहिं
बाजहिं बाजने विविध प्रकारा । नभ अरु नगर सुमंगलचारा ॥
सची सारदा रमा भवानी । जे सुरतिय सुचि सहज सयानी ॥
कपट नारि बर बेष बनाई । मिलीं सकल रनिवासहिं जाई ॥
करहिं गान कल मंगल बानी । हरष विवस सब काहुँ न जानीं ॥

छं०—को जान केहि आनंद बस सब ब्रह्म बर परिछन चली ।
कल गान मधुर निसान बरषहिं सुमन सुर सोभा भली ॥
आनंदकंदु बिलोकि दूलहु सकल हियँ हरषित भई ।
अंभोज अंबक अंबु उमगि सुअंग पुलकावलि छई ॥

दो०—जो सुखु भासिय मातु मन देखि राम बर बेषु ।

सो न सकहिं कहि कलप सत सहस सारदा सेषु ॥३१८॥

नयन नीरु हटि मंगल जानी । परिछनि करहिं मुदित मन रानी ॥
वेद बिहित अरु कुल आचारू । कीन्ह भली विधि सब व्यवहारू ॥
पंच सबद धुनि मंगल गाता । पट पाँवड़े परहिं विधि नाना ॥
करि आरती अरघु तिन्ह दीन्हा । राम गमनु मंडप तब कीन्हा ॥

दसरथु सहित समाज विराजे । विभव बिलोकि लोकपति लाजे ॥
 समयँ समयँ सुर वरषहिं फूला । सांति पढ़हिं महिसुर अनुकूला ॥
 नभ अरु नगर कोलाहल होई । आपनि पर कछु सुनइ न कोई ॥
 एहि विधि रामु मंडपहिं आए । अरघु देइ आसन बैठाए ॥

छं०—बैठारि आसन आरती करि निरखि बरु सुखु पावहीं ।

मनि बसन भूषन भूरि वारहिं नारि मंगल गावहीं ॥

ब्रह्मादि सुरबर विप्र बेष बनाइ कौतुक देखहीं ।

अवलोकित रघु कुल कमल रवि छवि सुफल जीवन लेखहीं ॥

दो०—नाऊ बारी भाट नट राम निछावरि पाइ ।

मुदित असीसहिं नाइ सिर हरखु न हृदयँ समाइ ॥३१९॥

मिले जनकु दसरथु अति प्रीती । करि वैदिक लौकिक सब रीती ॥

मिलत महा दोउ राज विराजे । उपमा खोजि खोजि कवि लाजे ॥

लही न कतहुँ हारि हियँ मानी । इन्ह सम एइ उपमा उर आनी ॥

सामध देखि देव अनुरागे । सुमन वरषि जसु गावन लागे ॥

जगु विरंचि उपजावा जब तैं । देखे सुने व्याह बहु तब तैं ॥

सकल भाँति सम साजु समाजू । सम समधी देखे हम आजू ॥

देव गिरा सुनि सुंदर साँची । प्रीति अलौकिक दुहु दिसि माची ॥

देत पाँवड़े अरघु सुहाए । सादर जनकु मंडपहिं ल्याए ॥

छं०—मंडपु बिलोकि बिचित्र रचनाँ रुचिरताँ मुनि मन हरे ।

निज पानि जनक सुजान सब कहूँ आनि सिंघासन धरे ॥

कुल इष्ट सरिस बसिष्ठ पूजे विनय करि आसिष लही ।
कौसिकहि पूजत परम प्रीति कि रीति तौ न परै कही ॥

दो०—बामदेव आदिक रिषय पूजे मुदित महीस ।

दिए दिव्य आसन सबहि सब सन लही असीस ॥३२०॥

बहुरि कीन्हि कोसलपति पूजा । जानि ईस सम भाउ न दूजा ॥
कीन्हि जोरि कर विनय बड़ाई । कहि निज भाग्य विभव बहुताई
पूजे भूपति सकल बराती । समधी सम सादर सब भाँती ॥
आसन उचित दिए सब काहू । कहाँ काह मुख एक उछाहू ॥
सकल बरात जनक सनमानी । दान मान विनती बर बानी ॥
विधि हरि हरु दिसिपति दिनराऊ । जे जानहिं रघुवीर प्रभाऊ ॥
कपट विप्र बर वेष बनाएँ । कौतुक देखहिं अति सचु पाएँ ॥
पूजे जनक देव सम जानें । दिए सुआसन विनु पहिचानें ॥

छं०—पहिचान को केहि जान सबहि अपान सुधि भोरी भई ।

आनंद कंदु बिलोकि दूलहु उभय दिसि आनंदमयी ॥

सुर लखे राम सुजान पूजे, मानसिक आसन दए ।

अवलोकि सीलु सुभाउ प्रभु को बिबुध मन प्रमुदित भए ॥

दो०—रामचंद्र मुख चंद्र छवि लोचन चारु चकोर ।

करत पान सादर सकल प्रेमु प्रमोदु न थोर ॥३२१॥

समउ बिलोकि बसिष्ठ बोलाए । सादर सतानंदु सुनि आए ॥

बेगि कुअँरि अब आनहु जाई । चले मुदित मुनि आयसु पाई ॥

रानी सुनि उपरोहित बानी । प्रमुदित सखिन्ह समेत सयानी ॥
 विप्र बधू कुलवृद्ध बोलाई । करि कुल रीति सुमंगल गाई ॥
 नारि बेष जे सुर बर बामा । सकल सुभायँ सुंदरी स्यामा ॥
 तिन्हहि देखि सुखु पावहिं नारीं । बिनु पहिचानि प्रानहु ते प्यारीं ॥
 बार बार सनमानहिं रानी । उमा रमा सारद सम जानी ॥
 सीय सँवारि समाजु बनाई । मुदित मंडपहिं चली लवाई ॥

छं०—चलि ल्याइ सीतहि सखीं सादर सजि सुमंगल भामिनीं ।
 नवसप्त साजें सुंदरीं सब मत्त कुंजर गामिनीं ॥
 कल गान सुनि मुनि ध्यान त्यागहिं काम कोकिल लाजहीं ।
 मंजीर नूपुर कलित कंकन ताल गति बर बाजहीं ॥

दो०—सोहति बनिता वृंद महुँ सहज सुहावनि सीय ।

छबि ललना गन मध्य जनु सुषमा तिय कमनीय ॥३२२॥

सिय सुंदरता बरनि न जाई । लघु मति बहुत मनोहरताई ॥
 आवत दीखि बरातिन्ह सीता । रूप रासि सब भाँति पुनीता ॥
 सबहि मनहिं मन किए प्रनामा । देखि राम भए पूरनकामा ॥
 हरषे दसरथ सुतन्ह समेता । कहि न जाइ उर आनँदु जेता ॥
 सुर प्रनामु करि बरिसहिं फूला । मुनि असीस धुनि मंगल मूला ॥
 गान निसान कोलाहल भारी । प्रेम प्रमोद मगन नर नारी ॥
 एहि विधि सीय मंडपहिं आई । प्रमुदित सांति पढ़हिं मुनिराई ॥
 तेहि अवसर कर विधि व्यवहारु । दुहुँ कुलगुर सब कीन्ह अचारु ॥

छं०—आचारु करि गुर गौरि गनपति मुदित बिप्र पुजावहीं ।
 सुर प्रगटि पूजा लेहिं देहिं असीस अति सुख पावहीं ॥
 मधुपर्क मंगल द्रव्य जो जेहि समय मुनि मन महुँ चहैं ।
 भरे कनक कोपर कलस सो तब लिएहिं परिचारक रहैं ॥१॥
 कुल रीति प्रीति समेत रवि कहि देत सब सादर कियो ।
 एहि भाँति देव पुजाइ सीतहि सुभग सिंघासनु दियो ॥
 सिय राम अवलोकनि परसपर प्रेमु काहु न लखि परै ।
 मन बुद्धि बर बानी अगोचर प्रगट कबि कैसेँ करै ॥२॥

दो०—होम समय तनु धरि अनलु अति सुख आहुति लेहिं ।
 बिप्र बेष धरि बेद सब कहि बिबाह बिधि देहिं ॥३२३॥

जनक पाटमहिषी जग जानी । सीय मातु किमि जाइ बखानी ॥
 सुजसु सुकृत सुख सुंदरताई । सब समेटि बिधि रची बनाई ॥
 समउ जानि मुनिवरन्ह बोलाई । सुनत सुआसिनि सादर ल्याई ॥
 जनक बाम दिसि सोह सुनयना । हिमगिरि संग बनी जनु मयना ॥
 कनक कलस मनि कोपर रुरे । सुचि सुगंध मंगल जल पूरे ॥
 निज कर मुदित रायँ अरु रानी । धरे राम के आगें आनी ॥
 पढ़हिं बेद मुनि मंगल बानी । गगन सुमन झरि अवसर जानी ॥
 बरु बिलोकि दंपति अनुरागे । पाय पुनीत पखारन लागे ॥

छं०—लागे पखारन पाय पंकज प्रेम तन पुलकावली ।
 नभ नगर गान निसान जय धुनि उमगि जनु चहुँ दिसि चली ॥

जे पद सरोज मनोज अरि उर सर सदैव विराजहीं ।
 जे सकुत सुमिरत बिमलता मन सकल कलि मल भाजहीं ॥ १॥
 जे परसि मुनिबनिता लही गति रही जो पातकमयी ।
 मकरंदु जिन्ह को संभु सिर सुचिता अवधि सुर बरनई ॥
 करि मधुप मन मुनि जोगिजन जे सेइ अभिमत गति लहैं ।
 ते पद पखारत भाग्यभाजनु जनकु जय जय सब कहैं ॥ २॥
 बर कुअँरि करतल जोरि साखोचारु दोउ कुलगुर करैं ।
 भयो पानिगहनु बिलोकि बिधि सुर मनुज मुनि आनँद भरैं ॥
 सुखमूल दूलहु देखि दंपति पुलक तन हुलस्यो हियो ।
 करि लोक बेद बिधानु कन्यादानु नृपभूषन कियो ॥ ३॥
 हिमवंत जिमि गिरिजा महेसहि हरिहि श्री सागर दई ।
 तिमि जनक रामहि सिय समरपी बिस्व कल कीरति नई ॥
 क्यों करै विनय बिदेहु कियो बिदेहु मूरति सावँरी ।
 करि होमु बिधिवत गाँठि जोरी होन लागीं भावँरी ॥ ४॥
 दो०—जय धुनि बंदी बेद धुनि मंगल गान निसान ।

सुनि हरषहिं बरषहिं बिबुध सुरतरु सुमन सुजान ॥ ३२४॥

कुअँरु कुअँरि कल भावँरि देहीं । नयन लाभु सब सादर लेहीं ॥
 जाइ न बरनि मनोहर जोरी । जो उपमा कछु कहौं सो थोरी ॥
 राम सीय सुंदर प्रतिछाहीं । जगमगात मनि खंभन माहीं ॥
 मनहुँ मदन रति धरि बहु रूपा । देखत राम बिआहु अनूपा ॥

दरस लालसा सकुच न थोरी । प्रगटत दुरत बहोरि बहोरी ॥
 भए मगन सब देखनिहारे । जनक समान अपान विसारे ॥
 प्रमुदित मुनिन्ह भावैरीं फेरीं । नेगसहित सब रीति निबेरीं ॥
 राम सीय सिर सेंदुर देहीं । सोभा कहि न जाति विधि केहीं ॥
 अरुन पराग जलजु भरि नीकें । ससिहि भूप अहि लोभ अमी कें ॥
 बहुरि बसिष्ठ दीन्हि अनुसासन । बरु दुलहिनि बैठे एक आसन ॥

छं०—बैठे बरासन रामु जानकि मुदित मन दसरथु भए ।
 तनु पुलक पुनि पुनि देखि अपनै सुकृत सुरतरु फल नए ॥
 भरि भुवन रहा उछाहु राम बिबाहु भा सबहीं कहा ।
 केहि भाँति बरनि सिरात रसना एक यहु मंगलु महा ॥१॥
 तब जनक पाइ बसिष्ठ आयसु ब्याह साज सँवारि कै ।
 मांडवी श्रुतकीरति उरमिला कुँअरि लई हँकारि कै ॥
 कुसकेतु कन्या प्रथम जो गुन सील सुख सोभामई ।
 सब रीति प्रीति समेत करि सो ब्याहि नृप भरतहि दई ॥२॥
 जानकी लघु भगिनी सकल सुंदरि सिरोमनि जानि कै ।
 सो तनय दीन्ही ब्याहि लखनहि सकल बिधि सनमानि कै ॥
 जेहि नामु श्रुतकीरति सुलोचनि सुमुखि सब गुन आगरी ।
 सो दई रिपुसूदनहि भूपति रूप सील उजागरी ॥३॥
 अनुरूप बर दुलहिनि परस्पर लखि सकुच हियँ हरषहीं ।
 सब मुदित सुंदरता सराहहिं सुमन सुर गन बरषहीं ॥

सुंदरीं सुंदर बरन्ह सह सब एक मंडप राजहीं ।

जनु जीव उर चारिउ अवस्था बिभुन सहित बिराजहीं ॥४॥

दो०—मुदित अवधपति सकल सुत बधुन्ह समेत निहारि ।

जनु पाए महिपाल मनि क्रियन्ह सहित फल चारि ॥१२५॥

जसिरघुबीर ब्याह विधि बरनी । सकल कुअँर ब्याहे तेहिं करनी ॥

कहिन जाइ कछु दाइज भूरी । रहा कनक मनि मंडपु पूरी ॥

कंबल बसन विचित्र पटोरे । भाँति भाँति बहु मोल न थोरे ॥

गजरथ तुरग दास अरु दासी । धेनु अलंकृत कामदुहा सी ॥

बस्तु अनेक करिअ किमि लेखा । कहिन जाइ जानहिं जिन्ह देखा ॥

लोकपाल अवलोकि सिहाने । लीन्ह अवधपति सबु सुखु माने ॥

दीन्ह जाचकन्हि जो जेहि भावा । उबरा सो जनवासेहिं आवा ॥

तब कर जोरि जनकु मृदु बानी । बोले सब बरात सनमानी ॥

छं०—सनमानि सकल बरात आदर दान विनय बड़ाइ कै ।

प्रमुदित महा मुनि बृंद बंदे पूजि प्रेम लड़ाइ कै ॥

सिरु नाइ देव मनाइ सब सन कहत कर संपुट किएँ ।

सुर साधु चाहत भाउ सिंधु कि तोष जल अंजलि दिएँ ॥१॥

कर जोरि जनकु बहोरि बंधु समेत कोसलराय सों ।

बोले मनोहर बयन सानि सनेह सील सुभाय सों ॥

संबंध राजन रावरें हम बड़े अब सब बिधि भए ।

एहि राज साज समेत सेवक जानिबे बिनु गथ लए ॥२॥

ए दारिका परिचारिका करि पालिबीं करुना नई ।
 अपराधु छमिबो बोलि पठए बहुत हौं ढीठ्यो कई ॥
 पुनि भानुकुलभूषन सकल सनमान निधि समधी किए ।
 कहि जाति नहिं विनती परस्पर प्रेम परिपूरन हिए ॥३॥
 बृंदारका गन सुमन बरिसहिं राउ जनवासेहि चले ।
 दुंदुभी जय धुनि बेद धुनि नभ नगर कौतूहल भले ॥
 तब सखीं मंगल गान करत मुनीस आयसु पाइ कै ।
 दूलह दुलहिनिन्ह सहित सुंदरि चलीं कोहबर ल्याइ कै ॥४॥
 दो०—पुनि पुनि रामहि चितव सिय सकुचति मनु सकुचै न ।

हरत मनोहर मीन छवि प्रेम पिआसे नैन ॥३२६॥

मासपारायण, ग्यारहवाँ विश्राम

स्याम सरीर सुभायँ सुहावन । सोभा कोटि मनोज लजावन ॥
 जावक जुत पद कमल सुहाए । मुनि मन मधुप रहत जिन्ह छाए
 पीत पुनीत मनोहर धोती । हरति बाल रवि दामिनि जोती ॥
 कल किंकिनि कटि सूत्र मनोहर । बाहु विसाल विभूषन सुंदर ॥
 पीत जनेउ महाछवि देई । कर मुद्रिका चोरि चितु लेई ॥
 सोहत व्याह साज सव साजे । उर आयत उरभूषन राजे ॥
 पिअर उपरना काखासोती । दुहुँ आँचरन्हि लगे मनि मोती ॥
 नयन कमल कल कुंडल काना । बदन सकल सौंदर्ज निधाना ॥
 सुंदर भृकुटि मनोहर नासा । भाल तिलकु रुचिरता निवासा ॥
 सोहत मौर मनोहर माथे । मंगलमय मुकुता मनि गाथे ॥

छं०—गाथे महामनि मौर मंजुल अंग सब चित चोरहीं ।
 पुर नारि सुर सुंदरीं बरहि बिलोकि सब तिन तोरहीं ॥
 मनि बसन भूषन वारि आरति करहिं मंगल गावहीं ।
 सुर सुमन बरिसहिं सूत मागध बंदि सुजसु सुनावहीं ॥१॥
 कोहबरहिं आने कुअँर कुअँरि सुआसिनिन्ह सुख पाइ कै ।
 अति प्रीति लौकिक रीति लागीं करन मंगल गाइ कै ॥
 लहकौरि गौरि सिखाव रामहि सीय सन सारद कहैं ।
 रनिवासु हास बिलास रस बस जन्म को फलु सब लहैं ॥२॥
 निज पानि मनि महुँ देखिअति मूरति सुरूपनिधान की ।
 चालति न भुजबली बिलोकनि विरह भय बस जानकी ॥
 कौतुक बिनोद प्रमोदु प्रेमु न जाइ कहि जानहिं अलीं ।
 बर कुअँरि सुंदर सकल सखीं लवाइ जनवासेहि चलीं ॥३॥
 तेहि समय सुनिअ असीस जहँ तहँ नगर नभ आनँदु महा ।
 चिरु जिअहुँ जोरीं चारु चारयो मुदित मन सबहीं कहा ॥
 जोगींद्र सिद्ध मुनीस देव बिलोकि प्रभु दुंदुभि हनी ।
 चले हरषि बरषि प्रसून निज निज लोक जय जय जय भनी ॥४॥
 दो०—सहित बधूटिन्ह कुअँर सब तब आए पितु पास ।

सोभा मंगल मोद भरि उमगेउ जनु जनवास ॥३२७॥

पुनि जेवनार भई बहु भाँती । पठए जनक बोलाइ बराती ॥

परत पाँवडे बसन अनुपा । सुतन्ह समेत गवन कियो भूपा ॥

सादर सब के पाय पखारे। जथाजोगु पीढ़न्ह बैठारे ॥
 धोए जनक अवधपति चरना। सीलु सनेहु जाइ नहिं बरना ॥
 बहुरि राम पद पंकज धोए। जे हर हृदय कमल महुँ गोए ॥
 तीनिउ भाइ राम सम जानी। धोए चरन जनक निज पानी ॥
 आसन उचित सबहिनृप दीन्है। बोलि सूपकारी सब लीन्है ॥
 सादर लगे परन पनवारे। कनक कील मनि पान सँवारे ॥
 दो०—सूपोदन सुरभी सरपि सुंदर स्वादु पुनीत ।

छन महुँ सब कें परसि गे चतुर सुआर विनीत ॥३२८॥

पंच कवल करि जेवन लागे। गारि गान सुनि अति अनुरागे ॥
 भाँति अनेक परे पकवाने। सुधा सरिस नहिं जाहिं बखाने ॥
 परसन लगे सुआर सुजाना। विंजन विविध नाम को जाना ॥
 चारि भाँति भोजन विधि गाई। एक एक विधि बरनि न जाई ॥
 छरस रुचिर विंजन बहु जाती। एक एक रस अगनित भाँती ॥
 जेवँत देहिं मधुर धुनि गारी। लै लै नाम पुरुष अरु नारी ॥
 समय सुहावनि गारि विराजा। हँसत राउ सुनि सहित समाजा ॥
 एहि विधि सबहीं भोजनु कीन्हा। आदर सहित आचमनु दीन्हा ॥
 दो०—देइ पान पूजे जनक दसरथु सहित समाज ।

जनवासेहि गवने मुदित सकल भूप सिरताज ॥३२९॥

नित नूतन मंगल पुर माहीं। निमिष सरिस दिन जामिनि जाहीं
 बड़े भोर भूपतिमनि जागे। जाचक गुन गन गावन लागे ॥

देखि कुअँर बर बधुन्ह समेता । किमि कहि जात मोदु मन जेता ॥
 प्रातक्रिया करि गे गुरु पाहीं । महाप्रमोदु प्रेसु मन माहीं ॥
 करि प्रनामु पूजा कर जोरी । बोले गिरा अमिअँ जनु बोरी ॥
 तुम्हरी कृपाँ सुनहु मुनिराजा । भयउँ आजु मैं पूरनकाजा ॥
 अब सब बिप्र बोलाइ गोसाईँ । देहु धेनु सब भाँति बनाई ॥
 सुनि गुर करि महिपाल बड़ाई । पुनि पठए मुनि बृंद बोलाई ॥
 दो०—बामदेउ अरु देवरिषि बालमीकि जाबालि ।

आए मुनिबर निकर तब कौसिकादि तपसालि ॥३३०॥
 दंड प्रनाम सबहि नृप कीन्हे । पूजि सप्रेम बरासन दीन्हे ॥
 चारि लच्छ बर धेनु मगाई । कामसुरभि सम सील सुहाई ॥
 सब विधिसकल अलंकृत कीन्हीं । मुदित महिप महिदेवन्ह दीन्हीं ॥
 करत बिनय बहु विधि नरनाहू । लहेउँ आजु जग जीवन लाहू ॥
 पाइ असीस महीसु अनंदा । लिए बोलि पुनि जाचक बृंदा ॥
 कनकबसन मनि हय गय स्यंदन । दिए बूझि रुचि रविकुलनंदन
 चले पढ़त गावत गुन गाथा । जय जय जय दिनकर कुल नाथा
 एहि विधि राम बिआह उछाहू । सकइ न बरनि सहसमुख जाहू ॥
 दो०—बार बार कौसिक चरन सीसु नाइ कह राउ ।

यह सबु सुखु मुनिराज तव कृपा कटाच्छ पसाउ ॥३३१॥

जनक सनेहु सीलु करतूती । नृपु सब भाँति सराह बिभूती ॥

दिन उठि बिदा अवधपति मागा । राखहि जनकु सहित अनुरागा ॥

नित नूतन आदरु अधिकाई । दिन प्रति सहस भाँति पहुनाई ॥
 नित नव नगर अनंद उछाहू । दसरथ गवनु सोहाइ न काहू ॥
 बहुत दिवस बीते एहि भाँती । जनु सनेह रजु बँधे बराती ॥
 कौसिक सतानंद तब जाई । कहा बिदेह नृपहि समुझाई ॥
 अब दसरथ कहँ आयसु देहू । जद्यपि छाड़ि न सकहु सनेहू ॥
 भलेहि नाथ कहि सचिव बोलाए । कहि जय जीव सीस तिन्ह नाए ॥
 दो०—अवधनाथु चाहत चलन भीतर करहु जनाउ ।

भए प्रेमबस सचिव सुनि बिप्र सभासद राउ ॥३३२॥

पुरबासी सुनि चलिहि बराता । बूझत बिकल परस्पर वाता ॥
 सत्य गवनु सुनि सब बिलखाने । मनहुँ साँझ सरसिजसकुचाने ॥
 जहँ जहँ आवत बसे बराती । तहँ तहँ सिद्ध चला बहु भाँती ॥
 विविध भाँति मेवा पकवाना । भोजन साजु न जाइ बखाना ॥
 भरि भरि बसहँ अपार कहारा । पठई जनक अनेक सुसारा ॥
 तुरग लाख रथ सहस पचीसा । सकल सँवारे नख अरु सीसा ॥
 मत्त सहस दस सिंधुर साजे । जिन्हहि देखि दिसि कुंजर लाजे ॥
 कनक बसन मनि भरि भरि जाना । महिषी धेनु वस्तु विधि नाना ॥
 दो०—दाइज अमित न सकिअ कहि दीन्ह बिदेहँ बहोरि ।

जो अवलोकत लोकपति लोक संपदा थोरि ॥३३३॥

सबु समाजु एहि भाँति बनाई । जनक अवधपुर दीन्ह पठाई ॥
 चलिहि बरात सुनत सब रानी । बिकल मीनगन जनु लघु पानी ॥

पुनि पुनि सीय गोद करि लेहीं। देइ असीस सिखावनु देहीं॥
 होएहु संतत पियहि पिआरी। चिर अहिवात असीस हमारी॥
 सासु ससुर गुर सेवा करेहू। पति रुख लखि आयसु अनुसरेहू
 अति सनेह बस सखीं सयानी। नारि धरम सिखवहिं मृदु बानी॥
 सादर सकल कुअँरि समुझाई। रानिन्ह वार वार उर लाई॥
 बहुरि बहुरि भेटहिं महतारीं। कहहिं विरंचि रचीं कत नारीं॥
 दो०—तेहि अवसर भाइन्ह सहित रामु भानुकुल केतु।

चले जनक मंदिर मुदित बिदा करावन हेतु ॥३३४॥

चारिउ भाइ सुभायँ सुहाए। नगर नारि नर देखन धाए॥
 कोउ कह चलन चहत हहिं आजू। कीन्ह विदेह विदा कर साजू॥
 लेहु नयन भरि रूप निहारी। प्रिय पाहुने भूप सुत चारी॥
 को जानै केहिं सुकृत सयानी। नयन अतिथि कीन्हे विधि आनी
 मरनसीलु जिमि पाव पिऊषा। सुरतरु लहै जनम कर भूखा॥
 पाव नारकी हरिपदु जैसैं। इन्ह कर दरसनु हम कहँ तैसैं॥
 निरखि राम सोभा उर धरहू। निज मन फनिमूरति मनि करहू॥
 एहि विधि सबहि नयन फलु देता। गए कुअँर सब राज निकेता॥
 दो०—रूप सिंधु सब बंधु लखि हरषि उठा रनिवासु।

करहिं निछावरि आरती महा मुदित मन सासु ॥३३५॥

देखि राम छवि अति अनुरागीं। प्रेमबिबस पुनि पुनि पद लागीं॥

रही न लाज प्रीति उर छाई। सहज सनेह वरनि किमि जाई॥

भाइन्ह सहित उबटि अन्हवाए । छरस असन अति हेतु जेवाँए ॥
 बोले राम सुअवसर जानी । सील सनेह सकुचमय बानी ॥
 राउ अवधपुर चहत सिधाए । विदा होन हम इहाँ पठाए ॥
 मातु मुदित मन आयसु देहू । बालक जानि करब नित नेहू ॥
 सुनत बचन बिलखेउ रनिवासू । बोलि न सकहिं प्रेमबस सासू ॥
 हृदयँ लगाइ कुअँरि सब लीन्ही । पतिन्ह सौँपि विनती अति कीन्ही

छं०—करि विनय सिय रामहि समरपी जोरि कर पुनि पुनि कहै।

बलि जाउँ तात सुजान तुम्ह कहूँ बिदित गति सब की अहै ॥

परिवार पुरजन मोहि राजहि प्रानप्रिय सिय जानिबी ।

तुलसीस सीलु सनेहु लखि निज किंकरी करि मानिबी ॥

सो०—तुम्ह परिपूरन काम जान सिरोमनि भावप्रिय ।

जन गुन गाहक राम दोष दलन करुनायतन ॥३३६॥

अस कहि रही चरन गहि रानी । प्रेम पंक जनु गिरा समानी ॥

सुनि सनेहसानी बर बानी । बहुविधि राम सासु सनमानी ॥

राम विदा मागत कर जोरी । कीन्ह प्रनामु बहोरि बहोरी ॥

पाइ असीस बहुरि सिरु नाई । भाइन्ह सहित चले रघुराई ॥

मंजु मधुर मूरति उर आनी । भई सनेह सिथिल सब रानी ॥

पुनि धीरजु धरि कुअँरि हँकारी । बार बार भेटहिं महतारी ॥

पहुँचावहिं फिरि मिलहिं बहोरी । बढी परस्पर प्रीति न थोरी ॥

पुनि पुनि मिलत सखिन्ह बिलगाई । बाल बच्छ जिमि धेनु लवाई ॥

दो०—प्रेमबिबस नर नारि सब सखिन्ह सहित रनिवासु ।

मानहुँ कीन्ह बिदेहपुर करुनाँ बिरहँ निवासु ॥३३७॥

सुक सारिका जानकी ज्याए । कनकपिंजरन्हिराखि पढ़ाए ॥
ब्याकुल कहहिं कहाँ बैदेही । सुनि धीरजु परिहरइ न केही ॥
भए विकल खग मृग एहि भाँती । मनुज दसा कैसेँ कहि जाती ॥
बंधु समेत जनकु तब आए । प्रेम उमगि लोचन जल छाए ॥
सीय बिलोकि धीरता भागी । रहे कहावत परम विरागी ॥
लीन्हि रायँ उर लाइ जानकी । मिटी महामरजाद ग्यान की ॥
समुझावत सब सचिव सयाने । कीन्ह बिचारु न अवसर जाने ॥
बारहिं बार सुता उर लाई । सजि सुंदर पालकीं मगाई ॥

दो०—प्रेमबिबस परिवारु सबु जानि सुलगन नरेस ।

कुअँरि चढ़ाई पालकिन्ह सुमिरे सिद्धि गनेस ॥३३८॥

बहुविधि भूप सुता समुझाई । नारिधरमु कुलरीति सिखाई ॥
दासीं दास दिए बहुतेरे । सुचि सेवक जे प्रिय सिय केरे ॥
सीय चलत ब्याकुल पुरवासी । होहिं सगुन सुभ मंगल रासी ॥
भूसुर सचिव समेत समाजा । संग चले पहुँचावन राजा ॥
समय बिलोकि बाजने बाजे । रथ गज बाजि बरातिन्ह साजे ॥
दसरथ बिप्र बोलि सब लीन्हे । दान मान परिपूरन कीन्हे ॥
चरन सरोज धूरि धरि सीसा । मुदित महीपति पाइ असीसा ॥
सुमिरि गजाननु कीन्ह पयाना । मंगलमूल सगुन भए नाना ॥

दो०-सुर प्रसून बरषहिं हरषि करहिं अपछरा गान ।

चले अवधपति अवधपुर मुदित बजाइ निसान ॥३३९॥

नृप करि बिनय महाजन फेरे । सादर सकल मागने टेरे ॥
भूषन बसन वाजि गज दीन्हे । प्रेम पोषि ठाढ़े सब कीन्हे ॥
बार बार बिरिदावलि भाषी । फिरे सकल रामहि उर राखी ॥
बहुरि बहुरि कोसलपति कहहीं । जनकु प्रेमवस फिरै न चहहीं ॥
पुनि कह भूपति बचन सुहाए । फिरिअ महीस दूरि बड़ि आए ॥
राउ बहोरि उतरि भए ठाढ़े । प्रेम प्रवाह बिलोचन बाढ़े ॥
तब विदेह बोले कर जोरी । बचन सनेह सुधौं जनु बोरी ॥
करौं कवन विधि बिनय बनाई । महाराज मोहि दीन्हि बड़ाई ॥

दो०-कोसलपति समधी सजन सनमाने सब भाँति ।

मिलनि परसपर बिनय अति प्रीति न हृदयँ समाति ॥३४०॥

मुनि मंडलिहि जनक सिरु नावा । आसिरबादु सबहि सन पावा ॥
सादर पुनि भेंटे जामाता । रूपसील गुन निधिसब भ्राता ॥
जोरि पंकरुह पानि सुहाए । बोले बचन प्रेम जनु जाए ॥
राम करौं केहि भाँति प्रसंसा । मुनि महेस मन मानस हंसा ॥
करहिं जोग जोगी जेहि लागी । कोहु मोहु ममता महु त्यागी ॥
व्यापकु ब्रह्म अलखु अबिनासी । चिदानंदु निरगुन गुनरासी ॥
मन समेत जेहि जान न बानी । तरकि न सकहिं सकल अनुमानी ॥
महिमा निगमु नेति कहि कहई । जो तिहुँ काल एकरस रहई ॥

दो०—नयन बिषय मो कहँ भयउ सो समस्त सुखमूल ।

सबइ लाभु जग जीव कहँ भएँ ईसु अनुकूल ॥३४१॥

सबहि भाँति मोहि दीन्हि बड़ाई । निज जन जानि लीन्ह अपनाई ॥
 होहिं सहस दस सारद सेषा । करहिं कल्प कोटिक भरि लेखा ॥
 मोर भाग्य राउर गुन गाथा । कहि न सिराहिं सुनहु रघुनाथा ॥
 मैं कछु कहउँ एक बल मोरें । तुम्ह रीझहु सनेह सुठि थोरें ॥
 बार बार मागउँ कर जोरें । मनु परिहरै चरन जनि भोरें ॥
 सुनि बर बचन प्रेम जनु पोषे । पूरनकाम रामु परितोषे ॥
 करि बर बिनय समुद्र सनमाने । पितु कौसिक बसिष्ठ सम जाने ॥
 बिनती बहुरि भरत सन कीन्ही । मिलि सप्रेम पुनि आसिष दीन्ही
 दो०—मिले लखन रिपुसूदनहि दीन्हि असीस महीस ।

भए परसपर प्रेमबस फिरि फिरि नावहिं सीस ॥३४२॥

बार बार करि बिनय बड़ाई । रघुपति चले संग सब भाई ॥
 जनक गहे कौसिक पद जाई । चरन रेनु सिर नयनन्ह लाई ॥
 सुनु मुनीस बर दरसन तोरें । अगमु न कछु प्रतीति मन मोरें ॥
 जो सुखु सुजसु लोकपति चहहीं । करत मनोरथ सकुचत अहहीं ॥
 सो सुखु सुजसु सुलभ मोहि स्वामी । सब सिधि तव दरसन अनुगामी
 कीन्हि बिनय पुनि पुनि सिरु नाई । फिरे महीसु आसिषा पाई ॥
 चली बरात निसान बजाई । मुदित छोट बड़ सब समुदाई ॥
 रामहि निरखि ग्राम नर नारी । पाइ नयन फलु होहिं सुखारी ॥

दो०-बीच बीच बर बास करि मग लोगन्ह सुख देत ।

अवध समीप पुनीत दिन पहुँची आइ जनेत ॥३४३॥

हने निसान पनव बर बाजे । भेरि संख धुनि हय गय गाजे ॥
झाँझि बिरव डिंडिमीं सुहाई । सरस राग बाजहिं सहनाई ॥
पुर जन आवत अकनि बराता । मुदित सकल पुलकावलि गाता ॥
निज निज सुंदर सदन सँवारे । हाट बाट चौहट पुर द्वारे ॥
गलीं सकल अरगजाँ सिंचाई । जहँ तहँ चौकें चारु पुराई ॥
बना बजारु न जाइ बखाना । तोरन केतु पताक बिताना ॥
सफल पूगफल कदलि रसाला । रोपे बकुल कदंब तमाला ॥
लगे सुभग तरु परसत धरनी । मनिमय आलबाल कल करनी ॥

दो०-बिबिध भौंति मंगल कलस गृह गृह रचे सँवारि ।

सुर ब्रह्मादि सिंहाहिं सब रघुबर पुरी निहारि ॥३४४॥

भूप भवनु तेहि अवसर सोहा । रचना देखि मदन मनु मोहा ॥
मंगल सगुन मनोहरताई । रिधिसिधिसुख संपदा सुहाई ॥
जनु उछाह सब सहज सुहाए । तनु धरि धरि दसरथ गृहँ छाए ॥
देखन हेतु राम वैदेही । कहहु लालसा होहि न केही ॥
जूथ जूथ मिलि चलीं सुआसिनि । निज छवि निदरहिं मदन बिलासिनि ॥
सकल सुमंगल सजें आरती । गावहिं जनु बहु वेष भारती ॥
भूपति भवन कोलाहलु होई । जाइ न बरनि समउ सुखु सोई ॥
कौसल्यादि राम महतारीं । प्रेमबिबस तन दसा बिसारीं ॥

दो०—दिए दान बिप्रन्ह बिपुल पूजि गनेस पुरारि ।

प्रमुदित परस दरिद्र जनु पाइ पदारथ चारि ॥३४५॥

मोद प्रमोद बिबस सब माता । चलहिं न चरन सिथिल भए गाता
 राम दरस हित अति अनुरागी । परिछनि साजु सजन सब लागीं ॥
 बिबिध बिधान बाजने बाजे । मंगल मुदित सुमित्राँ साजे ॥
 हरद दूब दधि पल्लव फूला । पान पूगफल मंगल मूला ॥
 अच्छत अंकुर लोचन लाजा । मंजुल मंजरि तुलसि बिराजा ॥
 छुहे पुरट घट सहज सुहाए । मदन सकुन जनु नीड़ बनाए ॥
 सगुन सुगंध न जाहिं बखानी । मंगल सकल सजहिं सब रानी ॥
 रचीं आरतीं बहुत बिधाना । मुदित करहिं कल मंगल गाना ॥

दो०—कनक थार भरि मंगलन्हि कमल करन्हि लिएँ मात ।

चलीं मुदित परिछनि करन पुलक पल्लवित गात ॥३४६॥

धूप धूम नभु मेचक भयऊ । सावन घन घमंडु जनु ठयऊ ॥
 सुरतरु सुमन माल सुर बरषहिं । मनहुँ बलाक अवलि मनु करषहिं
 मंजुल मनिमय बंदनिवारे । मनहुँ पाकरिपु चाप सँवारे ॥
 प्रगटहिं दुरहिं अटन्ह पर भामिनि । चारु चपल जनु दमकहिं दामिनि
 दुंदुभि धुनि घन गरजनि घोरा । जाचक चातक दादुर मोरा ॥
 सुर सुगंध सुचि बरषहिं बारी । सुखी सकल ससि पुर नर नारी ॥
 समउ जानि गुर आयसु दीन्हा । पुर प्रवेसु रघुकुलमनि कीन्हा ॥
 सुमिरि संभु गिरिजा गनराजा । मुदित महीपति सहित समाजा ॥

दो०—होहिं सगुन बरषहिं सुमन सुर दुंदुभीं बजाइ ।

बिबुध बधू नाचहिं मुदित मंजुल मंगल गाइ ॥३४७॥

मागध सूत बंदि नटनागर । गावहिं जसु तिहु लोक उजागर ॥
जय धुनि विमल वेद बरवानी । दस दिमि सुनिअ सुमंगल सानी ॥
बिपुल बाजने बाजन लागे । नभ सुर नगर लोग अनुरागे ॥
बने बराती बरनि न जाहीं । महा मुदित मन सुख न समाहीं ॥
पुरवासिन्ह तब राय जोहारे । देखत रामहि भए सुखारे ॥
करहिं निछावरि मनिगन चीरा । वारि बिलोचन पुलक सरीरा ॥
आगति करहिं मुदित पुग नारी । हरषहिं निरखि कुअँर बर चारी ॥
सिविका सुभग ओहार उधारी । देख दुलहिनिन्ह होहिं सुखारी ॥

दो०—एहि बिधि सबही देत सुखु आए राजदुआर ।

मुदित मातु परिछनि करहिं बधुन्ह समेत कुमार ॥३४८॥

करहिं आरती वारहिं वारा । प्रेसु प्रमोदु कहै को पारा ॥
भूषन मनि पट नाना जाती । करहिं निछावरि अगनित भाँती
बधुन्ह समेत देखि सुत चारी । परमानंद मगन महतारी ॥
पुनि पुनि सीय राम छवि देखी । मुदित सफल जग जीवन लेखी ॥
सखीं सीय मुख पुनि पुनि चाही । गान करहिं निज सुकृत सराही ॥
बरषहिं सुमन छनहिं छन देवा । नाचहिं गावहिं लावहिं सेवा ॥
देखि मनोहर चारिउ जोरीं । सारद उपमा सकल ढँढोरीं ॥
देत न बनहिं निपट लघु लागीं । एकटक रहीं रूप अनुरागीं ॥

दो०—निगम नीति कुल रीति करि अरघ पाँवड़े देत ।

बधुन्ह सहित सुत परिछि सब चलीं लवाइ निकेत ॥३४९॥

चारि सिंघासन सहज सुहाए । जनु मनोज निज हाथ बनाए ॥
तिन्ह पर कुअँरि कुअँर बैठारो सादर पाय पुनीत पखारे ॥
धूप दीप नैवेद वेद विधि । पूजे बर दुलहिनि मंगलनिधि ॥
बारहिं बार आरती करहीं । व्यजन चारु चामर सिर ढरहीं ॥
बस्तु अनेक निछावरि होहीं । भरीं प्रमोद मातु सब सोहीं ॥
पावा परम तत्व जनु जोगीं । अमृतु लहेउ जनु संतत रोगीं ॥
जनम रंक जनु पारस पावा । अंधहि लोचन लाभु सुहावा ॥
मूक बदन जनु सारद छाई । मानहुँ समर सूर जय पाई ॥
दो०—एहि सुख ते सत कोटि गुन पावहिं मातु अनंदु ।

भाइन्ह सहित बिआहि घर आए रघुकुल चंदु ॥३५०(क)॥

लोक रीति जननीं करहिं बर दुलहिनि सकुचाहिं ।

मोदु बिनोदु बिलोकि बड़ रामु मनहिं मुसुकाहिं ॥३५०(ख)॥

देव पितर पूजे विधि नीकी । पूजीं सकल बासना जी की ॥
सबहि वंदि मागहिं बरदाना । भाइन्ह सहित राम कल्याना ॥
अंतरहित सुर आसिष देहीं । मुदित मातु अंचल भरि लेहीं ॥
भूपति बोलि बराती लीन्हे । जान बसन मनि भूषन दीन्हे ॥
आयसु पाइ राखि उर रामहि । मुदित गए सब निज निज धामहि

जाचक जन जाचहिं जोइ जोई । प्रमुदित राउ देहिं सोइ सोई ॥
 सेवक सकल बजनिआ नाना । पूरन किए दान सनमाना ॥
 दो०-देहिं असीस जोहारि सब गावहिं गुन गन गाथ ।

तब गुर भूसुर सहित गृहँ गवनु कीन्ह नरनाथ ॥३५१॥
 जो वसिष्ठ अनुसासन दीन्ही । लोक वेद विधि सादर कीन्ही ॥
 भूसुर भीर देखि सब रानी । सादर उठीं भाग्य बड़ जानी ॥
 पाय पखारि सकल अन्हवाए । पूजि भली विधि भूप जेवाँए ॥
 आदर दान प्रेम परिपोषे । देत असीस चले मन तोषे ॥
 बहु विधि कीन्हि गाधिसुत पूजा । नाथ मोहि सम धन्य न दूजा ॥
 कीन्हि प्रसंसा भूपति भूरी । रानिन्ह सहित लीन्हि पग धूरी ॥
 भीतर भवन दीन्ह बर बासू । मन जोगवत रह नृपुरनिवासू ॥
 पूजे गुर पद कमल बहोरी । कीन्हि विनय उर प्रीति न थोरी ॥
 दो०-बधुन्ह समेत कुमार सब रानिन्ह सहित महीसु ।

पुनि पुनि बंदत गुर चरन देत असीस मुनीसु ॥३५२॥
 विनय कीन्हि उर अति अनुरागें । सुत संपदा राखि सब आगें ॥
 नेगु मागि मुनिनायक लीन्हा । आसिरवादु बहुत विधि दीन्हा ॥
 उर धरि रामहि सीय समेता । हरषि कीन्ह गुर गवनु निकेता ॥
 विप्रबधू सब भूप बोलाई । चैल चारु भूषन पहिराई ॥
 बहुरि बोलाइ सुआसिनि लीन्हीं । रुचि विचारि पहिरावनि दीन्हीं ॥
 नेगी नेग जोग सब लेहीं । रुचि अनुरूप भूपमनि देहीं ॥

प्रिय पाहुने पूज्य जे जाने। भूपति भली भाँति सनमाने ॥
देव देखि रघुवीर बिवाहू। वरषि प्रसून प्रसंसि उछाहू ॥

दो०—चले निसान बजाइ सुर निज निज पुर सुख पाइ।

कहत परसपर राम जसु प्रेम न हृदयँ समाइ ॥३५३॥

सब बिधि सबहि समदि नरनाहू। रहा हृदयँ भरि पूरि उछाहू ॥
जहँ रनिवासु तहाँ पगु धारे। सहित बहूटिन्ह कुअँर निहारे ॥
लिए गोद करि मोद समेता। को कहि सकइ भयउ सुखु जेता ॥
बधू सप्रेम गोद बैठारीं। बार बार हियँ हरषि दुलारी ॥
देखि समाजु मुदित रनिवासू। सब कैं उर अनंद कियो बासू ॥
कहेउ भूप जिमि भयउ बिवाहू। सुनि सुनि हरषु होत सब काहू ॥
जनक राज गुन सीलु बड़ाई। प्रीति रीति संपदा सुहाई ॥
बहुबिधि भूप भाट जिमि बरनी। रानीं सब प्रमुदित सुनि करनी ॥

दो०—सुतन्ह समेत नहाइ नृप बोलि बिप्र गुर ग्याति ।

भोजन कीन्ह अनेक बिधि घरी पंच गइ राति ॥३५४॥

मंगलगान करहिं बर भामिनि। भै सुखमूल मनोहर जामिनि ॥
अँचइ पान सब काहूँ पाए। सग सुगंध भूषित छवि छाए ॥
रामहि देखि रजायसु पाई। निज निज भवन चले सिर नाई ॥
प्रेमु प्रमोदु बिनोदु बड़ाई। समउ समाजु मनोहरताई ॥
कहिन सकहिं सत सारद सेसू। वेद विरंचि महेस गनेसू ॥

सो मैं कहौ कवन बिधि बरनी। भूमिनागु सिर धरइ कि बरनी ॥

नृप सब भौंति सबहि सनमानी । कहि मृदु बचन बोलाई रानी ॥
बधू लरिकनीं पर घर आई । राखेहु नयन पलक की नाई ॥
दो०—लरिका श्रमित उनीद बस सयन करावहु जाइ ।

अस कहि गे विश्रामगृहँ राम चरन चितु लाइ ॥३५५॥

भूप बचन सुनि सहज सुहाए । जगित कनक मनि पलँग डसाए ॥
सुभंग सुरभि पय फेन समाना । कोमल कलित सुपेतीं नाना ॥
उपवरहन बर बरनि न जाहीं । स्रग सुगंध मनिमंदिर माहीं ॥
रतनदीप सुठि चारु चँदोवा । कहत न बनइ जान जेहिं जोवा ॥
सेज रुचिर रचि रामु उठाए । प्रेम समेत पलँग पौढ़ाए ॥
अग्या पुनि पुनि भाइन्ह दीन्ही । निज निज सेज सयन तिन्ह कीन्ही
देखि स्याम मृदु मंजुल गाता । कहहिं सप्रेम बचन सब माता ॥
मारग जात भयावनि भारी । केहि विधि तात ताड़का मारी ॥
दो०—घोर निसाचर बिकट भट समर गनहिं नहिं काहु ।

मारे सहित सहाय किमि खल मारीच सुबाहु ॥३५६॥

मुनि प्रसाद बलि तात तुम्हारी । ईस अनेक करवरें टारी ॥
मख रखवारी करि दुहुँ भाई । गुरु प्रसाद सब विद्या पाई ॥
मुनितिय तरी लगत पग धूरी । कीरति रही भुवन भरि पूरी ॥
कमठ पीठि पवि कूट कठोरा । नृप समाज महुँ सिव वनु तोरा ॥
विस्व विजय जसु जानकि पाई । आए भवन व्याहि सब भाई ॥

सकल अमानुष करम तुम्हारे । केवल कौसिक कृपाँ सुधारे ॥

आजु सुफल जग जन्मु दृमाग । देखि तात बिधुबदन तुम्हारा ॥
 जे दिन गए तुम्हहि बिनु देखें । ते विरंचि जनि पारहिं लेखें ॥
 दो०—राम प्रतोषीं मातु सब कहि बिनीत बर बैन ।

सुभिरि संभु गुर बिप्र पद किए नीदबस नैन ॥३५७॥
 नीदउँ बदन सोह सुठि लोना । मनहुँ साँझ सरसीरुह सोना ॥
 घर घर करहिं जागरन नारीं । देहिं परसपर मंगल गारीं ॥
 पुरी विराजति राजति रजनी । रानीं कहहिं बिलोकहु सजनी ॥
 सुंदर बधुन्ह सासु लै सोई । फनिकन्ह जनु सिरमनि उर गोई
 प्रात पुनीत काल प्रभु जागे । अरुनचूड़ वर बोलन लागे ॥
 बंदि मागधन्हि गुनगन गाए । पुरजन द्वार जोहारन आए ॥
 बंदि बिप्र सुग गुर पितु माता । पाइ असीस मुदित सब भ्राता ॥
 जननिन्ह सादर बदन निहारे । भूपति संग द्वार पगु धारे ॥
 दो०—कीन्हि सौच सब सहज सुचि सरित पुनीत नहाइ ।

प्रातक्रिया करि तात पहिं आए चारिउ भाइ ॥३५८॥

नवाह्नपारायण, तीसरा विश्राम

भूप बिलोकि लिए उर लाई । बैठे हरषि रजायसु पाई ॥
 देखि रामु सब सभा जुड़ानी । लोचन लाभ अवधि अनुमानी ॥
 पुनि बसिष्ठ मुनि कौसिकु आए । सुभग आसनन्हि मुनि बैठाए ॥
 सुतन्ह समेत पूजि पद लागे । निरखि रामु दोउ गुर अनुगारे ॥
 कहहिं बसिष्ठ परम हनिहास । सुनहिं महीसु सुदित रनिवास ॥

मुनि मन अगम गाधिसुत करनी । मुदित वसिष्ठ विपुल विधि बरनी
बोले वामदेउ सब साँची । कीरति कलित लोक तिहुँ माची
मुनि आनंदु भयउ सब काहू । राम लखन उर अधिक उछाहू ॥
दो०—मंगल मोद उछाह नित जाहिं दिवस एहि भाँति ।

उमगी अवध अनंद भरि अधिक अधिक अधिकाति ॥ ३५९ ॥

सुदिन सोधि कल कंकन छोरे । मंगल मोद विनोद न थोरे ॥
नित नव सुखु सुर देखि सिहाहीं । अवध जन्म जाचहिं विधि पाहीं
विस्वामित्रु चलन नित चहहीं । राम सप्रेम विनय बस रहहीं ॥
दिन दिन सयगुन भूपति भाऊ । देखि सराह महामुनिराऊ ॥
मागत विदा राउ अनुरागे । सुतन्ह समेत ठाढ़ भे आगे ॥
नाथ सकल संपदा तुम्हारी । मैं सेवकु समेत सुत नारी ॥
करब सदा लरिकन्ह पर छोहू । दरसनु देत रहव मुनि मोहू ॥
अस कहि राउ सहित सुत रानी । परेउ चरन मुख आव न बानी ॥
दीन्हि असीस विप्र बंधु भाँती । चले न प्रीति रीति कहि जाती ॥
रामु सप्रेम संग सब भाई । आयसु पाइ फिरे पहुँचाई ॥

दो०—राम रूपु भूपति भगति व्याहु उछाहु अनंदु ।

जात सराहत मनहिं मन मुदित गाधिकुलचंदु ॥ ३६० ॥

वामदेव रघुकुल गुर ग्यानी । बहुरि गाधिसुत कथा बखानी ॥
मुनि मुनि सुजसु मनहिं मन राऊ । बरनत आपन पुन्य प्रभाऊ ॥
बहुरे लोग रजायसु भयऊ । सुतन्ह समेत नृपति गृहँ गयऊ ॥

जहँ तहँ राम ब्याहु मबु गावा । सुजसु पुनीत लोक तिहुँ छात्रा ॥
 आए ब्याहि रामु घर जव तें । वसइ अनंद अवध सब तब तें ॥
 प्रभु बिबाहँ जस भयउ उछाहू । सकहिं नवरनि गिरा अदिनाहू ॥
 कविकुल जीवनु पावन जानी । राम सीय जसु मंगल खानी ॥
 तेहि ते मैं कछु कहा बखानी । करन पुनीत हेतु निज बानी ॥
 छं०—निज गिरा पावनि करन कारन राम जसु तुलसीं कह्यो ।

रघुबीर चरित अपार बारिधि पारु कवि कौनैं लह्यो ॥
 उपबीत ब्याह उछाह मंगल सुनि जे सादर गावहीं ।
 बैदेहि राम प्रसाद ते जन सर्वदा सुख पावहीं ॥

सो०—सिय रघुबीर बिबाहु जे सप्रेम गावहिं सुनहिं ।

तिन्ह कहुँ सदा उछाहु मंगलायतन राम जसु ॥२६१॥

मासपारायण, बारहवाँ विश्राम



इति श्रीमद्रामचरितमानसे सकलकलिकलुषविध्वंसने

प्रथमः सोपानः समाप्तः ।

(बालकाण्ड समाप्त)

॥ श्रीरामाय नमः ॥

श्रीरामचरितमानस

अयोध्याकाण्ड



राम-भरत-मिलन



बरबस लिए उठाइ उर लाए कृपा निधान ।
भरत राम की मिलनि लखि बिसरे सबहि अपान ॥

श्रीगणेशाय नमः

श्रीजानकीवल्लभो विजयते

श्रीरामचरितमानस

द्वितीय सोपान

(अयोध्याकाण्ड)

श्लोक

यस्याङ्गे च विभाति भूधरसुता देवापगा मस्तके
भाले बालविधुर्गले च गरलं यस्योरसि व्यालराट् ।
सोऽयं भूतिविभूषणः सुरवरः सर्वाधिपः सर्वदा
शर्वः सर्वगतः शिवः शशिनिभः श्रीशङ्करः पातु माम् ॥१॥
प्रसन्नतां या न गताभिषेकतस्तथा न मम्ले वनवासदुःखतः ।
मुखाम्बुजश्रीरघुनन्दनस्य मे सदास्तु सा मञ्जुलमङ्गलप्रदा ॥२॥
नीलाम्बुजश्यामलकोमलाङ्गं सीतासमारोपितवामभागम् ।
पाणौ महासायकचारुचापं नमामि रामं रघुवंशनाथम् ॥३॥

दो०—श्रीगुरु चरन सरोज रज निज मनु मुकुरु सुधारि ।

वरनउँ रघुबर बिमल जसु जो दायकु फल चारि ॥

जब तैं रामु ब्याहि घर आए । नित नव मंगल मोद बधाए ॥
 भुवन चारिदस भूधर भारी । सुकृत मेघ बरषहिं सुख बारी ॥
 रिधि सिधि संपति नदीं सुहाई । उमगि अवध अंबुधि कहूँ आई ॥
 मनिगन पुर नर नारि सुजाती । सुचि अमोल सुंदर सब भाँती ॥
 कहिन जाइ कछु नगर बिभूती । जनु एतनिअ बिरंचि करतूती ॥
 सब बिधि सब पुर लोग सुखारी । रामचंद मुख चंदु निहारी ॥
 मुदित मातु सब सखीं सहेली । फलित विलोकि मनोरथ बेली ॥
 राम रूपु गुन सीलु सुभाऊ । प्रमुदित होइ देखि सुनि राऊ ॥
 दो०—सब कैं उर अभिलाषु अस कहहिं मनाइ महेसु ।

आप अछत जुबराज पद रामहि देउ नरेसु ॥ १ ॥

एक समय सब सहित समाजा । राजसभाँ रघुराजु बिराजा ॥
 सकल सुकृत मूरति नरनाहू । राम सुजसु सुनि अतिहि उछाहू ॥
 नृप सब रहहिं कृपा अभिलाषैं । लोकप करहिं प्रीति रुख राखैं ॥
 तिभुवन तीनि काल जग माहीं । भूरिभाग दसरथ सम नाहीं ॥
 मंगलमूल रामु सुत जासू । जो कछु कहिअ थोर सबु तासू ॥
 रायँ सुभायँ मुकुरु कर लीन्हा । बदनु विलोकि मुकुटु समकीन्हा ॥
 श्रवन समीप भए सित केसा । मनहुँ जरठपनु अस उपदेसा ॥

तप जुबराजु राम कहूँ देह । जीवन जतम लह किन लेह ॥

दो०—यह बिचारु उर आनि नृप सुदिनु सुअवसरु पाइ ।

प्रेम पुलकि तन मुदित मन गुरहि सुनायउ जाइ ॥ २ ॥

कहइ भुआलु सुनिअ मुनि नायक । भए राम सब बिधि सब लायक
 सेवक सचिव सकल पुरवासी । जे हमारे अरि मित्र उदासी ॥
 सबहि रामु प्रिय जेहि बिधि मोही । प्रभु असीस जनु तनु धरि सोही ॥
 विप्र सहित परिवार गोसाईं । करहिं छोहु सब रौरिहि नाई ॥
 जे गुर चरन रेनु सिर धरहीं । ते जनु सकल बिभव बस करहीं ॥
 मोहि सम यहु अनुभयउ न दूजें । सबु पायउँ रज पावनि पूजें ॥
 अब अभिलाषु एकु मन मोरें । पूजिहि नाथ अनुग्रह तोरें ॥
 मुनि प्रसन्न लखि सहज सनेहू । कहेउ नरेस रजायसु देहू ॥

दो०—राजन राउर नासु जसु सब अभिमत दातार ।

फल अनुगामी महिप मनि मन अभिलाषु तुम्हार ॥ ३ ॥

सब बिधि गुरु प्रसन्न जियँ जानी । बोलेउ राउ रहँमि मृदु बानी ॥
 नाथ रामु करिअहिं जुबराजू । कहिअ कृपा करि करिअ समाजू ॥
 मोहि अछत यहु होइ उछाहू । लहहिं लोग सब लोचन लाहू ॥
 प्रभु प्रसाद सिव सबइ निवाहीं । यह लालसा एक मन माहीं ॥
 पुनि न सोच तनु रहउ कि जाऊ । जेहिं न होइ पाछें पछिताऊ ॥
 सुनि मुनि दसरथ बचन सुहाए । मंगल मोद मूल मन भाए ॥
 सुनु नृप जासु बिमुख पछिताहीं । जासु भजन बिनु जरनि न जाहीं
 भयउ तुम्हार तनय सोइ स्वामी । रामु पुनीत प्रेम अनुगामी ॥

दो०—बेगि बिलंबु न करिअ नृप साजिअ सबुइ समाजु ।

सुदिन सुमंगलु तबहिं जब रामु होहिं जुबराजु ॥ ४ ॥

मुदित महीपति मंदिर आए । सेवक सचिव सुमंत्रु बोलाए ॥
 कहि जयजीव सीस तिन्ह नाए । भूप सुमंगल वचन सुनाए ॥
 जौं पाँचहि मत लागै नीका । करहु हरषि हियँ रामहि टीका ॥
 मंत्री मुदित सुनत प्रिय बानी । अभिमत बिरवँ परेउ जनु पानी ॥
 बिनती सचिव करहिं कर जोरी । जिअहु जगतपति बरिस करोरी ॥
 जग मंगल भल काजु विचारा । बेगिअ नाथ न लाइअ बारा ॥
 नृपहि मोदु सुनि सचिव सुभाषा । बढत बाँइ जनु लही सुसाखा ॥
 दो०—कहेउ भूप मुनिराज कर जोइ जोइ आयसु होइ ।

राम राज अभिषेक हित बेगि करहु सोइ सोइ ॥ ५ ॥

हरषि मुनीस कहेउ मृदु बानी । आनहु सकल सुतीरथ पानी ॥
 औषध मूल फूल फल पाना । कहे नाम गनि मंगल नाना ॥
 चामर चरम बसन बहु भाँती । रोम पाट पट अगनित जाती ॥
 मनिगन मंगल वस्तु अनेका । जो जग जोगु भूप अभिषेका ॥
 वेदबिदित कहि सकल विधाना । कहेउ रचहु पुर विविध बिताना ॥
 सफल रसाल पूगफल केरा । रोपहु बीधिन्ह पुर चहुँ फेरा ॥
 रचहु मंजु मनि चौकें चारू । कहहु बनावन बेगि बजारू ॥
 पूजहु गनपति गुर कुलदेवा । सब विधि करहु भूमिसुर सेवा ॥
 दो०—ध्वज पताक तोरन कलस सजहु तुरग रथ नाग ।

सिर धरि मुनिबर बचन मंडु निज निज काजहिं लाग ॥ ६ ॥

जो मुनीस जेहि आयसु दीन्हा । सो तेहिं काजु प्रथम जनु कीन्हा ॥
 बिप्र साधु सुर पूजत राजा । करत राम हित मंगल काजा ॥
 सुनत राम अभिषेक सुहावा । बाज गहागह अवध बधावा ॥
 राम सीय तन सगुन जनाए । फरकहिं मंगल अंग सुहाए ॥
 पुलकि सप्रेम परसपर कहहीं । भरत आगमनु सूचक अहहीं ॥
 भए बहुत दिन अति अवसेरी । सगुन प्रतीति भेंट प्रिय केरी ॥
 भरत सरिस प्रिय को जग माहीं । इहइ सगुन फल दूसर नाहीं ॥
 रामहि बंधु सोच दिन राती । अंडन्हि कमठ हृदउ जेहि भाँती

दो०—एहि अवसर मंगलु परम सुनि रहँसेउ रनिवासु ।

सोभत लखि बिधु बढत जनु वारिधि बीचि बिलासु ॥ ७ ॥

प्रथम जाइ जिन्ह वचन सुनाए । भूषन वसन भूरि तिन्ह पाए ॥
 प्रेम पुलकि तन मन अनुरागीं । मंगल कलस सजन सब लागीं ॥
 चौकें चारु सुमित्राँ पूरी । मनिमय विविध भाँति अति रूरी
 आनँद मगन राम महतारी । दिए दान बहु बिप्र हँकारी ॥
 पूजी ग्रामदेवि सुर नागा । कहेउ बहोरि देन बलिभागा ॥
 जेहि बिधि होइ राम कल्यानू । देहु दया करि सो बरदानू ॥
 गावहिं मंगल कोकिलबयनीं । विधुवदनीं मृगसावकनयनीं ॥

दो०—राम राज अभिषेकु सुनि हियँ हरषे नर नारि ।

लगे सुमंगल सजन सब बिधि अनुकूल बिचारि ॥ ८ ॥

तब नरनाहँ वसिष्ठु बोलाए । रामधाम सिख देन पठाए ॥

गुर आगमनु सुनत रघुनाथा । द्वार आई पद नायउ माथा ॥
 सादर अरघ देइ घर आने । सोरह भाँति पूजि सनमाने ॥
 गहे चरन सिय सहित बहोरी । बोले रामु कमल कर जोरी ॥
 सेवक सदन स्वामि आगमनू । मंगल मूल अमंगल दमनू ॥
 तदपि उचित जनु बोलि सप्रीती । पठइअ काज नाथ असि नीती ॥
 प्रभुता तजि प्रभु कीन्ह सनेहू । भयउ पुनीत आजु यहु गेहू ॥
 आयसु होइ सो करौ गोसाई । सेवकु लहइ स्वामि सेवकाई ॥
 दा०—सुनि सनेह साने बचन मुनि रघुबरहि प्रसंस ।

राम कस न तुम्ह कहहु अस हंस बंस अवतंस ॥ ९ ॥
 बरनि राम गुन सीलु सुभाऊ । बोले प्रेम पुलकि मुनिराऊ ॥
 भूप सजेउ अभिषेक समाजू । चाहत देन तुम्हहि जुवराजू ॥
 राम करहु सब संजम आजू । जौं विधि कुसल निवाहै काजू ॥
 गुरु सिख देइ राय पहिं गयऊ । राम हृदयँ अस विसमउ भयऊ ॥
 जनमे एक संग सब भाई । भोजन सयन केलि लरिकाई ॥
 करनबेध उपवीत बिआहा । संग संग सब भए उछाहा ॥
 बिमल बंस यहु अनुचित एकू । बंधु बिहाइ बड़ेहि अभिषेकू ॥
 प्रभु सप्रेम पछितानि सुहाई । हरउ भगत मन कै कुटिलाई ॥
 दो०—तेहि अवसर आए लखन मगन प्रेम आनंद ।

सनमाने प्रिय बचन कहि रघुकुल कैरव चंद ॥ १० ॥

भरत आगमनु सकल मनावहिं । आवहुं बेगि नयन फलु पावहिं ॥
 हाट बाट घर गलीं अथाई । कहहिं परसपर लोग लोगाई ॥
 कालि लगन भलि केतिक बारा । पूजिहि विधि अभिलाषु हमारा ॥
 कनक सिंघासन सीय समेता । बैठहिं रामु होइ चित चेता ॥
 सकल कहहिं कब होइहि काली । बिघन मनावहिं देव कुचाली ॥
 तिन्हहि सोहाइ न अवध बधावा । चोरहि चंदिनि राति न भावा ॥
 सारद बोलि विनय सुर करहीं । बारहिं बार पाय लै परहीं ॥
 दो०—बिपति हमारि बिलोकि बड़ि मातु करिअ सोइ आजु ।

रामु जाहिं बन राजु तजि होइ सकल सुरकाजु ॥ ११ ॥
 सुनि सुर विनय ठाढ़ि पछिताती । भइउँ सरोज बिपिन हिमराती ॥
 देखि देव पुनि कहहिं निहोरी । मातु तोहि नहिं थोरिउ खोरी ॥
 बिसमय हरष रहित रघुराऊ । तुम्ह जानहु सब राम प्रभाऊ ॥
 जीव करम बस सुख दुख भागी । जाइअ अवध देव हित लागी ॥
 बार बार गहि चरन सँकोची । चली बिचारि बिबुध मति पोची ॥
 ऊँच निवासु नीचि करतूती । देखि न सकहिं पराइ बिभूती ॥
 आगिल काजु बिचारि बहोरी । करिहहिं चाह कुसल कवि मोरी ॥
 हरषि हृदयँ दसरथ पुर आई । जनु ग्रह दसा दुसह दुखदाई ॥

दो०—नामु मंथरा मंदमति चेरी कैकह केरि ।
 अजस पेढारी ताहि करि गई गिरा मति फेरि ॥ १२ ॥

दीख मंथरा नगर बनावा । मंजुल मंगल बाज बधावा ॥

पूछेसि लोगन्ह काह उछाहू । राम तिलकु सुनि भा उर दाहू ॥
 करइ विचारु कुबुद्धि कुजाती । होइ अकाजु कवनि बिधि राती ॥
 देखि लागि मधु कुटिल किराती । जिमि गवँ तकइ लेउँ केहि भाँती
 भरत मातु पहिँ गइ बिलखानी । का अनमनि हसि कह हँसि रानी
 ऊतरु देइ न लेइ उसासू । नारि चरित करि ढारइ आँसू ॥
 हँसि कह रानि गालु बड़ तोरें । दीन्ह लखन सिख अस मन मोरें
 तबहुँ न बोल चेरि बड़ि पापिनि । छाड़इ स्वास कारि जनु साँपिनि
 दो०—सभय रानि कह कहसि किन कुसल रामु महिपालु ।

लखनु भरतु रिपुदमनु सुनि भा कुबरी उर सालु ॥ १३ ॥
 कत सिख देइ हमहि कोउ माई । गालु करव केहि कर बलु पाई ॥
 रामहि छाड़ि कुसल केहि आजू । जेहि जनेसु देइ जुवराजू ॥
 भयउ कौसिलहि बिधि अति दाहिन । देखत गरव रहत उर नाहिन
 देखहु कस न जाइ सब सोभा । जो अवलोकि मोर मनु छोभा ॥
 पूतु बिदेस न सोचु तुम्हारें । जानति हहु बस नाहु हमारें ॥
 नीद बहुत प्रिय सेज तुराई । लखहु न भूप कपट चतुराई ॥
 सुनि प्रिय बचन मलिन मनु जानी । झुकी रानि अब रहु अरगानी
 पुनि अस कबहुँ कहसि घरफोरी । तब धरि जीभ कढ़ावउँ तोरी ॥
 दो०—काने खोर कूबरे कुटिल कुचाली जानि ।

तिय बिसेषि पुनि चेरि कहि भरतमातु मुसुकानि ॥ १४ ॥

सुदिनु सुमंगल दायकु सोई। तोर कहा फुर जेहि दिन होई ॥
 जेठ स्वामि सेवक लघु भाई। यह दिनकर कुलरीति सुहाई ॥
 राम तिलकु जौ साँचेहुँ काली। देउँ मागु मन भावत आली ॥
 कौसल्या सम सब महतारी। रामहि सहज सुभायँ पिआरी ॥
 मो पर करहिं सनेहु बिसेषी। मैं करि प्रीति परीछा देखी ॥
 जौ विधि जनमु देइ करि छोहू। होहुँ राम सिय पूत पुतोहू ॥
 प्रान तेँ अधिक रामु प्रिय मोरें। तिन्ह केँ तिलक छोभु कस तोरें ॥
 दो०—भरत सपथ तोहि सत्य कहु परिहरि कपट दुराउ ।

हरष समय बिसमउ करसि कारन मोहि सुनाउ ॥ १५ ॥

एकहिं बार आस सब पूजी। अब कछु कहव जीभ करि दूजी ॥
 फोरै जोगु कपारु अभागा। भलेउ कहत दुख रउरेहि लागा ॥
 कहहिं झूठि फुरि बात बनाई। ते प्रिय तुम्हहि करुइ मैं माई ॥
 हमहुँ कहवि अब ठकुर सोहाती। नाहिं त मौन रहव दिनु राती ॥
 करि कुरूप विधि परबस कीन्हा। बवा सो लुनिअ लहिअ जो दीन्हा ॥
 कोउ नृप होउ हमहि का हानी। चेरि छाड़ि अब होव कि रानी ॥
 जारै जोगु सुभाउ हमारा। अनभल देखि न जाइ तुम्हारा ॥
 तातें कछुक बात अनुसारी। छमिअ देवि बड़ि चूक हमारी ॥
 दो०—गूढ़ कपट प्रिय बचन सुनि तीय अधरबुधि रानि ।

सुरमाया बस बैरिनिहि सुहृद जानि पतिआनि ॥ १६ ॥

सादर पुनि पुनि पूँछति ओही। सवरी गान मृगी जनु मोही ॥

तसिमति फिरी अहइ जसि भात्री । रहसी चेरि घात जनु फावी ॥
 'तुम्ह पूँछहु मैं कहत डेराऊँ । धरेहु मोर घरफोरी नाऊँ ॥
 सजि प्रतीति बहुविधि गढ़ि छोली । अवध सादसाती तब बोली ॥
 प्रिय सिय रामु कहा तुम्ह रानी । रामहि तुम्ह प्रिय सो फुरि बानी ॥
 रहा प्रथम अब ते दिन बीते । समउ फिरें रिपु होहिं पिरिते ॥
 भानु कमल कुल पोषनिद्वारा । बिनु जल जारि करइ सोइ छारा ॥
 जरि तुम्हारि चहं सवति उखारी । रूँधहु करि उपाउ बर बारी ॥
 दो०—तुम्हहि न सोचु सोहाग बल निज बस जानहु राउ ।

मन मलीन मुह मीठ नृपु राउर सरल सुभाउ ॥१७॥
 चतुर गँभीर राम महतारी । बीचु पाइ निज बात सँवारी ॥
 पठए भरतु भूप ननिअउरें । राम मातु मत जानब रउरें ॥
 सेवहिं सकल सवति मोहि नीकें । गरबित भरत मातु बल पी कें ॥
 सालु तुम्हार कौसिलहि माई । कपट चतुर नहिं होइ जनाई ॥
 राजहि तुम्ह पर प्रेमु बिसेषी । सवति सुभाउ सकइ नहिं देखी ॥
 रचि प्रपंचु भूपहि अपनाई । राम तिलक हित लगन धराई ॥
 यह कुल उचित राम कहूँ टीका । सबहि सोहाइ मोहि सुठि नीका ॥
 आगिलि बात समुझि डरु मोही । देउ दैउ फिरि सो फल ओही ॥

दो०—रचि पचि कोटिक कुटिलपन कीन्हेसि कपट प्रबोधु ।

कहिसि कथा सत सवति कै जेहि बिधि बाढ़ बिरोधु ॥१८॥

का पूँछहु तुम्ह अबहुँ न जाना । निज हित अनहित पसु पहिचाना ॥
 भयउ पाखु दिन सजत समाजू । तुम्ह पाई सुधि मोहि सन आजू ॥
 खाइअ पहिरिअ राज तुम्हारे । सत्य कहें नहिं दोषु हमारे ॥
 जौं असत्य कछु कहव बनाई । तौ बिधि देइहि हमहि सजाई ॥
 रामहि तिलक कालि जौं भयऊ । तुम्ह कहुँ विपति बीजुबिधि बयऊ
 रेख खँचाइ कहउँ बलु भाषी । भामिनि भइहु दूध कइ माखी ॥
 जौं सुत सहित करहु सेवकाई । तौ घर रहहु न आन उपाई ॥
 दो०—कद्रू बिनतहि दीन्ह दुखु तुम्हहि कौसिलाँ देव ।

भरतु बंदिगृह सेइहहिं लखनु राम के नेव ॥१९॥

कैकयसुता सुनत कटु बानी । कहि न सकइ कछु सहमि सुखानी ॥
 तन पसेउ कदली जिमि काँपी । कुबरीं दसन जीभ तव चाँपी ॥
 कहि कहि कोटिक कपट कहानी । धीरजु धरहु प्रबोधिसि रानी ॥
 फिरा करमु प्रिय लागि कुचाली । बकिहि सराहइ मानि मराली ॥
 सुनु मंथरा बात फुरि तोरी । दहिनि आँखि नित फरकइ मोरी
 दिन प्रति देखउँ राति कुसपने । कहउँ न तोहि मोह बस अपने ॥
 काह करौं सखि सूध सुभाऊ । दाहिन वाम न जानउँ काऊ ॥

दो०—अपने चलत न आजु लागि अनभल काहुक कीन्ह ।

केहि अघ एकहि बार मोहि दैअ दुसह दुखु दीन्ह ॥२०॥

नैहर जनमु भरव बरु जाई । जिअतन करबि सवति सेवकाई ॥
 अरि बस दैउ जिआवत जाही । मरनु नीक तेहि जीवन चाही ॥

दीन बचन कह बहुविधि रानी । सुनि कुबरीं तियमाया ठानी ॥
 अस कस कहहु मानि मन ऊना । सुखु सोहागु तुम्ह कहूँ दिन दूना ॥
 जेहिं राउर अति अनमल ताका । सोइ पाइहि यहु फलु परिपाका ॥
 जब तें कुमत सुना मैं स्वामिनि । भूख न बासर नीद न जामिनि ॥
 पूँछेउँ गुनिन्हरेख तिन्ह खाँची । भरत भुआल होहिं यह साँची ॥
 भामिनि करहु त कहौं उपाऊ । है तुम्हरीं सेवा बस राऊ ॥

दो०—परउँ कूप तुअ बचन पर सकउँ पूत पति त्यागि ।

कहसि मोर दुखु देखि बड़ कस न करब हित लागि ॥२१॥

कुबरीं करि कबुली कैकेई । कपट छुरी उर पाहन टेई ॥
 लखइ न रानि निकट दुखु कैसैं । चरइ हरित तिन बलिपसु जैसैं ॥
 सुनत बात मृदु अंत कठोरी । देति मनहुँ मधु माहुर घोरी ॥
 कहइ चेरि सुधि अहइ कि नाही । स्वामिनि कहिहु कथा मोहि पाहीं ॥
 दुइ बरदान भूप सन थाती । मागहु आजु जुड़ावहु छाती ॥
 सुतहि राजु रामहि बनवासू । देहु लेहु सब सवति हुलासू ॥
 भूपति राम सपथ जब करई । तब मागेहु जेहिं बचनु न टरई ॥
 होइ अकाजु आजु निसि बीतें । बचनु मोर प्रिय मानेहु जी तैं ॥

दो०—बड़ कुवातु करि पातकिनि कहेसि कोपगृहँ जाहु ।

काजु सँवारेहु सजग सबु सहसा जनि पतिआहु ॥२२॥

कुबरिहि रानि प्रानप्रिय जानी । बार बार बड़ि बुद्धि बखानी ॥

जौं बिधि पुरब मनोरथु काली । करौं तोहि चख पूतरि आली ॥
 बहुबिधि चेरिहि आदरु देई । कोपभवनं गवनी कैकई ॥
 बिपति बीजु बरषा रितु चेरी । भुईं भइ कुमति कैकई केरी ॥
 पाइ कपट जलु अंकुर जामा । बर दोउ दल दुख फल परिनामा ॥
 कोप समाजु साजि सबु सोई । राजु करत निज कुमति बिगोई ॥
 राउर नगर कोलाहलु होई । यह कुचालि कछु जान न कोई ॥
 दो०—प्रसुदित पुर नर नारि सब सजहिं सुमंगलचार ।

एक प्रबिसहिं एक निर्गमहिं भीर भूप दरबार ॥२३॥
 बाल सखा सुनि हियँ हरषाहीं । मिलि दस पाँच राम पहिं जाहीं ॥
 प्रभु आदरहिं प्रेमु पहिचानी । पूँछहिं कुसल खेम मृदु बानी ॥
 फिरहिं भवनप्रिय आयसु पाई । करत परसपर राम बड़ाई ॥
 को रघुबीर सरिस संसारा । सीलु सनेहु निवाहनिहारा ॥
 जेहिं जेहिं जोनि करम बस भ्रमहीं । तहँ तहँ ईसु देउ यह हमहीं ॥
 सेवक हम स्वामी सियनाहू । होउ नात यह ओर निवाहू ॥
 अस अभिलाषु नगर सब काहू । कैकयसुता हृदयँ अति दाहू ॥
 को न कुसंगति पाइ नसाई । रहइ न नीच मतेँ चतुराई ॥
 दो०—साँझ समय सानंद नृपु गयउ कैकई गेहँ ।

गवनु निठुरता निकट किय जनु धरि देह सनेहँ ॥२४॥

कोपभवन सुनि सकुचेउ राजु । भय बस अगहुड़ परइ न पाऊ ॥
 सुरपति बसइ बाहँबल जाकैं । नरपति सकल रहहिं रुख ताकैं ॥

सो सुनि तिय रिस गयउ सुखाई। देखहु काम प्रताप बढ़ाई ॥
 सूल कुलिस असि अँगवनिहारे। ते रतिनाथ सुमन सर मारे ॥
 सभय नरेसु प्रिया पहिं गयऊ। देखि दसा दुखु दारुन भयऊ ॥
 भूमि सयन पट्ट मोट पुराना। दिए डारि तन भूषन नाना ॥
 कुमतिहि कसि कुबेप्रता फाबी। अनअहिवातु सूच जनु भाबी ॥
 जाइ निकट नृपु कह मृदु बानी। प्रानप्रिया केहि हेतु रिसानी ॥

छं०—केहि हेतु रानि रिसानि परसत पानि पतिहि नेवारई।
 मानहुँ सरोष भुअंग भामिनि बिषम भाँति निहारई ॥
 दोउ बासना रसना दसन बर मरम ठाहरु देखई।
 तुलसी नृपति भवतव्यता बस काम कौतुक लेखई ॥

सो०—बार बार कह राउ सुमुखि सुलोचनि पिकवचनि।

कारन मोहि सुनाउ गजगामिनि निज कोप कर ॥२५॥

अनहित तोर प्रिया केई कीन्हा। केहि दुइ सिर केहि जमु चह लीन्हा
 कहु केहि रंकहि करौं नरेसू। कहु केहि नृपहि निकासौं देसू ॥
 सकउँ तोर अरि अमरउ मारी। काह कीट बपुरे नर नारी ॥
 जानसि मोर सुभाउ बरोरू। मनु तव आनन चंद चकोरू ॥
 प्रिया प्रान सुत सरबसु मोरें। परिजन प्रजा सकल बस तोरें ॥
 जौं कछु कहौं कपटु करि तोही। भामिनि राम सपथ सत मोही ॥
 ब्रिहसि मागु मनभावति बाता। भूषन सजहि मनोहर गाता ॥

दो०-यह सुनि मन गुनि सपथ बड़ि बिहसि उठी मतिमंद ।

भूषन सजति बिलोकि मृगु मनहुँ किरातिनि फंद ॥२६॥

पुनि कहराउ सुहृद जियँ जानी । प्रेम पुलकि मृदु मंजुल बानी ॥
 भामिनि भयउ तोर मनभावा । घर घर नगर अनंद बधावा ॥
 रामहि देउँ कालि जुवराजू । सजहि सुलोचनि मंगल साजू ॥
 दलकि उठेउ सुनि हृदउ कठोरू । जनु छुइ गयउ पाक बरतोरू ॥
 ऐसिउ पीर बिहसि तेहिं गोई । चोर नारि जिमि प्रगटि न रोई ॥
 लखहिं न भूप कपट चतुराई । कोटि कुटिल मनि गुरू पढ़ाई ॥
 जद्यपि नीति निपुन नरनाहू । नारिचरित जलनिधि अवगाहू ॥
 कपट सनेहु बढाइ बहोरी । बोली बिहसि नयन मुहु मोरी ॥

दो०-मागु मागु पै कहहु पिय कबहुँ न देहु न लेहु ।

देन कहेहु बरदान दुइ तेउ पावत संदेहु ॥२७॥

जानेउँ मरमु राउ हँसि कहई । तुम्हहि कोहाव परमप्रिय अहई ॥
 याती राखि न मागिहु काऊ । बिसरि गयउ मोहि भोर सुभाऊ ॥
 झूठेहुँ हमहि दोषु जनि देहू । दुइ कै चारि मागि मकु लेहू ॥
 रघुकुल रीति सदा चलि आई । प्राण जाहुँ बरु बचनु न जाई ॥
 नहिं असत्य सम पातक पुंजा । गिरि सम होहिं कि कोटिक गुंजा ॥
 सत्यमूल सब सुकृत सुहाए । वेद पुरान बिदित मनु गाए ॥
 तेहिपर राम सपथ करि आई । सुकृत सनेह अवधि रघुराई ॥
 बात दृढ़ाई कुमति हँसि बोली । कुमत कुबिहग कुलह जनु खोली

दो०—भूप मनोरथ सुभग वनु सुख सुबिहंग समाजु ।

भिल्लिनि जिमि छाड़न चहति बचनु भयंकरु बाजु ॥२८॥

मासपारायण, तेरहवाँ विश्राम

सुनहु प्रानप्रिय भावत जी का । देहु एक बर भरतहि टीका ॥
 मागउँ दूसर बर कर जोरी । पुरवहु नाथ मनोरथ मोरी ॥
 तापस बेष बिसेषि उदासी । चौदह बरिस रामु बनवासी ॥
 सुनि मृदु बचन भूप हियँ सोकू । ससि कर छुअत विकल जिमि कोकू
 गयउ सहमि नहि कछु कहि आवा । जनु सचान बन झपटेउ लावा ॥
 बिबरन भयउ निपट नरपाछू । दामिनि हनेउ मनहुँ तरु तालू ॥
 माथें हाथ मूदि दोउ लोचन । तनु धरि सोचु लाग जनु सोचन ॥
 मोर मनोरथु सुरतरु फूला । फरत करिनि जिमि हतेउ समूला
 अवध उजारि कीन्हि कैकेई । दीन्हिसि अचल विपति कै नेई ॥

दो०—कवनें अवसर का भयउ गयउँ नारि बिस्वास ।

जोग सिद्धि फल समय जिमि जतिहि अबिद्या नास ॥२९॥

एहिबिधि राउ मनहिं मन झाँखा । देखि कुभाँति कुमति मन माखा
 भरतु कि राउर पूत न होंही । आनेहु मोल बेसाहि कि मोही ॥
 जो सुनि सरु अस लाग तुम्हारें । काहे न बोलहु बचनु सँभारें ॥
 देहु उतरु अनु करहु कि नाहीं । सत्यसंध तुम्ह रघुकुल माहीं ॥
 देन कहेहु अब जनि बरु देहू । तजहु सत्य जग अपजसु लेहू ॥

सिद्धि दधीचि बलि जो कछु भाषा । तनु धनु तजेउ बचन पनु राखा
अति कटु बचन कहति कैकेई । मानहुँ लोन जरे पर देई ॥
दो०—धरम धुरंधर धीर धरि नयन उघारे रायँ ।

सिरु धुनि लीन्हि उसास असि मारेसि मोहि कुठायँ ॥३०॥

आगें दीखि जरत रिस भारी । मनहुँ रोष तरवारि उघारी ॥
मूठि कुबुद्धि धार निठुराई । धरी कूबरीं सान बनाई ॥
लखी महीप कराल कठोरा । सत्य कि जीवनु लेइहि मोरा ॥
बोले राउ कठिन करि छाती । वानी सबिनय तासु सोहाती ॥
प्रिया बचन कस कहसि कुभाँती । भीर प्रतीति प्रीति करि हाँती ॥
मोरें भरतु रामु दुइ आँखी । सत्य कहउँ करि संकरु साखी
अवसि दूतु मैं पठइव प्राता । ऐहहिं बेगि सुनत दोउ भ्राता ॥
सुदिन सोधि सबु साजु सजाई । देउँ भरत कहूँ राजु बजाई ॥

दो०—लोभु न रामहि राजु कर बहुत भरत पर प्रीति ।

मैं बड़ छोट बिचारि जियँ करत रहेउँ नृपनीति ॥३१॥

राम सपथ सत कहउँ सुभाऊ । राममातु कछु कहेउ न काऊ ॥
मैं सबु कीन्ह तोहि विनु पूँछें । तेहि तैं परेउ मनोरथु छूँछें ॥
रिस परिहरु अब मंगल साजू । कछु दिन गएँ भरत जुबराजू ॥
एकहि बात मोहि दुखु लागा । बर दूसर असमंजस मागा ॥
अजहूँ हृदउ जरत तेहि आँचा । रिस परिहास कि साँचेहुँ साँचा ॥
कह तजि रोषु राम अपराधू । सबु कोउ कहइ रामु सुठि साधू ॥

तुहँ सराहसि करमि सनेहू । अब सुनि मोहि भयउ संदेहू ॥
जासु सुभाउ अरिहि अनुकूला । सो किमि करिहि मातु प्रतिकूला ॥
दो०—प्रिया हास रिस परिहरहि मागु बिचारि बिबेकु ।

जेहिं देखौं अब नयन भरि भरत राज अभिषेकु ॥३२॥
जिए मीन बरु बारि बिहीना । मनि विनु फनिकु जिए दुख दीना
कहउँ सुभाउ न छलु मन माहीं । जीवनु मोर राम विनु नाहीं ॥
समुझि देखु जियँ प्रिया प्रवीना । जीवनु राम दरस आधीना ॥
सुनि मृदु वचन कुमति अति जरई । मनहुँ अनल आहुति घृत परई
कहइ करहु किन कोटि उपाया । इहाँ न लागिहि राउरि माया ॥
देहु किलेहु अजसु करि नाहीं । मोहि न बहुत प्रपंच सोहार्हीं ॥
रामु साधु तुम्ह साधु सयाने । राममातु भलि सब पहिचाने ॥
जस कौसिलाँ मोर भल ताका । तस फलु उन्हहि देउँ करि साका

दो०—होत प्रातु मुनिवेष धरि जौं न रामु बन जाहिं ।

मोर मरनु राउर अजस नृप समुझिअ मन माहिं ॥३३॥
अस कहि कुटिल भई उठि ठाढ़ी । मानहुँ रोष तरंगिनि बाढ़ी ॥
पाप पहार प्रगट भइ सोई भरी क्रोध जल जाइ न जोई ॥
दोउ बर कूल कठिन हठ धारा । भवैर कूबरी वचन प्रचारा ॥
ढाहत भूपरूप तरु मूला । चली विपति बारिधि अनुकूला ॥
लखी नरेस बात फुरि साँची । तिय मिस मीचु सीस पर नाची ॥

मागु माथ अबहीं देउँ तोही । राम बिरहँ जनि मारसि मोही ॥
 राखु राम कहँ जेहि तेहि भाँती । नाहिं त जरिहि जनम भरि छाती ॥
 दो०—देखी व्याधि असाध नृपु परेउ धरनि धुनि माथ ।

कहत परम आरत बचन राम राम रघुनाथ ॥३४॥
 व्याकुल राउ सिथिल सब गाता । करिनि कलप तरु मनहुँ निपाता ॥
 कंटु सूख मुख आव न बानी । जनु पाठीनु दीन विनु पानी ॥
 पुनि कह कटु कठोर कैकेई । मनहुँ घाय महुँ माहुर देई ॥
 जौ अंतहुँ अस करतबु रहेऊ । मागु मागु तुम्ह केहिं बल कहेऊ ॥
 दुइ कि होइ एक समय भुआला । हँसव ठठाइ फुलाउव गाला ॥
 दानि कहाउव अरु कृपनाई । होइ कि खेम कुसल रौताई ॥
 छाड़हु बचनु कि धीरजु धरहू । जनि अबला जिमि करुना करहू
 तनु तिय तनय धामु धनु धरनी । सत्यसंध कहँ तून सम बरनी ॥
 दो०—मरम बचन सुनि राउ कह कह कछु दोषु न तोर ।

लागेउ तोहि पिसाच जिमि कालु कहावत मोर ॥३५॥
 चहत न भरत भूपतहि भोगे । विधिवस कुमति वसी जिय तोरें ॥
 सो सबु मोर पाप परिनामू । भयउ कुठाहर जेहिं विधि बामू ॥
 सुवस बसिहि फिरि अवध सुहाई । सब गुन धाम राम प्रभुताई ॥
 करिहिं भाइ सकल सेवकाई । होइहि तिहुँ पुर राम बड़ाई ॥
 तोर कलंकु मोर पछिताऊ । मुएहुँ न मिटिहि न जाइहि काऊ
 अब तोहि नीक लग करु सोई । लोचन ओट बैठु मुहु गोई ॥

जव लगी जिऔं कहउँ कर जोरी। तव लगी जनि कछु कहसि बहोरी
फिरि पछितैहसि अंत अभागी। मारसि गाइ नहारु लागी ॥
दो०—परेउ राउ कहि कोटि बिधि काहे करसि निदानु ।

कपट सयानि न कहस्ति कछु जागति मनहुँ मसानु ॥३६॥
राम राम रट बिकल भुआलू। जनु बिनु पंख बिहंग बेहालू ॥
हृदयँ मनाव भोरु जनि होई। रामहि जाइ कहै जनि कोई ॥
उदउ करहुं जनि रबिरघुकुल गुर। अवध बिलोकि सूल होइहि उर
भूप प्रीति कैकइ कठिनार्इ। उभय अवधि बिधि रची बनार्इ ॥
बिलपत नृपहि भयउ भिनुसारा। बीना वेनु संख धुनि द्वारा ॥
पढ़हिं भाट गुन गावहिं गायक। सुनत नृपहि जनु लागहिं सायक
मंगल सकल सोहाहिं न कैसें। सहगामिनिहि बिभूषन जैसें ॥
तेहि निसि नीद परी नहिं काहू। राम दरस लालसा उछाहू ॥

दो०—द्वार भीर सेवक सचिव कहहिं उदित रवि देखि ।

जागेउ अजहुँ न अवधपति कारनु कवनु बिसेषि ॥३७॥
पछिले पहर भूपु नित जागा। आजु हमहि बड़ अचरजु लागा ॥
जाहु सुमंत्र जगावहु जाई। कीजिअ काजु रजायसु पाई ॥
गए सुमंत्रु तव राउर माहीं। देखि भयावन जात डेराहीं ॥
धाइ खाइ जनु जाइ न हेरा। मानहुँ बिपति बिषाद बसेरा ॥
पूछें कोउ न ऊतर देई। गए जेहिं भवन भूप कैकेई ॥

सोच विकल विवरन महि परेऊ । मानहुँ कमल मूलु परिहरेऊ ॥
सचिव समीत सकइ नहिं पूछी । बोली असुभ भरी सुभ छूछी
दो०—परी न राजहि नीद निसि हेतु जान जगदीसु ।

रामु रामु रटि भोरु किय कहइ न मरमु महीसु ॥३८॥
आनहु रामहि बेगि बोलाई । समाचार तव पूँछेहु आई ॥
चलेउ सुमंत्रु राय रुख जानी । लखी कुचालि कीन्हि कछु रानी
सोच विकल मग परइ न पाऊ । रामहि बोलि कहिहि काराऊ ॥
उर धरि धीरजु गयउ दुआरें । पूँछहिं सकल देखि मनु मारें ॥
समाधानु करि सो सबही का । गयउ जहाँ दिनकर कुल टीका ॥
राम सुमंत्रहि आवत देखा । आदरु कीन्ह पिता सम लेखा ॥
निरखि बदनु कहि भूप रजाई । रघुकुलदीपहि चलेउ लेवाई ॥
रामु कुभाँति सचिव सँग जाहीं । देखि लोग जहँ तहँ विलखाहीं ॥
दो०—जाइ दीख रघुवंसमनि नरपति निपट कुसाजु ।

सहमि परेउ लखि सिंघिनिहि मनहुँ वृद्ध गजराजु ॥३९॥
सूखहिं अधर जरइ सबु अंगू । मनहुँ दीन मनिहीन भुअंगू ॥
सरुष समीप दीखि कैकई । मानहुँ मीचु घरीं गनि लेई ॥
करुनामय मृदु राम सुभाऊ । प्रथम दीख दुखु सुना न काऊ ॥
तदपि धीर धरि समउ विचारी । पूँछी मधुर बचन महतारी ॥
मोहि कहु मातु तात दुख कारन । करिअ जतन जेहिं होइ निवारन ॥
सुनहु राम सबु कारनु एहू । राजहि तुम्ह पर बहुत सनेहू ॥

देन कहैन्ह मोहि दुइ बरदाना । मागेउँ जो कछु मोहि सोहाना ॥
 सो सुनि भयउ भूप उर सोचू । छाड़ि न सकहिं तुम्हार सँकोचू ॥

श्लो०—सुत सनेहु इत बचनु उत संकट परेउ नरेसु ।

सकहु त आयसु धरहु सिर मेटहु कठिन कलेसु ॥४०॥

निधरक बैठि कहइ कटु बानी । सुनत कठिनता अति अकुलानी
 जीभ कमान बचन सर नाना । मनहुँ महिप मृदु लच्छ समाना ॥
 जनु कठोरपनु धरें सरीरु । सिखइ धनुषविद्या बर बीरु ॥
 सबु प्रसंगु रघुपतिहि सुनाई । बैठि मनहुँ तनु धरि निठुराई ॥
 मन सुसुकाइ भानुकुल भानू । रामु सहज आनंद निधानू ॥
 बोले बचन विगत सब दूषन । मृदु मंजुल जनु बाग विभूषन ॥
 सुनु जननी सोइ सुत बड़भागी । जो पितु मातु बचन अनुरागी ॥
 तनय मातु पितु तोषनिहारा । दुर्लभ जननि सकल संसारा ॥

श्लो०—मुनिगन मिलनु बिसेषि बन सबहि भाँति हित मोर ।

तेहि महँ पितु आयसु बहुरि संमत जननी तोर ॥४१॥

भरतु प्रानप्रिय पावहिं राजू । विधिसब विधि मोहि सनमुख आजू
 जौं न जाउँ बन ऐसेहु काजा । प्रथम गनिअ मोहि मूढ़ समाजा ॥
 सेवहिं अरँडु कलपतरु त्यागी । परिहरि अमृत लेहिं विषु मागी ॥
 तेउ न पाइ अस समउ चुकाहीं । देखु विचारि मातु मन माहीं ॥
 अंब एक दुखु मोहि बिसेषी । निपट विकल नरनायकु देखी ॥

थोरिहिं बात पितहि दुख भारी । होति प्रतीति न मोहि महतारी ॥

राउ धीर गुन उदधि अगाधू । भा मोहि तें कछु बड़ अपराधू ॥
जातें मोहि न कहत कछु राऊ । मोरि सपथ तोहि कहु सतिभाऊ ॥
दो०—सहज सरल रघुबर बचन कुमति कुटिल करि जान ।

चलइ जोंक जल बक्रगति जद्यपि सलिलु समान ॥४२॥

रहसी रानि राम रुख पाई । बोली कपट सनेहु जनाई ॥
सपथ तुम्हार भरत कै आना । हेतु न दूसर मैं कछु जाना ॥
तुम्ह अपराध जोगु नहिं ताता । जननी जनक बंधु सुखदाता ॥
राम सत्य सबु जो कछु कहहू । तुम्ह पितु मातु बचन रत अहहू ॥
पितहि बुझाइ कहहु बलि सोई । चौथेंपन जेहिं अजसु न होई ॥
तुम्ह सम सुअन सुकृत जेहिं दीन्है । उचित न तासु निरादरु कीन्है
लागहिं कुमुख बचन सुभ कैसे । मगहँ गयादिक तीरथ जैसे ॥
रामहि मातु बचन सब भाए । जिमि सुरसरि गत सलिल सुहाए
दो०—गइ मुरुछा रामहि सुमिरि नृप फिरि करवट लीन्ह ।

सचिव राम आगमन कहि विनय समय सम कीन्ह ॥४३॥

अवनिप अकनि रामु पगु धारे । धरि धीरजु तब नयन उधारे ॥
सचिवँ सँभारि राउ बैठारे । चरन परत नृप रामु निहारे ॥
लिए सनेह बिकल उर लाई । गै मनि मनहुँ फनिक फिरि पाई
रामहि चितइ रहेउ नरनाहू । चला बिलोचन बारि प्रवाहू ॥
सोक विवस कछु कहै न पारा । हृदयँ लगावत बारहिं बारा ॥
बिधिहि मनाव राउ मन माहीं । जेहिं रघुनाथ न कानन जाहीं ॥

सुमिरि महेसहि कहइ निहोरी । बिनती सुनहु सदासिव मोरी ॥

आसुतोष तुम्ह अवढर दानी । आरति हरहु दीन जनु जानी ॥

दो०—तुम्ह प्रेरक सब के हृदयँ सो मति रामहि देहु ।

बचनु मोर तजि रहहिं घर परिहरि सीलु सनेहु ॥४४॥

अजसु होउ जग सुजसु नसाऊ । नरक परौं बरु सुरपुरु जाऊ ॥

सब दुख दुसह सहावहु मोही । लोचन ओट रामु जनि होंही ॥

अस मन गुनइ राउ नहिं बोला । पीपर पात सरिस मनु डोला ॥

रघुपति पितहि प्रेमबस जानी । पुनि कछु कहिहि मातु अनुमानी ॥

देस काल अवसर अनुसारी । बोले बचन बिनित बिचारी ॥

तात कहउँ कछु करउँ ढिठाई । अनुचितु छमव जानि लरिकारै ॥

अतिलघु बात लागि दुखु पावा । काहुँ न मोहि कहि प्रथम जनावा ॥

देखि गोसाईंहि पूँछिउँ माता । सुनि प्रसंगु भए सीतल गाता ॥

दो०—मंगल समय सनेह बस सोच परिहरिअ तात ।

आयसु देइअ हरषि हियँ कहि पुलके प्रभु गात ॥४५॥

धन्य जनसु जगतीतल तासू । पितहि प्रमोदु चरित सुनि जासू ॥

चारि पदारथ करतल ताकैं । प्रिय पितु मातु प्रान सम जाकैं ॥

आयसु पालि जनम फलु पाई । ऐहउँ बेगिहिं होउ रजाई ॥

बिदा मातु सन आवउँ मागी । चलिहउँ बनहि बहुरि पग लागी ॥

अस कहि राम गवनु तब कीन्हा । भूप सोक बस उतरु न दीन्हा ॥

नगर व्यापि गइ बात सुतीछी । छुअत चट्टी जनु सब तन बीछी ॥

सुनि भए विकल सकल नर नारी । बेलि बिटप जिमि देखि दवारी
जो जहँ सुनइ धुनइ सिरु सोई । बड़ बिषादु नहिं धीरजु होई ॥

दो०—मुख सुखाहिं लोचन स्रवहिं सोकु न हृदयँ समाइ ।

मनहुँ करुन रस कटकई उतरी अवध बजाइ ॥४६॥

मलेहि माझ बिधि बात बेगारी । जहँ तहँ देहिं कैकइहि गारी ॥

एहि पापिनिहि बूझि का परेऊ । छाइ भवन पर पावकु धरेऊ ॥

निज कर नयन काढ़ि चह दीखा । डारि सुधा बिषु चाहत चीखा ॥

कुटिल कठोर कुबुद्धि अभागी । भइ रघुवंस बेनु बन आगी ॥

पालव बैठि पेड़ु एहिं काटा । सुख महुँ सोक ठाढ़ धरि ठाटा ॥

सदा रामु एहि प्रान समाना । कारन कवन कुटिलपनु ठाना ॥

सत्य कहहिं कबि नारि सुभाऊ । सब बिधि अगहु अगाध दुराऊ

निज प्रतिबिंबु बरुकु गहि जाई । जानि न जाइ नारि गति भाई ॥

दो०—काह न पावकु जारि सक का न समुद्र समाइ ।

का न करै अबला प्रबल केहि जग कालु न खाइ ॥४७॥

का सुनाइ बिधि काह सुनावा । का देखाइ चह काह देखावा ॥

एक कहहिं भल भूप न कीन्हा । बरु बिचारि नहिं कुमतिहि दीन्हा

जो हठि भयउ सकल दुख भाजनु । अबला बिबस ग्यानु गुनु गा जनु ॥

एक धरम परमिति पहिचाने । नृपहि दोसु नहिं देहिं सयाने ॥

सिबि दधीचि हरिचंद कहानी । एक एक सन कहहिं बखानी ॥

एक भरत कर संमत कहहीं । एक उदास भायँ सुनि रहहीं ॥

कान मूदि कर रद गहि जीहा । एक कहहिं यह बात अलीहा ॥
 सुकृत जाहिं अस कहत तुम्हारे । रामु भरत कहुं प्रानपिआरे ॥
 दो०—चंदु चवै बरु अनल कन सुधा होइ बिषतूल ।

सपनेहुं कबहुं न करहिं किछु भरतु राम प्रतिकूल ॥४८॥

एक बिधातहि दूषनु देहीं । सुधा देखाइ दीन्ह बिषु जेहीं ॥
 खरभरु नगर सोचु सब काहू । दुसह दाहु उर मिटा उछाहू ॥
 बिप्रबधू कुलमान्य जठेरी । जे प्रिय परम कैकई केरी ॥
 लगीं देन सिख सीलु सराही । वचन बानसम लागहिं ताही ॥
 भरतु न मोहि प्रिय राम समाना । सदा कहहु यहु सबु जगु जाना ॥
 करहु राम पर सहज सनेहू । केहिं अपराध आजु वनु देहू ॥
 कबहुं न कियहु सवति आरेसू । प्रीति प्रतीति जान सबु देसू ॥
 कौसल्याँ अब काह बिगारा । तुम्ह जेहि लागि बज्र पुर पारा ॥
 दो०—सीय कि पिय सँगु परिहरिहि लखनु कि रहिहहिं धाम ।

राजु कि भूँजब भरत पुर नृपु कि जिइहि बिनु राम ॥४९॥

अस बिचारि उर छाड़हु कोहू । सोक कलंक कोठि जनि होहू ॥
 भरतहि अवसि देहु जुवराजू । कानन काह राम कर काजू ॥
 नाहिन रामु राज के भूखे । धरम धुरीन बिषय रस रूखे ॥
 गुर गृह बसहुं रामु तजि गेहू । नृप सन अस बरु दूसर लेहू ॥
 जौ नहिं लगिहहु कहें हमारे । नहिं लागिह किछु हाथ तुम्हारे ॥
 जौ परिहास कीन्हि कछु होई । तौ कहि प्रगट जनावहु सोई ॥

राम सरिस सुत कानन जोगू । काह कहिहि सुनि तुम्ह कहूँ लोगू
उठहु बेगि सोइ करहु उपाई । जेहि विधि सोकु कलंकु नसाई ॥

छं०—जेहि भाँति सोकु कलंकु जाइ उपाय करि कुल पालही ।

हठि फेरु रामहि जात बन जनि बात दूसरि चालही ॥

जिमि भानु बिनु दिनु प्रान बिनु तनु चंद बिनु जिमि जामिनी ।

तिमि अवध तुलसीदास प्रभु बिनु समुद्धि धौं जियँ भामिनी ॥

सो०—सखिन्ह सिखावनु दीन्ह सुनत मधुर परिनाम हित ।

तेई कछु कान न कीन्ह कुटिल प्रबोधी कूबरी ॥५०॥

उतरु न देइ दुसह रिस रूखी । मृगिन्ह चितव जनु बाधिनि भूखी

व्याधि असाधि जानि तिन्ह त्यागी । चलीं कहत मतिमंद अभागी ॥

राजु करत यह दैअँ विगोई । कीन्हेसि अस जस करइ न कोई ॥

एहि विधि विलपहिं पुर नर नारीं । देहिं कुचालिहि कोटिक गारीं ॥

जरहिं विषम जर लेहिं उसासा । कवनि राम बिनु जीवन आसा ॥

बिपुल ब्रियोग प्रजा अकुलानी । जनु जलचर गन सूखत पानी ॥

अति विषाद बस लोग लोगार्ई । गए मातु पहिं रामु गोसार्ई ॥

मुख प्रसन्न चित चौगुन चाऊ । मिटा सोचु जनि राखै राऊ ॥

दो०—नव गयंदु रघुवीर मनु राजु अलान समान ।

छूट जानि बन गवनु सुनि उर अनंदु अधिकान ॥५१॥

रघुकुलतिलक जोरि दोउ हाथा । मुदित मातु पद नायउ माया ॥

दीन्हि असीस लाइ उर लीन्हे । भूषन बसन निछावरि कीन्हे ॥

बार बार सुख चुंवति माता । नयन नेह जलु पुलकित गाता ॥
 गोद राखि पुनि हृदयँ लगाए । सवत प्रेमरस पयद सुहाए ॥
 प्रेमु प्रमोदु न कछु कहि जाई । रंक धनद पदवी जनु पाई ॥
 सादर सुंदर बदनु निहारी । बोली मधुर बचन महतारी ॥
 कहहु तात जननी बलिहारी । कवेहिँ लगन मुद मंगलकारी ॥
 सुकृत सील सुख सीव सुहाई । जनम लाभ कइ अवधि अघाई ॥
 दो०—जेहि चाहत नर नारि सब अति आरत एहि भँति ।

जिमि चातक चातकि तृषित वृष्टि सरद रितु स्वाति ॥५२॥

तात जाउँ बलि बेगि नहाहू । जो मन भाव मधुर कछु खाहू ॥
 पितु समीप तब जाएहु मैआ । भइ बड़ि बार जाइ बलि मैआ ॥
 मातु बचन सुनि अति अनुकूला । जनु सनेह सुरतरु के फूला ॥
 सुख मकरंद भरे श्रियमूला । निरखि राम मनु भवँरु न भूला ॥
 धरम धुरीन धरम गति जानी । कहेउ मातु सन अति मृदु बानी ॥
 पिताँ दीन्ह मोहि कानन राजू । जहँ सब भँति मोर बड़ काजू ॥
 आयसु देहि मुदित मन माता । जेहिँ मुद मंगल कानन जाता ॥
 जनि सनेह बस डरपसि भोरें । आनँदु अंब अनुग्रह तोरें ॥
 दो०—बरष चारिदस बिपिन बसि करि पितु बचन प्रमान ।

आइ पाय पुनि देखिहउँ मनु जनि करसि मलान ॥५३॥

बचन बिनीत मधुर रघुबर के । सर सम लगे मातु उर करके ॥

कहि न जाइ कछु हृदय विषादू । मनहुँ मृगी सुनि केहरि नादू ॥
नयन सजल तन थर थर काँपी । माजहि खाइ मीन जनु मापी ॥
धरि धीरजु सुत बदन नु निहारी । गदगद बचन कहति महतारी ॥
तात पितहि तुम्ह प्रानपिआरे । देखि मुदित नित चरित तुम्हारे ॥
राजु देन कहुँ सुभ दिन साधा । कहेउ जान बन केहि अपराधा ॥
तात सुनावहु मोहि निदानू । को दिनकर कुल भयउ कृसानू ॥

दो०—निरखि राम रुख सचिवसुत कारनु कहेउ बुझाइ ।

सुनि प्रसंगु रहि मूक जिमि दसा बरनि नहि जाइ ॥५४॥

राखि न सकइ न कहि सक जाहू । दुहूँ भाँति उर दारुन दाहू ॥
लिखत सुधाकर गा लिखि राहू । विधि गति वाम सदा सब काहू ॥
धरम सनेह उभयँ मति घेरी । भइ गति साँप छुछुंदरि केरी ॥
राखउँ सुतहि करउँ अनुरोधू । धरमु जाइ अरु बंधु विरोधू ॥
कहउँ जान बन तौ बड़ि हानी । संकट सोच विवस भइ रानी ॥
बहुरि समुझि तिय धरमु सयानी । रामु भरतु दोउ सुत सम जानी ॥
सरल सुभाउ राम महतारी । बोली बचन धीर धरि भारी ॥
तात जाउँ बलि कीन्हेहु नीका । पितु आयसु सब धरमक टीका ॥

दो०—राजु देन कहि दीन्ह बन मोहि न सो दुख लेसु ।

तुम्ह बिनु भरतहि भूपतिहि प्रजहि प्रचंड कलेसु ॥५५॥

जौं केवल पितु आयसु ताता । तौ जनि जाहु जानि बड़ि माता ॥

जौं पितु मातु कहेउ बन जाना । तौ कानन सत अवध समाना ॥

पितु बनदेव मातु बनदेवी । खग मृग चरन सरोरुह सेवी ॥
 अंतहुँ उचित नृपहि बनवासू । वय बिलोकि हियँ होइ हराँसू ॥
 बड़भागी बन अवध अभागी । जो रघुवंसतिलक तुम्ह त्यागी ॥
 जौं सुत कहौ संग मोहि लेहू । तुम्हरे हृदयँ होइ संदेहू ॥
 पूत परम प्रिय तुम्ह सबही के । प्रान प्रान के जीवन जी के ॥
 ते तुम्ह कहहु मातु बन जाऊँ । मै सुनि वचन बैठि पछिताऊँ ॥
 दो०—यह बिचारि नहिँ करउँ हठ झूठ सनेहु बड़ाइ ।

मानि मातु कर नात बलि सुरति बिसरि जनि जाइ ॥५६॥

देव पितर सब तुम्हहि गोसाईं । राखहुँ पलक नयन की नाई ॥
 अवधि अंबु प्रिय परिजन मीना । तुम्ह करुनाकर धरम धुरीना ॥
 अस बिचारि सोइ करहु उपाई । सबहि जिअत जेहिँ भेंटहु आई ॥
 जाहु सुखेन बनहि बलि जाऊँ । करि अनाथ जन परिजन गाऊँ ॥
 सब कर आजु सुकृत फल बीता । भयउ कराल कालु विपरीता ॥
 बहुबिधि बिलपि चरन लपटानी । परम अभागिनि आपुहि जानी ॥
 दारुन दुसह दाहु उर व्यापा । बरनि न जाहिँ बिलाप कलापा ॥
 राम उठाइ मातु उर लाई । कहि मृदु वचन बहुरि समुझाई ॥
 दो०—समाचार तेहि समय सुनि सीय उठी अकुलाइ ।

जाइ सासु पद कमल जुग बंदि बैठि सिरु नाइ ॥५७॥

दीन्हि असीस सासु मृदु बानी । अति सुकुमारि देखि अकुलानी ॥

CC-0. नैलिनामिबसुखसोजतिगीबान, सख रामि पति मेस सुवीर ॥

चलन चहत बन जीवननाथू । केहि सुकृती सन होइहि साथू ॥
 की तनु प्रान कि केवल प्राना । विधि करतबु कछु जाइ न जाना
 चारु चरन नख लेखति धरनी । नूपुर मुखर मधुर कवि बरनी ॥
 मनहुँ प्रेम बस बिनती करहीं । हमहि सीय पद जनि परिहरहीं ॥
 मंजु बिलोचन मोचति बारी । बोली देखि राम महतारी ॥
 तात सुनहु सिय अति सुकुमारी । सास ससुर परिजनहि पिआरी ॥
 दो०—पिता जनक भूपाल मनि ससुर भानुकुल भानु ।

पति रविकुल कैरव बिपिन बिधु गुन रूप निधानु ॥५८॥

मैं पुनि पुत्रबधू प्रिय पाई । रूप रासि गुन सील सुहाई ॥
 नयन पुतरि करि प्रीति बढ़ाई । राखेउँ प्रान जानकिहिं लाई ॥
 कलपवेलि जिमि बहुविधि लाली । सींचि सनेह सलिल प्रतिपाली ॥
 फूलत फलत भयउ विधि वामा । जानि न जाइ काह परिनामा ॥
 पलंग पीठ तजि गोद हिंडोरा । सियँ न दीन्ह पगु अवनि कठोरा
 जिअनमूरि जिमि जोगवत रहऊँ । दीप बाति नहिं टारन कहऊँ ॥
 सोइ सिय चलन चहति बन साथी । आयसु काह होइ रघुनाथा ॥
 चंद किन्नर रस रसिक चकोरी । रवि रुख नयन सकइ किमि जोरी
 दो०—करि केहरि निसिचर चरहिं दुष्ट जंतु बन भूरि ।

बिष बाटिकाँ कि सोह सुत सुभग सजीवनि मूरि ॥५९॥

बन हित कोल किरात किसोरी । रचीं बिरंचि बिषय सुख भोरी ॥
 पाहन कृमि जिमि कठिन सुभाऊ । तिन्हहि कलेसु न कानन काऊ ॥

कै तापस तिय कानन जोगू । जिन्ह तप हेतु तजा सब भोगू ॥
 सिय बन बसिहि तात केहि भाँती । चित्रलिखित कपि देखि डेराती
 सुरसर सुभग बनज बन चारी । डावर जोगु कि हंसकुमारी ॥
 अस विचारि जस आयसु होई । मैं सिख देउँ जानकिहि सोई ॥
 जौ सिय भवन रहै कह अंबा । मोहि कहँ होइ बहुत अवलंबा ॥
 सुनि रघुवीर मातु प्रिय बानी । सील सनेह सुधौं जनु सानी ॥
 दो०—कहि प्रिय बचन बिबेकमय कीन्हि मातु परितोष ।

लगे प्रबोधन जानकिहि प्रगटि बिपिन गुन दोष ॥६०॥

मासपारायण, चौदहवाँ विश्राम

मातु समीप कहत सकुचाहीं । बोले समउ समुझि मन माहीं ॥
 राजकुमारि सिखावनु सुनहू । आन भाँति जियँ जनि कछु गुनहू
 आपन मोर नीक जौं चहहू । बचनु हमार मानि गृह रहहू ॥
 आयसु मोर सासु सेवकाई । सब विधि भामिनि भवन भलाई ॥
 एहि ते अधिक धरमु नहिँ दूजा । सादर सासु ससुर पद पूजा ॥
 जब जब मातु करिहि सुधि मोरी । होइहि प्रेम विकल मति भोरी ॥
 तब तब तुम्ह कहि कथा पुरानी । सुंदरि समुझाएहु मृदु बानी ॥
 कहउँ सुभायँ सपथ सत मोही । सुमुखि मातु हित राखउँ तोही ॥
 दो०—गुर श्रुति संमत धरम फलु पाइअ बिनहिँ कलेस ।

हठ बस सब संकट सहे गालव नहुष नरेस ॥६१॥

दिवस जात नहिं लागिहि बारा । सुंदरि सिखवनु सुनहु हमारा ॥
 जौं हठ करहु प्रेम बस बामा । तौ तुम्ह दुखु पाउव परिनामा ॥
 काननु कठिन भयंकर भारी । घोर घामु हिम बारि बयारी ॥
 कुस कंटक मग काँकर नाना । चलव पयादेहिं विनु पदत्राना ॥
 चरन कमल मृदु मंजु तुम्हारे । मारग अगम भूमिधर भारे ॥
 कंदर खोह नदीं नद नारे । अगम अगाध न जाहिं निहारे ॥
 भालु बाघ वृक केहरि नागा । करहिं नाद सुनि धीरजु भागा ॥
 दो०—भूमि सयन बलकल बसन असनु कंद फल मूल ।

ते कि सदा सब दिन मिलहिं सबुइ समय अनुकूल ॥६२॥

नर अहार रजनीचर चरहीं । कपट वेष विधि कोटिक करहीं ॥
 लागइ अति पहार कर पानी । विपिन विपति नहिं जाइ बखानी ॥
 ब्याल कराल बिहग बन घोरा । निसिचर निकर नारि नर चोरा ॥
 डरपहिं धीर गहन सुधि आएँ । मृगलोचनि तुम्ह भीरु सुभाएँ ॥
 हंसगवनि तुम्ह नहिं बन जोगू । सुनि अपजसु मोहि देइहि लोगू ॥
 मानस सलिल सुधाँ प्रतिपाली । जिअइ कि लवन पयोधि मराली ॥
 नव रसाल बन बिहरनसीला । सोह कि कोकिल विपिन करीला ॥
 रहहु भवन अस हृदयँ विचारी । चंदबदनि दुखु कानन भारी ॥

दो०—सहज सुहृद गुर स्वामि सिख जो न करइ सिर मानि ।

सो पछिताइ अघाइ उर अवसि होइ हित हानि ॥६३॥

सुनि मृदु वचन मनोहर पिय के । लोचन ललित भरे जल सिय के ॥

सीतल सिख दाहक भइ कैसैं । चकइहि सरद चंद निसि जैसैं ॥
 उतरु न आव विकल बैदेही । तजन चहत सुचि स्वामि सनेही ॥
 बरबस रोकि बिलोचन बारी । धरि धीरजु उर अवनिकुमारी ॥
 लागि सासु पग कह कर जोरी । छमवि देवि बड़ि अविनय मोरी ॥
 दीन्हि प्रानपति मोहि सिख सोई । जेहि विधि मोर परम हित होई ॥
 मैं पुनि समुझि दीखि मन माहीं । पिय वियोग सम दुखु जग नाहीं ॥

श्लो०—प्राननाथ करुनायतन सुंदर सुखद सुजान ।

तुम्ह बिनु रघुकुल कुमुद बिधु सुरपुर नरक समान ॥६४॥

मातु पिता भगिनी प्रिय भाई । प्रिय परिवारु सुहृद समुदाई ॥
 सासु ससुर गुर सजन सहाई । सुत सुंदर सुसील सुखदाई ॥
 जहँ लगि नाथ नेह अरु नाते । पिय बिनु तियहि तरनिहु ते ताते ॥
 तनु धनु धामु धरनि पुर राजू । पति बिहीन सबु सोक समाजू ॥
 भोग रोगसम भूषन भारू । जम जातना सरिस संसारू ॥
 प्राननाथ तुम्ह बिनु जग माहीं । मो कहूँ सुखद कतहुँ कछु नाहीं ॥
 जिय बिनु देह नदी बिनु बारी । तैसिअ नाथ पुरुष बिनु नारी ॥
 नाथ सकल सुख साथ तुम्हारें । सरद विमल बिधु वदनु निहारें ॥

श्लो०—खग मृग परिजन नगरुवनु बलकल विमल दुकूल ।

नाथ साथ सुरसदन सम परनसाल सुखमूल ॥६५॥

बनदेवीं बनदेव उदारा । करिहहिं सासु ससुर सम सारा ॥

कुस किसलय साथरी सुहाई । प्रभु सँग मंजु मनोज तुराई ॥

कंद मूल फल अमिअ अहारू । अवध सौध सत सरिस पहारू ॥
 छिनु छिनु प्रभु पद कमल बिलोकी । रहिहउँ मुदित दिवस जिमि कोकी ॥
 बन दुख नाथ कहे बहुतेरे । भय विषाद परिताप घनेरे ॥
 प्रभु बियोग लवलेस समाना । सब मिलि होहिं न कृपानिधाना ॥
 अस जियँ जानि सुजान सिरोमनि । लेइअ संग मोहि छाड़िअ जनि ॥
 बिनती बहुत करौं का स्वामी । करुनामय उर अंतरजामी ॥

श्लो०—राखिअ अवध जो अवधि लागि रहत न जनिअहिं प्रान ।

दीनबंधु सुंदर सुखद सील सनेह निधान ॥६६॥

मोहि मग चलत न होइहि हारी । छिनु छिनु चरन सरोज निहारी ॥
 सबहि भाँति पिय सेवा करिहौं । मारग जनित सकल श्रम हरिहौं ॥
 पाय पखारि बैठि तरु छाहीं । करिहउँ बाउ मुदित मन माहीं ॥
 भ्रम कन सहित स्याम तनु देखें । कहँ दुख समउ प्रानपति पेखें ॥
 सम महि तृन तरु पल्लव डासी । पाय पलोटिहि सब निसि दासी ॥
 बार बार मृदु मूरति जोही । लागिहि तात बयारि न मोही ॥
 को प्रभु संग मोहि चितवनिहारा । सिंधवधुहि जिमि ससक सिआरा
 मैं सुकुमारि नाथ बन जोगू । तुम्हहि उचित तप मो कहूँ भोगू ॥

श्लो०—ऐसेउ बचन कठोर सुनि जौं न हृदउ बिलगान ।

तौ प्रभु बिषम बियोग दुख सहिहहिं पावँर प्रान ॥६७॥

अस कहि सीय विकल भइ भारी । बचन बियोगु न सकी सँभारी ॥
 देखि दसा रघुपति जियँ जाना । हठि राखें नहिं राखिहि प्राना ॥

कहेउ कृपाल भानुकुल नाथा । परिहरि सोचु चलहु वन साथा ॥
 नहिं बिषाद कर अवसरु आजू । बेगि करहु वन गवन समाजू ॥
 कहि प्रिय वचन प्रिया समुझाई । लगे मातु पद आसिष पाई ॥
 बेगि प्रजा दुख मेटव आई । जननी निठुर बिसरि जनि जाई ॥
 फिरिहि दसा विधि बहुरि कि मोरी । देखिहउँ नयन मनोहर जोरी
 सुदिन सुघरी तात कव होइहि । जननी जिअत वदन बिधु जोइहि
 दो०—बहुरि बच्छ कहि लालु कहि रघुपति रघुबर तात ।

कबहिं बोलाइ लगाइ हियँ हरषि निरखिहउँ गात ॥६८॥

लखि सनेह कातरि महतारी । वचनु न आव बिकल भइ भारी ॥
 राम प्रबोधु कीन्ह विधि नाना । समउ सनेहु न जाइ बखाना ॥
 तब जानकी सासु पग लागी । सुनिअ माय मैं परम अभागी ॥
 सेवा समय दैअँ वनु दीन्ह । मोर मनोरथु सफल न कीन्ह ॥
 तजव छोभु जनि छाड़िअ छोहू । करसु कठिन कछु दोसु न मोहू ॥
 सुनि सिय वचन सासु अकुलानी । दसा कवनि विधि कहौ बखानी
 बारहिं बार लाइ उर लीन्ही । धरि धीरजु सिख आसिष दीन्ही ॥
 अचल होउ अहिवातु तुम्हारा । जब लगि गंग जमुन जल धारा ॥

दो०—सीतहि सासु असीस सिख दीन्हि अनेक प्रकार ।

चली नाइ पद पदुम सिरु अति हित बारहिं बार ॥६९॥

समाचार जब लछिमन पाए । व्याकुल विलख वदन उठि धाए ॥
 कंप पुलक तन नयन सनीरा । गहे चरन अति प्रेम अधीरा ॥

कहि न सकत कछु चितवत ठाढ़े । मीनु दीन जनु जल तें काढ़े ॥
 सोचु हृदयँ विधि का होनिहारा । सबु सुख सुकृतु सिरान हमारा ॥
 सो कहूँ काह कहव रघुनाथा । रखिहहिं भवन कि लेहहिं साथा ॥
 राम बिलोकि बंधु कर जोरें । देह गोह सब सन तृनु तोरें ॥
 बोले बचनु राम नय नागर । सील सनेह सरल सुख सागर ॥
 तात प्रेम बस जनि कदराहू । समुझि हृदयँ परिनाम उछाहू ॥
 दो०—मातु पिता गुरु स्वामि सिख सिर धरि करहिं सुभायँ ।

लहेउ लाभु तिन्ह जनम कर नतरु जनमु जग जायँ ॥७०॥

अस जियँ जानि सुनहु सिख भाई । करहु मातु पितु पद सेवकाई ॥
 भवन भरतु रिपुसूदन नहिं । राउ बृद्ध मम दुखु मन माहीं ॥
 मैं बन जाउँ तुम्हहि लेइ साथा । होइ सबहि विधि अवध अनाथा ॥
 गुरु पितु मातु प्रजा परिवारू । सब कहूँ परइ दुसह दुख भारू ॥
 रहहु करहु सब कर परितोषू । नतरु तात होइहि बड़ दोषू ॥
 जासु राज प्रिय प्रजा दुखारी । सो नृपु अवसि नरक अधिकारी ॥
 रहहु तात असि नीति विचारी । सुनत लखनु भए व्याकुल भारी ॥
 सिअरें बचन सूखि गए कैसैं । परसत तुहिन तामरसु जैसैं ॥

दो०—उतरु न आवत प्रेम बस गहे चरन अकुलाइ ।

नाथ दासु मैं स्वामि तुम्ह तजहु त काह बसाइ ॥७१॥

दीन्ह मोहि सिख नीकि गोसाईं । लागि अगम अपनी कदराई ॥
 नरवर धीर धरम धुर धारी । निगम नीति कहूँ ते अधिकारी ॥

भैं सिसु प्रभु सनेहँ प्रतिपाला । मंदरु मेरु कि लेहिं मराला ॥
 गुर पितु मातु न जानउँ काहू । कहउँ सुभाउ नाथ पतिआहू ॥
 जहँ लगि जगत सनेह सगाई । प्रीति प्रतीति निगम निजु गाई ॥
 मोरें सबइ एक तुम्ह स्वामी । दीनबंधु उर अंतरजामी ॥
 धरम नीति उपदेसिअ ताही । कीरति भूति सुगति प्रिय जाही ॥
 मन क्रम बचन चरन रत होई । कृपासिंधु परिहरिअ कि सोई ॥
 दो०—करुनासिंधु सुबंधु के सुनि मृदु बचन बिनीत ।

समुझाए उर लाइ प्रभु जानि सनेहँ समीत ॥७२॥

मागहु बिदा मातु सन जाई । आवहु बेगि चलहु बन भाई ॥
 मुदित भए सुनि रघुबर बानी । भयउ लाभ बड़ गइ बड़ि हानी ॥
 हरषित हृदयँ मातु पहिं आए । मनहुँ अंध फिरि लोचन पाए ॥
 जाइ जननि पग नायउ माथा । मनु रघुनंदन जानकि साथ ॥
 पूछे मातु मलिन मन देखी । लखन कही सब कथा विसेषी ॥
 गई सहमि सुनि बचन कठोरा । मृगी देखि दव जनु चहु ओरा ॥
 लखन लखेउ भा अनरथ आजू । एहिं सनेह बस करव अकाजू ॥
 मागत बिदा सभय सकुचाहीं । जाइ संग बिधि कहिहि कि नाही ॥
 दो०—समुझि सुमित्राँ राम सिय रूपु सुसीलु सुभाउ ।

नृप सनेहु लखि धुनेउ सिरु पापिनि दीन्ह कुदाउ ॥७३॥

घोरजु धरेउ कुअवसर जानी । सहज सुहृद बोली मृदु बानी ॥

ताव तुम्हारि मातु बैदेही । पिता राम सब भूति सनेही ॥

अवध तहाँ जहँ राम निवासू । तहँई दिवसु जहँ भानु प्रकासू ॥
जौँ पै सीय रामु बन जाहीं । अवध तुम्हार काजु कछु नाहीं ॥
गुर पितु मातु बंधु सुर साईँ । सेइअहिं सकल प्रान की नाईँ ॥
रामु प्रानप्रिय जीवन जी के । स्वारथ रहित सखा सबही के ॥
पूजनीय प्रिय परम जहाँ तैं । सब मानिअहिं राम के नातैं ॥
अस जियँ जानि संग बन जाहू । लेहु तात जग जीवन लाहू ॥

दो०—भूरि भाग भाजनु भयहु मोहि समेत बलि जाउँ ।

जौँ तुम्हरेँ मन छाड़ि छलु कीन्ह राम पद ठाउँ ॥७४॥
पुत्रवती जुवती जग सोई । रघुपति भगतु जासु सुतु होई ॥
नतरु बाँझ भलि वादि बिआनी । राम विमुख सुत तैं हित जानी ॥
तुम्हरेहिं भाग रामु बन जाहीं । दूसर हेतु तात कछु नाहीं ॥
सकल सुकृत कर बड़ फलु एहू । राम सीय पद सहज सनेहू ॥
रागु रोषु इरिषा मदु मोहू । जनि सपनेहुँ इन्ह के बस होहू ॥
सकल प्रकार बिकार बिहाई । मन क्रम वचन करेहु सेवकाई ॥
तुम्ह कहूँ बन सब भाँति सुपासू । सँग पितु मातु रामु सिय जासू ॥
जेहिं न रामु बन लहहिं कलेसू । सुत सोइ करेहु इहइ उपदेसू ॥

छं०—उपदेसु यहु जेहिं तात तुम्हरे राम सिय सुख पावहीं ।

पितु मातु प्रिय परिवार पुर सुख सुरति बन बिसरावहीं ॥

तुलसी प्रभुहि सिख देइ आयसु दीन्ह पुनि आसिष दई ।

रति होउ अबिरल अमल सिय रघुबीर पद नित नित नई ॥

सो०—सातु चरन सिरु नाइ चले तुरत संकित हृदयँ ।

बागुर विषम तोराइ मनहुँ भाग सृगु भाग बस ॥७५॥

गए लखनु जहँ जानकिनाथू । मे मन मुदित पाइ प्रिय साथू ॥
 बंदि राम सिय चरन सुहाए । चले संग नृपमंदिर आए ॥
 कहहिं परसपर पुर नर नारी । भलि बनाइ विधि बात विगारी ॥
 तन कृस मन दुखु बदन मलीने । विकल मनहुँ माखी मधु छीने ॥
 कर मीजहिं सिरु धुनि पछिताहीं । जनु विनु पंख बिहग अकुलाहीं ॥
 भइ बड़ि भीर भूप दरबारा । बरनि न जाइ विषादु अपारा ॥
 सचिवँ उठाइ राउ बैठारे । कहि प्रिय वचन रामु पगु धारे ॥
 सिय समेत दोउ तनय निहारी । व्याकुल भयउ भूमिपति भारी ॥
 दो०—सीय सहित सुत सुभग दोउ देखि देखि अकुलाइ ।

बारहिं बार सनेह बस राउ लेइ उर लाइ ॥७६॥

सकइ न बोलि विकल नरनाहू । सोक जनित उर दारुन दाहू ॥
 नाइ सीसु पद अति अनुरागा । उठि रघुवीर विदा तव मागा ॥
 पितु असीस आयसु मोहि दीजै । हरष समय विसमउ कत कीजै ॥
 तात किँ प्रिय प्रेम प्रमादू । जसु जग जाइ होइ अपवादू ॥
 सुनि सनेह बस उठि नरनाहँ । बैठारे रघुपति गहि बाहाँ ॥
 सुनहु तात तुम्ह कहँ सुनि कहहीं । रामु चराचर नायक अहहीं ॥
 सुभ अरु असुभ करम अनुहारी । ईसु देइ फल हृदयँ विचारी ॥

करइ जो करम पाव फल सोई । निगम नीति अहि कह समु कोई ॥

दो०—और करै अपराधु कोउ और पाव फल भोगु ।

अति बिचित्र भगवंत गति को जग जानै जोगु ॥७७॥

रायँ राम राखन हित लागी । बहुत उपाय किए छलु त्यागी ॥
लखी राम रुख रहत न जाने । धरम धुरंधर धीर सयाने ॥
तब नृप सीय लाइ उर लीन्ही । अति हित बहुत भाँतिसिख दीन्ही
कहिवन के दुख दुसह सुनाए । सासु ससुर पितु सुख समझाए ॥
सिय मनु राम चरन अनुरागा । घर न सुगमु बनु बिषमु न लागा ॥
औरउ सबहिं सीय समझाई । कहि कहि बिपिन बिपति अधिकाई
सचिव नारि गुर नारि सयानी । सहित सनेह कहहिं मृदु बानी ॥
तुम्ह कहूँ तौ न दीन्ह बनवासू । करहु जो कहहिं ससुर गुर सासू ॥

दो०—सिख सीतलि हित मधुर मृदु सुनि सीतहि न सोहानि ।

सरद चंद चंदिनि लगत जनु चकई अकुलानि ॥७८॥

सीय सकुच बस उतर न देई । सो सुनि तमकि उठी कैकेई ॥
मुनि पट भूषन भाजन आनी । आगें धरि बोली मृदु बानी ॥
नृपहि प्रानप्रिय तुम्ह रघुवीरा । सील सनेह न छाड़िहि भीरा ॥
सुकृत सुजसु परलोकु नसाऊ । तुम्हहि जानवन कहिहि न काऊ ॥
अस बिचारि सोइ करहु जो भावा । राम जननि सिख सुनि सुख पावा
भूपहि बचन बानसम लागे । करहिं न प्रान पयान अभागे ॥
लोग विकल मुरुछित नरनाहू । काह करिअ कछु सूझ न काहू ॥

राम वरत सुनि वेष बनाई । चले जनक जननिहि सिरु नाई ॥

दो०—सजि बन साजु सम्राजु सबु बनिता बंधु समेत ।

बंदि बिप्र गुर चरन प्रभु चले करि सबहि अचेत ॥७९॥

निकसि बसिष्ठ द्वार भए ठाढ़े । देखे लोग विरह दव दाढ़े ॥

कहि प्रिय बचन सकल समुझाए । बिप्र बृंद रघुवीर बोलाए ॥

गुर सन कहि बरषासन दीन्हे । आदर दान विनय बस कीन्हे ॥

जाचक दान मान संतोषे । मीत पुनीत प्रेम परितोषे ॥

दासी दास बोलाइ बहोरी । गुरहि सौं पि बोले कर जोरी ॥

सब कै सार सँभार गोसाईं । करबि जनक जननी की नाई ॥

बारहिं बार जोरि जुग पानी । कहत रामु सब सन मृदु बानी ॥

सोइ सब भाँति मोर हितकारी । जेहि तैं रहै भुआल सुखारी ॥

दो०—मातु सकल मोरे बिरहैं जेहिं न होहिं दुख दीन ।

सोइ उपाउ तुम्ह करेहु सब पुर जन परम प्रवीन ॥८०॥

एहि विधि राम सबहि समुझावा । गुर पद पदुम हरषि सिरु नावा ॥

गनपति गौरि गिरीसु मनाई । चले असीस पाइ रघुराई ॥

राम चलत अति भयउ बिप्रादू । सुनि न जाइ पुर आरत नादू ॥

कुसगुन लंक अवध अति सोकू । हरष बिषाद बिबस सुरलोकू ॥

गइ मुरुछा तब भूपति जागे । बोलि सुमंत्रु कहन अस लागे ॥

रामु चले बन प्रान न जाहीं । केहि सुख लागि रहत तन माहीं ॥

एहि तैं कवन न्यथा बलवाना । जो दुखु पाइ तजहिं तनु प्राना ॥

पुनि धरि धीर कहइ नरनाह । लै रथ संग सखा तुम्ह जाह ॥

दो०—सुठि सुकुमार कुमार दोउ जनकसुता सुकुमारि ।

रथ चढ़ाइ देखराइ बनु फिरेहु गएँ दिन चारि ॥८१॥

जौं नहिं फिरहिं धीर दोउ भाई । सत्यसंध दृढ़व्रत रघुराई ॥
तौ तुम्ह विनय करेहु कर जोरी । फेरिअ प्रभु मिथिलेस किसोरी ॥
जब सिय कानन देखि डेराई । कहेहु मोरि सिख अवसरु पाई ॥
सासु ससुर अस कहेउ सँदेसू । पुत्रि फिरिअ बन बहुत कलेसू ॥
पितुगृह कबहुँ कबहुँ ससुरारी । रहेहु जहाँ रुचि होइ तुम्हारी ॥
एहि विधि करेहु उपाय कदंबा । फिरइ त होइ प्रान अवलंबा ॥
नाहिं त मोर मरनु परिनामा । कछु न बसाइ भएँ विधि बामा ॥
अस कहि मुरुछि परा महि राज । रामु लखनु सिय आनि देखाऊ ॥

दो०—पाइ रजायसु नाइ सिरु रथु अति बेग बनाइ ।

गयउ जहाँ बाहेर नगर सीय सहित दोउ भाइ ॥८२॥

तब सुमंत्र नृप वचन सुनाए । करि विनती रथ रामु चढ़ाए ॥
चढ़ि रथ सीय सहित दोउ भाई । चले हृदयँ अवधहि सिरु नाई ॥
चलत रामु लखि अवध अनाथा । विकल लोग सब लागे साथी ॥
कृषासिंधु बहुविधि समुझावहिं । फिरहिं प्रेम बस पुनि फिरि आवहि ॥
लागति अवध भयावनि भारी । मानहुँ कालराति अँधिआरी ॥
घोर जंतु सम पुर नर नारी । डरपहिं एकहि एक निहारी ॥
घर मसान परिजन जनु भूता । सुत हित मीत मनहुँ जमदूता ॥
बागन्ह बिटप बेलि कुम्हिलाहीं । सरित सरोवर देखि न जाहीं ॥

दो०—हय गय कोटिन्ह केलिमृग पुरपसु चातक मोर ।

पिक रथांग सुक सारिका सारस हंस चकोर ॥८३॥

राम बियोग विकल सब ठाढ़े । जहँ तहँ मनहुँ चित्र लिखि काढ़े ॥
नगर सफल बनु गहबर भारी । खग मृग विपुल सकल नर नारी
विधि कैकई किरातिनि कीन्ही । जेहिं दव दुसह दसहुँ दिसि दीन्ही
सहि न सके रघुवर विरहागी । चले लोग सब व्याकुल भागी ॥
सबहिं विचारु कीन्ह मन माहीं । राम लखन सिय बिनु सुखु नाहीं
जहाँ रामु तहँ सबुइ समाजू । बिनु रघुवीर अवध नहिं काजू ॥
चले साथ अस मंत्रु दढ़ाई । सुर दुर्लभ सुख सदन बिहाई ॥
राम चरन पंकज प्रिय जिन्हही । विषय भोग बस करहिं कि तिन्हही
दो०—बालक बृद्ध बिहाइ गृहँ लगे लोग सब साथ ।

तमसा तीर निवासु किय प्रथम दिवस रघुनाथ ॥८४॥

रघुपति प्रजा प्रेमबस देखी । सदय हृदयँ दुखु भयउ बिसेषी ॥
करुनामय रघुनाथ गोसाँई । बेगि पाइअहिं पीर पराई ॥
कहि सप्रेम मृदु बचन सुहाए । बहुविधि राम लोग समुझाए ॥
किए धरम उपदेस घनेरे । लोग प्रेम बस फिरहिं न फेरे ॥
सीछु सनेहु छाड़ि नहिं जाई । असमंजस बस भे रघुराई ॥
लोग सोग श्रम बस गए सोई । कछुक देवमायाँ मति मोई ॥
जबहिं जाम जुग जामिनि बीती । राम सचिव सन कहेउ सप्रीती ॥
खोज मारि रथु हाँकहु ताता । आन उपायँ बनिहि नहिं बाता ॥

दो०—राम लखन सिय जान चढ़ि सभु चरन सिरु नाइ ।

सचिव चलायउ तुरत रथु इत उत खोज दुराइ ॥८५॥

जागे सकल लोग भएँ भोरु । गेरघुनाय भयउ अति सोरु ॥
 रथ कर खोज कतहुँ नहिं पावहिं । राम राम कहि चहु दिसि धावहिं
 मनहुँ बारिनिधि बूड़ जहाजू । भयउ बिकल बड़ बनिक समाजू
 एकहि एक देहिं उपदेसू । तजे राम हम जानि कलेसू ॥
 निंदहिं आपु सराहहिं मीना । धिग जीवनु रघुवीर बिहीना ॥
 जौ पै प्रिय वियोगु विधि कीन्हा । तौ कस मरनु न मार्गे दीन्हा ॥
 एहि विधि करत प्रलाप कलापा । आए अवध भरे परितापा ॥
 विषम वियोगु न जाइ बखाना । अवधि आस सब राखहिं प्राणा ॥
 दो०—राम दरस हित नेम ब्रत लगे करन नर नारि ।

मनहुँ कोक कोकी कमल दीन बिहीन तमारि ॥८६॥

सीता सचिव सहित दोउ भाई । सुंगवेरपुर पहुँचे जाई ॥
 उतरे राम देवसरि देखी । कीन्ह दंडवत हरषु विसेषी ॥
 लखन सचिव सिय किए प्रनामा । सबहि सहित सुखु पायउ रामा ॥
 गंग सकल मुद मंगल मूला । सब सुख करनि हरनि सब सूला ॥
 कहि कहि कोटिक कथा प्रसंगा । रामु बिलोकहिं गंग तरंगा ॥
 सचिवहि अनुजहि प्रियहि सुनाई । बिबुध नदी महिमा अधिकाई ॥
 मज्जनु कीन्ह पंथ श्रम गयऊ । सुचि जलु पिअत मुदित मन भयऊ
 सुमिरत जाहि मिटइ श्रम भारू । तेहि श्रम यह लौकिक व्यवहारू

श्री०-सुद्ध साचिदानंदमय कंद भानुकुल केतु ।

चरित करत नर अनुहरत संसृति सागर सेतु ॥८७॥

बह सुधि गुहँ निषाद जब पाई । मुदित लिए प्रिय बंधु बोलाई ॥
 लिए फल मूल भेंट भरि भारा । मिलन चलेउ हियँ हरषु अपारा ॥
 करि दंडवत भेंट धरि आगें । प्रभुहि बिलोकत अति अनुरागें ॥
 सहज सनेह बिबस रघुराई । पूँछी कुसल निकट बैठाई ॥
 नाथ कुसल पद पंकज देखें । भयउँ भागभाजन जन लेखें ॥
 देव धरनि धनु धामु तुम्हारा । मैं जनु नीचु सहित परिवारा ॥
 कृपा करिअ पुर धारिअ पाऊ । थापिय जनु सबु लोगु सिहाऊ ॥
 कहेउ सत्य सबु सखा सुजाना । मोहि दीन्ह पितु आयसु आना ॥

श्री०-बरष चारिदस बासु बन मुनि व्रत बेपु अहार ।

ग्राम बासु नहिँ उचित सुनि गुहहि भयउ दुखु भार ॥८८॥

राम लखन सिय रूप निहारी । कहहिँ सप्रेम ग्राम नर नारी ॥
 ते पितु मातु कहहु सखि कैसे । जिन्ह पठए बन बालक ऐसे ॥
 एक कहहिँ भल भूपति कीन्हा । लोयन लाहु हमहिविधि दीन्हा ॥
 तब निषादपति उर अनुमाना । तरु सिंसुपा मनोहर जाना ॥
 लै रघुनाथहि ठाउँ देखावा । कहेउ राम सब भाँति सुहावा ॥
 पुरजन करि जोहारु घर आए । रघुवर संध्या करन सिधाए ॥
 गुहँ सँवारि साँथरी डसाई । कुस किसलयमय मृदुल सुहाई ॥
 मुचि फल मूल मधुर मृदु जानी । दोना भरि भरि राखेसि पानी ॥

दो०—सिय सुमन त्रिता सहित कद मूल फल खाई ।

सयन कीन्ह रघुवंसमनि पाय पलोत्त भाइ ॥८९॥

उठे लखनु प्रभु सोवत जानी । कहि सचिवहि सोवन मृदु बानी
कछुक दूरि सजि बान सरासन । जागन लगे बैठि वीरासन ॥
गुहँ बोलाइ पाहरू प्रतीती । ठावँ ठावँ राखे अति प्रीती ॥
आपु लखन पहिँ बैठेउ जाई । कटि भाथी सर चाप चढ़ाई ॥
सोवत प्रभुहि निहारि निषादू । भयउ प्रेम बस हृदयँ विषादू ॥
तनु पुलकित जलु लोचन बहई । बचन सप्रेम लखन सन कहई ॥
भूपति भवन सुभायँ सुहावा । सुरपति सदनु न पटतर पावा ॥
मनिमय रचित चारु चौबारे । जनु रति पति निज हाथ सँवारे ॥

दो०—सुचि सुबिचित्र सुभोगमय सुमन सुगंध सुबास ।

पलंग मंजु मनिदीप जहँ सब बिधि सकल सुपास ॥९०॥

बिविध बसन उपधान तुराई । छीर फेनु मृदु बिसद सुहाई ॥
तहँ सिय रामु सयन निसि करहीं । निज छवि रति मनोज मदु हरहीं
ते सिय रामु साथरीं सोए । श्रमित बसन बिनु जाहिं न जोए ॥
मातु पिता परिजन पुरवासी । सखा सुसील दास अरु दासी ॥
जोगवहिं जिन्हहि प्रान की नाई । महि सोवत तेइ राम गोसाई ॥
पिता जनक जग बिदित प्रभाऊ । ससुर सुरेस सखा रघुराऊ ॥
रामचंदु पति सो बैदेही । सोवत महि बिधि बामन केही ॥
सिय रघुबीर कि कानन जोगू । करम प्रधान सत्य कह लोगू ॥

दो० - Vinay Anandini Sahib Bhuvan Vani Trust Donations

जेहिं रघुनंदन जानकिहि सुख अवसर दुखु दीन्ह ॥९१॥

भइ दिनकर कुल बिटप कुठारी । कुमति कीन्ह सब बिस्व दुखारी
 भयउ विषादु निषादहि भारी । राम सीय महि सयन निहारी ॥
 बोले लखन मधुर मृदु बानी । ग्यान विराग भगति रससानी ॥
 काहु न कोउ सुख दुख कर दाता । निज कृत करम भोग सबु भ्राता
 जोग बियोग भोग भल मंदा । हित अनहित मध्यम भ्रम फंदा ॥
 जनमु मरनु जहँ लगि जग जालू । संपति विपति करमु अरु कालू ॥
 घरनि धामु धनु पुर परिवारू । सरगु नरकु जहँ लगि व्यवहारू ॥
 देखिअ सुनिअ गुनिअ मन माहीं । मोह मूल परमारथु नाहीं ॥

दो०-सपनें होइ भिखारि नृपु रंकु नाकपति होइ ।

जागें लाभु न हानि कछु तिमि प्रपंच जियँ जोइ ॥९२॥

अस बिचारि नहिं कीजिअ रोसू । काहुहि बादि न देइअ दोसू ॥
मोह निसाँ सबु सोवनिहारा । देखिअ सपन अनेक प्रकारा ॥
एहिं जग जामिनि जागहिं जोगी । परमारथी प्रपंच बियोगी ॥
जानिअ तबहिं जीव जग जागा । जव सब विषय बिलास बिरागा ॥
होइ बिबेकु मोह भ्रम भागा । तव रघुनाथ चरन अनुरागा ॥
सखा परम परमारथु एहू । मन क्रम बचन राम पद नेहू ॥
राम ब्रह्म परमारथ रूपा । अविगत अलख अनादि अनूपा ॥
सकल बिकार रहित गतभेदा । कहि नित नेति निरूपहिं वेदा ॥

दो०—मंगल मूनि भूषुर भूषुर भूषुर हित ल विवृणु ।

करत चरित धरि मनुज तनु सुनत मिटहिं जग जाल ॥९३॥

मासपारायण, पंद्रहवाँ विश्राम

सखा समुझि अस परिहरि मोहू । सिय रघुबीर चरन रत होहू ॥
कहत राम गुन भा भिनुसारा । जागे जग मंगल सुखदारा ॥
सकल सौच करि राम नहावा । सुचि सुजान बट छीर मगावा ॥
अनुज सहित सिर जटा बनाए । देखि सुमंत्र नयन जल छाए ॥
हृदयँ दाहु अति बदन मलीना । कह कर जोरि बचन अति दीना ॥
नाथ कहेउ अस कोसलनाथा । लै रथु जाहु राम कै साथी ॥
बनु देखाइ सुरसरि अन्हवाई । आनेहु फेरि बेगि दोउ भाई ॥
लखनु रामु सिय आनेहु फेरी । संसय सकल सँकोच निवेरी ॥
दो०—नृप अस कहेउ गोसाँई जस कहइ करौं बलि सोइ ।

करि बिनती पायन्ह परेउ दीन्ह बाल जिमि रोइ ॥९४॥

तात कृपा करि कीजिअ सोई । जातैं अवध अनाथ न होई ॥
मंत्रिहि राम उठाइ प्रबोधा । तात धरम मतु तुम्ह सबु सोधा ॥
सिबि दधीच हरिचंद नरेसा । सहे धरम हित कोटि कलेसा ॥
रंतिदेव बलि भूप सुजाना । धरमु धरेउ सहि संकट नाना ॥
धरमु न दूसर सत्य समाना । आगम निगम पुरान बखाना ॥
मैं सोइ धरमु सुलभ करि पावा । तजैं तिहूँ पुर अपजसु छावा ॥
संभावित कहूँ अपजस लाहू । मरन कोटि सम दारुन दाहू ॥

तुम्ह सन तात बहुत का कहऊ । दिए उतरु फिरि पातकु लहऊँ ॥

दो०—पितु पद गहि कहि कोटि नति बिनय करब कर जोरि ।

चिंता कबनिहु बात कै तात करिअ जनि मोरि ॥९५॥

तुम्ह पुनि पितु सम अति हित मोरें । बिनती करउँ तात कर जोरें ॥

सब विधि सोइ करतब्य तुम्हारें । दुख न पाव पितु सोच हमारें ॥

सुनि रघुनाथ सचिव संवादू । भयउ सपरिजन बिकल निषादू ॥

पुनि कछु लखन कही कटु बानी । प्रभु वरजे बड़ अनुचित जानी ॥

सकुचि राम निज सपथ देवाई । लखन सँदेसु कहिअ जनि जाई ॥

कह सुमंत्रु पुनि भूप सँदेसू । सहि न सकिहि सिय विपिन कलेसू ॥

जेहि विधि अवध आव फिरि सीया । सोइ रघुवरहि तुम्हहि करनीया ॥

नतरु निपट अवलंब बिहीना । मैं न जिअब जिमि जल बिनु मीना ॥

दो०—मइकें ससुरें सकल सुख जबहिं जहाँ मनु मान ।

तहँ तब रहिहि सुखेन सिय जब लगि बिपति बिहान ॥९६॥

बिनती भूप कीन्ह जेहि भाँती । आरति प्रीति न सो कहि जाती ॥

पितु सँदेसु सुनि कृपानिधाना । सियहि दीन्ह सिख कोटि विधाना ॥

सासु ससुर गुर प्रिय परिवारू । फिरहु त सब कर मिटै खमारू ॥

सुनि पति बचन कहति वैदेही । सुनहु प्रानपति परम सनेही ॥

प्रभु करुनामय परम बिबेकी । तनु तजि रहति छाँह किमि छँकी ॥

प्रभा जाइ कहँ भानु बिहाई । कहँ चंद्रिका चंदु तजि जाई ॥

पतिहि प्रेममय बिनय सुनाई । कहति सचिव सन गिरा सुहाई ॥

तुम्ह पितु ससुर ससरि हितकारी । उतर देउं फिरि अनुक्ति भारी ॥

दो०—आरति बस सनमुख भइउं बिलगु न मानब तात ।

आरजसुत पद कमल बिनु बादि जहाँ लगि नात ॥९७॥

पितु बैभव बिलास मैं डीठा । नृप मनि मुकुट मिलित पद पीठा

सुखनिधान असपितु गृह मोरें । पिय बिहीन मन भाव न भोरें ॥

ससुर चक्रवइ कोसलराऊ । भुवन चारिदस प्रगट प्रभाऊ ॥

आगें होइ जेहि सुरपति लेई । अरध सिंघासन आसनु देई ॥

ससुर एतादस अवध निवासू । प्रिय परिवार मातु सम सासू ॥

बिनु रघुपति पद पदुम परागा । मोहि केउ सपनेहुँ सुखद न लागा

अगम पंथ वनभूमि पहारा । करि केहरि सर सरित अपारा ॥

कोल किरात कुरंग बिहंगा । मोहि सब सुखद प्रानपति संग ॥

दो०—सासु ससुर सन मोरि हूँति बिनय करबि परि पायँ ।

मोर सोचु जनि करिअ कछु मैं बन सुखी सुभायँ ॥९८॥

प्राननाथ प्रिय देवर साथ ॥ वीर धुरीन धरें धनु भाथा ॥

नहिं मग भ्रमु भ्रमु दुख मन मोरें । मोहि लगि सोचु करिअ जनि मोरें

सुनि सुमंत्रु सिय सीतलि बानी । भयउ बिकल जनु फनि मनि हानी

नयन सूझ नहिं सुनइ न काना । कहि न सकइ कछु अति अकुलाना

राम प्रबोधु कीन्ह बहु भाँती । तदपि होति नहिं सीतलि छाती ॥

जतन अनेक साथ हित कीन्ह ॥ उचित उतर रघुनंदन दीन्ह ॥

मेटि जाइ नहिं राम रजाई । कठिन करम गति कछु न बसाई ॥

Vinay Avasthi Sahib Bhuvan Vani Trust Donations
राम लखन सिय पद सिरु नाई । फिरउ बनि कजिमि मूर गवाँई ॥

दो०—रथु हाँकेउ हय राम तन हेरि हेरि हिहिनाहि ।

देखि निषाद बिषादबस धुनहिं सीस पछिताहि ॥९९॥

जासु बियोग विकल पसु ऐसैं । प्रजा मातु पितु जिइहहिं कैसैं ॥

बरबस राम सुमंत्रु पठाए । सुरसरि तीर आपु तब आए ॥

मागी नाव न केवटु आना । कहइ तुम्हार मरमु मैं जाना ॥

चरन कमल रज कहूँ सबु कहई । मानुष करनि मूरि कछु अहई ॥

छुअत सिला भइ नारि सुहाई । पाहन तैं न काठ कठिनाई ॥

तरनिउ मुनि घरिनी होइ जाई । बाट परइ मोरि नाव उड़ाई ॥

एहिं प्रतिपालउँ सबु परिवारू । नहिं जानउँ कछु अउर कवारू ॥

जौं प्रभु पार अवसि गा चहहू । मोहि पद पदुम पखारन कहहू ॥

छं०—पद कमल धोइ चढ़ाइ नाव न नाथ उतराई चहौं ।

मोहि राम राउरि आन दसरथ सपथ सब साची कहौं ॥

बरु तीर मारहुँ लखनु पै जब लगि न पाय पखारिहौं ।

तब लगि न तुलसीदास नाथ कृपाल पारु उतारिहौं ॥

सो०—सुनि केवट के बैन प्रेम लपेटे अटपटे ।

बिहसे करुनाऐन चितइ जानकी लखन तन ॥१००॥

कृपासिंधु बोले मुसुकाई । सोइ करु जेहिं तव नाव न जाई

बेगि आनु जल पाय पखारू । होत बिलंबु उतारहि पारू ॥

जासु नाम सुमिरत एक बारा । उतरहिं नर भवसिंधु अपारा ॥

Vinay Avasthi Sahib Bhuwan Vaidi Trust Donations

सोइ कृपालु केवटाह निहारा । जेहि जगु किय तिहु पगहु ते थोरा ॥
पद नख निरखि देवसरि हरषी । सुनि प्रभु बचन मोहँ मति करषी ॥
केवट राम रजायसु पावा । पानि कठवता भरि लेइ आवा ॥
अति आनंद उमगि अनुरागा । चरन सरोज पखारन लागा ॥
वरषि सुमन सुर सकल सिहाहीं । एहि सम पुन्य पुंज कोउ नाहीं ॥
दो०—पद पखारि जलु पान करि आपु सहित परिवार ।

पितर पारु करि प्रभुहि पुनि मुदित गयउ लेइ पार ॥१०१॥

उतरि ठाढ़ भए सुरसरि रेता । सीय रामु गुह लखन समेता ॥
केवट उतरि दंडवत कीन्हा । प्रभुहि सकुच एहि नहिं कछु दीन्हा
पिय हिय की सिय जाननिहारी । मनि मुदरी मन मुदित उतारी ॥
कहेउ कृपाल लेहि उतराई । केवट चरन गहे अकुलाई ॥
नाथ आजु मैं काह न पावा । मिटे दोष दुख दारिद दावा ॥
बहुत काल मैं कीन्हि मजूरी । आजु दीन्ह बिधि बनि भलि भूरी
अब कछु नाथ न चाहिअ मोरें । दीनदयाल अनुग्रह तोरें ॥
फिरती बार मोहि जो देवा । सो प्रसादु मैं सिर धरि लेवा ॥
दो०—बहुत कीन्ह प्रभु लखन सियँ नहिं कछु केवटु लेइ ।

बिदा कीन्ह करुनायतन भगति बिमल बरु देइ ॥१०२॥

तब मज्जनु करि रघुकुलनाथा । पूजि पारथिव नाथउ माथा ॥
सियँ सुरसरिहि कहेउ कर जोरी । मातु मनोरथ पुरउवि मोरी ॥
पति देवर सँग कुसल ब्रहोरी । आइ करौं जेहि पूजा तोरी ॥

सुनि सिय विनय प्रेम रस सानी । भइ तव विमल बारि बर बानी ॥
 सुनु रघुवीर प्रिया वैदेही । तव प्रभाउ जग विदित न केही ॥
 लोकप होहिं बिलोकत तोरैं । तोहि सेवहिं सब सिधि कर जोरैं ॥
 तुम्ह जो हमहि बड़ि विनय सुनाई । कृपा कीन्हि मोहि दीन्हि बड़ाई
 तदपि देवि मैं देवि असीसा । सफल होन हित निज बागीसा ॥
 दो०—प्राननाथ देवर सहित कुसल कोसला आइ ।

पूजिहि सब मनकामना सुजसु रहिहि जग छाइ ॥ १०३ ॥
 गंग बचन सुनि मंगल मूला । मुदित सीय सुरसरि अनुकूला ॥
 तव प्रभु गुहहि कहेउ घर जाहू । सुनत सूख मुख भा उर दाहू ॥
 दीन बचन गुह कह कर जोरी । विनय सुनहु रघुकुलमनि मोरी ॥
 नाथ साथ रहि पंथु देखाई । करि दिन चारि चरन सेवकाई ॥
 जेहिं बन जाइ रहब रघुराई । परनकुटी मैं करबि सुहाई ॥
 तव मोहि कहँ जसि देबरजाई । सोइ करिहउँ रघुवीर दोहाई ॥
 सहज सनेह राम लखि तासू । संग लीन्ह गुह हृदयँ हुलासू ॥
 पुनि गुहँ ग्याति बोलि सब लीन्हे । करि परितोषु बिदा तव कीन्हे ॥
 दो०—तब गनपति सिव सुमिरि प्रभु नाइ सुरसरिहि माथ ।

सखा अनुज सिय सहित बन गवनु कीन्ह रघुनाथ ॥ १०४ ॥
 तेहि दिन भयउ बिटप तर बासू । लखन सखाँ सब कीन्ह सुपासू ॥
 प्रात प्रातकृत करि रघुराई । तीरथराजु दीख प्रभु जाई ॥
 सचिव सत्य श्रद्धा प्रिय नारी । माधव सरिस मीतु हितकारी ॥

चारि पदारथ भरा भँडारू । पुन्य प्रदेस देस अति चारू ॥
छेत्रु अगम गढु गाढ सुहावा । सपनेहुँ नहिं प्रतिपच्छिन्ह पावा ॥
सेन सकल तीरथ बर बीरा । कलुष अनीक दलन रनधीरा ॥
संगमु सिंहासनु सुठि सोहा । छत्रु अखयबहु मुनि मनु मोहा ॥
चवँर जमुन अरु गंग तरंगा । देखि होहिं दुख दारिद भंगा ॥
दो०—सेवहिं सुकृती साधु सुचि पावहिं सब मनकाम ।

बंदी बेद पुरान गन कहहिं बिमल गुन ग्राम ॥ १०५ ॥

को कहि सकइ प्रयाग प्रभाऊ । कलुष पुंज कुंजर मृगराऊ ॥
अस तीरथपति देखि सुहावा । सुख सागर रघुवर सुखु पावा ॥
कहि सिय लखनहि सखहि सुनाई । श्रीमुख तीरथराज बड़ाई ॥
करि प्रनामु देखत बन बागा । कहत महातम अति अनुरागा ॥
एहि बिधि आइ बिलोकी बेनी । सुमिरत सकल सुमंगल देनी ॥
मुदित नहाइ कीन्हि सिय सेवा । पूजि जथाविधि तीरथ देवा ॥
तब प्रभु भरद्वाज पहिं आए । करत दंडवत मुनि उर लाए ॥
मुनि मन मोद न कछु कहि जाई । ब्रह्मानंद रासि जनु पाई ॥
दो०—दीन्हि असीस मुनीस उर अति अनंदु अस जानि ।

लोचन गोचर सुकृत फल मनहुँ किए बिधि आनि ॥ १०६ ॥

कुसल प्रसन्न करि आसन दीन्हे । पूजि प्रेम परिपूरन कीन्हे ॥
कंद मूल फल अंकुर नीके । दिए आनि मुनि मनहुँ अमी के ॥
सीय लखन जन सहित सुहाए । अति रुचि राम मूल फल खाए ॥

भए विगतश्रम रामु सुखारे । भरद्वाज मृदु वचन उचारे ॥
 आजु सुफल तपु तीरथ त्यागू । आजु सुफल जप जोग विरागू ॥
 सफल सकल सुभ साधन सज्जू । राम तुम्हहि अवलोकत आजू ॥
 लाभ अवधि सुख अवधि न दूजी । तुम्हरेँ दरस आस सब पूजी ॥
 अब करि कृपा देहु वर एहू । निज पद सरसिज सहज सनेहू ॥
 दो०-करम बचन मन छाड़ि छलु जब लगि जनु न तुम्हार ।

तब लगि सुखु सपनेहुँ नहीं किँएँ कोटि उपचार ॥ १०७ ॥
 मुनि मुनि बचन रामु सकुचाने । भाव भगति आनंद अघाने ॥
 तब रघुबर मुनि सुजसु सुहावा । कोटि भाँति कहि सबहि सुनावा ॥
 सो बड़ सो सब गुन गन गेहू । जेहि मुनीस तुम्ह आदर देहू ॥
 मुनि रघुवीर परसपर नवहीं । बचन अगोचर सुखु अनुभवहीं ॥
 यह सुधि पाइ प्रयाग निवासी । बडु तापस मुनि सिद्ध उदासी ॥
 भरद्वाज आश्रम सब आए । देखन दसरथ सुअन सुहाए ॥
 राम प्रनाम कीन्ह सब काहू । मुदित भए लहि लोयन लाहू ॥
 देहिँ असीस परम सुखु पाई । फिरे सराहत सुंदरताई ॥
 दो०-राम कीन्ह बिश्राम निसि प्रात प्रयाग नहाइ ।

चले सहित सिय लखन जन मुदित मुनिहि सिरु नाइ । १०८ ॥

राम सप्रेम कहेउ मुनि पाहीं । नाथ कहिअ हम केहि मग जाहीं ॥
 मुनि मन बिहसि राम सन कहहीं । सुगम सकल मग तुम्ह कहूँ अहहीं
 साथ लागि मुनि सिध्य होलाए । मुनि मन मुदित पचासक आस ॥

सबन्हि राम पर प्रेम अपारा । सकल कहहिं मगु दीख हमारा ॥
 मुनि बटु चारि संग तब दीन्हे । जिन्ह बहु जनम सुकृत सब कीन्हे
 करि प्रनामु रिषि आयसु पाई । प्रमुदित हृदयँ चले रघुराई ॥
 ग्राम निकट जब निकसहिं जाई । देखहिं दरसु नारि नर धाई ॥
 होहिं सनाथ जनम फलु पाई । फिरहिं दुखित मनु संग पठाई ॥
 दो०—बिदा किए बटु बिनय करि फिरे पाइ मन काम ।

उत्तरि नहाए जमुन जल जो सरीर सम स्याम ॥१०९॥

सुनत तीरवासी नर नारी । धाए निज निज काज विसारी ॥
 लखन राम सिय सुंदरताई । देखि करहिं निज भाग्य बड़ाई ॥
 अति लालसा बसहिं मन माहीं । नाउँ गाउँ बूझत सकुचाहीं ॥
 जे तिन्ह महुँ बयविरिध सयाने । तिन्ह करि जुगुति रामु पहिचाने ॥
 सकल कथा तिन्ह सबहि सुनाई । बनहि चले पितु आयसु पाई ॥
 सुनि सविषाद सकल पछिताहीं । रानी रायँ कीन्ह भल नाहीं ॥
 तेहि अवसर एक तापसु आवा । तेजपुंज लघुवयस सुहावा ॥
 कवि अलखित गति बेषु विरागी । मन क्रम बचन राम अनुरागी ॥
 दो०—सजल नयन तन पुलकि निज इष्टदेउ पहिचानि ।

परेउ दंड जिमि धरनितल दसा न जाइ बखानि ॥११०॥

राम सप्रेम पुलकि उर लावा । परम रंक जनु पारसु पावा ॥
 मनहुँ प्रेमु परमारथु दोऊ । मिलत धरै तन कह सबु कोऊ ॥
 बहुरि लखन पायन्ह सोइ लागा । लीन्ह उठाइ उमगि अनुरागा ॥

पुनि सिय चरन धूरि धरि सीसा । जननि जानि सिसु दीन्हि असीसा
 कीन्ह निषाद दंडवत तेही । मिलेउ मुदित लखि राम सनेही ॥
 पिअत नयन पुट रूपु पियूषा । मुदित सुअसनु पाइ जिमि भूखा
 ते पितु मातु कहहु सखि कैसे । जिन्ह पठए वन बालक ऐसे ॥
 राम लखन सिय रूपु निहारी । होहिं सनेह बिकल नर नारी ॥
 दो०—तब रघुवीर अनेक बिधि सखहि सिखावनु दीन्ह ।

राम रजायसु सीस धरि भवन गवनु तेई कीन्ह ॥१११॥

पुनि सियँ राम लखन कर जोरी । जमुनहि कीन्ह प्रनामु बहोरी ॥
 चले ससीय मुदित दोउ भाई । रबितनुजा कइ करत बड़ाई ॥
 पथिक अनेक मिलहिं मग जाता । कहहिं सप्रेम देखि दोउ भ्राता ॥
 राज लखन सब अंग तुम्हारें । देखि सोचु अति हृदय हमारें ॥
 मारग चलहु पयादेहि पाएँ । ज्योतिषु झूठ हमारें भाएँ ॥
 अगमु पंथु गिरि कानन भारी । तेहि मँहँ साथ नारि सुकुमारी ॥
 करि केहरि बन जाइ न जोई । हम सँग चलहिं जो आयसु होई ॥
 जाव जहाँ लगि तहँ पहुँचाई । फिरव बहोरि तुम्हहि सिरु नाई ॥
 दो०—एहि बिधि पूँछहिं प्रेम बस पुलक गात जलु नैन ।

कृपासिंधु फेरहिं तिन्हहि कहि बिनीत मृदु बैन ॥११२॥

जे पुर गाँव बसहिं मग माहीं । तिन्हहि नाग सुर नगर सिहाहीं ॥
 केहि सुकृती केहि घरी बसाए । धन्य पुन्यमय परम सुहाए ॥

पुन्य पुंज मग निकट निवासी । तिन्हहिं सराहहिं सुरपुरवासी ॥
 जे भरि नयन बिलोकहिं रामहि । सीता लखन सहित धनस्यामहि ॥
 जे सर सरित राम अवगाहहिं । तिन्हहि देव सर सरित सराहहिं ॥
 जेहि तर तर प्रभु बैठहिं जाई । करहिं कलपतरु तासु बड़ाई ॥
 परसि राम पद पदुम परागा । मानति भूमि भूरि निज भागा ॥
 दो०—छाँह करहिं घन बिबुधगन बरषहिं सुमन सिहाहिं ।

देखत गिरि बन बिहग मृग रामु चले मग जाहिं ॥ ११३ ॥

सीता लखन सहित रघुराई । गाँव निकट जब निकसहिं जाई ॥
 सुनि सब बाल बृद्ध नर नारी । चलहिं तुरत गृहकाजु बिसारी ॥
 राम लखन सिय रूप निहारी । पाइ नयनफलु होहिं सुखारी ॥
 सजल बिलोचन पुलक सरीरा । सब भए मगन देखि दोउ बीरा ॥
 बरनि न जाइ दसा तिन्ह केरी । लहि जनु रंकन्ह सुरमनि ढेरी ॥
 एकन्ह एक बोलि सिख देहीं । लोचन लाहु लेहु छन एहीं ॥
 रामहि देखि एक अनुरागे । चितवत चले जाहिं सँग लागे ॥
 एक नयन मग छवि उर आनी । होहिं सिथिल तन मन बर बानी ॥
 दो०—एक देखि बट छाँह भलि डासि मृदुल तन पात ।

कहहिं गवाँइअ छिनुकु श्रमु गवनब अबहिं कि प्रात ॥ ११४ ॥

एक कलस भरि आनहिं पानी । अँचइअ नाथ कहहिं मृदु बानी ॥
 सुनि प्रिय वचन प्रीति अति देखी । राम कृपाल सुसील बिसेषी ॥
 जानी श्रमित सीय मन माहीं । घरिक बिलंबु कीन्ह बट छाहीं ॥

सुदित नारि नर देखहि सोभा । रूप अनूप नयन मनु लोभा ॥
 एकटक सब सोहहि चहुँ ओरा । रामचंद्र मुख चंद चकोरा ॥
 तरुन तमाल बरन तनु सोहा । देखत कोटि मदन मनु मोहा ॥
 दामिनि बरन लखन सुठि नीके । नख सिख सुभग भावते जी के ॥
 मुनिपट कटिन्ह कसैं तूनीरा । सोहहिं कर कमलनि धनु तीरा ॥
 दो०—जटा मुकुट सीसनि सुभग उर भुज नयन बिसाल ।

सरद परब बिधु बदन बर लसत स्वेद कन जाल ॥११५॥
 बरनि न जाइ मनोहर जोरी । सोभा बहुत थोरि मति मोरी ॥
 राम लखन सिय सुंदरताई । सब चितवहिं चित मन मति लाई ॥
 थके नारि नर प्रेम पिआसे । मनहुँ मृगी मृग देखि दिआ से ॥
 सीय समीप ग्रामतिय जाहीं । पूँछत अति सनेहँ सकुचाहीं ॥
 बार बार सब लागहिं पाएँ । कहहिं बचन मृदु सरल सुभाएँ ॥
 राजकुमारि बिनय हम करहीं । तिय सुभायँ कछु पूँछत डरहीं ॥
 स्वामिनि अविनय छमवि हमारी । बिलगु न मानव जानि गवाँरी ॥
 राजकुअँर दोउ सहज सलोने । इन्ह तैं लही दुति मरकत सोने ॥
 दो०—स्यामल गौर किसोर बर सुंदर सुषमा ऐन ।

सरद सर्वरीनाथ मुखु सरद सरोरुह नैन ॥११६॥

मासपारायण, सोलहवाँ विश्राम

नवाह्नपारायण, चौथा विश्राम

कोटि मनोज लजावनिहारे । सुमुख कहहु को आहिं तुम्हारे ॥
 सुनि सनेहमय मंजुल बानी । सकुची सिय मन महुँ मुसुकानी ॥
 तिन्हहि बिलोकि बिलोकति धरनी । दुहुँ सकोच सकुचति बरबरनी
 सकुचि सप्रेम बाल मृग नयनी । बोली मधुर बचन पिकवयनी ॥
 सहज सुभाय सुभग तन गोरे । नामु लखनु लघु देवर मोरे ॥
 बहुरि बदनु विधु अंचल ढाँकी । पिय तन चितइ भौंह करि बाँकी
 खंजन मंजु तिरीछे नयननि । निज पति कहेउ तिन्हहि सियँ सयननि
 भई सुदित सब ग्रामवधूटीं । रंकन्ह राय रासि जनु लूटीं ॥
 दो०—अति सप्रेम सिय पायँ परि बहुविधि देहिं असीस ।

सदा सोहागिनि होहु तुम्ह जब लगि महि अहि सीस ॥११७॥

पारवती सम पतिप्रिय होहू । देवि न हम पर छाड़ब छोहू ॥
 पुनि पुनि विनय करिअ करजोरी । जौँ एहि मारग फिरिअ बहोरी
 दरसन देव जानि निज दासी । लखीं सीयँ सब प्रेम पिआसी ॥
 मधुर बचन कहि कहि परितोषीं । जनु कुमुदिनीं कौमुदीं पोषीं ॥
 तबहिं लखन रघुवर रुख जानी । पूँछेउ मगु लोगन्हि मृदु बानी ॥
 सुनत नारि नर भए दुखारी । पुलकित गात बिलोचन बारी ॥
 मिटा मोदु मन भए मलीने । विधि निधि दीन्ह लेत जनु छीने
 समुझि करम गति धीरजु कीन्हा । सोधि सुगम मगु तिन्ह कहि दीन्हा
 दो०—लखन जानकी सहित तब गवनु कीन्ह रघुनाथ ।

फेरे सब प्रिय बचन कहि लिए लाइ मन साथ ॥११८॥

फिरत नारि नर अति पछिताहीं । दैअहि दोषु देहिं मन माहीं ॥
 सहित बिषाद परसपर कहहीं । बिधि करतव उलटे सब अहहीं ॥
 निपट निरंकुस निठुर निसंकू । जेहिं ससि कीन्ह सरुज सकलंकू ॥
 रूख कलपतरु सागरु खारा । तेहिं पठए बन राजकुमारा ॥
 जौं पै इन्हहि दीन्ह बनवासू । कीन्ह बादि बिधि भोग बिलासू ॥
 ए बिचरहिं मग बिनु पद चाना । रचे बादि बिधि बाहन नाना ॥
 एमहि परहिं डासि कुस पाता । सुभग सेज कत सृजत बिधाता ॥
 तरुवर बास इन्हहि बिधि दीन्हा । धवलधाम रचि रचि श्रमु कीन्हा
 दो०—जौं ए मुनि पट धर जटिल सुंदर सुठि सुकुमार ।

बिबिध भाँति भूषन बसन बादि किए करतार ॥ ११९ ॥

जौं ए कंद मूल फल खाहीं । बादि सुधादि असन जग माहीं ॥
 एक कहहिं ए सहज सुहाए । आपु प्रगट भए बिधि न बनाए ॥
 जहँ लगि वेद कही बिधि करनी । श्रवन नयन मन गोचर बरनी ॥
 देखहु खोजि भुवन दस चारी । कहँ अस पुरुष कहाँ असि नारी ॥
 इन्हहि देखि बिधि मनु अनुरागा । पटतर जोग बनावै लागा ॥
 कीन्ह बहुत श्रम ऐक न आए । तेहिं इरिषा बन आनि दुखाए ॥
 एक कहहिं हम बहुत न जानहिं । आपुहि परम धन्य करि मानहिं ॥
 ते पुनि पुन्यपुंज हम लेखे । जे देखहिं देखिहहिं जिन्ह देखे ॥
 दो०—एहि बिधि कहि कहि बचन प्रिय लेहिं नयन भरि नीर ।

नारि सनेह विकल बस होहीं। चकई साँझ समय जनु सोहीं ॥
 मृदु पद कमल कठिन मगु जानी। गहवरि हृदयँ कहहिं वर बानी ॥
 परसत मृदुल चरन अरुनारे। सकुचति महि जिमि हृदय हमारे
 जौ जगदीस इन्हहि वनु दीन्हा। कस न सुमनमय मारगु कीन्हा ॥
 जौ मागा पाइअ विधि पाहीं। एरखिअहिं सखि आँखिन्ह माहीं
 जे नर नारि न अवसर आए। तिन्ह सिय रामु न देखन पाए ॥
 सुनि सुरुपु बूझहिं अकुलाई। अब लगि गए कहाँ लगि भाई ॥
 समरथ धाइ बिलोकहिं जाई। प्रमुदित फिरहिं जनमफलु पाई ॥
 दो०—अबला बालक बृद्ध जन कर मीजहिं पछिताहिं ।

होहिं प्रेमबस लोग इमि रामु जहाँ जहँ जाहिं ॥१२१॥

गावँ गावँ अस होइ अनंदू। देखि भानुकुल कैरव चंदू ॥
 जे कछु समाचार सुनि पावहिं। ते नृप रानिहि दोसु लगावहिं ॥
 कहहिं एक अति भल नरनाहू। दीन्ह हमहि जोइ लोचन लाहू ॥
 कहहिं परसपर लोग लोगाई। बातें सरल सनेह सुहाई ॥
 ते पितु मातु धन्य जिन्ह जाए। धन्य सो नगरु जहाँ तें आए ॥
 धन्य सो देसु सैलु बन गाऊँ। जहँ जहँ जाहिं धन्य सोइ ठाऊँ ॥
 सुखु पायउ विरंचि रचि तेही। ए जेहि के सब भाँति सनेही ॥
 राम लखन पथि कथा सुहाई। रही सकल मग कानन छाई ॥

दो०—एहि विधि रघुकुल कमल रवि मग लोगन्ह सुख देत ।

जाहिं चले देखत विपिन सिय सौमित्रि सनेत ॥१२२॥

आगें रामु लखनु बने पाछें । तापस बेष बिराजत काछें ॥
 उभय बीच सिय सोहति कैसैं । ब्रह्म जीव बिच माया जैसैं ॥
 बहुरि कहउँ छवि जसि मन बसई । जनु मधु मदन मध्य रति लसई
 उपमा बहुरि कहउँ जियँ जोही । जनु बुध विधु बिच रोहिनि सोही
 प्रभु पद रेख बीच बिच सीता । धरति चरन मग चलति सभीता ॥
 सीय राम पद अंक बराएँ । लखन चलहिं मगु दाहिन लाएँ ॥
 राम लखन सिय प्रीति सुहाई । वचन अगोचर किमि कहि जाई ॥
 खग मृग मगन देखि छवि होहीं । लिए चोरि चित राम बटोहीं ॥
 दो०—जिन्ह जिन्ह देखे पथिक प्रियसिय समेत दोउ भाइ ।

भव मगु अगसु अनंदु तेइ बिनु श्रम रहे सिराइ ॥१२३॥

अजहुँ जासु उर सपनेहुँ काऊ । बसहुँ लखनु सिय रामु बटाऊ ॥
 राम धाम पथ पाइहि सोई । जो पथ पाव कवहुँ मुनि कोई ॥
 तब रघुवीर श्रमित सिय जानी । देखि निकट बटु सीतल पानी ॥
 तहँ बसि कंद मूल फल खाई । प्रात नहाइ चले रघुराई ॥
 देखत बन सर सैल सुहाए । बालमीकि आश्रम प्रभु आए ॥
 राम दीख मुनि बासु सुहावन । सुंदर गिरि काननु जल पावन ॥
 सरनि सरोज बिटप बन फूले । गुंजत मंजु मधुप रस भूले ॥
 खग मृग विपुल कोलाहल करहीं । विरहित दैर मुदित मन चरहीं ॥

दो०—सुचि सुंदर आश्रमु निरखि हरषे राजिवनेन ।

सुनि रघुवर आगमनु मुनि आगें आयउ लेन ॥१२४॥

मुनि कहूँ राम दंडवत कीन्हा । आसिरबादु विप्रवर दीन्हा ॥
 देखि राम छवि नयन जुड़ाने । करि सनमानु आश्रमहिं आने ॥
 मुनिवर अतिथि प्रानप्रिय पाए । कंद मूल फल मधुर मगाए ॥
 सिय सौमित्रि राम फल खाए । तब मुनि आश्रम दिए सुहाए ॥
 बालमीकि मन आनँदु भारी । मंगल मूरति नयन निहारी ॥
 तब कर कमल जोरि रघुराई । बोले बचन श्रवन सुखदाई ॥
 तुम्ह त्रिकाल दरसी मुनिनाथा । विश्व बदर जिमि तुम्हरेँ हाथा ॥
 अस कहि प्रभु सब कथा बखानी । जेहि जेहि भाँति दीन्ह बनू रानी
 दो०—तात बचन पुनि मातु हित भाइ भरत अस राउ ।

मो कहूँ दरस तुम्हार प्रभु सबु मम पुन्य प्रभाउ ॥१२५॥

देखि पाय मुनिराय तुम्हारे । भए सुकृत सब सुफल हमारे ॥
 अब जहँ राउर आयसु होई । मुनि उदवेगु न पावै कोई ॥
 मुनि तापस जिन्ह तें दुखु लहहीं । ते नरेस बिनु पावक दहहीं ॥
 मंगल मूल विप्र परितोषू । दहइ कोटि कुल भूसुर रोषू ॥
 अस जियँ जानि कहिअ सोइ ठाऊँ । सिय सौमित्रि सहित जहँ जाऊँ
 तहँ रचि रुचिर परन तृन साला । वासु करौँ कछु काल कृपाला ॥
 सहज सरल सुनि रघुवर बानी । साधु साधु बोले मुनि ग्यानी ॥
 कस न कहहु अस रघुकुलकेतू । तुम्ह पालक संतत श्रुति सेतू ॥

छं०—श्रुति सेतु पालक राम तुम्ह जगदीस माया जानकी ।

जो सृजति जगु पालति हरति रुख पाइ कृपानिधान की ॥

जो सहससीसु अहीसु महिधरु लखनु सचराचर धनी ।
सुर काज धरि नरराज तनु चले दलन खल निसिचर अनी॥

सो०—राम सरूप तुम्हार बचन अगोचर बुद्धिपर ।

अबिगत अकथ अपार नेति नेति नित निगम कह ॥१२६॥

जगु पेखन तुम्ह देखनिहारे । विधि हरि संभु नचावनिहारे ॥
तेउ न जानहिं मरमु तुम्हारा । और तुम्हहि को जाननिहारा ॥
सोइ जानइ जेहि देहु जनाई । जानत तुम्हहि तुम्हइ होइ जाई ॥
तुम्हरिहि कृपाँ तुम्हहि रघुनंदन । जानहिं भगत भगत उर चंदन ॥
चिदानंदमय देह तुम्हारी । विगत विकार जान अधिकारी ॥
नर तनु धरेहु संत सुर काजा । कहहु करहु जस प्राकृत राजा ॥
राम देखि सुनि चरित तुम्हारे । जड़ मोहहिं बुध होहिं सुखारे ॥
तुम्ह जो कहहु करहु सबु साँचा । जस काछिअ तस चाहिअ नाचा
दो०—पूँछेहु मोहि कि रहौं कहँ मैं पूँछत सकुचाउँ ।

जहँ न होहु तहँ देहु कहि तुम्हहि देखावौं ठाउँ ॥१२७॥

सुनि मुनि बचन प्रेम रस साने । सकुचि राम मन महुँ मुसुकाने ॥
बालमीकि हँसि कहहिं बहोरी । बानी मधुर अमिअ रस बोरी ॥
सुनहु राम अब कहँ निकेता । जहाँ बसहु सिय लखन समेता ॥
जिन्ह के श्रवन समुद्र समाना । कथा तुम्हारि सुभग सरि नाना ॥
भरहिं निरंतर होहिं न पूरे । तिन्ह के हिय तुम्ह कहँ गृह रूरे ॥
लोचन चातक जिन्ह करि राखे । रहहिं दरस जलधर अभिलाषे ॥

निदरहिं सरित सिंधु सर भारी । रूप बिंदु जल होहिं सुखारी ॥
तिन्ह के हृदय सदन सुखदायक । बसहु बंधु सिय सह रघुनायक ॥

दो०—जसु तुम्हार मानस बिमल हंसिनि जीहा जासु ।

मुकताहल गुन गन चुनइ राम बसहु हियँ तासु ॥१२८॥

प्रभु प्रसाद सुचि सुभग सुवासा । सादर जासु लहइ नित नासा ॥
तुम्हहि निवेदित भोजन करहीं । प्रभु प्रसाद पट भूषन धरहीं ॥
सीसनवाहिं सुर गुरु द्विज देखी । प्रीति सहित करि विनय बिसेषी ॥
कर नित करहिं राम पद पूजा । राम भरोस हृदयँ नहिं दूजा ॥
चरन राम तीरथ चलि जाहीं । राम बसहु तिन्हके मन माहीं ॥
मंत्रराजु नित जपहिं तुम्हारा । पूजहिं तुम्हहि सहित परिवारा ॥
तरपन होम करहिं विधि नाना । विप्र जेवाँइ देहिं बहु दाना ॥
तुम्ह तें अधिक गुरहि जियँ जानी । सकल भायँ सेवहिं सनमानी ॥
दो०—सबु करि मागहिं एक फलु राम चरन रति होउ ।

तिन्ह के मन मंदिर बसहु सिय रघुनंदन दोउ ॥१२९॥

काम कोह मद मान न मोहा । लोभ न छोभ न राग न द्रोहा ॥
जिन्ह के कपट दंभ नहिं माया । तिन्ह के हृदय बसहु रघुराया ॥
सब के प्रिय सब के हितकारी । दुख सुख सरिस प्रसंसा गारी ॥
कहहिं सत्य प्रिय वचन विचारी । जागत सोवत सरन तुम्हारी ॥
तुम्हहि छाड़ि गति दूसरि नाहीं । राम बसहु तिन्ह के मन माहीं ॥
जननी सम जानहिं परनारी । धनु पराव विष तें विष भारी ॥

जे हरषहिं पर संपत्ति देखी । दुखित होहिं पर विपत्ति विसेषी ॥
जिन्हहि राम तुम्ह प्रानपिआरे । तिन्ह के मन सुभ सदन तुम्हारे ॥
दो०—स्वामि सखा पितु मातु गुर जिन्ह के सब तुम्ह तात ।

मन मंदिर तिन्ह के बसहु सीय सहित दोउ आत ॥ १३० ॥

अवगुन तजि सब के गुन गहहीं । विप्र धेनु हित संकट सहहीं ॥
नीति निपुन जिन्ह कह जग लीका । घर तुम्हार तिन्ह कर मनु नीका
गुन तुम्हार समुझइ निज दोसा । जेहि सब भाँति तुम्हार भरोसा ॥
राम भगत प्रिय लागहिं जेही । तेहि उर बसहु सहित वैदेही ॥
जाति पाँति धनु धरमु बड़ाई । प्रिय परिवार सदन सुखदाई ॥
सब तजि तुम्हहि रहइ उर लाई । तेहि के हृदयँ रहहु रघुराई ॥
सरगु नरकु अपवरगु समाना । जहँ तहँ देख धरें धनु बाना ॥
करम बचन मन राउर चेरा । राम करहु तेहि केँ उर डेरा ॥
दो०—जाहि न चाहिअ कबहुँ कछु तुम्ह सन सहज सनेहु ।

बसहु निरंतर तासु मन सो राउर निज गेहु ॥ १३१ ॥

एहि बिधि मुनिवर भवन देखाए । बचन सप्रेम राम मन भाए ॥
कह मुनि सुनहु भानुकुलनायक । आश्रम कहउँ समय सुखदायक
चित्रकूट गिरि करहु निवासू । तहँ तुम्हार सब भाँति सुपासू ॥
सैलु सुहावन कानन चारू । करि केहरि मृग विहग बिहारू ॥
नदी पुनीत पुरान बखानी । अत्रिप्रिया निज तपबल आनी ॥

सुरसरि धार ताउँ मंदाकिनि । जो सब पातक पोतक डाकिनि ॥

अत्रि आदि मुनिबर बहु बसहीं । करहिं जोग जप तप तन कसहीं ॥
चलहु सफल श्रम सब कर करहू । राम देहु गौरव गिरिबरहू ॥
दो०—चित्रकूट महिमा अमित कही महामुनि गाइ ।

आइ नहाए सरित बर सिय समेत दोउ भाइ ॥१३२॥
रघुबर कहेउ लखन भल घाटू । करहु कतहुँ अब ठाहर ठाटू ॥
लखन दीख पय उतर करारा । चहुँ दिसि फिरेउ धनुषजिमि नारा ॥
नदीपनच सर सम दम दाना । सकल कलुष कलिसाउज नाना ॥
चित्रकूट जनु अचल अहेरी । चुकइ न घात मार मुठभेरी ॥
अस कहि लखन ठाउँ देखरावा । थलु बिलोकि रघुबर सुख पावा ॥
रमेउ राम मनु देवन्ह जाना । चले सहित सुर थपति प्रधाना ॥
कोल किरात बेष सब आए । रचे परन तृन सदन सुहाए ॥
बरनि न जाहिं मंजु दुइ साला । एक ललित लघु एक बिसाला ॥

दो०—लखन जानकी सहित प्रभु राजत रुचिर निकेत ।

सोह मदनु मुनिबेष जनु रति रितुराज समेत ॥१३३॥

भासपारायण, सत्रहवाँ विश्राम

अमर नाग किंनर दिसिपाला । चित्रकूट आए तेहि काला ॥
राम प्रनामु कीन्ह सब काहू । मुदित देव लहि लोचन लाहू ॥
वरषि सुमन कह देव समाजू । नाथ सनाथ भए हम आजू ॥
करि बिनती दुख दुसह सुनाए । हरषित निज निज सदन सिधाए ॥
चित्रकूट रघुनंदनु छाए । समाचार सुनि सुनि मुनि आए ॥

आवत देखि मुदित मुनिबृन्दा । कीन्ह दंडवत रघुकुल चंदा ॥
 मुनि रघुवरहि लाइ उर लेहीं । सुफल होन हित आसिष देहीं ॥
 सिय सौमित्रि राम छवि देखहिं । साधन सकल सफल करि लेखहिं
 दो०—जथाजोग सनमानि प्रभु बिदा किए मुनिबृन्दा ।

करहिं जोग जप जाग तप निज आश्रमन्हि सुछंद ॥ १३४ ॥

यह सुधि कोल किरातन्ह पाई । हरपे जनु नव निधि घर आई ॥
 कंद मूल फल भरि भरि दोना । चले रंक जनु लूटन सोना ॥
 तिन्ह महुँ जिन्ह देखे दोउ भ्राता । अपर तिन्हहि पूँछहिं मगु जाता
 कहत सुनत रघुबीर निकाई । आइ सबन्हि देखे रघुराई ॥
 करहिं जोहारु मेंट धरि आगे । प्रभुहि विलोकहिं अति अनुरागे
 चित्र लिखे जनु जहँ तहँ ठाढ़े । पुलक सरीर नयन जल बाढ़े ॥
 राम सनेह मगन सब जाने । कहि प्रिय वचन सकल सनमाने ॥
 प्रभुहि जोहारि बहोरि बहोरी । वचन बिनीत कहहिं कर जोरी ॥

दो०—अब हम नाथ सनाथ सब भए देखि प्रभु पाय ।

भाग हमारें आगमनु राउर कोसलराय ॥ १३५ ॥

धन्य भूमि बन पंथ पहारा । जहँ जहँ नाथ पाउ तुम्ह धारा ॥
 धन्य बिहग मृग काननचारी । सफल जनम भए तुम्हहि निहारी ॥
 हम सब धन्य सहित परिवारा । दीख दरसु भरि नयन तुम्हारा ॥
 कीन्ह बासु भल ठाउँ बिचारी । इहाँ सकल रितु रहब सुखारी ॥
 हम सब भाँति करब सेवकाई । करि केहरि अहि बाध बराई ॥

बन बेहड़ गिरि कंदर खोहा । सब हमार प्रभु पग पग जोहा ॥
तहँ तहँ तुम्हहि अहेर खेलउब । सर निरझर जलठाउँ देखाउब
हम सेवक परिवार समेता । नाथ न सकुचब आयसु देता ॥

दो०—बेद बचन मुनि मन अगम ते प्रभु करुना ऐन ।

बचन किरातन्ह के सुनत जिमि पितु बालक बैन ॥ १३६ ॥

रामहि केवल प्रेमु पिआरा । जानि लेउ जो जाननिहारा ॥
राम सकल बनचर तब तोषे । कहि मृदु बचन प्रेम परिपोषे ॥
विदा किए सिर नाइ सिधाए । प्रभु गुन कहत सुनत घर आए ॥
एहि विधि सिय समेत दोउ भाई । बसहिं विपिन सुर मुनि सुखदाई
जब तैं आइ रहे रघुनायकु । तब तैं भयउ बन मंगलदायकु ॥
फूलहिं फलहिं बिटप विधि नाना । मंजु बलित बर बेलि विताना ॥
सुरतरु सरिस सुभायँ सुहाए । मनहुँ विबुध बन परिहरि आए ॥
गुंज मंजुतर मधुकर श्रेनी । त्रिविध बयारि बहइ सुख देनी ॥
दो०—नीलकंठ कलकंठ सुक चातक चक्र चकोर ।

भाँति भाँति बोलहिं बिहग श्रवन सुखद चित चोर ॥ १३७ ॥

करि केहरि कपि कोल कुरंगा । विगतवैर विचरहिं सब संगी ॥
फिरत अहेर राम छवि देखी । होहिं मुदित मृगबृंद विसेषी ॥
विबुध विपिन जहँ लगि जग माहीं । देखि रामवनु सकल सिहाहीं ॥
सुरसरि सरसइ दिनकर कन्या । मेकलसुता गोदावरि घन्या ॥
सब सर सिंधु नदी नद नाना । मंदाकिनि कर करहिं बखाना ॥

उदय अस्त गिरि अरु कैलासू। मंदर मेरु सकल सुरबासू ॥
 सैल हिमाचल आदिक जेते। चित्रकूट जसु गावहिं तेते ॥
 विधि मुदित मन सुखु न समाई। श्रम विनु विपुल बड़ाई पाई ॥
 दो०—चित्रकूट के बिहग मृग बेलि बिटप तृन जाति।

पुन्य पुंज सब धन्य अस कहहिं देव दिन राति ॥१३८॥
 नयनवंत रघुवरहि बिलोकी। पाइ जनम फल होहिं विसोकी ॥
 परसि चरन रज अचर सुखारी। भए परम पद के अधिकारी ॥
 सो बनु सैल सुभायँ सुहावन। मंगलमय अति पावन पावन ॥
 महिमा कहिअ कवनि विधि तासू। सुखसागर जहँ कीन्ह निवासू ॥
 पय पयोधि तजि अवध बिहाई। जहँ सिय लखनु रामु रहे आई ॥
 कहि न सकहिं सुषमा जसि कानन। जौं सत सहस होहिं सहसानन ॥
 सो मैं बरनि कहौ विधि केहीं। डावर कमठ कि मंदर लेहीं ॥
 सेवहिं लखनु करम मन बानी। जाइ न सीलु सनेहु बखानी ॥
 दो०—छिनु छिनु लखि सिय राम पद जानि आपु पर नेहु।

करत न सपनेहुँ लखनु चितु बंधु मातु पितु गेहु ॥१३९॥
 राम संग सिय रहति सुखारी। पुर परिजन गृह सुरति बिसारी ॥
 छिनु छिनु पिय विधु बदन निहारी। प्रमुदित मनहुँ चकोरकुमारी ॥
 नाह नेहु नित बढ़त बिलोकी। हरषित रहति दिवस जिमि कोकी ॥
 सिय मनु राम चरन अनुरागा। अवध सहस सम बनु प्रिय लगा ॥
 परनकुटी प्रिय प्रियतम संग। प्रिय परिवार कुरंग बिहंगा ॥

Vinay Ayasthi Sahib Bhuvan Vani Trust Donations

सासु ससुर सम मुनितिय मुनिवर । असनु अमिअ सम कद मूल फर
नाथ साथ साँथरी सुहाई । मयन सयन सय सम सुखदाई ॥
लोकप होहिं बिलोकत जासू । तेहि कि मोहि सक बिषय बिलासू
दो०—सुमिरत रामहि तजहिं जन तृन सम बिषय बिलासु ।

रामप्रिया जग जननि सिय कछु न आचरजु तासु ॥१४०॥

सीय लखन जेहि बिधि सुखु लहहीं । सोइ रघुनाथ करहिं सोइ कहहीं ।
कहहिं पुरातन कथा कहानी । सुनहिं लखनु सिय अति सुखु मानी
जब जब रामु अवध सुधि करहीं । तब तब बारि बिलोचन भरहीं ॥
सुमिरि मातु पितु परिजन भाई । भरत सनेहु सीलु सेवकाई ॥
कृपासिंधु प्रभु होहिं दुखारी । धीरजु धरहिं कुसमउ बिचारी ॥
लखि सिय लखनु बिकल होइ जाहीं । जिमि पुरुषहि अनुसर परिछाहीं
प्रिया बंधु गति लखि रघुनंदनु । धीर कृपाल भगत उर चंदनु ॥
लगे कहन कछु कथा पुनीता । सुनि सुखु लहहिं लखनु अरु सीता
दो०—रामु लखन सीता सहित सोहत परन निकेत ।

जिमि बासव बस अमरपुर सची जयंत समेत ॥१४१॥

जोगवहिं प्रभु सिय लखनहि कैसैं । पलक बिलोचन गोलक जैसैं ॥
सेवहिं लखनु सीय रघुवीरहि । जिमि अबिबेकी पुरुष सरीरहि ॥
एहि बिधि प्रभु बन बसहिं सुखारी । खग मृग सुर तापस हितकारी
कहेउँ राम बन गवनु सुहावा । सुनहु सुमंत्र अवध जिमि आवा
फिरेउ निषादु प्रभुहि पहुँचाई । सचिव सहित रथ देखेसि आई ॥

मंत्री बिकल बिलोकि निषादू । कहि न जाइ जस भयउ बिषादू ॥
 राम राम सिय लखन पुकारी । परेउ धरनितल व्याकुल भारी ॥
 देखि दखिन दिसि हय हिहिनाहीं । जनु विनु पंख बिहग अकुलहीं
 दो०—नहिं तन चरहिं न पिअहिं जलु मोचहिं लोचन बारि ।

व्याकुल भए निषाद सब रघुबर बाजि निहारि ॥१४२॥

धरि धीरजु तब कहइ निषादू । अब सुमंत्र परिहरहु बिषादू ॥
 तुम्ह पंडित परमारथ ग्याता । धरहु धीर लखि बिमुख बिधाता ॥
 बिबिधि कथा कहि कहि मृदु बानी । रथ बैठारेउ बरबस आनी ॥
 सोक सिथिल रथु सकइ न हाँकी । रघुबर विरह पीर उर बाँकी ॥
 चरफराहिं मग चलहिं न घोरि । बन मृग मनहुँ आनि रथ जोरि ॥
 अदुकि परहिं फिरि हेरहिं पीछें । राम बियोगि बिकल दुख तीछें ॥
 जो कह रामु लखनु बैदेही । हिकरि हिकरि हित हेरहिं तेही ॥
 बाजि विरह गति कहि किमि जाती । विनु मनि फनिक बिकल जेहि भाँती ॥

०—भयउ निषादु बिषादबस देखत सचिव तुरंग ।

बोलि सुसेवक चारि तब दिए सारथी संग ॥१४३॥

गुह सारथिहि फिरेउ पहुँचाई । विरहु बिषादु बरनि नहिं जाई ॥
 चले अवध लेइ रथहि निषादा । होहिं छनहिं छन मगन बिषादा ॥
 सोच सुमंत्र बिकल दुख दीना । धिग जीवन रघुबीर बिहीना ॥
 रहिहि न अंतहुँ अधम सरीरु । जसु न लहेउ बिछुरत रघुबीरु ॥

भए अजस अघ भाजन प्राणा । कवन हेतु नहिं करत प्याना ॥

अहह मंद मनु अवसर चूका । अजहुँ न हृदय होत दुइ टूका ॥
मीजि हाथ सिरु धुनि पछिताई । मनहुँ कृपन धन रासि गवाँई ॥
धिरिद बाँधि बर वीरु कहाई । चलेउ समर जनु सुभट पराई ॥
दो०—बिप्र बिबेकी बेदबिद संमत साधु सुजाति ।

जिमि धोखें मदपान कर सचिव सोच तेहि भाँति ॥ १४४ ॥

जिमि कुलीन तिय साधु सयानी । पतिदेवता करम मन बानी ॥
रहै करम बस परिहरि नाहू । सचिव हृदयँ तिमि दारुन दाहू ॥
लोचन सजल डीठि भइ थोरी । सुनइ न श्रवन बिकल मति भोरी ॥
सूखहि अधर लागि मुहँ लाटी । जिउ न जाइ उर अवधि कपाटी ॥
बिवरन भयउ न जाइ निहारी । मारेसि मनहुँ पिता महतारी ॥
हानि गलानि बिपुल मन व्यापी । जमपुर पंथ सोच जिमि पापी ॥
वचनु न आव हृदयँ पछिताई । अवध काह मैं देखव जाई ॥
राम रहित रथ देखिहि जोई । सकुचिहि मोहि बिलोकत सोई ॥

दो०—धाइ पूँछिहहिं मोहि जब बिकल नगर नर नारि ।

उतरु देव मैं सबहि तब हृदयँ बज्रु बैठारि ॥ १४५ ॥

पुछिहहिं दीन दुखित सब माता । कहव काह मैं तिन्हहि बिधाता ॥
पूछिहि जबहिं लखन महतारी । कहिहउँ कवन सँदेस सुखारी ॥
राम जननि जब आइहि धाई । सुमिरि बन्धु जिमि धेनु लवाई ॥
पूँछत उतरु देव मैं तेही । गे बनु राम लखनु बैदेही ॥
जोइ पूँछिहि तेहि ऊतरु देवा । जाइ अवध अब यहु सुखु लेवा ॥

पूँछिहि जबहिं राउ दुख दीना । जिवनु जासु रघुनाथ अधीना ॥
 देहउँ उतरु कौनु सुहु लाई । आयउँ कुसल कुअँर पहुँचाई ॥
 सुनत लखन सिय राम सँदेसू । तृन जिमि तनु परिहरिहि नरेसू ॥
 दो०—हृदउ न बिदरेउ पंक जिमि बिछुरत प्रीतमु नीरु ।

जानत हौं मोहि दीन्ह बिधि यहु जातना सरीरु ॥१४६॥

एहि बिधि करत पंथ पछितावा । तमसा तीर तुरत रथु आवा ॥
 बिदा किए करि बिनय निषादा । फिरे पायँ परि बिकल विषादा ॥
 पैठत नगर सचिव सकुचाई । जनु मारेसि गुर बाँभन गाई ॥
 बैठि बिटप तर दिवसु गवाँवा । साँझ समय तब अवसरु पावा ॥
 अवध प्रवेसु कीन्ह अँधिआरें । पैठ भवन रथु राखि दुआरें ॥
 जिन्ह जिन्ह समाचार सुनि पाए । भूप द्वार रथु देखन आए ॥
 रथु पहिचानि बिकल लखि घोरे । गरहिं गात जिमि आतप ओरे ॥
 नगर नारि नर ब्याकुल कैसैं । निघटत नीर मीनगन जैसैं ॥

दो०—सचिव आगमनु सुनत सबु बिकल भयउ रनिवासु ।

भवनु भयंकरु लाग तेहि मानहुँ प्रेत निवासु ॥१४७॥

अति आरति सब पूँछहिं रानी । उतरु न आव बिकल भइ बानी ॥
 सुनइ न श्रवन नयन नहिं सूझा । कहहु कहाँ नृपु तेहि तेहि बूझा ॥
 दासिन्ह दीख सचिव बिकलाई । कौसल्या गृहँ गई लवाई ॥
 जाइ सुमंत्र दीख कस राजा । अमिअरहित जनु चंदु विराजा ॥

लेइ उसासु सोच एहि भाती । सुरपुरत जनु खसैउ जजाती ॥
 लेत सोच भरि छिनु छिनु छाती । जनु जरि पंख परेउ संपाती ॥
 राम राम कह राम सनेही । पुनि कह राम लखन वैदेही ॥
 दो०—देखि सचिव जय जीव कहि कीन्हेउ दंड प्रनामु ।

सुनत उठेउ व्याकुल नृपति कहु सुमंत्र कहँ रामु ॥१४८॥

भूप सुमंत्रु लीन्ह उर लाई । बूझत कछु अधार जनु पाई ॥
 सहित सनेह निकट बैठारी । पूँछत राउ नयन भरि बारी ॥
 राम कुसल कहु सखा सनेही । कहँ रघुनाथु लखनु वैदेही ॥
 आने फेरि कि बनहि सिधाए । सुनत सचिव लोचन जल छाए ॥
 सोक विकल पुनि पूँछ नरेसू । कहु सिय राम लखन संदेसू ॥
 राम रूप गुन सील सुभाऊ । सुमिरि सुमिरि उर सोचत राऊ ॥
 राउ सुनाइ दीन्ह बनवासू । सुनि मन भयउ न हरषु हराँसू ॥
 सो सुत बिछुरत गए न प्राना । को पापी बड़ मोहि समाना ॥

दो०—सखा रामु सिय लखनु जहँ तहाँ मोहि पहुँचाउ ।

नाहि त चाहत चलन अब प्रान कहँ सतिभाउ ॥१४९॥

पुनि पुनि पूँछत मंत्रिहि राऊ । प्रियतम सुअन संदेस सुनाऊ ॥
 करहि सखा सोइ बेगि उपाऊ । रामु लखनु सिय नयन देखाऊ ॥
 सचिव धीर धरि कह मृदु बानी । महाराज तुम्ह पंडित ग्यानी ॥
 वीर सुधीर धुरंधर देवा । साधु समाजु सदा तुम्ह सेवा ॥
 जनम मरन सब दुख सुख भोगा । हानि लाभु प्रिय मिलन वियोगा ॥

काल करम बस होहि गोसाई । बरबस राति दिवस की नाई ॥
 सुख हरप्रहिं जड़ दुख बिलखाहीं । दोउ सम धीर धरहिं मन माहीं ॥
 धीरज धरहु बिबेकु बिचारी । छाड़िअ सोच सकल हितकारी ॥
 दो०—प्रथम बासु तमसा भयउ दूसर सुरसरि तीर ।

न्हाइ रहे जलपानु करि सिय समेत दोउ बीर ॥१५०॥
 केवट कीन्ह बहुत सेवकाई । सो जामिनि सिंगरौ गवाँई ॥
 होत प्रात बट छीरु मगावा । जटा मुकुट निज सीस बनावा ॥
 राम सखाँ तव नाव मगाई । प्रिया चढ़ाइ चढ़े रघुराई ॥
 लखन बान धनु धरे बनाई । आपु चढ़े प्रभु आयसु पाई ॥
 बिकल बिलोकि मोहि रघुवीर । बोले मधुर बचन धरि धीरा ॥
 तात प्रनामु तात सन कहेहू । बार बार पद पंकज गहेहू ॥
 करबि पायँ परि बिनय बहोरी । तात करिअ जनि चिंता मोरी ॥
 बन मग मंगल कुसल हमारें । कृपा अनुग्रह पुन्य तुम्हारें ॥

छं०—तुम्हरेँ अनुग्रह तात कानन जात सब सुखु पाइहौं ।
 प्रतिपालि आयसु कुसल देखन पाय पुनि फिरि अइहौं ॥
 जननीं सकल परितोषि परि परि पायँ करि बिनती धनी ।
 तुलसी करेहु सोइ जतनु जेहिं कुसली रहहिं कोसल धनी ॥

सो०—गुर सन कहब सँदेसु बार बार पद पदुम गहि ।

करब सोइ उपदेसु जेहिं न सोच मोहि अवधपति ॥१५१॥

पुरजन परिजन सकल निहोरी । तात सुनाइहु बिनती मोरी ॥

सोइ सब भाँति मोर हितकारी । जातैं रह नरनाहु सुखारी ॥
 कहव, सँदेसु भरत के आएँ । नीति न तजिअ राजपदु पाएँ ॥
 पालेहु प्रजहि करम मन बानी । सेएहु मातु सकल सम जानी ॥
 ओर निबाहेहु भायप भाई । करि पितु मातु सुजन सेवकाई ॥
 तात भाँति तेहि राखव राऊ । सोच मोर जेहिं करै न काऊ ॥
 लखन कहे कछु बचन कठोरा । बरजि राम पुनि मोहि निहोरा ॥
 बार बार निज सपथ देवाई । कहबिन तात लखन लरिकाई ॥
 दो०—कहि प्रनासु कछु कहन लिय सिय भइ सिथिल सनेह ।

थकित बचन लोचन सजल पुलक पलवित देह ॥१५२॥

तेहि अवसर रघुवर रुख पाई । केवट पारहि नाव चलाई ॥
 रघुकुलतिलक चले एहि भाँती । देखउँ ठाढ़ कुलिस धरि छाती ॥
 मैं आपन किमि कहौं कलेसू । जिअत फिरेउँ लेइ राम सँदेसू ॥
 अस कहि सचिव बचन रहि गयऊ । हानि गलानि सोच बस भयऊ
 सूत बचन सुनतहिं नरनाहू । परेउ धरनि उर दारुन दाहू ॥
 तलफत विषम मोह मन मापा । माजा मनहुँ मीन कहूँ ब्यापा ॥
 करि बिलाप सब रोवहिं रानी । महा विपति किमि जाइ बखानी ॥
 सुनि बिलाप दुखहू दुखु लागा । धीरजहू कर धीरजु भागा ॥
 दो०—भयउ कोलाहलु अवध अति सुनि नृप राउर सोरु ।

बिपुल बिहग बन परेउ निसि मानहुँ कुलिस कठोरु ॥१५३॥

प्राण कंठगत भयउ भुआलू । मनि बिहीन जनु ब्याकुल ब्यालू ॥

इंद्रौ सकल बिकल भई भारी । जनु सर सरसिज वनु बिनु बारी ॥
 कौसल्याँ नृपु दीख मलाना । सबिकुल रवि अँथयउ जियँ जाना ॥
 उर धरि धीर राम महतारी । बोली बचन समय अनुसारी ॥
 नाथ समुझि मन करिअ विचारू । राम बियोग पयोधि अपारू ॥
 करनधार तुम्ह अवध जहाजू । चढ़ेउ सकल प्रिय पथिक समाजू ॥
 धीरजु धरिअ त पाइअ पारू । नाहिं त बूढ़िहि सबु परिवारू ॥
 जौं जियँ धरिअ चिनय पिय मोरी । रामु लखनु सिय मिलहिं बहोरी
 दो०—प्रिया बचन मृदु सुनत नृपु चितयउ अँखि उधारि ।

तलफत मीन मलीन जनु सींचत सीतल बारि ॥१५४॥
 धरि धीरजु उठि बैठ भुआलू । कहु सुमंत्र कहँ राम कृपालू ॥
 कहाँ लखनु कहँ रामु सनेही । कहँ प्रिय पुत्रबधू वैदेही ॥
 बिलपत राउ बिकल बहु भाँती । भइ जुग सरिस सिराति न राती ॥
 तापस अंध साप सुधि आई । कौसल्यहि सब कथा सुनाई ॥
 भयउ बिकल बरनत इतिहासा । राम रहित धिग जीवन आसा ॥
 सो तनु राखि करब मैं काहा । जेहिं न प्रेम पनु मोर निबाहा ॥
 हा रघुनंदन प्रान पिरीते । तुम्ह बिनु जिअत बहुत दिन बीते ॥
 हा जानकी लखन हा रघुबर । हा पितु हित चित चातक जलधर ॥
 दो०—राम राम कहि राम कहि राम राम कहि राम ।

तनु परिहरि रघुबर बिरहँ राउ गयउ सुरधाम ॥१५५॥

जिअत राम बिधु बदन नु निहारा । राम बिरह करि मरनु सँवारा ॥
 सोक बिकल सब रोवहिं रानी । रूपु सीलु बलु तेजु बखानी ॥
 करहिं बिलाप अनेक प्रकारा । परहिं भूमितल वारहिं वारा ॥
 बिलपहिं बिकल दास अरु दासी । घर घर रुदनु करहिं पुरवासी ॥
 अँथयउ आजु भानुकुल भानू । धरम अवधि गुन रूप निधानू ॥
 गारीं सकल कैकइहि देहीं । नयन बिहीन कीन्ह जग जेहीं ॥
 एहि बिधि बिलपत रैन विहानी । आए सकल महामुनि ग्यानी ॥
 दो०—तब बसिष्ठ मुनि समय सम कहि अनेक इतिहास ।

सोक नेवारेउ सबहि कर निज बिग्यान प्रकास ॥१५६॥

तेल नावँ भरि नृप तनु राखा । दूत बोलाइ बहुरि अस भाषा ॥
 धावहु बेगि भरत पहिं जाहू । नृप सुधि कतहुँ कहहु जनि काहू ॥
 एतनेइ कहेहु भरत सन जाई । गुर बोलाइ पठयउ दोउ भाई ॥
 सुनि मुनि आयसु धावन धाए । चले बेग बर बाजि लजाए ॥
 अनरथु अवध अरंभेउ जब तैं । कुसगुन होहिं भरत कहूँ तब तैं ॥
 देखहिं राति भयानक सपना । जागि करहिं कटु कोटि कल्पना ॥
 बिप्र जेवाँइ देहिं दिन दाना । सिव अभिषेक करहिं बिधि नाना ॥
 मागहिं हृदयँ महेस मनाई । कुसल मातु पितु परिजन भाई ॥
 दो०—एहि बिधि सोचत भरत मन धावन पहुँचे आइ ।

गुर अनुसासन श्रवन सुनि चले गनेसु मनाइ ॥१५७॥

चले समीर बेग हय हाँके । नाघत सरित सैल बन बाँके ॥

हृदयँ सोचु बड़ कछु न सोहाई । अस जानहिं जियँ जाउँ उड़ाई ॥
 एक निमेष बरष सम जाई । एहि विधि भरत नगर निअराई ॥
 असगुन होहिं नगर पैठारा । रटहिं कुभाँति कुखेत करारा ॥
 खर सिआर बोलहिं प्रतिकूला । सुनि सुनि होइ भरत मन सूला ॥
 श्रीहत सर सरिता बन बागा । नगरु बिसेषि भयावनु लागा ॥
 खग मृग हय गय जाहिं न जोए । राम बियोग कुरोग बिगोए ॥
 नगर नारि नर निपट दुखारी । मनहुँ सबन्हि सब संपति हारी ॥
 दो०—पुरजन मिलहिं न कहहिं कछु गवँहिं जोहारहिं जाहिं ।

भरत कुसल पूँछि न सकहिं भय बिषाद मन माहिं ॥ १५८ ॥

हाट बाट नहिं जाइ निहारी । जनु पुर दहँ दिसि लागि दवारी ॥
 आवत सुत सुनि कैकयनंदिनि । हरषी रविकुल जलरुह चंदिनि ॥
 सजि आरती मुदित उठि धाई । द्वारेहिं भेंटि भवन लेइ आई ॥
 भरत दुखित परिवारु निहारा । मानहुँ तुहिन बनज बनु मारा ॥
 कैकेई हरषित एहि भाँती । मनहुँ मुदित दव लाइ किराती ॥
 सुतहि ससोच देखि मनु मारें । पूँछति नैहर कुसल हमारें ॥
 सकल कुसल कहि भरत सुनाई । पूँछी निज कुल कुसल भलाई ॥
 कहु कहँ तात कहाँ सब माता । कहँ सिय राम लखन प्रिय भ्राता ॥

दो०—सुनि सुत बचन सनेहमय कपट नीर भरि नैन ।

भरत श्रबन मन सूल सम पापिनि बोली बैन ॥ १५९ ॥

तात बात मैं सकल सँचारी । भै मंथरा सहाय बिचारी ॥

कछुक काज बिधि बीच बिगारेउ । भूपति सुरपति पुर पगु धारेउ ॥
 सुनत भरतु भए बिबस बिषादा । जनु सहमेउ करि केहरि नादा ॥
 तात तात हा तात पुकारी । परे भूमितल ब्याकुल भारी ॥
 चलत न देखन पायउँ तोही । तात न रामहि सौपेहु मोही ॥
 बहुरि धीर धरि उठे सँभारी । कहु पितु मरन हेतु महतारी ॥
 सुनि सुत बचन कहति कैकेई । मरमु पाँछि जनु माहुर देई ॥
 आदिहु तैं सब आपनि करनी । कुटिल कठोर मुद्रित मन बरनी ॥
 दो०-भरतहि बिसरेउ पितु मरन सुनत राम बन गौनु ।

हेतु अपनपउ जानि जियँ थकित रहे धरि मौनु ॥१६०॥

बिकल बिलोकि सुतहि समुझावति । मनहुँ जरे पर लोनु लगावति ॥
 तात राउ नहिँ सोचै जोगू । बिद्वइ सुकृत जसु कीन्हेउ भोगू ॥
 जीवत सकल जनम फल पाए । अंत अमरपति सदन सिधाए ॥
 अस अनुमानि सोच परिहरहू । सहित समाज राज पुर करहू ॥
 सुनि सुठि सहमेउ राजकुमारू । पाकें छत जनु लग अँगारू ॥
 धीरज धरि भरि लेहिँ उसासा । पापिनि सबहि भाँति कुल नासा ॥
 जौँ पै कुरुचि रही अति तोही । जनमत काहे न मारे मोही ॥
 पेड़ काटि तैं पालउ सींचा । मीन जिअन निति बारि उलीचा ॥

दो०-हंसबंसु दसरथु जनकु राम लखन से भाइ ।

जननी तूँ जननी भई बिधि सन कछु न बसाइ ॥१६१॥

जब तैं कुमति कुमत जियँ ठयऊ । खंड खंड होइ हृदउ न गबऊ ॥

Vinay Avasthi Sahib Bhuvan Vani Trust Donations

बर मागत मन भइ नहि पीरा । गरि ने जीह मुह परेउ न कीरा ॥
 भूपँ प्रतीतितोरि किमि कीन्ही । मरन काल बिधि मति हरि लीन्ही
 बिधिहुँ न नारि हृदय गति जानी । सकल कपट अध अवगुन खानी ॥
 सरल सुसील धरम रत राऊ । सो किमि जानै तीय सुभाऊ ॥
 अस को जीव जंतु जग माहीं । जेहि रघुनाथ प्रानप्रिय नाहीं ॥
 भे अति अहित रामु तेउ तोही । को तू अहसि सत्य कहु मोही ॥
 जो हसि सो हसि मुहँ मसि लाई । आँखि ओट उठि बैठहि जाई ॥
 दो०—राम बिरोधी हृदय तें प्रगट कीन्ह बिधि मोहि ।

मो समान को पातकी बादि कहउँ कछु तोहि ॥१६२॥
 सुनि सत्रुघुन मातु कुटिलाई । जरहिं गात रिस कछु न बसाई ॥
 तेहि अवसर कुबरी तहँ आई । बसन बिभूषन बिबिध बनाई ॥
 लखि रिस भरेउ लखन लघु भाई । वरत अनल घृत आहुति पाई ॥
 हुमगि लात तकि कूबर मारा । परि मुह भर महि करत पुकारा ॥
 कूबर टूटेउ फूट कपारू । दलित दसन मुख रुधिर प्रचारू ॥
 आह दइअ मैं काह नसावा । करत नीक फल अनइस पावा ॥
 सुनि रिपुहन लखि नख सिख खोटी । लगे घसीटन धरि धरि झोंटी
 भरत दयानिधि दीन्हि छड़ाई । कौसल्या पहिं गे दोउ भाई ॥
 दो०—मलिन बसन बिबरन बिकल कृस सरीर दुख भार ।

कनक कल्प बर बेलि बन मानहुँ हनी तुसार ॥१६३॥

भरतहि देखि मातु उठि धाई । मुरुछित अवनि परी झई आई ॥

Vinay Avasthi Sahib Bhuvan Vani Trust Donations

देखत भरतु बिकल भए भारी । पर चरन तन दसा बिसारी ॥
मातु तात कहँ देहि देखाई । कहँ सिय रामु लखनु दोउ भाई ॥
कैकइ कत जनमी जग माझा । जौं जनमित भइ काहे न बाँझा ॥
कुल कलंकु जेहिं जनमेउ मोही । अपजस भाजन प्रियजन द्रोही ॥
कोतिभुवन मोहि सरिस अभागी । गति असि तोरि मातु जेहि लागी ॥
पितु सुरपुर बन रघुवर केतू । मैँ केवल सब अनरथ हेतू ॥
धिग मोहि भयउँ वेनु बन आगी । दुसह दाह दुख दूषन भागी ॥
दो०—मातु भरत के वचन मृदु सुनि पुनि उठी सँभारि ।

लिए उठाइ लगाइ उर लोचन मोचति बारि ॥ १६४ ॥

सरल सुभाय मायँ हियँ लाए । अति हित मनहुँ राम फिरि आए ॥
भेंटेउ बहुरि लखन लघु भाई । सोकु सनेहु न हृदयँ समाई ॥
देखि सुभाउ कहत सबु कोई । राम मातु अस काहे न होई ॥
माताँ भरतु गोद बैठारे । आँसु पोंछि मृदु वचन उचारे ॥
अजहुँ बच्छ बलि धीरज धरहू । कुसमउ समुझि सोक परिहरहू ॥
जनि मानहु हियँ हानि गलानी । काल करम गति अघटित जानी ॥
काहुहि दोसु देहु जनि ताता । भा मोहि सब विधि वाम विधाता ॥
जो एतेहुँ दुख मोहि जिआवा । अजहुँ को जानइ कातेहि भावा ॥
दो०—पितु आयस भूषन बसन तात तजे रघुबीर ।

बिसमउ हरषु न हृदयँ कछु पहिरे बलकल चीर ॥ १६५ ॥

मुख प्रसन्न मन रंग न रोषू । सब कर सब विधि करि परितोषू ॥

चले Vinay Avasthi Sahib Bhuvan Vani Trust Donations

सुनतहिं लखनु चले उठि साथी । रहइ न राम चरन अनुरागी ॥
 तब रघुपति सबही सिरु नाई । चले संग सिय अरु लघु भाई ॥
 रामु लखनु सिय बनहि सिधाए । गइउं न संग न प्रान पठाए ॥
 यहु सबु भा इन्ह आँखिन्ह आगें । तउ न तजा तनु जीव अभागें ॥
 मोहि न लाज निज नेहु निहारी । राम सरिस सुत मैं महतारी ॥
 जिए मरै भल भूपति जाना । मोर हृदय सत कुलिस समाना ॥
 दो०—कौसल्या के बचन सुनि भरत सहित रनिवासु ।

ब्याकुल बिलपत राजगृह मानहुँ सोक नेवासु ॥ १६६ ॥

बिलपहिं बिकल भरत दोउ भाई । कौसल्याँ लिए हृदयँ लगाई ॥
 भाँति अनेक भरतु समुझाए । कहि विवेकमय बचन सुनाए ॥
 भरतहुँ मातु सकल समुझाई । कहि पुरान श्रुति कथा सुहाई ॥
 छल बिहीन सुचि सरल सुवानी । बोले भरत जोरि जुग पानी ॥
 जे अघ मातु पिता सुत मारें । गाइ गोठ महिसुर पुर जारें ॥
 जे अघ तिय बालक बध कीन्हें । मीत महीपति मादुर दीन्हें ॥
 जे पातक उपपातक अहहीं । करम बचन मन भव कवि कहहीं ॥
 ते पातक मोहि होहुँ बिधाता । जौं यहु होइ मोर मत माता ॥

दो०—जे परिहरि हरि हर चरन भजहिं भूतगन घोर ।

तेहि कइ गति मोहि देउ बिधि जौं जननी मत मोर ॥ १६७ ॥

बेचहिं वेदु धरमु दुहि लेहीं । पिसुन पराय पाप कहि देहीं ॥

कपटी कुटिल कलहप्रिय क्रोधी । वेद विदूषक विस्व विरोधी ॥
लोभी लंपट लोलुपचारा । जे ताकहिं परधनु परदारा ॥
पावों मैं तिन्ह कै गति घोरा । जौं जननी यहु संमत मोरा ॥
जे नहिं साधुसंग अनुरागे । परमारथ पथ विमुख अभागे ॥
जे न भजहिं हरि नरतनु पाई । जिन्हहि न हरि हर सुजसु सोहाई ॥
तजि श्रुतिपंथु बाम पथ चलहीं । बंचक विरचि वेष जगु छलहीं ॥
तिन्ह कै गति मोहि संकर देऊ । जननी जौं यहु जानौं भेऊ ॥
दो०—मातु भरत के बचन सुनि साँचे सरल सुभायँ ।

कहति राम प्रिय तात तुम्ह सदा बचन मन कायँ ॥ १६८ ॥

राम प्रानहु तैं प्रान तुम्हारे । तुम्ह रघुपतिहि प्रानहु तैं प्यारे ॥
बिधु विष चवै सवै हिमु आगी । होइ बारिचर बारि विरागी ॥
भएँ ग्यानु बरु मिटै न मोहू । तुम्ह रामहि प्रतिकूल न होहू ॥
मत तुम्हार यहु जो जग कहहीं । सो सपनेहुँ सुख सुगति न लहहीं ॥
अस कहि मातु भरतु हियँ लाए । यन पय सवहिं नयन जल छाए ॥
करत बिलाप बहुत एहि भाँती । बैठेहिं बीति गई सब राती ॥
बामदेउ बसिष्ठ तव आए । सचिव महाजन सकल बोलाए ॥
मुनि बहु भाँति भरत उपदेसे । कहि परमारथ बचन सुदेसे ॥

दो०—तात हृदयँ धीरजु धरहु करहु जो अवसर आजु ।

उठे भरत गुर बचन सुनि करन कहेउ सबु साजु ॥ १६९ ॥

नृपतनु वेद विदित अन्हवावा । परम विचित्र विमानु बनावा ॥

गहि पद भरत मातु सब राखी । रहीं रानि दरसन अभिलाषी ॥
 चंदन अगर भार बहु आए । अमित अनेक सुगंध सुहाए ॥
 सरजु तीर रचि चिता बनाई । जनु सुरपुर सोपान सुहाई ॥
 एहि विधि दाह क्रिया सब कीन्ही । विधिवत न्हाइ तिलांजुलि दीन्ही
 सोधि सुमृति सब वेद पुराना । कीन्ह भरत दसगात विधाना ॥
 जहँ जस मुनिवर आयसु दीन्हा । तहँ तस सहस भाँति सबु कीन्हा ॥
 भए विसुद्ध दिए सब दाना । धेनु बाजि गज बाहन नाना ॥
 दो०—सिंघासन भूषन बसन अन्न धरनि धन धाम ।

दिए भरत लहि भूमिसुर भे परिपूरन काम ॥१७०॥

पितु हित भरत कीन्ह जसि करनी । सो मुख लाख जाइ नहिं बरनी
 सुदिनु सोधि मुनिवर तब आए । सचिव महाजन सकल बोलाए ॥
 बैठे राजसभाँ सब जाई । पठए बोलि भरत दोउ भाई ॥
 भरतु बसिष्ठ निकट बैठारे । नीति धरममय वचन उचारे ॥
 प्रथम कथा सब मुनिवर बरनी । कैकई कुटिल कीन्ह जसि करनी ॥
 भूप धरमब्रतु सत्य सराहा । जेहिं तनु परिहरि प्रेम निवाहा ॥
 कहत राम गुन सील सुभाऊ । सजल नयन पुलकेउ मुनिराऊ ॥
 बहुरि लखन सिय प्रीति बखानी । सोक सनेह मगन मुनि ग्यानी ॥
 दो०—सुनहु भरत भावी प्रबल बिलखि कहेउ मुनिनाथ ।

हानि लाभु जीवनु मरनु जसु अपजसु बिधि हाथ ॥१७१॥

अस विचारि केहि देइअ दोसु । ब्यरथ काहि पर कीजिअ रोसु ॥

तात बिचार करहु मन माहीं । सोच जोगु दसरथु नृपु नाहीं ॥
 सोचिअ बिप्र जो बेद बिहीना । तजि निज धरमु विषय लयलीना
 सोचिअ नृपति जो नीति न जाना । जेहि न प्रजा प्रिय प्रान समाना
 सोचिअ ब्रयसु कृपन धनवानू । जोन अतिथि सिव भगति सुजानू
 सोचिअ सूद्रु बिप्र अवमानी । मुखर मानप्रिय ग्यान गुमानी ॥
 सोचिअ पुनि पति बंचक नारी । कुटिल कलहप्रिय इच्छाचारी ॥
 सोचिअ बटु निज व्रतु परिहरई । जो नहिं गुर आयसु अनुसरई ॥

दो०—सोचिअ गृही जो मोह बस करइ करम पथ त्याग ।

सोचिअ जती प्रपंच रत बिगत बिबेक विराग ॥ १७२ ॥

बैखानस सोइ सोचै जोगू । तपु बिहाइ जेहि भावइ भोगू ॥
 सोचिअ पिसुन अकारन क्रोधी । जननि जनक गुर बंधु बिरोधी ॥
 सब बिधि सोचिअ पर अपकारी । निज तनु पोषक निरदय भारी ॥
 सोचनीय सबहीं बिधि सोई । जो न छाड़ि छलु हरिजन होई ॥
 सोचनीय नहिं कोसलराऊ । भुवन चारिदस प्रगट प्रभाऊ ॥
 भयउ न अहइ न अब होनिहारा । भूप भरत जस पिता तुम्हारा ॥
 बिधि हरि हरु सुरपति दिसिनाथा । वरनहिं सब दसरथ गुन गाथा ॥

दो०—कहहु तात केहि भाँति कोउ करिहि बड़ाई तासु ।

राम लखन तुम्ह सत्रुहन सरिस सुअन सुचि जासु ॥ १७३ ॥

सब प्रकार भूपति बड़भागी । बादि बिप्रादु करिअ तेहि लागी ॥
 यहु सुनि समुझि सोचु परिहरहू । सिर धरि राज रजायसु करहु ॥

रायँ राजपदु तुम्ह कहँ दीन्हा । पिता बचनु फुर चाहिअ कीन्हा ॥
 तजे रामु जेहिं बचनहि लागी । तनु परिहरेउ राम बिरहागी ॥
 नृपहि बचन प्रिय नहिं प्रिय प्राना । करहु तात पितु बचन प्रवाना ॥
 करहु सीस धरि भूप रजाई । हइ तुम्ह कहँ सब भाँति भलाई ॥
 परसुराम पितु अग्या राखी । मारी मातु लोक सब साखी ॥
 तनय जजातिहि जौवनु दयऊ । पितु अग्याँ अघ अजसु न भयऊ ॥
 दो०—अनुचित उचित बिचारु तजि जे पालहिं पितु बैन ।

ते भाजन सुख सुजस के बसहिं अमरपति ऐन ॥१७४॥

अवमि नरेस बचन फुर करहू । पालहु प्रजा सोकु परिहरहू ॥
 सुरपुर नृपु पाइहि परितोषू । तुम्ह कहँ सुकृतु सुजसु नहिं दोषू ॥
 बेद विदित संमत सबही का । जेहि पितु देइ सो पावइ टीका ॥
 करहु राजु परिहरहु गलानो । मानहु मोर बचन हित जानी ॥
 सुनि सुखु लहव राम बैदेहीं । अनुचित कहव न पंडित केहीं ॥
 कौसल्यादि सकल महतारीं । तेउ प्रजा सुख होहिं सुखारीं ॥
 परम तुम्हार राम कर जानिहि । सो सब विधि तुम्ह सन भल मानिहि ॥
 सौपेहु राजु राम के आएँ । सेवा करहु सनेह सुहाएँ ॥
 दो०—कीजिअ गुर आयसु अवसि कहहिं सचिव कर जोरि ।

रघुपति आएँ उचित जस तस तब करब बहोरि ॥१७५॥

कौसल्या धरि धीरजु कहई । पूत पथ्य गुर आयसु अहई ॥
 सो आदरिअ करि अहित मानी । तजिअ विषाद काल गति जानी ॥

वन गधुपति सुरपति नरनाहू । तुम्ह एहि भाँति तात कदराहू ॥
परिजन प्रजा सचिव सब अंबा । तुम्हही सुत सब कहँ अवलंबा ॥
लखि विधि बाम कालु कठिनाई । धीरजु धरहु मातु बलि जाई ॥
सिर धरि गुर आयसु अनुसरहू । प्रजा पालि परिजन दुखु हरहू ॥
गुर के बचन सचिव अभिनंदनु । सुने भरत हिय हित जनु चंदनु ॥
सुनी बहोरि मातु मृदु बानी । सील सनेह सरल रस सानी ॥

छं०—सानी सरल रस मातु बानी सुनि भरतु व्याकुल भए ।

लोचन सरोरुह स्रवत सींचत बिरह उर अंकुर नए ॥

सो दसा देखत समय तेहि विसरी सबहि सुधि देह की ।

तुलसी सराहत सकल सादर सीवँ सहज सनेह की ॥

सो०—भरतु कमल कर जोरि धीर धुरंधर धीर धरि ।

बचन अमिअँ जनु बोरि देत उचित उत्तर सबहि ॥ १७६ ॥

मासपारायण, अठारहवाँ विश्राम

मोहि उपदेसु दीन्ह गुर नीका । प्रजा सचिव संमत सबही का ॥
मातु उचित धरि आयसु दीन्हा । अवसि सीस धरि चाहउँ कीन्हा ॥
गुर पितु मातु स्वाभि हित बानी । सुनि मन मुदित करिअ भलि जानी
उचित कि अनुचित किएँ विचारू । धरमु जाइ सिर पातक भारू ॥
तुम्ह तौ देहु सरल सिख सोई । जो आचरत मोर भल होई ॥
जद्यपि यह समुझत हउँ नीकें । तदपि होत परितोषु न जी कें ॥
अब तुम्ह विनय मोरि सुनि लेहू । मोहि अनुहरत सिखावनु देहू ॥

ऊतर देउँ छमव अपराधू । दुखित दोष गुन गनहिं न साधू ॥

दो०—पितु सुरपुर सिय रामु बन करन कहहु मोहि राजु ।

एहि तें जानहु मोर हित कै आपन बड़ काजु ॥१७७॥

हित हमार सियपति सेवकाई । सो हरि लीन्ह मातु कुटिलाई ॥

मैं अनुमानि दीख मन माहीं । आन उपायँ मोर हित नाहीं ॥

सोक समाजु राजु केहि लेखें । लखन राम सिय बिनु पद देखें ॥

बादि बसन बिनु भूषन भारू । बादि बिरति बिनु ब्रह्मविचारू ॥

सरुज सरीर बादि बहु भोगा । बिनु हरिभगति जायँ जप जोगा ॥

जायँ जीव बिनु देह सुहाई । बादि मोर सबु बिनु रघुराई ॥

जाउँ राम पहिं आयसु देहू । एकहिं आँक मोर हित एहू ॥

हे नृप करि भल आपन चहहू । सोउ सनेह जड़ता बस कहहू ॥

दो०—कैकेई सुअ कुटिलमति राम विमुख गतलाज ।

तुम्ह चाहत सुख मोहबस मोहि से अधम कें राज ॥१७८॥

कहउँ साँचु सब सुनि पतिआहू । चाहिअ धरमसील नरनाहू ॥

मोहि राजु हठि देइहहु जबहीं । रसा रसातल जाइहि तबहीं ॥

मोहि समान को पाप निवासू । जेहि लगि सीय राम बनवासू ॥

रायँ राम कहूँ काननु दीन्हा । बिछुरत गमनु अमरपुर कीन्हा ॥

मैं सठु सब अनरथ कर हेनू । बैठ बात सब सुनउँ सचेतू ॥

बिनु रघुवीर विलोकि अवासू । रहे प्रान सहि जग उपहासू ॥

राम पुनीत विषय रस रूखे । लोलुप भूमि भोग के भूखे ॥

कहँ लगि कहौं हृदय कठिनाई । निदरि कुलिसु जेहिँ लही बड़ाई
दो०—कारन तें कारजु कठिन होइ दोसु नहिँ मोर ।

कुलिस अस्थि तें उपल तें लोह कराल कठोर ॥१७९॥

कैकई भव तनु अनुरागे । पावँर प्रान अघाइ अभागे ॥
जौं प्रिय विरहँ प्रान प्रिय लागे । देखव सुनव बहुत अव आगे ॥
लखन राम सिय कहँ वनु दीन्हा । पठइ अमरपुर पति हित कीन्हा
लीन्ह विधवपन अजसु आपू । दीन्हेउ प्रजहिँ सोकु संतापू ॥
मोहि दीन्ह सुखु सुजसु सुराजू । कीन्ह कैकई सब कर काजू ॥
एहि तें मोर काह अव नीका । तेहि पर देन कहहु तुम्ह टीका ॥
कैकइ जठर जनमि जग माहीं । यह मोहि कहँ कछु अनुचित नाहीं
मोरि बात सब विधिहिँ बनाई । प्रजा पाँच कत करहु सहाई ॥
दो०—ग्रह ग्रहीत पुनि बात बस तेहि पुनि बीछी मार ।

तेहि पिआइअ बारुनी कहहु काह उपचार ॥१८०॥

कैकइ सुअन जोगु जग जोई । चतुर विरंचि दीन्ह मोहि सोई ॥
दसरथ तनय राम लघु भाई । दीन्ह मोहि विधि बादि बड़ाई ॥
तुम्ह सब कहहु कढ़ावन टीका । राय रजायसु सब कहँ नीका ॥
उतरु देउँ केहि विधि केहि केही । कहहु सुखेन जथा रुचि जेही ॥
मोहि कुमातु समेत बिहाई । कहहु कहिहि के कीन्ह भलाई ॥
मो विनु को सचराचर माहीं । जेहि सिय रामु प्रानप्रिय नाहीं ॥
परम हानि सब कहँ बड़ लाहू । अदिनु मोर नहिँ दूषन काहू ॥

संसय सील प्रेम बस अहहू । सबुइ उचित सब जो कहू कहू ॥

दो०—राम मातु सुठि सरलचित मो पर प्रेसु बिसेषि ।

कहइ सुभाय सनेह बस मोरि दीनता देखि ॥१८१॥

गुर बिबेक सागर जगु जाना । जिन्हहि बिस्व कर बदरस्माना ॥
मो कहँ तिलक साज सज सोऊ । भएँ बिधि विमुख विमुख सबु कोऊ
परिहरि रामु सीय जग माहीं । कोउ न कहिहि मोर मत नाहीं ॥
सो मैं सुनव सहव सुखु मानी । अंतहुँ कीच तहाँ जहँ पानी ॥
डरु न मोहि जग कहिहि कि पोचू । परलोकहु कर नाहिन सोचू ॥
एकइ उर बस दुसह दवारी । मोहिलगि भेसिय रामु दुखारी ॥
जीवन लाहु लखन भल पावा । सबु तजि राम चरन मनु लावा ॥
मोर जनम रघुवर बन लागी । झूठ काह पछिताउँ अभागी ॥
दो०—आपनि दारुन दीनता कहउँ सबहि सिरु नाइ ।

देखें बिनु रघुनाथ पद जिय कै जगनि न जाइ ॥१८२॥

आन उपाउ मोहि नहिं सूझा । को जिय कै रघुवर बिनु बूझा ॥
एकहिं आँक इहइ मन माहीं । प्रातकाल चलिहउँ प्रभु पाहीं ॥
जद्यपि मैं अनभल अपराधी । मै मोहि कारन सकल उपाधी ॥
तदपि सरन सनमुख मोहि देखी । छमि सब करिहहि कृपा बिसेषी ॥
सील सकुच सुठि सरल सुभाऊ । कृपा सनेह सदन रघुराऊ ॥
अरिहुक अनभल कीन्ह न रामा । मैं सिसु सेवक जद्यपि बामा ॥

बुझ मै पाँच सोर भल मानी । आयसु आसिष देहु सबानी ॥

जेहिं सुनि विनय मोहि जनु जानी । आवहिं बहुरि रामु रजधानी ॥

दो०—जद्यपि जनमु कुमातु तें मैं सठु सदा सदोस ।

आपन जानि न त्यागिहहिं मोहि रघुबीर भरोस ॥१८३॥

भरत वचन सब कहैं प्रिय लागे । राम सनेह सुधाँ जनु पागे ॥

लोग वियोग विषम विष दागे । मंत्र सबीज सुनत जनु जागे ॥

मातु सचिव गुर पुर नर नारी । सकल सनेहँ बिकल भए भारी ॥

भरतहि कहहिं सराहि सराही । राम प्रेम मूरति तनु आही ॥

तात भरत अस काहे न कहहू । प्रान समान राम प्रिय अहहू ॥

जो पावँरु अपनी जड़ताई । तुम्हहि सुगाइ मातु कुटिलाई ॥

सो सठु कोटिक पुरुष समेता । बसिहि कल्प सत नरक निकेता ॥

अहि अघ अवगुन नहिं मनि गहई । हरइ गरल दुख दारिद दहई ॥

दो०—अवसि चलिअ बन रामु जहँ भरत मंत्रु भल कीन्ह ।

सोक लिंथु बूझत सबहि तुम्ह अवलंबनु दीन्ह ॥१८४॥

भा सब कैं मन मोदु न थोरा । जनु घन धुनि सुनि चातक मोरा ॥

चलत प्रात लखि निरनउ नीके । भरतु प्रानप्रिय भे सबही के ॥

मुनिहि बंदि भरतहि सिख नाई । चले सकल घर बिदा कराई ॥

धन्य भरत जीवनु जग माहीं । सीछु सनेहु सराहत जाहीं ॥

कहहिं परसपर भा बड़ काजू । सकल चलै कर साजहिं भाजू ॥

जेहि राखहिं रहु घर रखवारी । सो जानइ जनु गरदनि मारी ॥

कोउ कह रहन कहिअ नहिं काहू । को न चहइ जग जीवन लाहू ॥

दो०—जरउ सो संपति सदन सुख सुहृद मातु पितु भाइ ।

सनमुख होत जो राम पद करै न सहस सहाइ ॥१८५॥

घर घर साजहिं बाहन नाना । हरषु हृदयँ परभात पयाना ॥
 भरत जाइ घर कीन्ह बिचारू । नगरु बाजि गज भवन भँडारू ॥
 संपति सब रघुपति कै आही । जौं बिनु जतन चलौं तजि ताही ॥
 तौ परिनाम न मोरि भलाई । पाप सिरोमनि साँई दोहाई ॥
 करइ स्वामि हित सेवकु सोई । दूषन कोटि देइ किन कोई ॥
 अस बिचारि सुचि सेवक बोले । जे सपनेहुँ निज धरम न डोले ॥
 कहि सबु मरमु धरमु भल भाषा । जो जेहि लायक सो तेहिं राखा ॥
 करि सबु जतनु राखि रखवारे । राम मातु पहिं भरतु सिधारे ॥

दो०—आरत जननी जानि सब भरत सनेह सुजान ।

कहेउ बनावन पालकीं सजन सुखासन जान ॥१८६॥

चक्र चक्रि जिमि पुर नर नारी । चहत प्रात उर आरत भारी ॥
 जागत सब निसि भयउ बिहाना । भरत बोलाए सचिव सुजाना ॥
 कहेउ लेहु सबु तिलक समाजू । बनहिं देव मुनि रामहि राजू ॥
 बेगि चलहु सुनि सचिव जोहारे । तुरत तुरग रथ नाग सँवारे ॥
 अरुंधती अरु अग्निनि समाऊ । रथ चढ़ि चले प्रथम मुनिराऊ ॥
 बिप्र बृंद चढ़ि बाहन नाना । चले सकल तप तेज निधाना ॥
 नगर लोग सब सजि सजि जाना । चित्रकूट कहँ कीन्ह पयाना ॥

सिबिका सुभग न जाहिं बखानी । चढ़ि चढ़ि चलत भई सब रानी ॥

दो०—सौंपि नगर सुचि सेवकनि सादर सकल चलाइ ।

सुमिरि राम सिय चरन तब चले भरत दोउ भाइ ॥१८७॥

राम दरस बस सब नर नारी । जनु करि करिनि चले तकि बारी ॥
 बन सिय रामु समुझि मन माहीं । सानुज भरत पयादेहिं जाहीं ॥
 देखि सनेहु लोग अनुरागे । उतरि चले हय गय रथ त्यागे ॥
 जाइ समीप राखि निज डोली । राम मातु मृदु बानी बोली ॥
 तात चढ़हु रथ बलि महतारी । होइहि प्रिय परिवारु दुखारी ॥
 तुम्हरेँ चलत चलिहि सबु लोगू । सकल सोक कृस नहिं मग जोगू ॥
 सिर धरि बचन चरन सिरु नाई । रथ चढ़ि चलत भए दोउ भाई ॥
 तमसा प्रथम दिवस करि वासू । दूसर गोमति तीर निवासू ॥

दो०—पय अहार फल असन एक निसि भोजन एक लोग ।

करत राम हित नेम व्रत परिहरि भूषन भोग ॥१८८॥

सई तीर बसि चले विहाने । सुंगबेरपुर सब निअराने ॥
 समाचार सब सुने निषादा । हृदयँ विचार करइ सविषादा ॥
 कारन कवन भरतु बन जाहीं । है कछु कपट भाउ मन माहीं ॥
 जौं पै जियँ न होति कुटिलाई । तौ कत लीन्ह संग कटकाई ॥
 जानहिं सानुज रामहि मारी । करउँ अकंटक राजु सुखारी ॥
 भरत न राजनीति उर आनी । तब कलंकु अब जीवन हानी ॥
 सकल सुरासुर जुरहिं जुझारा । रामहि समर न जीतनिहारा ॥
 का आचरजु भरतु अस करहीं । नहिं विष बेलि अमिअ फल फरहीं ॥

दो०—अस बिचारि गुह ग्याति सन कहेउ सजग सब होहु ।

हथवाँसहु बोरहु तरनि कीजिअ घाटारोहु ॥१८९॥

होहु सँजोइल रोकहु घाटा । ठाटहु सकल मरै के ठाटा ॥
 सनमुख लोह भरत सन लेऊँ । जिअतन सुरसरि उतरन देऊँ ॥
 समर मरनु पुनि सुरसरि तीरा । राम काजु छनभंगु सरीरा ॥
 भरत भाइ नृपु मैं जन नीचू । बड़ें भाग असि पाइअ मीचू ॥
 स्वामि काज करिहउँ रन रारी । जस धवलिहउँ भुवन दसचारी ॥
 तजउँ प्रान रघुनाथ निहोरें । दुहूँ हाथ मुद मोदक मोरें ॥
 साधु समाज न जाकर लेखा । राम भगत महुँ जासु न रेखा ॥
 जायँ जिअत जग सो महि भारू । जननी जौवन बिटप कुठारू ॥

दो०—बिगत बिषाद निषादपति सबहि बड़ाइ उछाहु ।

सुमिरि राम मागेउ तुरत तरकस धनुष सनाहु ॥१९०॥

बेगहु भाइहु सजहु सँजोऊ । सुनि रजाइ कदराइ न कोऊ ॥
 भलेहि नाथ सब कहहि सहरषा । एकहिँ एक बड़ावइ करषा ॥
 चले निषाद जोहारि जोशरी । सूर सकल रन रूचइ रारी ॥
 सुमिरि राम पद पंकज पनहीं । भार्यी बाँधि चढ़ाइन्हि धनहीं ॥
 अँगरी पहिरि कूँड़ि सिर-धरहीं । फरसा बाँस सेल सम करहीं ॥
 एक कुसल अति ओड़न खाँड़े । कूदहिँ गगन मनहुँ छिति छाँड़े ॥
 निज निज साजु समाजु बनाई । गुह राउतहि जोहारे जाई ॥
 देखि सुभट सब लायक जाने । लै लै नाम सकल सनमाने ॥

दो०—भाइहु लावहु धोख जनि आजु काज बड़ मोहि ।

सुनि सरोष बोले सुभट बोर अधीर न होहि ॥१९१॥

राम प्रताप नाथ बल तोरे । करहिं कटकु बिनु भट बिनु घेरे ॥
जीवत पाउ न पाछें धरहीं । रुंड मुंडमय मेदिनि कहीं ॥
दीख निषादनाथ भल टोळ । कहेउ बजाउ जुझाऊ ढोळ ॥
एतना कहत छींक भइ बाँए । कहेउ सगुनिअन्ह खेत सुहाए ॥
बूढ़ु एकु कह सगुन विचारी । भरतहि मिलिअ न होइ हिरारी ॥
रामहि भरतु मनावन जाहीं । सगुन कहइ अस बिग्रहु नाहीं ॥
सुनि गुह कहइ नीक कह बूढ़ा । सहसा करि पछिताहिं विमूढ़ा ॥
भरत सुभाउ सीलु बिनु बूझें । बड़ि हित हानि जानि बिनु जूझें ॥
दो०—गहहु घाट भट समिटि सब लेउँ मरम मिलि जाइ ।

बूझि मित्र अरि मध्य गति तस तब करिहउँ आइ ॥१९२॥

लखव सनेहु सुभायँ सुहाएँ । वैरु प्रीति नहिं दुरइँ दुराएँ ॥
अस कहि भेंट सँजोवन लागे । कंद मूल फल खग मृग मागे ॥
मीन पीन पाठीन पुराने । भरि भरि भार कहारन्ह आने ॥
मिलन साजु सजि मिलन सिधाए । मंगल मूल सगुन सुभ पाए ॥
देखि दूरि तें कहि निज नामू । कीन्ह मुनीसहि दंड प्रनामू ॥
जानि रामप्रिय दीन्हि असीसा । भरतहि कहेउ बुझाइ मुनीसा ॥
राम सखा सुनि संदनु त्यागा । चले उतरि उमगत अनुरागा ॥
गाउँ जाति गुहँ नाउँ सुनाई । कीन्ह जोहार माथ महि लाई ॥

दो०—करत दंडवत देखि तेहि भरत लीन्ह उर लाइ ।

मनहुँ लखन सन भेंट भइ प्रेमु न हृदयँ समाइ ॥१९३॥

भेंटत भरतु ताहि अति प्रीती । लोग सिहाहिँ प्रेम कै रीती ॥
 धन्य धन्य धुनि मंगल मूला । सुर सराहि तेहि बरिसहिँ फूला ॥
 लोक बेद सब भाँतिहिँ नीचा । जासु छाँह छुइ लेइअ सींचा ॥
 तेहि भरि अंक राम लघु भ्राता । मिलत पुलक परिपूरित गाता ॥
 राम राम कहि जे जमुहाहीं । तिन्हहि न पाप पुंज समुहाहीं ॥
 यह तौ राम लाइ उर लीन्हा । कुल समेत जगु पावन कीन्हा ॥
 करमनास जलु सुरसरि परई । तेहि को कहहु सीस नहिँ धरई ॥
 उलटा नामु जपत जगु जाना । बालमीकि भए ब्रह्म समाना ॥

दो०—स्वपच सबर खस जमन जड़ पावँर कोल किरात ।

रामु कहत पावन परम होत भुवन बिख्यात ॥१९४॥

नहिँ अचिरिजु जुग जुग चलि आई । केहि न दीन्हि रघुबीर बड़ाई ॥
 राम नाम महिमा सुर कहहीं । सुनि सुनि अवधलोग सुखु लहहीं ॥
 रामसखहि मिलि भरत सप्रेमा । पूँछी कुसल सुमंगल खेमा ॥
 देखि भरत कर सीलु सनेहू । भा निषाद तेहि समय विदेहू ॥
 सकुच सनेहु मोदु मन बाढ़ा । भरतहि चितवत एकटक ठाढ़ा ॥
 धरि धीरजु पद बंदि बहोरी । बिनय सप्रेम करत कर जोरी ॥
 कुसल मूल पद पंकज पेखी । मै तिहुँ काल कुसल निज लेखी ॥

अब प्रभु परम अनुग्रह तोरे । सहित कोटि कुल मंगल मोरे ॥

दो०—समुझि मोरि करतूति कुलु प्रभु महिमा जियँ जोइ ।

जो न भजइ रघुबीर पद जग बिधि बंचित सोइ ॥ १९५ ॥

कपटी कायर कुमति कुजाती । लोक वेद बाहेर सब भाँती ॥
 राम कीन्ह आपन जवही तैं । भयउँ भुवन भूपन तबही तैं ॥
 देखि प्रीति सुनि विनय सुहाई । मिलेउ बहोरि भरत लघु भाई ॥
 कहि निषाद निज नाम सुबानी । सादर सकल जोहारी रानी ॥
 जानि लखन सम देहिं असीसा । जिअहु सुखी सय लाख बरीसा ॥
 निरखि निषादु नगर नर नारी । भए सुखी जनु लखनु निहारी ॥
 कहहिं लहेउ एहिं जीवन लाहू । भेंटैउ रामभद्र भरि बाहू ॥
 सुनि निषादु निज भाग बड़ाई । प्रमुदित मन लइ चलेउ लेवाई ॥
 दो०—सनकारे सेवक सकल चले स्वामि रुख पाइ ।

घर तरु तर सर बाग बन बास बनाएन्हि जाइ ॥ १९६ ॥

सुंगबेरपुर भरत दीख जव । भे सनेहँ सब अंग सिथिल तव ॥
 सोहत दिऐं निषादहि लागू । जनु तनु धरें विनय अनुरागू ॥
 एहि बिधि भरत सेनु सबु संगी । दीखि जाइ जग पावनि गंगा ॥
 रामघाट कहँ कीन्ह प्रनामू । भा मनु मगनु मिले जनु रामू ॥
 करहिं प्रनाम नगर नर नारी । मुदित ब्रह्ममय बारि निहारी ॥
 करि मज्जनु मागहिं कर जोरी । रामचंद्र पद प्रीति न थोरी ॥
 भरत कहेउ सुरसरि तव रेनू । सकल सुखद सेवक सुरधेनू ॥
 जोरि पानि बर मागउँ एहू । सीय राम पद सहज सनेहू ॥

दो०-एहि बिधि मज्जनु भरतु करि गुर अनुसासन पाइ।

मातु नहानीं जानि सब डेरा चले लवाइ ॥१९७॥

जहँ तहँ लोगन्ह डेरा कीन्ह। भरत सोधु सबही कर लीन्ह ॥
 सुर सेवा करि आयसु पाई। राम मातु पहुँ गे दोउ भाई ॥
 चरन चाँपि कहि कहि मृदु बानी। जननीं सकल भरत सनमानी ॥
 भाइहि साँभि मातु सेवकाई। आपु निपादहि लीन्ह बोलाई ॥
 चले सखा कर सों कर जोरें। सिथिल सरीरु सनेह न थोरें ॥
 पूँछत सखहि सो डाउँ देखाऊ। नेकु नयन मन जरनि जुड़ाऊ ॥
 जहँ सिय रामु लखनु निसि सोए। कहत भरे जल लोचन कोए ॥
 भरत बचन सुनि भयउ विषादू। तुरत तहाँ लइ गयउ निषादू ॥

दो०-जहँ सिंसुपा पुनीत तर रघुबर किय विश्रामु।

अति सनेहँ सादर भरत कीन्हैउ दंड प्रनामु ॥१९८॥

कुस साँथरी निहारि सुहाई। कीन्ह प्रनामु प्रदच्छिन जाई ॥
 चरन रेख रज आँखिन्ह लाई। बनइ न कहत प्रीति अधिकाई ॥
 कनक बिंदु दुइ चारिक देखे। राखे सीस सीय सम लेखे ॥
 सजल बिलोचन हृदयँ गलानी। कहत सखा सन बचन सुबानी ॥
 श्रीहत सीय बिरहँ दुतिहीना। जथा अवध नर नारि बिलीना ॥
 पिता जनक देउँ पटतर केही। करतल भोगु जोगु जग जेही ॥
 समुर भानुकुल भानु भुआइ। जेहि सिहात अमरावति पालू ॥

प्राननाथ रघुनाथ गोसाईं जो बड़ होत सो राम बड़ाई ॥

दो०—पति देवता सुतीय मनि सीय साँथरी देखि ।

बिहरत हृदउ न हहरि हर पवि तें कठिन बिसेषि ॥ १९९ ॥

लालन जोगु लखन लघु लोने । मे न भाइ अस अहहिं न होने ॥
पुरजन प्रिय पितु मातु दुलारे । सिय रघुवीरहि प्रानपिआरे ॥
मृदु मूरति सुकुमार सुभाऊ । तात बाउ तन लाग न काऊ ॥
ते बन सहहिं विपति सब भाँती । निदरे कोटि कुलिस एहिं छाती ॥
राम जनमि जगु कीन्ह उजागर । रूप सील सुख सब गुन सागर ॥
पुरजन परिजन गुर पितु माता । राम सुभाउ सबहि सुखदाता ॥
बैरिउ राम बड़ाई करहीं । बोलनि मिलनि विनय मन हरहीं
सारद कोटि कोटि सत सेवा । करि न सकहिं प्रभु गुन गन लेखा

दो०—सुखस्वरूप रघुवंसमनि मंगल मोद निधान ।

ते सोवत कुस डसि महि बिधि गति अति बलवान् ॥ २०० ॥

राम सुना दुखु कान न काऊ । जीवनतरु जिमि जोगवइ राऊ ॥
पलक नयन फनि मनि जेहिं भाँती । जोगवहिं जननि सकल दिन राती
ते अब फिरत विपिन पदचारी । कंद मूल फल फूल अहारी ॥
धिग कैकई अमंगल मूला । भइसि प्रानप्रियतम प्रतिकूला ॥
मैं धिग धिग अब उदधि अभागी । सबु उतगातु भयउ जेहि लागी
कुल कलंकु करि सृजेउ विधाताँ । साँइ दोह मोहि कीन्ह कुमाताँ ॥
सुनि सप्रेम समुझाव निषादू । नाथ करिअ कत बादि विषादू ॥
राम तुम्हहि प्रिय तुम्ह प्रिय रामहि । यह निरजोसु दोसु बिधि बामहि

छं०—विधि बाम की करनी कठिन जेहिं मातु कीन्ही बावरी ।
 तेहि राति पुनि पुनि करहिं प्रभु सादर सरहना रावरी ॥
 तुलसी न तुम्ह सो राम प्रीतमु कहतु हों सौंहें किए ।
 परिनाम मंगल जानि अपने आनिए धीरजु हिँए ॥

सो०—अंतरजामी रामु सकुच सप्रेम कृपायतन ।
 चलिअ करिअ विश्रामु यह बिचारि दृढ़ आनि मन ॥२०१॥

सखा वचन सुनि उर धरि धीरा । बाम चले सुमिरत रघुबीरा ॥
 यह सुधि पाइ नगर नर नारी । चले बिलोकन आरत भारी ॥
 परदखिना करि करहिं प्रनामा । देहिं कैकइहि खोरि निकामा ॥
 भरि भरि बारि बिलोचन लेहीं । बाम विधातहि दूषन देहीं ॥
 एक सराहहिं भरत सनेहू । कोउ कह नृपति निबाहेउ नेहू ॥
 निंदहिं आपु सराहि निषादहि । को कहि सकइ विमोह विषादहि ॥
 एहि विधि राति लोगु सबु जागा । भा भिनुसार गुदारा लागा ॥
 गुरहि सुनावँ चढ़ाइ सुहाई । नई नाव सब मातु चढ़ाई ॥
 दंड चारि महुँ भा सबु पारा । उतरि भरत तब सबहि सँभारा ॥
 दो०—प्रातक्रिया करि मातु पद बंदि गुरहि सिरु नाइ ।

आगें किए निषाद गन दीन्हेउ कटकु चलाइ ॥२०२॥

कियउ निषादनाथु अगुआई । मातु पालकीं सकल चलाई ॥
 साथ बोलाइ भाइ लघु दीन्हा । विप्रन्ह सहित गवनु गुर कीन्हा
 आपु सुरसरिहि कीन्हा प्रनाम । सुमिरे लखन सहित सिय राम ॥

गवने भरत पयादेहिं पाए। कोतल संग जाहिं डोरिआए ॥
 कहहिं सुसेवक बारहिं बारा। होइअ नाथ अस्व असवारा ॥
 रामु पयादेहि पायँ सिधाए। हम कहँ रथ गज बाजि बनाए ॥
 सिर भर जाउँ उचित अस मोरा। सब तैं सेवक धरमु कठोरा ॥
 देखि भरत गति सुनि मृदु बानी। सब सेवक गन गरहिं गलानी ॥
 दो०—भरत तीसरे पहर कहँ कीन्ह प्रवेसु प्रयाग।

कहत राम सिय राम सिय उमगि उमगि अनुराग ॥२०३॥

झलका झलकत पायन्ह कैसैं। पंकज कोस ओस कन जैसैं ॥
 भरत पयादेहिं आए आजू। भयउ दुखित सुनि सकल समाजू
 खबरि लीन्ह सब लोग नहाए। कीन्ह प्रनामु त्रिवेनिहिं आए ॥
 सबिधि सितासित नीर नहाने। दिए दान महिसुर सनमाने ॥
 देखत स्यामल धवल हलोरे। पुलकि सरीर भरत कर जोरे ॥
 सकल काम प्रद तीरथराऊ। वेद विदित जग प्रगट प्रभाऊ ॥
 मागउँ भीख त्यागि निज धरमू। आरत काह न करइ कुकरमू ॥
 अस जियँ जानि सुजान सुदानी। सफल करहिं जग जाचक बानी ॥
 दो०—अरथ न धरम न काम रुचि गति न चहउँ निरबान।

जनम जनम रति राम पद यह बरदानु न आन ॥२०४॥

जानहुँ रामु कुटिल करि मोही। लोग कहउ गुर साहिब द्रोही ॥
 सीता राम चरन रति मोरें। अनुदिन बढ़उ अनुग्रह तोरें ॥
 जलदु जनम भरि सुरति बिसारउ। जाचत जलु पवि पाहन डारउ ॥

चातकु रटनि घटें घटि जाई । बटें प्रेमु सव भँति भलाई ॥
 कनकहिं बान चढ़इ जिमि दाहैं । तिमि प्रियतम पद नेम निवाहैं ॥
 भरत बचन सुनि माझ त्रिवेनी । भइ मृदु बानि सुमगल देनी ॥
 तात भरत तुम्ह सव विधि साधू । राम चरन अनुराग अगाधू ॥
 बादि गलानि करहु मन माहीं । तुम्ह सम रामहि कोउ प्रिय नाही
 दो०—तनु पुलकेउ हियँ हरपु सुनि बेनि बचन अनुकूल ।

भरत धन्य कहि धन्य सुर हरषित बरषहिं फूल ॥२०५॥
 प्रमुदित तीरथराज निवासी । बैखानस बटु गृही उदासी ॥
 कहहिं परसपर मिलि दस पाँचा । भरत सनेहु सीलु सुचि साँचा ॥
 सुनत राम गुन ग्राम सुहाए । भरद्वाज मुनिवर पहिं आए ॥
 दंड प्रनामु करत मुनि देखे । मूरुतिमंत भाग्य निज लेखे ॥
 धाइ उठाइ लाइ उर लीन्हे । दीन्हि असीस कृतारथ कीन्हे ॥
 आसनु दीन्ह नाइ सिरु बैठे । चहत सकुच गृहँ जनु भजि पैठे ॥
 मुनि पूँछव कछु यह बड़ सोचू । बोले रिपि लखि सीलु सँकोचू ॥
 सुनहु भरत हम सव सुधि पाई । विधि करतव पर किछु न बसाई
 दो०—तुम्ह गलानि जियँ जनि करहु समुझि मातु करतूति ।

तात कैकइहि दोसु नहिं गई गिरा मति धूति ॥२०६॥
 यहउ कहत भल कहिहि न कोऊ । लोकु बेदु बुध संमत दोऊ ॥
 तात तुम्हार विमल जसु गाई । पाइहि लोकउ बेदु बड़ाई ॥
 लोक बेदु संमत सब कहई । जेहि पितु देइ राजु सो लहई ॥

राउ सत्यव्रत तुम्हहि बोलाई । देत राजु सुख धरमु बड़ाई ॥
 राम गवनु बन अनरथ मूला । जो सुनि सकल बिस्व भइ सूला ॥
 सो भात्री बस रानि अयानी । करि कुचालि अंतहुँ पछितानी ॥
 तहँउँ तुम्हार अल्प अपराधू । कहै सो अधम अयान असाधू ॥
 करतेहु राजु त तुम्हहि न दोषू । रामहि होत सुनत संतोषू ॥
 दो०—अब अति कीन्हेहु भरत भल तुम्हहि उचित मत एहु ।

सकल सुमंगल मूल जग रघुवर चरन सनेहु ॥२०७॥

सो तुम्हार धनु जीवनु प्राणा । भूरिभ ग को तुम्हहि समाना ॥
 यह तुम्हार आचरजु न ताता । दसरथ सुअन राम प्रिय भ्राता ॥
 सुनहु भरत रघुवर मन माहीं । पेम पात्रु तुम्ह सम कोउ नाहीं ॥
 लखन राम सीतहि अति प्रीती । निसि सब तुम्हहि सराहत वीती ॥
 जाना मरमु नहात प्रयागा । मगन होहिं तुम्हरेँ अनुरागा ॥
 तुम्ह पर अस सनेहु रघुवर केँ । सुख जीवन जग जस जड़ नर केँ
 यह न अधिक रघुवीर बड़ाई । प्रनत कुटुंब पाल रघुराई ॥
 तुम्ह तौ भरत मोर मत एहू । धरें देह जनु राम सनेहू ॥
 दो०—तुम्ह कहँ भरत कलंक यह हम सब कहँ उपदेसु ।

राम भगति रस सिद्धि हित भा यह समउ गनेसु ॥२०८॥

नव विधु विमल तात जसु तारा । रघुवर किंकर कुमुद चकोरा ॥
 उदित सदा अँयइहि कबहूँ ना । घटिहि न जंग नभ दिन दिन दूना
 कोक तिलोक प्रीति अति करिही । प्रभु प्रताप रवि छविहि न हरिही ॥

निसि दिन सुखद सदा सब काहू । प्रसिहि न कैकइ करतबु राहू ॥
 पूरन राम सुपेम पियूषा । गुर अवमान दोष नहि दूषा ॥
 राम भगत अब अमिअँ अघाहूँ । कीन्हेहु सुलभ सुधा वसुधाहूँ ॥
 भूप भगीरथ सुरसरि आनी । सुमिरत सकल सुमंगल खानी ॥
 दसरथ गुन गन बरनि न जाहीं । अधिकु कहा जेहि सम जग नाहीं
 दो०—जासु सनेह सकोच बस राम प्रगट भए आइ ।

जे हर हिय नयननि कबहुँ निरखे नहीं अघाइ ॥२०९॥
 कीरति बिधु तुम्ह कीन्ह अनूपा । जहँ बस राम पेम मृगरूपा ॥
 तात गलानि करहु जियँ जाएँ । डरहु दरिद्रहि पारसु पाएँ ॥
 सुनहु भरत हम झूठ न कहहीं । उदासीन तापस बन रहहीं ॥
 सब साधन कर सुफल सुहावा । लखन राम सिय दरसनु पावा ॥
 तेहि फल कर फलु दरस तुम्हारा । सहित पयाग सुभाग हमारा ॥
 भरत धन्य तुम्ह जसु जगु जयऊ । कहि अस पेम मगन मुनि भयऊ
 सुनि मुनि बचन सभासद हरषे । साधु सराहि सुमन सुर बरषे ॥
 धन्य धन्य धुनि गगन पयागा । सुनि सुनि भरतु मगन अनुरागा
 दो०—पुलक गात हियँ रामु सिय सजल सरोरुह नैन ।

करि प्रनामु मुनि मंडलिहि बोले गदगद बैन ॥२१०॥
 मुनि समाजु अरु तीरथराजू । साँचिहुँ सपथ अघाइ अकाजू ॥
 एहिं यल जौं किछु कहिअ बनाई । एहि सम अधिक न अघ अधमाई
 तुम्ह सर्वग्य कहहुँ सविभाजू । उर अंतरजासी रघुराजू ॥

मोहि न मातु करतव कर सोचू । नहिं दुखु जियँ जगु जानिहि पोचू
नाहिन डरु विगारिहि परलोकु । पितहु मरन कर मोहि न सोकु ॥
सुकृत सुजस भरि भुअन सुहाए । लछिमन राम सरिस सुत पाए ॥
राम बिरहँ तजि तनु छनभंगू । भूप सोच कर कवन प्रसंगू ॥
राम लखन सिय विनु पग पनहीं । करि मुनि बेष फिरहिं वन वनहीं
दो०—अजिन बसन फल असन महि सयन डसि कुस पात ।

बसि तरु तर नित सहत हिम आतप बरषा बात ॥२११॥

एहि दुख दाहँ दहइ दिन छाती । भूख न वासर नीद न राती ॥
एहि कुरोग कर औषधु नाहीं । सोधेउँ सकल बिस्व मन माहीं ॥
मातु कुमत बढ़ई अघ मूला । तेहिं हमार हित कीन्हँ वँसूला ॥
कलि कुकाठ कर कीन्ह कुजंत्रू । गाड़ि अवधि पढ़ि कठिन कुमंत्रू
मोहिलगि यहु कुठाडु तेहिं ठाटा । घालेसि सब जगु बारह बाटा ॥
मिटइ कुजोगु राम फिरि आएँ । बसइ अवध नहिं आन उपाएँ ॥
भरत बचन सुनि मुनि सुखु पाई । सबहिं कीन्हि बहु भाँति बड़ाई ॥
तात करहु जनि सोचु विसेषी । सब दुखु मिटिहि राम पग देखी ॥

दो०—करि प्रबोधु मुनिबर कहेउ अतिथि पेमप्रिय होहु ।

कंद मूल फल फूल हम देहिं लेहु करि छोहु ॥२१२॥

सुनि मुनि बचन भरत हियँ सोचू । भयउ कुअवसर कठिन सँकोचू
जानि गरुड गुर गिरा बहोरी । चरन बंदि बोले कर जोरी ॥
सिर धरि आयसु करिअ तुम्हारा । परम धरम यहु नाथ हमारा ॥

सुरभि फूल फल अमिअ समाना । विमल जलासय विविध विधाना
असन पान सुचि अमिअ अमी से । देखि लोग सकुचात जमी से ॥
सुर सुरभी सुरतरु सबही कैं । लखि अभिलाषु सुरेस सची कैं ॥
रितु वसंत वह विविध बयारी । सब कहैं सुलभ पदारथ चारी ॥
सुक चंदन वनितादिक भोगा । देखि हरष विसमय बस लोगा ॥
दो०—संपति चकई भरतु चक मुनि आयस खेलवार ।

तेहि निसि आश्रम पिंजराँ राखे भा भिनुसार ॥२१५॥

मासपारायण, उन्नीसवाँ विश्राम

कीन्ह निमज्जनु तीरथराजा । नाइ मुनिहि सिरु सहित समाजा ॥
रिषि आयसु असीस सिर राखी । करि दंडवत विनय बहु भाषी ॥
पथ गति कुसल साथ सब लीन्हें । चले चित्रकूटहिं चितु दीन्हें ॥
रामसखा कर दीन्हें लागू । चलत देह धरि जनु अनुरागू ॥
नहिं पद त्रान सीस नहिं छाया । पेसु नेसु ब्रतु धरमु अमाया ॥
लखन राम सिय पंथ कहानी । पूँछत सखहि कहत मृदु बानी ॥
राम बास थरु बिटप बियोकेँ । उर अनुराग रहत नहिं रोकेँ ॥
देखि दसा सुर बरिसहिं फूला । भइ मृदु महि मगु मंगल मूला ॥
दो०—किएँ जाहिं छाया जलद सुखद बहइ बर बात ।

तस मगु भयउ न राम कहँ जस भा भरतहि जात ॥२१६॥

जड़ चेतन मग जीव घनेरे । जेचितए प्रभु जिन्ह प्रभु हेरे ॥
ते सब भए परम पद जोगू । भरत दरस मेटा भव रोगू ॥

यह बड़ि बात भरत कह नहीँ । सुमिरत जिनहि रामु मन माही ॥
 वारक राम कहत जग जेऊ । होत तरन तारन नर तेऊ ॥
 भरतु राम प्रिय पुनि लघु भ्राता । कस न होइ मगु मंगलदाता ॥
 सिद्ध साधु मुनिवर अस कहहीं । भरतहि निरखि हरषु हियँ लहहीं ॥
 देखि प्रभाउ सुरेसहि सोचू । जगु भल भलेहि पोच कहूँ पोचू ॥
 गुर सन कहेउ करिअ प्रभु सोई । रामहि भरतहि भेट न होई ॥

दो०—रामु सँकोची प्रेम बस भरत सपेम पयोधि ।

बनी बात बेगरन चहति करिअ जतनु छलु सोधि ॥२१७॥
 बचन सुनत सुरगुरु मुसुकाने । सहसनयन त्रिनु लोचन जाने ॥
 मायापति सेवक सन माया । करइ त उलटि परइ सुरराया ॥
 तब किछु कीन्ह राम रुख जानी । अब कुचालि करि होइहि हानी ॥
 सुनु सुरेस रघुनाथ सुभाऊ । निज अपराध रिसाहिँ न काऊ ॥
 जो अपराधु भगत कर करई । राम रोष पावक सो जरई ॥
 लोकहुँ बेद विदित इतिहासा । यह महिमा जानहिँ दुरवासा ॥
 भरत सरिस को राम सनेही । जगु जप राम रामु जप जेही ॥

दो०—मनहुँ न आनिअ अमरपति रघुवर भगत अकाजु ।

अजसु लोक परलोक दुख दिन दिन सोक समाजु ॥२१८॥
 सुनु सुरेस उपदेसु हमारा । रामहि सेवकु परम पिआरा ॥
 मानत सुखु सेवक सेवकाई । सेवक बैर बैर अधिकाई ॥

करम प्रधान बिस्व करि राखा । जो जस करइ सो तस फलु चाखा
तदपि करहिं सम विषम बिहारा । भगत अभगत हृदय अनुसार॥
अगुन अलेप अमान एकरस । रामु सगुन भए भगत पेम बस ॥
राम सदा सेवक रुचि राखी । वेद पुरान साधु सुर साखी ॥
अस जियँ जानि तजहु कुटिलाई । करहु भरत पद प्रीति सुहाई ॥
दो०—राम भगत परहित निरत पर दुख दुखी दयाल ।

भगत सिरोमनि भरत तें जनि डरपहु सुरपाल ॥२१९॥

सत्यसंध प्रभु सुर हितकारी । भरत राम आयस अनुसारी ॥
स्वारथ विवस बिकल तुम्ह होहू । भरत दोसु नहिं राउर मोहू ॥
सुनि सुरबर सुरगुर वर वानी । भा प्रमोदु मन मिटी गलानी ॥
बरषि प्रसून हरषि सुरराऊ । लगे सराहन भरत सुभाऊ ॥
एहि बिधि भरत चले मग जाहीं । दसा देखि मुनि सिद्ध सिहाहीं ॥
जवहिं रामु कहि लेहिं उसासा । उमगत पेमु मनहुँ चहु पासा ॥
द्रवहिं वचन सुनि कुलिस पषाना । पुरजन पेमु न जाइ बखाना ॥
बीच बास करि जमुनहिं आए । निरखि नीरु लोचन जल छाए
दो०—रघुबर बरन बिलोकि बर बारि समेत समाज ।

होत मगन बारिधि बिरह चढ़े बिबेक जहाज ॥२२०॥

जमुन तीर तेहि दिन करि बासू । भयउ समय सम सबहि सुपासू ॥
रातिहिं घाट घाट की तरनी । आई अगनित जाहिं न बरनी ॥
प्रात पार भए एकहि खेवाँ । तोषे रामसखा की सेवाँ ॥

चले नहाइ नदिहि सिर नाई। साथ निषादनाथ दोउ भाई ॥
 आगें मुनिवर बाहन आछें। राजसमाज जाइ सबु पाछें ॥
 तेहि पाछें दोउ बंधु पयादें। भूपन बसन बेष सुठि सादें ॥
 सेवक सुहृद सचिवसुत साथा। सुभिरत लखनु सीय रघुनाथा ॥
 जहँ जहँ राम बास विश्रामा। तहँ तहँ करहिं सप्रेम प्रनामा ॥
 दो०-मगवासी नर नारि सुनि धाम काम तजि धाइ ।

देखि सरूप सनेह सब मुदित जनम फलु पाइ ॥२२१॥
 कहहिं सपेम एक एक पाहीं। रामु लखनु सखि होहिं कि नाहीं ॥
 बय बपु बरन रूपु सोइ आली। सीलु सनेहु सरिस सम चाली ॥
 बेषु न सो सखि सीय न संगी। आगें अनी चली चतुरंगा ॥
 नहिं प्रसन्न मुख मानस खेदा। सखि संदेहु होइ एहिं भेदा ॥
 तामु तरक तियगन मन मानी। कहहिं सकल तेहि सम न सयानी ॥
 तेहि सराहि बानी फुरि पूजी। बोली मधुर बचन तिय दूजी ॥
 कहि सपेम सब कथाप्रसंगू। जेहि विधि राम राजरस भंगू ॥
 भरतहि बहुरि सराहन लागी। सील सनेह सुभाय सुभागी ॥
 दो०-चलत पयादें खात फल पिता दीन्ह तजि राजु ।

जात मनावन रघुवरहि भरत सरिस को आजु ॥२२२॥
 भायव भगति भरत आचरनू। कहत सुनत दुख दूषन हरनू ॥
 जो किछु कहव थोर मुख सोई। राम बंधु अस काहे न होई ॥
 राम सब मानस भरतहि देखें। भदन्ह धन्य जुवती जन लेखें ॥

मुनि गुन देखि दसा पछिताहो । केकइ जननि जोगु सुनु नाहीं ॥
कोउ कह दूपनु रानिहि नाहिन । विधि सबु कीन्ह हमहि जो दाहिन
कहँ हम लोक वेद विधि हीनी । लघु तिय कुल करतूति मलीनी ॥
बसहिँ कुदेम कुगाँव कुबामा । कहँ यह दरसु पुन्य परिनामा ॥
अस अनंदु अचिरिजु प्रति ग्रामा । जनु मरुभूमि कलपतरु जामा ॥

दो०—भरत दरसु देखत खुलेउ मग लोगन्ह कर भागु ।

जनु सिंघल बासिन्ह भयउ विधि बस सुलभ प्रयागु ॥२३॥

निज गुन सहित राम गुन गाथा । सुनत जाहिँ सुभात रघुनाथा ॥
तीरथ मुनि आश्रम सुरधामा । निरखि निमज्जहिँ करहिँ प्रनामा ॥
मनहीं मन मागहिँ बरु एहू । सीय राम पद पदुम सनेहू ॥
मिलहिँ किगात कोल बनवासी । ब्रैखानस बटु जती उदासी ॥
करि प्रनामु पूँछहिँ जेहि तेही । केहि बन लखनु रामु ब्रैदेही ॥
ते प्रभु समाचार सब कहहीं । भरतहि देखि जनम फलु लहहीं ॥
जे जन कहहिँ कुसल हम देखे । ते प्रिय राम लखन सम लेखे ॥
एहि विधि बूझत सबहि सुवानी । सुनत राम बनवास कहानी ॥

दो०—तेहि बासर बसि प्रातहीं चले सुमिरि रघुनाथ ।

राम दरस की लालसा भरत सरिस सब साथ ॥२४॥

मंगल सगुन होहिँ सब काहू । फरकहिँ सुखद विलोचन बाहू ॥
भरतहिसहित समाज उछाहू । मिलिहहिँ रामु मिटिहि दुख दाहू
करत मनोरथ जस जियँ जाके । जाहिँ सनेह सुराँ सब छाके ॥

Vinay Avasthi Sahib Bhuvani Vani Trust Donations

सिथिल अंग पग मग डगि डालीहि। विहवल बचन पम बस बोलहिं
 रामसखाँ तेहि समय देखावा। सैल सिरोमनि सहज सुहावा ॥
 जासु समीप सरित पय तीरा। सीय समेत बसहिं दोउ बीरा ॥
 देखि करहिं सब दंड प्रनामा। कहि जय जानकि जीवन रामा ॥
 प्रेम मगन अस राजसमाजू। जनु फिरि अवध चले रघुराजू ॥
 दो०—भरत प्रेमु तेहि समय जस तस कहि सकइ न सेषु ।

कबिहि अगम जिमि ब्रह्मसुखु अह मम मलिन जनेषु २२५
 सकल सनेह सिथिल रघुवर कैं। गए कोस दुइ दिनकर ढरकैं ॥
 जलु थलु देखि बसे निसि बीतैं। कीन्ह गवन रघुनाथ पिरीतैं ॥
 उहाँ रामु रजनी अवसेषा। जागे सीयँ सपन अस देखा ॥
 सहित समाज भरत जनु आए। नाथ त्रियोग ताप तन ताए ॥
 सकल मलिन मन दीन दुखारी। देखीं सासु आन अनुहारी ॥
 सुनिसिय सपन भरे जल लोचन। भए सोच बस सोच विमोचन ॥
 लखन सपन यह नीक न होई। कठिन कुचाह सुनाइहि कोई ॥
 अस कहि बंधु समेत नहाने। पूजि पुरारि साधु सनमाने ॥
 छं०—सनमानि सुर मुनि बंदि बैठे उतर दिसि देखत भए ।

नभ धूरि खग मृग भूरि भागे बिकल प्रभु आश्रम गए ॥
 तुलसी उठे अवलोकि कारनु काह चित सचकित रहे ।
 सब समाचार किरात कोलन्हि आइ तेहि अवसर कहे ॥

सो०—सुनत सुमंगल बैन मन प्रमोद तन पुलक भर ।

सरद सरोरुह नैन तुलसी भरे सनेह जल ॥२२६॥

बहुरि सोचबस भे सियरवनू। कारन कवन भरत आगवनू॥
 एक आइ अस कहा बहोरी। सेन संग चतुरंग न थोरी॥
 सो सुनि रामहि भा अति सोचू। इत पितु बच इत बंधु सकोचू॥
 भरत सुभाउ समुझि मन माहीं। प्रभु चित हित थिति पावत नाहीं
 समाधान तब भा यह जाने। भरतु कहे महुँ साधु सयाने॥
 लखन लखेउ प्रभु हृदयँ खभारू। कहत समय सम नीति विचारू॥
 बिनु पूछें कछु कहउँ गोसाईं। सेवकु समयँ न ढीठ ढिठाई॥
 तुम्ह सर्वग्य सिरोमनि स्वामी। आपनि समुझि कहउँ अनुगामी॥

दो०-नाथ सुहृद सुठि सरल चित सील सनेह निधान ।

सब पर प्रीति प्रतीति जियँ जानिअ आपु समान ॥२२७॥

विप्रई जीव पाइ प्रभुताई। मूढ़ मोह बस होहिं जनाई॥
 भरतु नीति रत साधु सुजाना। प्रभु पद प्रेमु सकल जगु जाना॥
 तेऊ आजु राम पदु पाई। चले धरम मरजाद मेटाई॥
 कुटिल कुबंधु कुअवसर ताकी। जानि राम बनवास एकाकी॥
 करि कुमंत्रु मन साजि समाजू। आए करै अकंटक राजू॥
 कोटि प्रकार कलपि कुटिलाई। आए दल बटोरि दोउ भाई॥
 जौं जियँ होति न कपट कुचाली। केहि सोहाति रथ बाजि गजाली॥
 भरतहि दोसु देइ को जाएँ। जग बौराइ राज पदु पाएँ॥

दो०-ससि गुर तिय गामी नघुषु चढ़ेउ भूमिसुर जान ।

लोक बेद तें बिमुख भा अधम न बेन समान ॥२२८॥

Vinay Avasthi Sahib Bhawan Vani Trust Donations

सहस्रबाहु सुरनाथु त्रिसकू । कहि न राजमद दीन्ह कलंकू ॥
 भरत कीन्ह यह उचित उपाऊ । रिपु रिन रंच न राखव काऊ ॥
 एक कीन्हि नहिं भरत भलाई । निदरे राम जानि असहाई ॥
 समझि परिहि सोउ आजु बिसेषी । समर सरोष राम मुखु पेखी ॥
 एतना कहत नीति रस भूला । रनरस बिटपु पुलक मिस फूला ॥
 प्रभु पद बंदि सीस रज राखी । बोले सत्य सहज बलु भाषी ॥
 अनुचित नाथ न मानव मोरा । भरत हमहि उपचार न थोरा ॥
 कहँ लगि सहिअ रहिअ मनु मारें । नाथ साथ धनु हाथ हमारें ॥

दो०—छत्रि जाति रघुकुल जनमु राम अनुग जगु जान ।

लातहुँ मारें चढ़ति सिर नीच को धूरि समान ॥२२९॥

उठि कर जोरि रजायसु मागा । मनहुँ वीर रस सोवत जागा ॥
 बाँधि जटा सिर कसि कटि भाथा । साजि सरासनु सायकु हाथा ॥
 आजु राम सेवक जसु लेऊँ । भरतहि समर सिखावन देऊँ ॥
 राम निरादर कर फलु पाई । सोवहुँ समर सेज दोउ भाई ॥
 आइ बना भल सकल समाजू । प्रगट करउँ रिस पाछिल आजू ॥
 जिमि करि निकर दलइ मृगराजू । लेइ लपेटि लवा जिमि बाजू ॥
 तैसेहिं भरतहि सेन समेता । सानुज निदरि निपातउँ खेता ॥
 जौ सहाय कर संकरु आई । तौ मारउँ रन राम दोहाई ॥

दो०—अति सरोष माखे लखनु लखि सुनि सपथ प्रवान ।

सभयलोक सब लोकपति चाहत भभरि भगान ॥२३०॥

जगु भय मगन गगन भइ बानी । लखन बाहुबल विपुल बखानी
तात प्रताप प्रभाउ तुम्हारा । को कहि सकइ को जाननिहारा ॥
अनुचित उचित काजु किछु होऊ । समुझि करिअ भल कह सबु कोऊ
सहसा करि पाछें पछिताहीं । कहहिं वेद बुध ते बुध नाहीं ॥
सुनि सुर वचन लखन सकुचाने । राम सीयँ सादर सनमाने ॥
कही तात तुम्ह नीति सुहाई । सब तें कठिन राजमदु भाई ॥
जो अचवँत नृप मातहिं तेई । नाहिन साधुमभा जेहिं सेई ॥
सुनहु लखन भल भरत सरीसा । विधि प्रपंच महुँ सुना न दीसा ॥

दो०—भरतहि होइ न राजमदु विधि हरि हर पद पाइ ।

कबहुँ कि काँजी सीकरनि छीरसिंधु बिनसाइ ॥२३१॥

तिमिरु तरुन तरनिहि मकु गिलई । गगनु मगन मकु मेघहि मिलई
गोपद जल बूझहिं घटजोनी । सहज छमा बरु छाड़ै छोनी ॥
मसक फूँक मकु मेरु उड़ाई । होइ न नृपमदु भरतहि भाई ॥
लखन तुम्हार सपथ पितु आना । सुचि सुबंधु नहिं भरत समाना ॥
सगुनु खीरु अवगुन जलु ताता । मिलइ रचइ परपंचु विधाता ॥
भरतु हंस रविवंस तड़ागा । जनमि कीन्ह गुन दोष विभागा ॥
गहि गुन पय तजि अवगुन बारी । निज जस जगत कीन्ह उजिआरी
कहत भरत गुन सीलु सुभाऊ । पेम पयोधि मगन रघुराऊ ॥

दो०—सुनि रघुबर बानी विबुध देखि भरत पर हेतु ।

सकल सराहत राम सो प्रभु को कृपानिकेतु ॥२३२॥

जौ न होत जग जनम भरत को । सकल धरम धुर धरनि धरत को ॥
 कवि कुल अगम भरत गुन गाथा । को जानइ तुम्ह बिनु रघुनाथा ॥
 लखन राम सियँ सुनि सुर बानी । अति सुखु लहेउ न जाइ बखानी
 इहाँ भरतु सब सहित सहाए । मंदाकिनीं पुनीत नहाए ॥
 सरित समीप राखि सब लोगा । मागि मातु गुर सचिव नियोगा ॥
 चले भरतु जहँ सिय रघुराई । साथ निषादनाथु लघु भाई ॥
 समुझि मातु करतव सकुचाही । करत कुतरक कोटि मन माहीं ॥
 रामु लखनु सिय सुनि मम नाऊँ । उठि जनि अनत जाहिं तजि ठाऊँ
 दो०—मातु मते महुँ मानि मोहि जो कछु करहिं सो थोर ।

अघ अवगुन छमि आदरहिं समुझि आपनी ओर ॥२३३॥

जौ परिहरहिं मलिन मनु जानी । जौ सनमानहिं सेवकु मानी ॥
 मोरें सरन रामहि की पनही । राम सुखामि दोसु सब जनही ॥
 जग जस भाजन चातक मीना । नेम पेम निज निपुन नबीना ॥
 अस मन गुनत चले मग जाता । सकुच सनेहँ सिथिल सब गाता ॥
 फेरति मनहुँ मातु कृत खोरी । चलत भगतिबल धीरज धोरी ॥
 जब समुझत रघुनाथ सुभाऊ । तव पथ परत उताइल पाऊ ॥
 भरत दसा तेहि अवसर कैसी । जल प्रवाहँ जल अलि गति जैसी ॥
 देखि भरत कर सोचु सनेहू । भा निषाद तेहि समयँ विदेहू ॥

दो०—लगे होन मंगल सगुन सुनि गुनि कहत निषादु ।

मिटिहि सोचु होइहि हरषु पुनि परिनाम बिषादु ॥२३४॥

सेवक बचन सत्य सत्य जाने । आश्रम तिकर जग निवासने

भरत दीख बन सैल समाजू। मुदित छुधित जनु पाइ सुनाजू ॥
 ईति भीति जनु प्रजा दुखारी। त्रिविध ताप पीड़ित ग्रह मारी ॥
 जाइ सुराज सुदेस सुखारी। होहिं भरत गति तेहि अनुहारी ॥
 राम बास बन संपति भ्राजा। सुखी प्रजा जनु पाइ सुराजा ॥
 सचिव विरागु बिबेकु नरेसू। बिपिन सुहावन पावन देसू ॥
 भट जम नियम सैल रजधानी। सांति सुमति सुचि सुंदर रानी ॥
 सकल अंग संपन्न सुराऊ। राम चरन आश्रित चित चाऊ ॥
 दो०—जीति मोह महिपालु दल सहित बिबेक भुआलु।

करत अकंटक राजु पुरँ सुख संपदा सुकालु ॥२३५॥
 बन प्रदेस मुनि बास घनेरे। जनु पुर नगर गाउँ गन खेरे ॥
 बिपुल बिचित्र बिहग मृग नाना। प्रजा समाजु न जाइ बखाना ॥
 खगहा करि हरि बाध बराहा। देखि महिष बृष साजु सराहा ॥
 बयरु बिहाइ चरहिं एक संग। जहँ तहँ मनहुँ सेन चतुरंगा ॥
 झरना झरहिं मत्त गज गाजहिं। मनहुँ निसान बिबिधि बिधि बाजहिं ॥
 चक्र चकोर चातक सुक पिक गन। कूजत मंजु मराल मुदित मन ॥
 अलिगन गावत नाचत मोरा। जनु सुराज मंगल चहु ओरा ॥
 बेलि बिटप तृन सफल सफूला। सब समाजु मुद मंगल मूला ॥
 दो०—राम सैल सोभा निरखि भरत हृदयँ अति पेसु।

तापस तप फलु पाइ जिमि सुखी सिरानें नेसु ॥२३६॥

मासपारायण, बीसवाँ विश्राम

नवाह्नपारायण, पाँचवाँ विश्राम

तव केवट ऊँचें चढि धाई । कहेउ भरत सन भुजा उठाई ॥
 नाथ देखि अहिं बिटप विमला । पाकरि जंभु रसाल तमाला ॥
 जिन्ह तरुवरन्ह मध्य बटु सोहा । मंजु विमाल देखि मनु मोहा ॥
 नील मघन पल्लव फल लाला । अविरल छाहँ सुखद सब काला ॥
 मानहुँ तिमिर अरुनमय रांसी विरची विधि सँकेलि सुषमा सी ॥
 ए तरु सरित समीप गोसाँई । रघुवर परनकुटी जहँ छाई ॥
 तुलसी तरुवर विविध सुहाए । कहँ कहँ सियँ कहँ लखन लगाए ॥
 बट छायाँ वेदिका बनाई । सियँ निज पानि सरोज सुहाई ॥
 दो०—जहाँ बैठि मुनिगन सहित नित सिय रामु सुजान ।

सुनिहि कथा इतिहास सब आगम निगम पुरान ॥२३७॥

सखा बचन सुनि बिटप निहारी । उमगे भरत बिलोचन बारी ॥
 करत प्रनाम चले दोउ भाई । कहत प्रीति सारद सकुचाई ॥
 हरषहिं निरखि राम पद अंका । मानहुँ पारसु पायउ रंका ॥
 रज सिर धरि हियँ नयनन्हि लावहिं । रघुवर मिलन सरिस सुख पावहिं ॥
 देखि भरत गति अकथ अतीवा । प्रेम मगन मृग खग जड़ जीवा ॥
 सखहि सनेह बिबस मग भूला । कहि सुपंथ सुर वरषहिं फूला ॥
 निरखि सिद्ध साधक अनुरागे । सहज सनेहु सराहन लागे ॥
 होत न भूतल भाउ भरत को । अचर सचर चर अचर करत को

दो०—पेम अमिअ मंदरु बिरहु भरतु पयोधि गँभीर ।

Vinay Avasthi Sahib Bhuvan Vani Trust Donations

सखा समेत मन हर जोटा । लख उ न लखन सघन बन ओटा ॥
भरत दीख प्रभु आश्रमु पावन । सकल सुमंगल सदन सुहावन ॥
करत प्रवेश मिटे दुख दावा । जनु जोगीं परमारथु पावा ॥
देखे भरत लखन प्रभु आगे । पूछे बचन कहत अनुरागे ॥
सीस जटा कटि मुनि पट बाँधे । तून कसें कर सर धनु काँधे ॥
बेदी पर मुनि साधु समाजू । सीय सहित राजत रघुराजू ॥
बलकल बसन जटिल तनु स्यामा । जनु मुनि वेष कीन्हरति कामा ॥
कर कमलनि धनु सायकु फेरत । जिय की जरनि हरत हँसि हेरत ॥

दो०—लसत मंजु मुनि मंडली मध्य सीय रघुचंदु ।

ग्यान सभाँ जनु तनु धरें भगति सच्चिदानंदु ॥२३९॥

सानुज सखा समेत मगन मन । बिसरे हरष सोक सुख दुख गन ॥
पाहि नाथ कहि पाहि गोसाईं । भूतल परे लकुट की नाई ॥
बचन सपेम लखन पहिचाने । करत प्रनामु भरत जियँ जाने ॥
बंधु सनेह सरस एहि ओरा । उत साहिब सेवा बस जोरा ॥
मिलिन जाइ नहिं गुदरत बनई । सुकवि लखन मन की गति भनई
रहे राखि सेवा पर भारू । चढ़ी चंग जनु खैच खेलारू ॥
कहत सप्रेम नाइ महि माथा । भरत प्रनाम करत रघुनाथा ॥
उठे रामु मुनि पेम अधीरा । कहूँ पट कहूँ निषंग धनु तीरा ॥

दो०—बरबस लिए उठाइ उर लाए कृगनिधान ।

भरत राम की मिलनि लखि बिसरे सबहि अपान ॥२४०॥

मिलनि प्रीति किमि जाइ बखानी। कविकुल अगम करम मन बानी
 परम पेम पूरन दोउ भाई। मन बुधि चित अहमिति विसराई॥
 कहहु सुपेम प्रगट को करई। केहि छाया कवि मति अनुसरई॥
 कविहि अरथ आखर बलु साँचा। अनुहरि ताल गतिहि नटु नाचा
 अगम सनेह भरत रघुवर को। जहँ न जाइ मनु विधि हरि हर को
 सो मैं कुमति कहौं केहि भाँती। बाज सुराग कि गाँडर ताँती॥
 मिलनि बिलोकि भरत रघुवर की। सुरगन सभय धकधकी धरकी॥
 समुझाए सुरगुरु जड़ जागे। वरषि प्रसून प्रसंसन लागे॥

०-मिलि सपेम रिपुसूदनहि केवटु भेंटैउ राम।

भूरि भायँ भेंटै भरत लछिमन करत प्रनाम ॥२४१॥

भेंटैउ लखन ललकि लघु भाई। बहुरि निषादु लीन्ह उर लाई॥
 पुनि मुनिगन दुहुँ भाइन्ह बंदे। अभिमत आसिष पाइ अनंदे॥
 सानुज भरत उमगि अनुरागा। धरि सिर सिय पद पदुम परागा॥
 पुनि पुनि करत प्रनाम उठाए। सिर कर कमल परसि बैठाए॥
 सीयँ असीस दीन्ह मन माहीं। मगन सनेहँ देह सुधि नाहीं॥
 सब विधि सानुकूल लखि सीता। भे निसोच उर अपडर बीता॥
 कोउ किछु कहइ न कोउ किछु पूँछा। प्रेम भरा मन निज गति छूँछा
 तेहि अवसर केवटु धीरजु धरि। जोरि पानि बिनवत प्रनामु करि॥

दो०-नाथ साथ मुनिनाथ के मातु सकल पुर लोग।

Vinay Avasthi Sahib Bhuvan Vani Trust Donations

सीलसिंधु सुनि गुर आगवन् । सिय समीप राखि रिपुदवन् ॥
चले सबेग रामु तेहि काला । धीर धरम धुर दीनदयाला ॥
गुरहि देखि सानुज अनुरागे । दंड प्रनाम करन प्रभु लागे ॥
मुनिवर धाइ लिए उर लाई । प्रेम उमगि भेंटे दोउ भाई ॥
प्रेम पुलकि केवट कहि नामू । कीन्ह दूरि तैं दंड प्रनामू ॥
रामसखा रिषि बरबस भेंटा । जनु महि लुठत सनेह समेटा ॥
रघुपति भगति सुमंगल मूला । नभ सराहि सुर बरिसहिं फूला ॥
एहि सम निपट नीच कोउ नाहीं । बड़ बसिष्ठ सम को जग माहीं ॥

दो०—जेहि लखि लखनहु तैं अधिक मिले मुदित मुनिराउ ।
सो सीतापति भजनको प्रगट प्रताप प्रभाउ ॥२४३॥

आरत लोग राम सबु जाना । करुनाकर सुजान भगवाना ॥
जो जेहि भायँ रहा अभिलाषी । तेहि तेहि कै तसि तसि रुख राखी ॥
सानुज मिलि पल महँ सब काहू । कीन्ह दूरि दुखु दारुन दाहू ॥
यह बड़ि बात राम कै नाहीं । जिमि घट कोटि एक रबि छाहीं ॥
मिलि केवटहि उमगि अनुरागा । पुरजन सकल सराहहिं भागा ॥
देखीं राम दुखित महतारीं । जनु सुबेलि अवलीं हिम मारीं ॥
प्रथम राम भेंटी कैकेई । सरल सुभायँ भगति मति भेई ॥
पग परि कीन्ह प्रबोधु बहोरी । काल करम विधि सिर धरि खोरी ॥

दो०—भेंटीं रघुबर मातु सब करि प्रबोधु परितोषु ।

अंब ईस आधीन जगु काहु न देइअ दोषु ॥२४४॥

गुरतिय पद बंदे दुहु भाई । सहितु विप्रतिय जे सँग आई ॥
 गंग गौरि सम सब सनमानीं । देहिं असीस मुदित मृदु बानीं ॥
 गहि पद लगे सुमित्रा अंका । जनु भेंटी संपति अति रंका ॥
 पुनि जननी चरननि दोउ भ्राता । परे पेम ब्याकुल सब गाता ॥
 अति अनुराग अंब उर लाए । नयन सनेह सलिल अन्हवाए ॥
 तेहि अवसर कर हरष विषादू । किमि कबि कहै मूक जिमि स्वादू ॥
 मिलि जननिहि सानुज रघुराऊ । गुर सन कहेउ कि धारिअ पाऊ ॥
 पुरजन पाइ मुनीस नयोगू । जल थल तकि तकि उतरेउ लोगू ॥

दो०—महिसुर मंत्री मातु गुर गने लोग लिए साथ ।

पावन आश्रम गवनु किय भरत लखन रघुनाथ ॥२४५॥

सीय आइ मुनिवर पग लागी । उचित असीस लहे मन मागी ॥
 गुर गतिनिहि मुनितियन्ह समेता । मिली पेमु कहि जाइ न जेता ॥
 बंदि बंदि पग सिय सबही के । आसिरबचन लहे प्रिय जी के ॥
 सासु सकल जव सीयँ निहारीं । मूदे नयन सहमि सुकुमारीं ॥
 परीं अधिक बस मनहुँ मरालीं । काह कीन्ह करतार कुचालीं ॥
 तिन्ह सिय निरखि निपट दुखु पावा । सो सबु सहिअ जो दैउ सहावा ॥
 जनकसुता तव उर धरि धीरा । नील नलिन लोचन भरि नीरा ॥
 मिली सकल सासुन्ह सिय जाई । तेहि अवसर करुना महि छाई ॥

दो०—लागि लागि पग सबनि सिय भेंटति अति अनुराग ।

इहयँ असीसहि पेम बस रहिअहु भारी सोदाग ॥ २४६ ॥

विकल सनेह सीय सब रानी । बैठन सबहि कहिउ पुरोवानी ॥
 कहि जग गति मायिक मुनिनाथा । कहे कलुक परमारथ गाथा ॥
 नृप कर सुरपुर गवनु सुनावा । सुनि रघुनाथ दुमह दुखु पावा ॥
 मरन हेतु निज नेहु विचारी । भे अति विकल धीर धुर धारी ॥
 कुलिस कठोर सुनत कहु बानी । बिलपत लखन सीय सब रानी ॥
 सोक विकल अति सकल समाजू । मानहुँ राजु अकाजेउ आजू ॥
 मुनिवर बहुरि राम समुझाए । सहित समाज सुसरित नहाए ॥
 व्रतु निरंबु तेहि दिन प्रभु कीन्हा । मुनिहु कहें जलु काहुँ न लीन्हा ॥
 दो० - भोरु भएँ रघुनंदनहि जो मुनि आयसु दीन्हा ।

श्रद्धा भगति समेत प्रभु सो सबु सादरु कीन्हा ॥२४७॥
 करि पितु क्रिया वेद जसि बरनी । भे पुनीत पातक तम तरनी ॥
 जासु नाम पावक अघ तूला । सुमिरत सकल सुमंगल मूला ॥
 सुद्ध सो भयउ साधु संमत अस । तीरथ आवाहन सुरसरि जस ॥
 सुद्ध भएँ दुइ बासर बीते । बोले गुर सन राम पिरीते ॥
 नाथ लोग सब निपट दुखारी । कंद मूल फल अंबु अहारी ॥
 सानुज भरतु सचिव सब माता । देखि मोहिंपल जिमि जुग जाता ॥
 सब समेत पुर धारिअ पाऊ । आपु इहाँ अमरावति राऊ ॥
 बहुत कहेउँ सबक्रियउँ दिठाई । उचित होइ तस करिअ गोसाँई ॥
 दो० - धर्म सेनु करुनायतन कस न कहहु अस राम ।

लोग दुखित दिन दुइ दरस देखि लहहुँ बिश्राम ॥२४८॥

राम बचन सुनि सभय समाजू । जनु जलनिधि महुँ बिकल जहाजू ॥
 सुनि गुर गिरा सुमंगल मूला । भयउ मनहुँ मारुत अनुकूला ॥
 पावन पयँ तिहुँ काल नहाहीं । जो बिलोकि अघ ओघ नसाहीं ॥
 मंगलमूरति लोचन भरि भरि । निरखहिं हरषि दंडवत करि करि
 राम सैल बन देखन जाहीं । जहँ सुख सकल सकल दुख नाहीं ॥
 झरना झरहिं सुधासम बारी । त्रिविध तापहर त्रिविध बयारी ॥
 बिटप बेलि तृन अगनित जाती । फल प्रसून पल्लव बहु भाँती ॥
 सुंदर सिला सुखद तरु छाहीं । जाइ वरनि बन छवि केहि पाहीं ॥

दो०—सरनि सरोरुह जल बिहग कूजत गुंजत भृंग ।

बैर बिगत बिहरत बिपिन मृग बिहंग बहुरंग ॥२४९॥

कोल किरात मिल बनवासी । मधु सुचि सुंदर स्वादु सुधा सी ॥
 भरि भरि परन पुटीं रचि रूरी । कंद मूल फल अंकुर जूरी ॥
 सबहि देहिं करि बिनय प्रनामा । कहि कहि स्वाद भेद गुन नामा
 देहिं लोग बहु मोल न लेहीं । फेरत राम दोहाई देहीं ॥
 कहहिं सनेह मगन मृदु बानी । मानत साधु पेम पहिचानी ॥
 तुम्ह सुकृती हम नीच निषादा । पावा दरसनु राम प्रसादा ॥
 हमहि अगम अति दरसु तुम्हारा । जस मरु धरनि देवधुनि धारा
 राम कृपाल निषाद नेवाजा । परिजन प्रजउ चहिअ जस राजा ॥

दो०—यह जियँ जानि संकोचु तजि करिअ छोडु लखि नेहु ।

हमहि कृतार्थ करन लगि फल तन अंकुर लेहु ॥२५०॥

Vinay Avasthi Sahib Bhuvan Yani Trust Donations

तुम्ह प्रिय पाहुने बन पगु धरि । सेवा जागु न भागि हमारे ॥
 देव काह हम तुम्हहि गोसाँई । ईधनु पात किरात मिताई ॥
 यह हमारि अति बड़ि सेवकाई । लेहिं न बासन बसन चोराई ॥
 हम जड़ जीव जीव गन घाती । कुटिल कुचाली कुमति कुजाती
 पाप करत निसि बासर जाहीं । नहिं पट कटि नहिं पेट अघाहीं ॥
 सपनेहुँ धरम बुद्धि कस काऊ । यह रघुनंदन दरस प्रभाऊ ॥
 जब तैं प्रभु पद पदुम निहारे । मिटे दुसह दुख दोष हमारे ॥
 बचन सुनत पुरजन अनुरागे । तिन्ह के भाग सराहन लागे ॥

छं०—लागे सराहन भाग सब अनुराग बचन सुनावहीं ।
 बोलनि मिलनि सिय राम चरन सनेहु लखि सुखु पावहीं ॥
 नर नारि निदरहिं नेहु निज सुनि कोल भिल्लनि की गिरा ।
 तुलसी कृपा रघुवंसमनि की लोह लै लौका तिरा ॥

सो०—बिहरहिं बन चहु ओर प्रति दिन प्रमुदित लोग सब ।
 जल ज्यों दादुर मोर भए पीन पावस प्रथम ॥२५१॥

पुरजन नारि मगन अंति प्रीती । बासर जाहिं पलक सम बीती ॥
 सीय सासु प्रति बेष बनाई । सादर करइ सरिस सेवकाई ॥
 लखा न मरमु राम बिनु काहूँ । माया सब सिय माया माहूँ ॥
 सीय सासु सेवा बस कीन्हीं । तिन्ह लहि सुख सिख आसिष दीन्हीं
 लखि सिय सहित सरल दोउ भाई । कुटिल रानि पछितानि अघाई
 अवनि जमहि जाचति कैकेई । महि न बीचु विधि मीचु न देई ॥

लोकहुँ वेद विदित कवि कहहीं । राम विमुख थलु नरक न लहहीं ॥

यहु संसउ सब के मन माहीं । राम गवनु बिधि अवध कि नाहीं ॥

दो०—निसि न नीद नहिं भूख दिन भरतु बिकल सुचि सोच ।

नीच कीच बिच मगन जस मीनहि सलिल सँकोच ॥२५२॥

कीन्हि मातु मिस काल कुचाली । ईति भीति जस पाकत साली ॥

केहि बिधि होइ राम अभिषेकू । मोहि अवकलत उपाउ न एकू ॥

अवसि फिरहिं गुर आयसु मानी । मुनि पुनि कहव राम रुचि जानी ॥

मातु कहेहुँ बहुरहिं रघुराऊ । राम जननि हठ करवि कि काऊ ॥

मोहि अनुचर कर केतिक वाता । तेहि महुँ कुसमउ बाम बिधाता ॥

जौ हठ करउँ त निपट कुकरमू । हरगिरि तें गुरु सेवक धरमू ॥

एकउं जुगुति न मन ठहरानी । सोचत भरतहि रैनि बिहानी ॥

प्रात नहाइ प्रभुहि सिर नाई । बैठत पठए रिषयँ बोलाई ॥

दो०—गुर पद कमल प्रनासु करि बैठे आयसु पाइ ।

बिप्र महाजन सचिव सब जुरे सभासद आइ ॥२५३॥

बोले मुनिवरु समय समाना । सुनहु सभासद भरत सुजाना ॥

धरम धुरीन भानु कुल भानू । राजा रामु स्वबस भगवानू ॥

सत्यसध पालक श्रुति सेतू । राम जनमु जग मंगल हेतू ॥

गुर पितु मातु बचन अनुमारी । खल दलु दलन देव हितकारी ॥

नीति प्रीति परमारथ स्वारथु । कोउ न राम सम जान जथारथु ॥

बिधि हरि हरु ससि रवि दिसिपाला । माया जीव करम कुलि काला ॥

अहिप महिप जहँ लगि प्रभुताई । जोग सिद्धि निगमागम गाई ॥
करि विचार जियँ देखहु नीकें । राम रजाइ सीस सबही कें ॥
दो०—राखें राम रजाइ रुख हम सब कर हित होइ ।

समुझि सयाने करहु अब सब मिलि संमत सोइ ॥२५४॥

सब कहँ सुखद राम अभिषेकू । मंगल मोद मूल मग एकू ॥
केहि विधि अवध चलहिं रघुराऊ । कहहु समुझि सोइ करिअ उपाऊ
सब सादर सुनि सुनिवर बानी । नय परमारथ स्वारथ सानी ॥
उतरु न आव लोग भए भोरे । तब सिरु नाइ भरत कर जोरे ॥
भानुवंस भए भूप घनेरे । अधिक एक तें एक बड़ेरे ॥
जंनम हेतु सब कहँ पितु माता । करम सुभासुभ देइ विधाता ॥
दलि दुख सजइ सकल कल्याना । अस असीस राउरि जगु जाना ॥
सो गोसाईं विधि गति जेहिं छेंकी । सकइ को टारि टेक जो टेकी ॥
दो०—बूझिअ मोहि उपाउ अब सो सब मोर अभागु ।

सुनि सनेहमय बचन गुर उर उमगा अनुरागु ॥२५५॥

तात बात फुरि राम कृपाहीं । राम विमुख सिधि सपनेहुँ नाहीं ॥
सकुचउँ तात कहत एक बाता । अरध तजहिं बुध सरबस जाता ॥
तुम्ह कानन गवनहु दोउ भाई । फेरिअहिं लखन सीय रघुराई ॥
सुनि सुबचन हरषे दोउ भ्राता । भे प्रमोद परिपूरन गाता ॥
मन प्रसन्न तन तेजु बिराजा । जनु जिय राउ रामु भए राजा ॥
बहुत लाभ लोगन्ह लघु हानी । सम दुख सुख सब रोवहिं रानी ॥

कहहिं भरतु मुनि कहा सो कीन्हे । फल जग जीवन्ह अभिमत दीन्हे
कानन करउँ जनम भरि बासू । एहि तैं अधिक न मोर सुपासू ॥

दो०—अंतरजामी रामु सिय तुम्ह सरबग्य सुजान ।

जौं फुर कहहु त नाथ निज कीजिअ बचनु प्रवान ॥२५६॥

भरत बचन सुनि देखि सनेहू । सभा सहित मुनि भए विदेहू ॥

भरत महा महिमा जलरासी । मुनि मति ठाढ़ि तीर अबलासी ॥

गा चह पार जतनु हियँ हेरा । पावति नाव न बोहितु बेरा ॥

औरु करिहि को भरत बड़ाई । सरसी सीपि कि सिंधु समाई ॥

भरतु मुनिहि मन भीतर भाए । सहित समाज राम पहिं आए ॥

प्रभु प्रनामु करि दीन्ह सुआसनु । बैठे सब सुनि मुनि अनुसासनु ॥

बोले मुनिवरु बचन बिचारी । देस काल अवसर अनुहारी ॥

सुनहु राम सरबग्य सुजाना । धरम नीति गुन ग्यान निधाना ॥

दो०—सब के उर अंतर बसहु जानहु भाउ कुभाउ ।

पुरजन जननी भरत हित होइ सो कहिअ उपाउ ॥२५७॥

आरत कहहिं बिचारि न काऊ । सूझ जुआरिहि आपन दाऊ ॥

सुनि मुनि बचन कहत रघुराऊ । नाथ तुम्हारेहि हाथ उपाऊ ॥

सब कर हित रुख राउरि राखें । आयसु किएँ सुदित फुर भाषें ॥

प्रथम जो आयसु मो कहूँ होई । माथें मानि करौं सिख सोई ॥

पुनि जेहि कहँ जस कहव गोसाईं । सो सब भाँति घटिहि सेवकाईं ॥

कह मुनि राम सत्य तुम्ह भाषा । भरत सनेहँ विचारु न सावा ॥

Vinay Avasthi Sahib Bhuvan Vani Trust Donations
तेहि तैं कहउ बहारि बहारी । भरत भगति वसै मई माति मोरी ॥
मोरें जान भरत रुचि राखी । जो कीजिअ सो सुभ सिव साखी ॥
दो०—भरत बिनय सादर सुनिअ करिअ बिचारु बहोरि ।

करब साधुमत लोकमत नृपनय निगम निचोरि ॥२५८॥

गुर अनुरागु भरत पर देखी । राम हृदयँ आनंदु विसेषी ॥
भरतहि धरम धुरंधर जानी । निज सेवक तन मानस बानी ॥
बोले गुर आयस अनुकूला । बचन मंजु मृदु मंगलमूला ॥
नाथ सपथ पितु चरन दोहाई । भयउ न भुअन भरत सम भाई ॥
जे गुर पद अंबुज अनुरागी । ते लोकहुँ वेदहुँ बड़भागी ॥
राउर जा पर अस अनुरागू । को कहि सकइ भरत कर भागू ॥
लखि लघु बंधु बुद्धि सकुचाई । करत बदन पर भरत बड़ाई ॥
भरतु कहहिं सोइ किऐं भलाई । अस कहि राम रहे अरगाई ॥
दो०—तब मुनि बोले भरत सन सब सँकोचु तजि तात ।

कृपासिंधु प्रिय बंधु सन कहहु हृदय कै बात ॥२५९॥

मुनि मुनि बचन राम रुख पाई । गुरु साहिव अनुकूल अघाई ॥
लखि अपनैं सिर सबु छरु भारू । कहि न सकहिं कछु करहिं बिचारू ॥
पुलकि सरीर सभाँ भए ठाढ़े । नीरज नयन नेह जल बाढ़े ॥
कहव मोर मुनिनाथ निबाहा । एहि तैं अधिक कहाँ मैं काहा ॥
मैं जानउँ निज नाथ सुभाऊ । अपराधिहु पर कोह न काऊ ॥
मो पर कृपा सनेहु विसेषी । खेलत खुनिस न कबहुँ देखी ॥

सिसुपन तैं परिहरेउँ न संगू । कबहुँ न कीन्ह मोर मन भंगू ॥
मैं प्रभु कृपा रीति जियँ जोही । हारेहुँ खेल जितावहिं मोही ॥

दो०-महूँ सनेह सकोच बस सनसुख कही न बैन ।

दरसन नृपित न आजु लगि पैम पिआसे नैन ॥२६०॥

विधि न सकेउ सहि मोर दुलारा । नीच ब्रीचु जननी मिस पारा ॥
यहउ कहत मोहि आजु न सोभा । अपनी समुझि साधु सुचि को भा
मातु मंदि मैं साधु सुचाली । उर अस आनत कोटि कुचाली ॥
फरइ कि कोदव बालि सुसाली । मुकता प्रसव कि संबुक काली ॥
सपनेहुँ दोसक लेसु न काहू । मोर अभाग उदधि अवगाहू ॥
बिनु समुझें निज अघ परिपाकू । जारिउँ जायँ जननि कहि काकू ॥
हृदयँ हेरि हारेउँ सब ओरा । एकहि भाँति भलेहिं भल मोरा ॥
गुर गोसाँइ साहिव सिय रामू । लागत मोहि नीक परिनामू ॥

दो०-साधु सभाँ गुर प्रभु निकट कहउँ सुथल सतिभाउ ।

प्रेम प्रपंचु कि झूठ फुर जानहिं मुनि रघुराउ ॥२६१॥

भूपति मरन पेम पनु राखी । जननी कुमति जगतु सबु साखी ॥
देखि न जाहिं विकल महतारीं । जरहिं दुसह जर पुर नर नारीं ॥
महीं सकल अनरथ कर मूला । सो मुनि समुझि सहिउँ सब सूला
मुनि बन गवनु कीन्ह रघुनाथा । करि मुनि बेष लखन सिय साथा ॥
बिनु पानहिन्ह पयादेहि पाएँ । संकरु साखि रहेउँ एहि घाएँ ॥

बहुरि निहारि निषाद सनेह । कुजिह कटि स उठ भासु नाने ॥

अब सबु आखिन्ह देखउ आई । जिअत जीव जइ सबइ सहाई ॥
जिन्हहि निरखि मग साँपिनि बीछी । तजहिं बिषम बिषु तामस तीछी
दो०—तेह रघुनंदनु लखनु सिय अनहित लागे जाहि ।

तासु तनय तजि दुसह दुख दैउ सहावइ काहि ॥२६२॥
मुनि अति बिकल भरत बर बानी । आरति प्रीति बिनय नय सानी ॥
सोक मगन सब सभाँ खभारू । मनहुँ कमल बन परेउ तुसारू ॥
कहि अनेक बिधि कथा पुरानी । भरत प्रबोधु कीन्ह मुनि ग्यानी ॥
बोले उचित बचन रघुनंदू । दिनकर कुल कैरव बन चंदू ॥
तात जायँ जियँ करहु गलानी । ईस अधीन जीव गति जानी ॥
तीनि काल तिभुअन मत मोरें । पुन्यसिलोक तात तर तोरें ॥
उर आनत तुम्ह पर कुटिलाई । जाइ लोक परलोक नसाई ॥
दोसु देहिं जननिहि जइ तेई । जिन्ह गुर साधु सभा नहिं सेई ॥
दो०—मिटिहहिं पाप प्रपंच सब अखिल अमंगल भार ।

लोक सुजसु परलोक सुखु सुमिरत नामु तुम्हार ॥२६३॥
कहउँ सुभाउ सत्य सिव साखी । भरत भूमि रह राउरि राखी ॥
तात कुतरक करहु जनि जाएँ । बैर पेम नहिं दुरइ दुराएँ ॥
मुनि गन निकट बिहग मृग जाहीं । बाधक बधिक बिलोकि पराहीं ॥
हित अनहित पसु पच्छिउ जाना । मानुष तनु गुन ग्यान निधाना ॥
तात तुम्हहि मै जानउँ नीकें । करौं काह असमंजस जीकें ॥
राखेउ रायँ सत्य मोहि त्यागी । तनु परिहरेउ पेम पन लागी ॥

तासु वचन मेटत मन सोचू। तेहि तैं अधिक तुम्हार सँकोचू ॥
 ता पर गुर मोहि आयसु दीन्हा। अवसि जो कहहु चहउँ सोइ कीन्हा
 दो०—मनु प्रसन्न करि सकुच तजि कहहु करैं सोइ आजु ।

सत्यसंध रघुबर वचन सुनि भा सुखी समाजु ॥२६४॥

सुर गन सहित सभय सुरराजू। सोचहिं चाहत होन अकाजू ॥
 बनत उपाउ करत कछु नाहीं। राम सरन सब गे मन माहीं ॥
 बहुरि विचारि परस्पर कहहीं। रघुपति भगत भगति बस अहहीं
 सुधि करि अंवरीष दुरवासा। भे सुर सुरपति निपट निरासा ॥
 सहे सुरन्ह बहु काल विषादा। नरहरि किए प्रगट प्रह्लादा ॥
 लगि लगि कान कहहिं धुनि माथा। अब सुर काज भरत के हाथा ॥
 आन उपाउ न देखिअ देवा। मानत रामु सुसेवक सेवा ॥
 हियँ सपेम सुमिरहु सब भरतहि। निज गुन सील राम बस करतहि ॥
 दो०—सुनि सुर मत सुरगुर कहेउ भल तुम्हार बड़ भागु ।

सकल सुमंगल मूल जग भरत चरन अनुरागु ॥२६५॥

सीतापति सेवक सेवकाई। कामधेनु सय सरिस सुहाई ॥
 भरत भगति तुम्हरें मन आई। तजहु सोचु विधि बात बनाई ॥
 देखु देवपति भरत प्रभाऊ। सहज सुभायँ विवस रघुराऊ ॥
 मन थिर करहु देव डरु नाहीं। भरतहि जानि राम परिछाहीं ॥
 सुनि सुरगुर सुर संमत सोचू। अंतरजामी प्रभुहि सकोचू ॥
 निज सिर भार भरत जियँ जाना। करत कोटि विधि उर अनुमाना

करि विचारु मन दीन्हि ठीका । राम रजायस आपन नीका ॥
निज पन तजि राखेउ पनु मोरा । छोहु सनेहु कीन्ह नहिं थोरा ॥

०—कीन्ह अनुग्रह अमित अति सब विधि सीतानाथ ।

करि प्रनामु बोले भरतु जोरि जलज जुग हाथ ॥२६६॥

कहाँ कहावों का अब स्वामी । कृपा अंबुनिधि अंतरजामी ॥
गुर प्रसन्न साहिव अनुकूला । मिटी मलिन मन कलपित सूला
अपडर डरेउँ न सोच समूलें । रविहि न दोषु देव दिसि भूलें ॥
मोर अभागु मातु कुटिलाई । विधि गति विषम काल कठिनाई
पाउ रोपि सब मिलि मोहि घाला । प्रनतपाल पन आपन पाला ॥
यह नइ रीति न राउरि होई । लोकहुँ वेद विदित नहिं गोई ॥
जगु अनभल भल एकु गोसाई । कहिअ होइ भल कासु भलाई ॥
देउ देवतरु सरिस सुभाऊ । सनमुख विमुख न काहुहि काऊ
दो०—जाइ निकट पहिचानि तरु छाहँ समनि सब सोच ।

मागत अभिमत पाव जग राउ रंकु भल पोच ॥२६७॥

लखि सब विधि गुरस्वामि सनेहू । मिटेउ छोभु नहिं मन संदेहू ॥
अब करुनाकर कीजिअ सोई । जनहित प्रभु चित छोभु न होई ॥
जो सेवकु साहिवहि सँकोची । निज हित चहइ तासु मति पोची
सेवक हित साहिव सेवकाई । करै सकल सुख लोभ बिहाई ॥
स्वारथु नाथ फिरें सबही का । किँए रजाइ कोटि विधि नीका ॥

यह स्वारथ परमारथ सारू । सकल सुकृत फल सुगति सिंगारू

देव एक धिनती सुनि मोरी । उचित होइ तस करब बहोरी ॥
तिलक समाजु साजि सबु आना । करिअ सुफल प्रभु जौ मनु माना
दो०—सानुज पठइअ मोहि बन कीजिअ सबहि सनाथ ।

नतरु फेरिअहिं बंधु दोउ नाथ चलौं मैं साथ ॥२६८॥

नतरु जाहिं बन तीनिउ भाई । बहुरिअ सीय सहित रघुराई ॥
जेहि विधि प्रभु प्रसन्न मन होई । करुना सागर कीजिअ सोई ॥
देव दीन्ह सबु मोहि अमारू । मोरें नीति न धरम विचारू ॥
कहउँ बचन सब स्वारथ हेतू । रहत न आरत कैं चित चेतू ॥
उतरु देइ सुनि स्वामि रजाई । सो सेवकु लखि लाज लजाई ॥
अस मैं अवगुन उदधि अगाधू । स्वामि सनेहँ सराहत साधू ॥
अब कृपाल मोहि सो मत भावा । सकुच स्वामि मन जाइँ न पावा ॥
प्रभु पद सपथ कहउँ सति भाऊ । जग मंगल हित एक उपाऊ ॥
दो०—प्रभु प्रसन्न मन सकुच तजि जो जेहि आयसु देब ।

सो सिर धरि धरि करिहि सबु मिटिहि अनट अवरेब ॥२६९॥

भरत बचन सुनि सुनि सुर हरषे । साधु सराहि सुमन सुर बरषे ॥
असमंजस बस अवध नेवासी । प्रमुदित मन तापस बनवासी ॥
चुपहिं रहे रघुनाथ सँकोची । प्रभु गति देखि सभा सब सोची ॥
जनक दूत तेहि अवसर आए । सुनि बसिष्ट सुनि बेगि बोलाए ॥
करि प्रनाम तिन्ह रामु निहारे । वेषु देखि भए निपट दुखारे ॥
दूतन्ह मुनिबर बूझी बाता । कहइ बिदेह भए कुसलाता ॥

सुनि सकुचाइ नाइ महि माथा । बोलै चर बर जोर हाथा ॥
बूझब राउर सादर साई । कुसल हेतु सो भयउ गोसाई ॥
दो०—नाहिं त कोसल नाथ के साथ कुसल गइ नाथ ।

मिथिला अवध बिसेष तें जगु सब भयउ अनाथ ॥२७०॥

कोसलपति गति सुनि जनकौरा । भे सब लोक सोक बस बौरा ॥
जेहि देखे तेहि समय विदेहू । नामु सत्य अस लाग न केहू ॥
रानि कुचालि सुनत नरपालहि । सूझ न कछु जस मनि बिनु व्यालहि
भरत राज रघुवर बनवासू । भा मिथिलेसहि हृदयँ हराँसू ॥
नृप बूझे बुध सचिव समाजू । कहहु विचारि उचित का आजू ॥
समुझि अवध असमंजस दोऊ । चलिअ कि रहिअ न कह कछु कोऊ
नृपहिं धीर धरि हृदयँ विचारी । पठए अवध चतुर चर चारी ॥
बूझि भरत सति भाउ कुभाऊ । आएहु बेगि न होइ लखाऊ ॥

दो०—गए अवध चर भरत गति बूझि देखि करतूसि ।

चले चित्रकूटहि भरतु चार चले तेरहूति ॥२७१॥

दूतन्ह आइ भरत कह करनी । जनक समाज जयामति बरनी ॥
सुनि गुर परिजन सचिव महीपति । भे सब सोच सनेहँ विकल अति
धरि धीरजु करि भरत बड़ाई । लिए सुभट साहनी बोलाई ॥
घर पुर देस राखि रखवारे । हय गय रथ बहु जान सँवारे ॥
दुधरी साधि चले ततकाला । किए विश्रामु न मग महिपाला ॥
भोरहिं आजु नहाइ प्रयागा । चले जमुन उतरन सबु लागा ॥

खबरि लेन हम पठए नाथा । तिन्ह कहि अस महि नायउ माथा
साथ किरात छ सातक दीन्हे । मुनिवर तुरत विदा चर कीन्हे ॥

दो०—सुनत जनक आगवनु सबु हरषेउ अवध समाजु ।

रघुनंदनहि सकोचु बड़ सोच बिबस सुरराजु ॥२७२॥

गरइ गलानि कुटिल कैकेई । काहि कहै केहि दूषनु देई ॥
असमन आनि मुदित नर नारी । भयउ बहोरि रहब दिन चारी ॥
एहि प्रकार गत बासर सोऊ । प्रात नहान लाग सबु कोऊ ॥
करि मजनु पूजहिं नर नारी । गनप गौरि तिपुरारि तमारी ॥
रमा रमन पद बंदि बहोरी । बिनवहिं अंजुलि अंचल जोरी ॥
राजा रामु जानकी रानी । आनँद अवधि अवध रजधानी ॥
सुबस बसउ फिरि सहित समाजा । भरतहि रामु करहुँ जुवराजा ॥
एहि सुख सुधाँ सींचि सब काहू । देव देहु जग जीवन लाहू ॥

दो०—गुर समाज भाइन्ह सहित राम राजु पुर होउ ।

अछत राम राजा अवध मरिअ मागु सबु कोउ ॥२७३॥

मुनि सनेहमय पुरजन बानी । निंदहिं जोग बिरति मुनि ग्यानी ॥
एहि बिधि नित्यकरम करि पुरजन । रामहि करहिं प्रनाम पुलकि तन
ऊँच नीच मध्यम नर नारी । लहहिं दरसु निज निज अनुहारी ॥
सावधान सबही सनमानहिं । सकल सराहत कृपानिधानहिं ॥
लरिकाइहि तैं रघुवर बानी । पालत नीति प्रीति पहिचानी ॥

सील सकोच सिंधु रघुराजु । सुमुख सुलोचन सरल सुभाजु ॥

Vinay Avasthi Sahib Bhuvan Vani Trust Donations
कहत राम गुन गन अनुरागे । सब निज भाग सिराहेन लागे ॥
हम सम पुन्य पुंज जग थोरे । जिन्हहि रामु जानत करि मोरे ॥

दो०—प्रेम भगन तेहि समय सब सुनि आवत मिथिलेसु ।

सहित सभा संभ्रम उठेउ रविकुल कमल दिनेसु ॥२७४॥

भाइ सचिव गुर पुरजन साथी । आगें गवनु कीन्ह रघुनाथा ॥
गिरिवरु दीख जनकपति जवहीं । करि प्रनामु रथ त्यागेउ तवहीं ॥
राम दरस लालसा उछाहू । पथ श्रम लेसु कलेसु न काहू ॥
मन तहँ जहँ रघुवर बैदेही । विनु मन तन दुख सुख सुधि केही
आवत जनकु चले एहि भाँती । सहित समाज प्रेम मति माती ॥
आए निकट देखि अनुरागे । सादर मिलन परसपर लागे ॥
लगे जनक मुनिजन पद बंदन । रिषिन्ह प्रनामु कीन्ह रघुनंदन ॥
भाइन्ह सहित रामु मिलि राजहि । चले लवाइ समेत समाजहि ॥

दो०—आश्रम सागर सांत रस पूरन पावन पाथु ।

सेन मनहुँ करुना सरित लिएँ जाहिँ रघुनाथु ॥२७५॥

बोरति ग्यान विराग करारे । वचन ससोक मिलत नद नारे ॥
सोच उसास समीर तरंगा । धीरज तट तरुवर कर भंगा ॥
विषम विषाद तोरावति धारा । भय भ्रम भवँर अवर्त अपारा ॥
केवट बुध विद्या बड़ि नावा । सकहिँ न खेइ ऐक नहिँ आवा ॥
वनचर कोल किरात विचारे । थके बिलोकि पथिक हियँ हारे ॥
आश्रम उदधि मिली जव जाई । मनहुँ उठेउ अंबुधि अकुलाई ॥

सोक विकल दाउ राज समाजा । रहा न ग्यानु न धीरजु लाजा ॥
भूप रूप गुन सील सराही । रोवहिं सोक सिंधु अवगाही ॥

छं०—अवगाहि सोक समुद्र सोचहिं नारि नर व्याकुल महा ।
दै दोष सकल सरोष बोलहिं बाम बिधि कीन्हो कहा ॥
सुर सिद्ध तापस जोगिजन मुनि देखि दसा बिदेह की ।
तुलसी न समरथु कोउ जो तरि सकै सरित सनेह की ॥
सो०—किए अमित उपदेस जहँ तहँ लोगन्ह मुनिबरन्ह ।

धीरजु धरिअ नरेस कहेउ बसिष्ठ बिदेह सन ॥२७६॥

जासु ग्यानु रवि भव निसि नासा । बचन किरन मुनि कमल बिकासा
तेहि कि मोह ममता निअराई । यह सिय राम सनेह बड़ाई ॥
बिषई साधक सिद्ध सयाने । त्रिविध जीव जग वेद बखाने ॥
राम सनेह सरस मन जासू । साधु सभाँ बड़ आदर तामू ॥
सोह न राम पेम विनु ग्यानू । करनधार विनु जिमि जलजानू ॥
मुनि बहुविधि बिदेहु समुझाए । राम घाट सब लोग नहाए ॥
सकल सोक संकुल नर नारी । सो बासरु बीतेउ विनु बारी ॥
पसु खग मृगन्ह न कीन्ह अहारू । प्रिय परिजन कर कौन विचारू
दो०—दोउ समाज निमिराजु रघुराजु नहाने प्रात ।

बैठे सब बट बिटप तर मन मलीन कृस गात ॥२७७॥

जे महिसुर दसरथ पुर बासी । जेमिथिलापति नगर निवासी ॥

हंस बंस गुर जनक पुरोधा । जिन्ह जग मस परमारथ सोभा

Vinay Avasthi Sahib Bhuvan Vani Trust Donations

लगे कहन उपदेस अनेका । सहित धर्म नय विरति विवेका ॥
 कौसिक कहि कहि कथा पुरानी । समझाई सब सभा सुवानी ॥
 तब रघुनाथ कौमिकहि कहेऊ । नाथ कालि जल विनु सब रहेऊ ॥
 मुनि कह उचित कहत रघुराई । गयउ वीति दिन पहर अढ़ाई ॥
 रिषि रुख लखि कह तेरहुतिराजू । इहाँ उचित नहिँ असन अनाजू ॥
 कहा भूप भल सबहि सोहाना । पाइ रजायसु चले नहाना ॥
 दो०-तेहि अवसर फल फूल दल मूल अनेक प्रकार ।

लइ आए बनचर विपुल भरि भरि काँवरि भार ॥२७८॥

कामद भे गिरि राम प्रसादा । अवलोकत अपहरत विषादा ॥
 सर सरिता बन भूमि विभागा । जनु उमगत आनंद अनुरागा ॥
 बेलि बिटप सब सफल सफूला । बोलत खग मृग अलि अनुकूला ॥
 तेहि अवसर बन अधिक उछाहू । त्रिविध समीर सुखद सब काहू ॥
 जाइ न बरनि मनोहरताई । जनु महि करति जनक पहुनाई ॥
 तब सब लोग नहाइ नहाई । राम जनक मुनि आयसु पाई ॥
 देखि देखि तरुवर अनुरागे । जहँ तहँ पुरजन उतरन लागे ॥
 दल फल मूल कंद विधि नाना । पावन सुंदर सुधा समाना ॥

दो०-सादर सब कहँ रामगुर पठए भरि भरि भार ।

पूजि पितर सुर अतिथि गुर लगे करन फरहार ॥२७९॥

एहि विधि बासर बीते चारी । रामु निरखि नर नारि सुखारी ॥

दुहु समाज असि रुचि मन माहीं । विनु सिय राम फिरब भल नाहीं ॥

सीता राम संग बनवासू। कोटि अमरपुर सरिस सुपासू ॥
 परिहरि लखन रामु बैदेही। जेहि घर भाव बाम विधितेही ॥
 दाहिन दइउ होइ जब सबही। राम समीप बसिअ बन तबही ॥
 मंदाकिनि मजनु तिहु काला। राम दरसु मुद मंगल माला ॥
 अटनु राम गिरि बन तापस थल। असनु अमिअ सम कंद मूल फल
 सुख समेत संवत दुइ साता। पल सम होहिं न जनिअहिं जाता
 दो०—एहि सुख जोग न लोग सब कहहिं कहाँ अस भागु।

सहज सुभायँ समाज दुहु राम चरन अनुरागु ॥२८०॥

एहि विधि सकल मनोरथ करहीं। वचन सप्रेम सुनत मन हरहीं ॥
 सीय मातु तेहि समय पठाईं। दासीं देखि सुअवसरु आईं ॥
 सावकास सुनि सब सिय सासू। आयउ जनकराज रनिवासू ॥
 कौसल्याँ सादर सनमानी। आसन दिए समय सम आनी ॥
 सीलु सनेहु सकल दुहु ओरा। द्रवहिं देखि सुनि कुलिस कठोरा
 पुलकसिथिल तन बारि बिलोचन। महि नख लिखन लगीं सब सोचन
 सब सिय राम प्रीति कि सि मूरति। जनु करुना बहु वेष विसूरति ॥
 सीय मातु कह विधि बुधि बाँकी। जो पय फेनु फोर पवि टाँकी ॥

दो०—सुनिअ सुधा देखिअहिं गरल सब करतूति कराल।

जहँ तहँ काक उलूक बक मानस सकृत् मराल ॥२८१॥

सुनि ससोच कह देवि सुमित्रा। विधि गति बड़ि विपरीत विचित्रा

जो सुजि पालइ हरइ बहोरी। बाल केलि सम विधि सुनि ओरी ॥

कौसल्या कह दसु न कहूँ । करमनि कर सुख सुख छति लाहूँ
कठिन करम गति जान बिधाता । जो सुभ असुभ सकल फल दाता
ईस रजाइ सीस सबही कें । उतपति थितिलय विपहु अमी कें
देवि मोह बस सोचिअ बादी । विधि प्रपंचु अस अचल अनादी
भूपति जिअव मरव उर आनी । सोचिअ सखि लखि निज हित हानी
सीय मातु कह सत्य सुवानी । सुकृती अवधि अवधपति रानी ॥
दो०—लखनु रामु सिय जाहुँ बन भल परिनाम न पोचु ।

गहबरि हियँ कह कौसिला मोहि भरत कर सोचु ॥२८२॥

ईस प्रसाद असीस तुम्हारी । सुत सुतबधू देवसरि बारी ॥
राम सपथ मैं कीन्हि न काऊ । सो करि कहउँ सखी सति भाऊ ॥
भरत सील गुन बिनय बड़ाई । भायप भगति भरोस भलाई ॥
कहत सारदहु कर मति हीचे । सागर सीप कि जाहिँ उलीचे ॥
जानउँ सदा भरत कुलदीपा । बार बार मोहि कहेउ महीपा ॥
कसैं कनकु मनि पारिखि पाएँ । पुरुष परिखिअहिँ समयँ सुभाएँ
अनुचित आजु कहव अस मोरा । सोक सनेहँ सयानप थोरा ॥
सुनि सुरसरि सम पावनि बानी । भई सनेह बिकल सब रानी ॥
दो०—कौसल्या कह धीर धरि सुनहु देवि मिथिलेसि ।

को बिबेकनिधि बलभहि तुम्हहि सकइ उपदेसि ॥२८३॥

रानि राय सन अवसर पाई । अपनी भाँति कहव समुझाई ॥
रखिअहिँ लखनु भरतु गवनहिँ बन । जौ यह मत मानै महीप मन

तौ भल जतनु करव सुविचारी । मोरें सोचु भरत कर भारी ॥
 गूढ़ सनेह भरत मन माहीं । रहें नीक मोहि लागत नाहीं ॥
 लखि सुभाउ सुनि सरल सुवानी । सब भइ मगन करुन रस रानी ॥
 नभ प्रसून झरि धन्य धन्य धुनि । सिथिल सनेहें सिद्ध जोगी मुनि ॥
 सबुरनिवासु विथकि लखि रहेऊ । तब धरि धीर सुमित्राँ कहेऊ ॥
 देवि दंड जुग जामिनि बीती । राम मातु सुनि उठी सप्रीती ॥
 दो०—बेगि पाउ धारिअ थलहि कह सनेहें सतिभाय ।

हमरें तौ अब ईस गति कै मिथिलेय सहाय ॥२८४॥

लखि सनेह सुनि वचन विनीता । जनक प्रिया गह पाय पुनीता ॥
 देवि उचित असि विनय तुम्हारी । दसरथ घरिनि राम महतारी ॥
 प्रभु अपने नीचहु आदरहीं । अगिनि धूम गिरि सिर तिनु धरहीं ॥
 सेवकु राउ करम मन वानी । सदा सहाय महेसु भवानी ॥
 रउरे अग जोगु जग को है । दीप सहाय कि दिनकर सोहै ॥
 रामु जाइ वनु करि सुर काजू । अचल अवधपुर करिहहिं राजू ॥
 अमर नाग नर राम बाहुबल । सुख बसिहहिं अपनें अपनें थल ॥
 यह सब जागबलिक कहि राखा । देवि न होइ मुधा मुनि भाषा ॥
 दो०—अस कहि पग परि पेम अति सिय हित विनय सुनाइ ।

सिय समेत सियमातु तब चली सुआयसु पाइ ॥२८५॥

प्रिय परिजनहि मिली बैदेही । जो जेहि जोगु भाँति तेहि तेही ॥

तापस वेष जानकी देखी । भाग्य लखि लखि विधावु निसेषी ॥

जनक राम Vinay Avasthaya Sahani Bhuvan Varanasi Trust Donations ॥

लीन्हि लाइ उर जनक जानकी । पाहुनि पावन पेस प्रान की ॥

उर उमगेउ अंबुधि अनुरागू। भयउ भूप मनु मनहुँ पयागू॥

सिय सनेह बढु बाढत जोहा । ता पर राम पेम सिसु सोहा ॥

चिरजीवी मुनि ग्यान विकल जनु । बूढ़त लहेउ बाल अवलंबनु ॥

मोह मगन मति नहिं बिदेह की । महिमा सिय रघुवर सनेह की ॥

दो०-सिय पितु मातु सनेह बस बिकल न सकी सँभारि ।

धरनिसुताँ धीरजु धरेउ समउ सुधरसु बिचारि ॥२८६॥

तापस बेष जनक सिय देखी । भयउ पेमु परितोषु बिसेषी ॥

पुत्रि पवित्र किए कुल दोऊ । सुजस धवल जगु कह सबु कोऊ ॥

जिति सुरसरि कीरति सरितोरी । गवनु कीन्ह विधि अंड करोरी ॥

गंग अवनि थल तीनि बड़ेरे। एहिं किए साधु समाज घनेरे ॥

पितु कह सत्य सनेहँ सुबानी । सीय सकुच महँ मनहुँ समानी ॥

पुनि पितु मातु लीन्हि उर लाई । सिख आसिष हित दीन्हि सुहाई ॥

कहति न सीय सकुचि मन माहीं । इहाँ बसव रजनीं भल नाहीं ॥

लखि रुख रानि जनायउ राऊ । हृदयँ सराहत सीलु सुभाऊ ॥

दो०-बार बार मिलि भेंटि सिय बिदा कीन्हि सनमानि ।

कही समय सिर भरत गति रानि सुबानि सयानि ॥२८७॥

सुनि भूपाल भरत व्यवहारू । सोन सुगंध सुधा ससि सारू ॥

मूदे सजल नयन पुलके तन । सुजसु सराहन लगे मुदित मन ॥

सावधान सुनु सुमुखि सुलोचनि । भरत कथा भव बंध विमोचनि ॥
 धरम राजनय ब्रह्मविचारू । इहाँ जयामति मोर प्रचारू ॥
 सो सति मोरि भरत महिमाही । कहै काह छलि छुअति न छाँही ॥
 विधि गनपति अहिपति सिव सारद । कवि कोविद बुध बुद्धि विसारद
 भरत चरित कीरति करतूती । धरम सील गुन विमल विभूती ॥
 समुझत सुनत सुखद सब काहू । सुचि सुरसरि रुचि निदर सुधाहू
 दो०—निरवधि गुन निरूपम पुरुषु भरतु भरत सम जानि ।

कहिअ सुमेरु कि सेर सम कबिकुल मति सकुचानि ॥२८८॥

अगम सबहि वरनत बरवरनी । जिमि जलहीन मीन गमु धरनी ॥
 भरत अमित महिमा सुनु रानी । जानहिं रामु न सकहिं बखानी ॥
 बरनि सप्रेम भरत अनुभाऊ । तिय जिय की रुचि लखि कह राऊ
 बहुरहिं लखनु भरतु बन जाहीं । सब कर भल सब के मन माहीं ॥
 देवि परंतु भरत रघुवर की । प्रीति प्रतीति जाइ नहिं तरकी ॥
 भरतु अवधि सनेह ममता की । जद्यपि रामु सीम समता की ॥
 परमारथ स्वारथ सुख सारे । भरत न सपनेहुँ मनहुँ निहारे ॥
 साधन सिद्धि राम पग नेहू । मोहि लखि परत भरत मत एहू ॥
 दो०—भोरेहुँ भरत न पेलिहहिं मनसहुँ राम रजाइ ।

करिअ न सोचु सनेह बस कहेउ भूप बिलखाइ ॥२८९॥

राम भरत गुन गनत सप्रीती । निसि दंपतिहि पलक सम वीती ॥

राज समाज प्रात जुग जागे । न्हाह न्हाइ सुर पूजन लागे ॥

गे नहाइ गुर पहि रघुराइ । बदि चरन बोलि सुख पाई ॥
 नाथ भरतु पुरजन महतारी । सोक बिकल बनवास दुखारी ॥
 सहित समाज राउ मिथिलेसू । बहुत दिवस भए सहत कलेसू ॥
 उचित होइ सोइ कीजिअ नाथा । हित सबही कर रौरें हाथा ॥
 अस कहि अति सकुचे रघुराऊ । मुनि पुलके लखि सीलु सुभाऊ ॥
 तुम्ह बिनु राम सकल सुख साजा । नरक सरिस दुहु राज समाजा ॥
 दो०-प्रान प्रान के जीव के जिव सुख के सुख राम ।

तुम्ह तजि तात सोहात गृह जिन्हहि तिन्हहि बिधि बाम २९०
 सो सुखु करमु धरमु जरि जाऊ । जहँ न राम पद पंकज भाऊ ॥
 जोगु कुजोगु ग्यानु अग्यानू । जहँ नहिं राम पेम परधानू ॥
 तुम्ह बिनु दुखी सुखी तुम्ह तेहीं । तुम्ह जानहु जिय जो जेहि केहीं ॥
 राउर आयसु सिर सबही कैं । बिदित कृपालहि गति सब नीकैं ॥
 आपु आश्रमहि धारिअ पाऊ । भयउ सनेह सिथिल मुनिराऊ ॥
 करि प्रनामु तव रामु सिधाए । रिषि धरि धीर जनक पहिं आए ॥
 राम बचन गुरु नृपहि सुनाए । सील सनेह सुभायँ सुहाए ॥
 महाराज अब कीजिअ सोई । सब कर धरम सहित हित होई ॥
 दो०-ग्यान निधान सुजान सुचि धरम धीर नरपाल ।

तुम्ह बिनु असमंजस समन को समरथ एहि काल ॥ २९१ ॥
 मुनि मुनि बचन जनक अनुरागे । लखि गति ग्यानु विरागु विरागे ॥
 सिथिल सनेहँ गुनत मन माहीं । आए इहाँ कीन्ह भल नाहीं ॥

रामहि राय कहैउ बन जाना । कोन्ह आपु प्रिय प्रेम प्रवाना ॥
 हम अब बन तैं बनाहि पठाई । प्रसुदित फिरब विवेक बड़ाई ॥
 तापस मुनि महिसुर सुनि देखी । भए प्रेम बस बिकल बिसेषी ॥
 समउ समुझि धरि धीरजु राजा । चले भरत पहिं सहित समाजा ॥
 भरत आइ आगें भइ लीन्हे । अवसर सरिस सुआसन दीन्हे ॥
 तात भरत कह तेरहुति राऊ । तुम्हहि विदित रघुवीर सुभाऊ ॥
 दो०—राम सत्यव्रत धरम रत सब कर सीलु सनेहु ।

संकट सहत सकोच बस कहिअ जो आयसु देहु ॥२९२॥
 सुनि तन पुलकि नयन भरि बारी । बोले भरतु धीर धरि भारी ॥
 प्रभु प्रिय पूज्य पिता सम आपू । कुलगुरु सम हित माय न बापू ॥
 कौसिकादि मुनि सचिव समाजू । ग्यान अंबुनिधि आपुनु आजू ॥
 सिसु सेवकु आयसु अनुगामी । जानि मोहि सिख देइअ स्वामी ॥
 एहिं समाज थल बूझव राउर । मौन मलिन मैं बोलव बाउर ॥
 छोटे बदन कहउँ बड़ि बाता । छमव तात लखि बाम बिधाता ॥
 आगम निगम प्रसिद्ध पुराना । सेवा धरमु कठिन जगु जाना ॥
 स्वामि धरम स्वारथहि बिरोधू । बैरु अंध प्रेमहि न प्रबोधू ॥
 दो०—राखि राम रुख धरमु ब्रतु पराधीन मोहि जानि ।

सब कैं संमत सर्व हित करिअ पेसु पहिचानि ॥२९३॥
 भरत बचन सुनि देखि सुभाऊ । सहित समाज सराहत राऊ ॥
 सुगम अगम मृदु मंजु कठोरे । अरथु अमित अति आखर थोरे

ज्यों मुखु मुकुर मुकुर निज पानी । गहि न जाइ अस अदभुत बानी
भूप भरतु मुनि सहित समाजू । गे जहँ बिबुध कुमुद द्विजराजू ॥
सुनि सुधि सोच बिकल सब लोगा । मनहुँ मीनगन नव जल जोगा ॥
देवँ प्रथम कुलगुर गति देखी । निरखि बिदेह सनेह बिसेषी ॥
राम भगतिमय भरतु निहारे । सुर स्वारथी हहरि हियँ हारे ॥
सब कोउ राम पेसमय पेखा । भए अलेख सोच बस लेखा ॥
दो०—रामु सनेह सकोच बस कह ससोच सुरराजु ।

रचहु प्रपंचहि पंच मिलि नाहिं त भयउ अकाजु ॥२९४॥

सुरन्ह सुमिरि सारदा सराही । देवि देव सरनागत पाही ॥
फेरि भरत मति करि निज माया । पालु बिबुध कुल करि छल छाया
बिबुधबिनय सुनि देवि सयानी । बोली सुर स्वारथ जड़ जानी ॥
मो सन कहहु भरत मति फेरू । लोचन सहस न सूझ सुमेरू ॥
बिधि हरि हर माया बड़ि भारी । सोउ न भरत मति सकइ निहारी ॥
सो मति मोहि कहत करु भोरी । चंदिनि कर कि चंडकर चोरी ॥
भरत हृदयँ सिय राम निवासू । तहँ कितिमिर जहँ तरनि प्रकासू ॥
अस कहि सारद गइ बिधि लोका । बिबुध बिकल निसि मानहुँ कोका
दो०—सुर स्वारथी मलीन मन कीन्ह कुमंत्र कुठाडु ।

रचि प्रपंच माया प्रबल भय भ्रम अरति उचाडु ॥२९५॥

करि कुचालि सोचत सुरराजू । भरत हाथ सब काजु अकाजू ॥

गए जनक रघुनाथ समीपा । सनमाने सब सबिकल दीपा ॥

समय समाज धरम अविरोधा । बोले तब रघुवंस पुरोधा ॥
 जनक भरत संवादु सुनाई । भरत कडाउति कही सुहाई ॥
 तात राम जस आयसु देहू । सो सबु करै मोर मत एहू ॥
 सुनि रघुनाथ जोरि जुग पानी । बोले सत्य सरल मृदु बानी ॥
 विद्यमान आपुनि मिथिलेसू । मोर कहव सब भाँति भदेसू ॥
 राउर राय रजायसु होई । राउरि सपथ सही सिर सोई ॥
 दो०-रामसपथ सुनि मुनि जनकु सकुचे सभा समेत ।

सकल बिलोकत भरत मुखु बनइ न ऊतरु देत ॥२९६॥

सभा सकुच बस भरत निहारी । रामबंधु धरि धीरजु भारी ॥
 कुसमउ देखि सनेहु सँभारा । बढ़त विंधि जिमि घटज निवारा ॥
 सोक कनकलोचन मति छोनी । हरी विमल गुन गन जग जोनी ॥
 भरत बिबेक बराहँ बिसाला । अनायास उधरी तेहि काला ॥
 करि प्रनामु सब कहँ कर जोरे । रामु राउ गुर साधु निहोरे ॥
 छमब आजु अति अनुचित मोरा । कहउँ बदन मृदु बचन कठोरा ॥
 हियँ सुमिरी सारदा सुहाई । मानस तें मुख पंकज आई ॥
 विमल बिबेक धरम नय साली । भरत भारती मंजु मराली ॥
 दो०-निरखि बिबेक बिलोचनन्हि सिथिल सनेहँ समाजु ।

करि प्रनामु बोले भरतु सुमिरि सीय रघुराजु ॥२९७॥

प्रभु पितु मातु सुहृद गुर स्वामी । पूज्य परम हित अंतरजामी ॥

साल सुहाइत लील विधा नू । प्रनसपाल सर्वथ सुजामू ॥

समरथ सरनागत हितकारी। गुनगाहकु अवगुन भयहारी ॥
स्वामि गोसाँइहि सरिस गोसाँई। मोहि समान मैं साँई दोहाँई ॥
प्रभु पितु वचन मोह बस पेली। आयउँ इहाँ समाजु सकेली ॥
जग भल पोच ऊँच अरु नीचू। अमिअ अमरपद माहुरु मोचू ॥
राम रजाइ मेट मन माहीं। देखा सुना कतहुँ कोउ नाहीं ॥
सो मैं सब विधि कीन्हि ठिठाई। प्रभु मानी सनेह सेवकाई ॥

दो०—कृपाँ भलाई आपनी नाथ कीन्ह भल मोर ।

दूषन भे भूषन सरिस सुजसु चारु चहु ओर ॥२९८॥
राउरि रीति सुयानि बड़ाई। जगत विदित निगमागम गाई ॥
कूर कुटिल खल कुमति कलंकी। नीच निसील निरीस निसंकी ॥
तेउ सुनि सरन सामुहें आए। सकृत प्रनामु किहें अपनाए ॥
देखि दोष कबहुँ न उर आने। सुनि गुन साधु समाज बखाने ॥
को साहिव सेवकहि नेवाजी। आपु समाज साज सब साजी ॥
निज करतूति न समुझिअ सपनें। सेवक सकुच सोचु उर अपने ॥
सो गोसाँई नहिँ दूसर कोपी। भुजा उठाइ कहउँ पन रोपी ॥
पसु नाचत सुक पाठ प्रवीना। गुन गति नट पाठक आधीना ॥

दो०—यों सुधारि सनमानि जन किए साधु सिरमोर ।

को कृपाल बिनु पालिहै बिरिदावलि बरजोर ॥२९९॥
सोक सनेहँ कि बाल सुभाएँ। आयउँ लाइ रजायसु बाएँ ॥
तबहुँ कृपाल हेरि निज ओरा। सबहि भाँति भल मानेउ सोरा ॥

देखेउँ पाय सुमंगल मूला । जानेउँ स्वामि सहज अनुकूला ॥
 बड़ें समाज बिलोकेउँ भागू । बड़ीं चूक साहिव अनुरागू ॥
 कृपा अनुग्रहु अंगु अघाई । कीन्हि कृपानिधि सब अधिकारी ॥
 राखा मोर दुलार गोसाईं । अपनें सील सुभायँ भलाई ॥
 नाथ निपट मैं कीन्हि ढिठाई । स्वामि समाज सकोच बिहाई ॥
 अबिनय बिनय जथा रुचि बानी । छमिहि देउ अति आरति जानी ॥
 दो०—सुहृद सुजान सुसाहिवहि बहुत कहब बड़ि खोरि ।

आयसु देइअ देव अब सबइ सुधारी मोरि ॥३००॥

प्रभु पद पदुम पराग दोहाई । सत्य सुकृत सुख सीवँ सुहाई ॥
 सो करि कहउँ हिए अपने की । रुचि जागत सोवत सपने की ॥
 सहज सनेहँ स्वामि सेवकाई । स्वारथ छल फल चारि बिहाई ॥
 अग्या सम न सुसाहिव सेवा । सो प्रसादु जन पावै देवा ॥
 अस कहि प्रेम बिबस भए भारी । पुलक सरीर बिलोचन बारी ॥
 प्रभु पद कमल गहे अकुलाई । समउ सनेहु न सो कहि जाई ॥
 कृपासिंधु सनमानि सुबानी । बैठाए समीप गहि पानी ॥
 भरत बिनय मुनि देखि सुभाऊ । सिथिल सनेहँ सभा रघुराऊ ॥
 छं०—रघुराउ सिथिल सनेहँ साधु समाज मुनि मिथिला धनी ।

मन महुँ सराहत भरत भायप भगति की महिमा घनी ॥

भरतहि प्रसंसत बिबुध बरषत सुमन मानस मलिन से ।

तुलसी निकल सब लोग सुनि सकुचे बिसरि गेन अलिख से ॥

श्लो०—देखि दुखारी दीन दुहु समाज नर नारि सब ।

मघवा महा मलीन मुणु मारि मंगल चहत ॥३०१॥

कपट कुचालि सीवँ सुरराजू। पर अकाज प्रिय आपन काजू ॥
काक समान पाकरिपु रीती। छली मलीन कतहुँ न प्रतीती ॥
प्रथम कुमत करि कपटु सँकेला। सो उचाटु सब कैं सिर मेला ॥
सुरमायाँ सब लोग विमोहे। राम प्रेम अतिसय न बिछोहे ॥
भय उचाट बस मन थिर नाहीं। छन बन रुचि छन सदन सोहाहीं ॥
दुविध मनोगति प्रजा दुखारी। सरित सिंधु संगम जनु बारी ॥
दुचित कतहुँ परितोषु न लहहीं। एक एक सन मरमु न कहहीं ॥
लखि हियँहँसि कह कृपानिधानू। सरिस स्वान मघवान जुवानू ॥
दो०—भरतु जनकु मुनिजन सचिव साधु सचेत बिहाइ ।

लागि देवमाया सबहि जथाजोगु जनु पाइ ॥३०२॥

कृपासिंधु लखि लोग दुखारे। निज सनेहँ सुरपति छल भारे ॥
सभा राउ गुर महिसुर मंत्री। भरत भगति सब कै मति जंत्री ॥
रामहि चितवत चित्र लिखे से। सकुचत बोलत बचन सिखे से ॥
भरत प्रीति नति विनय बड़ाई। सुनत सुखद वरनत कठिनाई ॥
जासु विलोकि भगति लवलेसू। प्रेम मगन मुनिगन मिथिलेसू ॥
महिमा तासु कहै किमि तुलसी। भगति सुभायँ सुमति हियँहुलसी ॥
आपु छोटि महिमा बड़ि जानी। कबिकुल कानि मानि सकुचानी ॥
कहि न सकति गुन रुचि अधिकाई। मति गति बाल बचन की नाई

दो०-भरत बिमल जसु बिमल बिधु सुमति चकोरकुमारि ।

उदित बिमल जन हृदय नभ एकटक रही निहारि ॥२०३॥

भरत सुभाउ न सुगम निगमहूँ । लघु मति चापलता कवि छमहूँ ॥
कहत सुनत सति भाउ भरत को । सीय राम पद होइ न रत को ॥
सुमिरत भरतहि प्रेमु राम को । जेहि न सुलभु तेहि सरिस ब्रामको
देखि दयाल दसा सबही बी । राम सुजान जानि जन जी की ॥
धरम धुरीन धीर नय नागर । सत्य सनेह सील सुख सागर ॥
देसु कालु लखि समउ समाजू । नीति प्रीति पालक रघुराजू ॥
बोले बचन बानि सरबसु से । हित परिनाम सुनत ससिरसु से ॥
तात भरत तुम्ह धरम धुरीना । लोक वेद विद प्रेम प्रवीना ॥

दो०-करम बचन मानस बिमल तुम्ह समान तुम्ह तात ।

गुर समाज लघु बंधु गुन कुसमयँ किमि कहि जात ॥३०४॥

जानहु तात तरनि कुल रीती । सत्यसंध पितु कीरति प्रीती ॥
समउ समाजु लाज गुरजन की । उदासीन हित अनहित मन की ॥
तुम्हहि विदित सबही कर करमू । आपन मोर परम हित धरमू ॥
मोहि सब भाँति भरोस तुम्हारा । तदपि कहउँ अवसर अनुसारा ॥
तात तात बिनु बात हमारी । केवल गुरकुल कृपाँ सँभारी ॥
नतरु प्रजा परिजन परिवारु । हमहि सहित सबु होत खुआरु ॥
जौ बिनु अवसर अथवँ दिनेसू । जग केहि कहहु न होइ कलेसू ॥

दो०—~~श्रावण/कावसा/सालि/भक्ति/धरम/धरनि/भक्त/धाम~~।
 Shravan/Kavasa/Sali/Bhakti/Dharam/Dharani/Bhakt/Dham

गुर प्रभाउ पालिहि सबहि भल होइहि परिनाम ॥३०५॥

सहित समाज तुम्हार हमारा । घर बन गुर प्रसाद रखवारा ॥
 मातु पिता गुर स्वामि निदेसू । सकल धरम धरनीधर सेसू ॥
 सो तुम्ह करहु करावहु मोहू । तात तरनिकुल पालक होहू ॥
 साधक एक सकल सिधि देनी । कीरति सुगति भूतिमय बेनी ॥
 सो विचारि सहि संकटु भारी । करहु प्रजा परिवार सुखारी ॥
 बाँटी विपति सबहिं मोहि भाई । तुम्हहि अवधि भरि बड़ि कठिनाई
 जानि तुम्हहि मृदु कहउँ कठोरा । कुसमयँ तात न अनुचित मोरा
 होहिं कुठायँ सुबंधु सहाए । ओड़िअहिं हाथ असनिहु के घाए ॥
 दो०—सेवक कर पद नयन से मुख सो साहिबु होइ ।

तुलसी प्रीति कि रीति सुनि सुकवि सराहहिं सोइ ॥३०६॥

सभा सकल सुनि रघुवर बानी । प्रेम पयोधि अमिअँ जनु सानी ॥
 सिथिल समाज सनेह समाधी । देखि दसा चुप सारद साधी ॥
 भरतहि भयउ परम संतोषू । सनमुख स्वामि श्रिमुख दुख दोषू ॥
 मुख प्रसन्न मन मिटा विषादू । भा जनु गूँगेहि गिरा प्रसादू ॥
 कीन्ह सप्रेम प्रनामु बहोरी । बोले पानि पंकरुह जोरी ॥
 नाथ भयउ सुखु साथ गए को । लहेउँ लाहु जग जनमु भए को ॥
 अव कृपाल जस आयसु होई । करौं सीस धरि सादर सोई ॥
 सो अवलंब देव मोहि देई । अग्रि पारु पावौं जेहि सेई ॥

Vinay Avasthi Sahib Bhuvan Vani Trust Donations
दो०—देव देव अभिषेक हित गुर अनुसासनु पाई ।

आनेउँ सब तीरथ सलिल तेहि कहँ काह रजाइ ॥३०७॥

एकु मनोरथु बड़ मन माहीं । सभयँ सकोच जात कहि नाहीं ॥
कहहु तात प्रभु आयसु पाई । बोले बानि सनेह सुहाई ॥
चित्रकूट सुचि थल तीरथ बन । खग मृग सर सरि निर्झर गिरिगन
प्रभु पद अंकित अवनि बिसेषी । आयसु होइ त आवौं देखी ॥
अवसि अत्रि आयसु सिर धरहू । तात बिगतभय कानन चरहू ॥
मुनि प्रसाद बनु मंगल दाता । पावन परम सुहावन भ्राता ॥
रिषिनायकु जहँ आयसु देहीं । राखेहु तीरथ जलु थल तेहीं ॥
मुनि प्रभु बचन भरत सुखु पावा । मुनि पद कमल मुदित सिरु नावा
दो०—भरत राम संबादु मुनि सकल सुमंगल मूल ।

सुर स्वारथी सराहि कुल बरषत सुरतरु फूल ॥३०८॥

धन्य भरत जय राम गोसाई । कहत देव हरषत बरिआई ॥
मुनि मिथिलेस सभाँ सब काहू । भरत बचन मुनि भयउ उछाहू ॥
भरत राम गुन ग्राम सनेहू । पुलकि प्रसंसत राउ बिदेहू ॥
सेवक स्वामि सुभाउ सुहावन । नेमु पेमु अति पावन पावन ॥
मति अनुसार सराहन लागे । सचिव सभासद सब अनुरागे ॥
मुनि मुनि राम भरत संबादू । दुहु समाज हियँ हरषु बिषादू ॥
राम मातु दुखु सुखु सम जानी । कहि गुन राम प्रबोधी रानी ॥
एक कहहि रघुबीर बड़ाई । एक सराहत भरत भलाई ॥

दो०—अत्रि कहैउ ठबनवस्तुन सैल समीह सुकूप ।

राखिअ तीरथ तोय तहँ पावन अमिअ अनूप ॥३०९॥

भरत अत्रि अनुसासन पाई । जल भाजन सब दिए चलाई ॥
 सानुज आपु अत्रि मुनि साधू । सहित गए जहँ कूप अगाधू ॥
 पावन पाथ पुन्यथल राखा । प्रमुदित प्रेम अत्रि अस भाषा ॥
 तात अनादि सिद्ध थल एहू । लोपेउ काल विदित नहिं केहू ॥
 तब सेवकन्ह सरस थलु देखा । कीन्ह सुजल हित कूप विसेषा ॥
 विधिबस भयउ बिस्व उपकारू । सुगम अगम अति धरम विचारू ॥
 भरतकूप अब कहिहहिं लोगा । अति पावन तीरथ जल जोगा ॥
 प्रेम सनेम निमज्जत प्राणी । होइहहिं विमल करम मन बानी ॥
 दो०—कहत कूप महिमा सकल गए जहाँ रघुराउ ।

अत्रि सुनायउ रघुबरहि तीरथ पुन्य प्रभाउ ॥३१०॥

कहत धरम इतिहास सप्रीती । भयउ भोरु निसि सो सुख बीती ॥
 नित्य निवाहि भरत दोउ भाई । राम अत्रि गुर आयसु पाई ॥
 सहित समाज साज सब सादें । चले राम बन अटन पयादें ॥
 कोमल चरन चलत विनु पनहीं । भइ मृदु भूमि सकुचि मन मनहीं ॥
 कुस कंटक काँकरीं कुराई । कटुक कठोर कुबस्तु दुराई ॥
 महि मंजुल मृदु मारग कीन्हे । बहत समीर त्रिविध सुख लीन्हे ॥
 सुमन बरषि सुर घन करि छाहीं । बिटप फूलि फलि तृन मृदुताहीं ॥
 मृग बिलोकि खग बोलि सुबानी । सेवहिं सकल राम प्रिय जानी ॥

दो०—Vijay Vasthi Sahib Bhuwan Vani Trust Donations
सुलभ सिद्धि सब प्रकृतहु राम कहत जुहुत ।

राम प्रानप्रिय भरत कहँ यह न होइ बड़ि बात ॥३११॥

एहि विधि भरतु फिरत बन माहीं । नेमु प्रेमु लखि मुनि सकुचाहीं ॥
पुन्य जलाश्रय भूमि विभागा । खग मृग तरु तृन गिरि बन बागा
चारु विचित्र पवित्र बिसेषी । बृद्धत भरतु दिव्य सब देखी ॥
सुनि मन मुदित कहत रिपिराऊ । हेतु नाम गुन पुन्य प्रभाऊ ॥
कतहुँ निमज्जन कतहुँ प्रनामा । कतहुँ विलोकत मन अभिरामा ॥
कतहुँ बैठि मुनि आयसु पाई । सुमिरत सीय सहित दोउ भाई ॥
देखि सुभाउ सनेहु सुसेवा । देहिं असीस मुदित बनदेवा ॥
फिरहिं गएँ दिनु पहर अढ़ाई । प्रभु पद कमल बिलोकहिं आई ॥
दो०—देखे थल तीरथ सकल भरत पाँच दिन माझ ।

कहत सुनत हरि हर सुजसु गयउ दिवसु भइ साँझ ॥३१२॥

भोर न्हाइ सबु जुरा समाजू । भरत भूमिसुर तेरहुति राजू ॥
भल दिन आजु जानि मन माहीं । राम कृपाल कहत सकुचाहीं ॥
गुर नृप भरत सभा अवलोकी । सकुचि राम फिरि अवनि बिलोकी
सील सराहि सभा सब सोची । कहँ न राम सम स्वामि सँकोची ॥
भरत सुजान राम रुख देखी । उठि सप्रेम धरि धीर बिसेषी ॥
करि दंडवत कहत कर जोरी । राखों नाथ सकल रुचि मोरी ॥
मोहिलगि सहेउ सबहिं संतापू । बहुत भाँति दुखु पावा आपू ॥
अब गोसाँइ मोहि देउ रजाई । सेवौ अवध अवधि भरि जाई ॥

दो०—^{Viney Avasthi Sanib Bhuva/ave/ro/दीन्द्रबालs।}जहि उपाय सुनि पाय जनु देखै दीन्द्रबालs।

सो सिख देइअ अवधि लगि कोसलपाल कृपाल ॥३१२॥

पुरजन परिजन प्रजा गोसाईं । सब सुचि सरस सनेहँ सगाईं ॥
 राउर बदि भल भव दुख दाहू । प्रभु बिनु बादि परमपद लाहू ॥
 स्वामि सुजानु जानि सब ही की । रुचि लालसा रहनि जन जी की ॥
 प्रनतपालु पालिहि सब काहू । देउ दुहू दिसि ओर निवाहू ॥
 अस मोहि सब विधि भूरि भरोसो । किँँ बिचारु न सोचु खरो सो ॥
 आरति मोर नाथ कर छोहू । दुहुँ मिलि कीन्ह ढीठु हठि मोहू
 यह बड़ दोषु दूर करि स्वामी । तजि सकोच सिखइअ अनुगामी
 भरत विनय सुनि सबहिँ प्रसंसी । खीर नीर बिबरन गति हंसी ॥
 दो०—दीनबंधु सुनि बंधु के बचन दीन छलहीन ।

देस काल अवसर सरिस बोले रामु प्रवीन ॥३१४॥

तात तुम्हारि मोरि परिजन की । चिंता गुरहि नृपहि घर बन की ॥
 माथे पर गुर मुनि मिथिलेसू । हमहि तुम्हहि सपनेहुँ न कलेसू ॥
 मोर तुम्हार परम पुरुषारथु । स्वारथु सुजसु धरमु परमारथु ॥
 पितु आयसु पालिहिँ दुहु भाई । लोक बेद भल भूप भलाई ॥
 गुर पितु मातु स्वामि सिख पालें । चलेहुँ कुमग पग परहिँ न खालें ॥
 अस बिचारि सब सोच बिहाई । पालहु अवध अवधि भरि जाई ॥
 देसु कोसु परिजन परिवारू । गुर पद रजहिँ लाग छरु भारू ॥
 तुम्ह मुनि मातु सचिव सिख मानी । पालेहु पुहुमि प्रजा रजधानी ॥

दो०—^{Yashwanthji Sahib Bhawan Varanasi Trust Donations} सुखिआ सुखु सो चाहिह खान पाव कहु एक ।

पालह पोषह सकल अंग तुलसी सहित बिबेक ॥३१५॥

राजधरम सरबसु एतनोई । जिमि मन माहँ मनोरथ गोई ॥
 बंधु प्रबोधु कीन्ह बहु भाँती । बिनु अधार मन तोषु न साँती ॥
 भरत सील गुर सचिव समाजू । सकुच सनेह बिबस रघुराजू ॥
 प्रभु करि कृपा पाँवरीं दीन्हीं । सादर भरत सीस धरि लीन्हीं ॥
 चरनपीठ करुनानिधान के । जनु जुग जामिक प्रजापान के ॥
 संपुट भरत सनेह रतन के । आखर जुग जनु जीव जतन के ॥
 कुल कपाट कर कुसल करम के । विमल नयन सेवा सुधरम के ॥
 भरत मुदित अवलंब लहे तैं । अस सुख जस सिय रामु रहे तैं ॥

दो०—मागेउ बिदा प्रनामु करि राम लिए उर लाइ ।

लोग उचाटे अमरपति कुटिल कुअवसरु पाइ ॥३१६॥

सो कुचालि सब कहँ भइ नीकी । अवधि आस सम जीवनि जी की
 नतरु लखन सिय राम बियोगा । हहरि मरत सब लोग कुरोगा ॥
 रामकृपाँ अवरेव सुधारी । बिबुध धारि भइ गुनद गोहारी ॥
 भेंटत भुज भरि भाइ भरत सो । राम प्रेम रसु कहिन परत सो ॥
 तन मन बचन उमग अनुरागा । धीर धुरंधर धीरजु त्यागा ॥
 बारिज लोचन मोचत बारी । देखि दसा सुर सभा दुखारी ॥
 मुनिगन गुर धुर धीर जनक से । ग्यान अनल मन कसैं कनक से ॥
 जे बिरंचि निरलेप उपाए । पदुम पत्र जिमि जग जल जाए ॥

Vinay Avasthi Sahib Bhuvan Vani Trust Donations
दो०-तेउ बिलोकि रघुबर भरत प्रीति अनूप अपार ।

भए सगन मन तन बचन सहित बिराग बिचार ॥३१७॥

जहाँ जनक गुर गति मति भोरी । प्राकृत प्रीति कहत बड़ि खोरी ॥
बरनत रघुबर भरत बियोगू । सुनि कठोर कवि जानिहि लोगू ॥
सो सकोच रसु अकथ सुबानी । समउ सनेहु सुमिरि सकुचानी ॥
भेंटि भरतु रघुबर समुझाए । पुनि रिपुदवनु हरषि हियँ लाए ॥
सेवक सचिव भरत रख पाई । निज निज काज लगे सब जाई ॥
सुनि दारुन दुखु दुहूँ समाजा । लगे चलन के साजन साजा ॥
प्रभु पद पदुम बंदि दोउ भाई । चले सीस धरि राम रजाई ॥
मुनि तापस बनदेव निहोरी । सब सनमानि बहोरि बहोरी ॥
दो०-लखनहिं भेंटि प्रनामु करि सिर धरि सिय पद धूरि ।

चले सप्रेम असीस सुनि सकल सुमंगल मूरि ॥३१८॥

सानुज राम नृपहि सिर नाई । कीन्ह बहुत बिधि विनय बड़ाई ॥
देव दया बस बड़ दुखु पायउ । सहित समाज काननहिं आयउ ॥
पुर पगु धारिअ देइ असीसा । कीन्ह धीर धरि गवनु महीसा ॥
मुनि महिदेव साधु सनमाने । बिदा किए हरि हर सम जाने ॥
सासु समीप गए दोउ भाई । फिरे बंदि पग आसिष पाई ॥
कौसिक बामदेव जाबाली । पुरजन परिजन सचिव सुचाली ॥
जथा जोगु करि विनय प्रनामा । बिदा किए सब सानुज रामा ॥
नारि पुरुष लघु मध्य बड़ेरे । सब सनमानि कृपानिधि केरे ॥

दो०—भरत मातु पद बंदि प्रभु सुचि सनेह मिलि भेटि ।

बिदा कीन्ह सजि पालकी सकुच सोच सब भेटि ॥३१९॥

परिजन मातु पितहि मिलि सीता । फिरी प्रानप्रिय प्रेम पुनीता ॥
करि प्रनामु भेंटों सब सासू । प्रीति कहत कवि हियँ न हुलासू ॥
सुनि सिख अभिमत आसिष पाई । रही सीय दुहु प्रीति समाई ॥
रघुपति पटु पालकीं मगाई । करि प्रबोधु सब मातु चढ़ाई ॥
बार बार हिलि मिलि दुहुँ भाई । सम सनेहँ जननीं पहुँचाई ॥
साजि बाजि गज बाहन नाना । भरत भूप दल कीन्ह पयाना ॥
हृदयँ रामु सिय लखन समेता । चले जाहिँ सब लोग अचेता ॥
बसह बाजि गज पसु हियँ हारें । चले जाहिँ परबस मन मारें ॥

दो०—गुर गुरतिय पद बंदि प्रभु सीता लखन समेत ।

फिरे हरष बिसमय सहित आए परन निकेत ॥३२०॥

बिदा कीन्ह सनमानि निषादू । चलेउ हृदयँ बड़ बिरह बिषादू
कोल किरात भिल बनचारी । फेरे फिरे जोहारि जोहारी ॥
प्रभु सिय लखन बैठि बट छाहीं । प्रिय परिजन बियोग बिलखाहीं
भरत सनेह सुभाउ सुबानी । प्रिया अनुज सन कहत बखानी ॥
प्रीति प्रतीति बचन मन करनी । श्रीमुख राम प्रेम बस बरनी ॥
तेहि अवसर खग मृग जल मीना । चित्रकूट चर अचर मलीना ॥
बिबुध बिलोकि दसा रघुवर की । बरषि सुमन कहि गति घर घर की
प्रभु प्रनामु करि दीन्ह भरोसो । चले मुदित मन डर न खारो सो ॥

Vinay Avasthi Sahib Bhuvan Vani Trust Donations.
दो०-सानुज सोय समेत प्रभु राजत परन कुटीर ।

भगति ग्यानु बैराग्य जनु सोहत धरें सरीर ॥३२१॥

मुनि महिसुर गुर भरत भुआलू । राम बिरहँ सबु साजु बिहालू ॥
प्रभु गुन ग्राम गनत मन माहीं । सब चुपचाप चले मग जाहीं ॥
जमुना उतरि पार सबु भयऊ । सो बासरु विनु भोजन गयऊ ॥
उतरि देवसरि दूसर बासू । रामसखाँ सब कीन्ह सुपासू ॥
सई उतरि गोमती नहाए । चौथें दिवस अवधपुर आए ॥
जनकु रहे पुर बासर चारी । राज काज सब साज सँभारी ॥
सौँपि सचिव गुर भरतहि राजू । तेरहुति चले साजि सबु साजू ॥
नगर नारि नर गुर सिख मानी । बसे सुखेन राम रजधानी ॥

दो०-राम दरस लागि लोग सब करत नेम उपवास ।

तजि तजि भूषन भोग सुख जिअत अवधि कीं आस ॥३२२॥

सचिव सुसेवक भरत प्रबोधे । निज निज काज पाइ सिख ओधे ॥
पुनि सिख दीन्हि बोलि लघु भाई । सौँपी सकल मातु सेवकाई ॥
भूसुर बोलि भरत कर जोरे । करि प्रनाम बय विनय निहोरे ॥
ऊँच नीच कारजु भल पोचू । आयसु देव न करब सँकोचू ॥
परिजन पुरजन प्रजा बोलाए । समाधानु करि सुबस बसाए ॥
सानुज गे गुर गेहँ बहोरी । करि दंडवत कहत कर जोरी ॥
आयसु होइ त रहौं सनेमा । बोले मुनि तन पुलकि सपेमा ॥
समुझब कहब करब तुम्ह जोई । धरम सारु जग होइहि सोई ॥

दो०—सुनि सिख पाइ असीस बड़ि गनक बोलि दिनु साधि ।

सिंघासन प्रभु पादुका बैठारे निरुपाधि ॥३२३॥

राम मातु गुर पद सिरु नाई । प्रभु पद पीठ रजायसु पाई ॥
 नंदिगावँ करि परन कुटीरा । कीन्ह निवासु धरम धुर धीरा ॥
 जटाजूट सिर मुनिपट धारी । महि खनि कुस साँथरी सँवारी ॥
 असन बसन बासन व्रत नेमा । करत कठिन रिषिधरम सप्रेमा ॥
 भूषन बसन भोग सुख भूरी । मन तन बचन तजे तिन तूरी ॥
 अवध राजु सुर राजु सिहाई । दसरथ धनु सुनि धनदु लजाई ॥
 तेहिं पुर बसत भरत बिनु रागा । चंचरीक जिमि चंपक बागा ॥
 रमा बिलासु राम अनुरागी । तजत बमन जिमि जन बड़भागी ॥
 दो०—राम पेम भाजन भरतु बड़े न एहिं करतूति ।

चातक हंस सराहिअत टैंक बिबेक बिभूति ॥३२४॥

देह दिनहुँ दिन दूबरि होई । घटइ तेजु बलु मुखछवि सोई ॥
 नित नव राम प्रेम पनु पीना । बढ़त धरम दलु मनु न मलीना ॥
 जिमि जलु निघटत सरद प्रकासे । बिलसत बेतस बनज बिकासे ॥
 सम दम संजम नियम उपासा । नखत भरत हिय बिमल अकासा ॥
 ध्रुव बिस्वासु अवधि राका सी । स्वामि सुरति सुरबीथि बिकासी ॥
 राम पेम बिधु अचल अदोषा । सहित समाज सोह नित चोखा ॥
 भरत रहनि समुझनि करतूती । भगति विरति गुन बिमल बिभूती ॥
 बरनत सकल सुकवि सुकचाहीं । सेस गनेस गिरा गम नाहीं ॥

Vinay Avasthi Sahib Bhuvan Vani Trust Donations
दो०—नित पूजत प्रभु पावरी प्राति न हृदय समाति ।

मागि मागि आयसु करत राज काज बहु भाँति ॥३२५॥

पुलक गात हियँ सिय रघुबीरू । जीह नामु जप लोचन नीरू ॥

लखन राम सिय कानन बसहीं । भरतु भवन बसि तप तनु कसहीं ॥

दोउ दिसि समुझि कहत सबु लोगू । सब विधि भरत सराहन जोगू ॥

सुनि व्रत नेम साधु सकुचाहीं । देखि दसा मुनिराज लजाहीं ॥

परम पुनीत भरत आचरनू । मधुर मंजु मुद मंगल करनू ॥

हरन कठिन कलि कलुष कलेसू । महामोह निसि दलन दिनेसू ॥

पाप पुंज कुंजर मृगराजू । समन सकल संताप समाजू ॥

जन रंजन भंजन भव भारू । राम सनेह सुधाकर सारू ॥

छं०—सिय राम प्रेम पियूष पूरन होत जनमु न भरत को ।

मुनि मन अगम जम नियम सम दम बिषम व्रत आचरत को

दुख दाह दारिद दंभ दूषन सुजस मिस अपहरत को ।

कलिकाल तुलसी से सठन्हि हठि राम सनमुख करत को ॥

सो०—भरत चरित करि नेमु तुलसी जो सादर सुनहिं ।

सीय राम पद पेसु अवसि होइ भव रस बिरति ॥३२६॥

मासंपारायण, इक्कीसवाँ विश्राम


इति श्रीमद्रामचरितमानसे सकलकलिकलुषविध्वंसने

द्वितीयः सोपानः समाप्तः ।

(अयोध्याकाण्ड समाप्त)



सुतीक्ष्णजी रामके ध्यानमें



अतिसय प्रीति देखि रघुवीरा
प्रगटे हृदयँ हरन भव भीरा ॥

श्रीगणेशाय नमः

श्रीजानकीवल्लभो विजयते

श्रीरामचरितमानस

तृतीय सोपान

(अरण्यकाण्ड)

श्लोक

मूलं धर्मतरोर्विवेकजलधेः पूर्णेन्दुमानन्ददं
वैराग्याम्बुजभास्करं ह्यघघनध्वान्तापहं तापहम् ।
मोहाम्भोधरपूगपाटनविधौ स्वःसम्भवं शङ्करं
वन्दे ब्रह्मकुलं कलङ्कशमनं श्रीरामभूप्रियम् ॥ १ ॥
सान्द्रानन्दपयोदसौभगतनुं पीताम्बरं सुन्दरं
पाणौ बाणशरासनं कटिलसत्तूणीरभारं वरम् ।
राजीवायतलोचनं धृतजटाजूटेन संशोभितं
सीतालक्ष्मणसंयुतं पथिगतं रामाभिरामं भजे ॥ २ ॥

Vinay Avasthi Sahib Bhuwan Vani Trust Donations
सो०—उमा राम गुन गूढ़ पांडित मुनि पावहि बिरति ।

पावहिं मोह बिमूढ़ जे हरि बिमुख न धर्म रति ॥

पुर नर भरत प्रीति मैं गाई । मति अनुरूप अनूप सुहाई ॥
अब प्रभु चरित सुनहु अति पावन । करत जे बन सुर नर मुनि भावन
एक बार चुनि कुसुम सुहाए । निज कर भूषन राम बनाए ॥
सीतहि पहिराए प्रभु सादर । बैठे फटिक सिला पर सुंदर ॥
सुरपति सुत धरि बायस वेषा । सठ चाहत रघुपति बल देखा ॥
जिमि पिपीलिका सागर थाहा । महा मंदमति पावन चाहा ॥
सीता चरन चोंच हति भागा । मूढ़ मंदमति कारन कागा ॥
चला रुधिर रघुनायक जाना । सींक धनुष सायक संधाना ॥

दो०—अति कृपाल रघुनायक सदा दीन पर नेह ।

ता सन आइ कीन्ह छल मूरख अवगुन गेह ॥ १ ॥

प्रेरित मंत्र ब्रह्मसर धावा । चला भाजि बायस भय पावा ॥
धरि निज रूप गयउ पितु पाहीं । राम बिमुख राखा तेहि नाहीं ॥
भा निरास उपजी मन त्रासा । जथा चक्र भय रिषि दुर्वासा ॥
ब्रह्मधाम सिवपुर सब लोका । फिरा श्रमित व्याकुल भय सोका
काहूँ बैठन कहा न ओही । राखि को सकइ राम कर द्रोही ॥
मातु मृत्यु पितु समन समाना । सुधा होइ बिष सुनु हरिजाना ॥
मित्र करइ सत रिपु कै करनी । ता कहँ बिबुधनदी बैतरनी ॥
सब जगु ताहि अनलहु ते ताता । जो रघुवीर बिमुख सुनु भ्राता ॥

Vinay Avasthi Sahib Bhuyan Vani Trust Donations

नारद देखा बिकल जयता । लागि दया कामल चित संता ॥
पठवा तुरत राम पहिं ताही । कहेसि पुकारि प्रनत हित पाही ॥
आतुरसभय गहेसि पद जाई । त्राहि त्राहि दयाल रघुराई ॥
अतुलित बल अतुलित प्रभुताई । मैं मतिमंद जानि नहिं पाई ॥
निज कृत कर्म जनित फल पायउँ । अब प्रभु पाहि सरन तकि आयउँ
सुनि कृपाल अति आरत बानी । एकनयन करि तजा भवानी ॥
सो०—कीन्ह मोह बस द्रोह जद्यपि तेहि कर बध उचित ।

प्रभु छाडेउ करि छोह को कृपाल रघुबीर सम ॥ २ ॥

रघुपति चित्रकूट बसि नाना । चरित किए श्रुति सुधा समाना ॥
बहुरिराम अस मन अनुमाना । होइहि भीर सबहिं मोहि जाना ॥
सकल मुनिन्ह सनबिदा कराई । सीता सहित चले द्वौ भाई ॥
अत्रि के आश्रम जब प्रभु गयऊ । सुनत महामुनि हरषित भयऊ ॥
पुलकित गात अत्रि उठि धाए । देखि रामु आतुर चलि आए ॥
करत दंडवत मुनि उर लाए । प्रेम बारि द्वौ जन अन्हवाए ॥
देखि राम छवि नयन जुड़ाने । सादर निज आश्रम तब आने ॥
करि पूजा कहि बचन सुहाए । दिए मूल फल प्रभु मन भाए ॥

सो०—प्रभु आसन आसीन भरि लोचन सोभा निरखि ।

मुनिबर परम प्रबीन जोरि पानि अस्तुति करत ॥ ३ ॥

छं०—नमामि भक्त वत्सलं । कृपालु शील कोमलं ॥

भजामि ते पदांबुजं । अकामिनां स्वधामदं ॥

Vinay Avasthi Sahib Bhuvan Vani Trust Donations

निकास श्याम सुदर । भवाम्बुनाथ मदरं ॥
 प्रफुल्ल कंज लोचनं । मदादि दोष मोचनं ॥
 प्रलंब बाहु विक्रमं । प्रभोऽप्रमेय वैभवं ॥
 निषंग चाप सायकं । धरं त्रिलोक नायकं ॥
 दिनेश वंश मंडनं । महेश चाप खंडनं ॥
 मुनींद्र संत रंजनं । सुरारि वृंद भंजनं ॥
 मनोज वैरि वंदितं । अजादि देव सेवितं ॥
 विशुद्ध बोध विग्रहं । समस्त दूषणापहं ॥
 नमामि इंदिरा पतिं । सुखाकरं सतां गतिं ॥
 भजे सशक्ति सानुजं । शची पति प्रियानुजं ॥
 त्वदंघ्रि मूल ये नराः । भजंति हीन मत्सराः ॥
 पतंति नो भवार्णवे । वितर्क वीचि संकुले ॥
 विविक्त वासिनः सदा । भजंति मुक्तये मुदा ॥
 निरस्य इंद्रियादिकं । प्रयांति ते गतिं स्वकं ॥
 तमेकमद्भुतं प्रभुं । निरीहमीश्वरं विभुं ॥
 जगद्गुरुं च शाश्वतं । तुरीयमेव केवलं ॥
 भजामि भाव बल्लभं । कुयोगिनां सुदुर्लभं ॥
 स्वभक्त कल्प पादपं । समं सुसेव्यमन्वहं ॥
 अनूप रूप भूपतिं । नतोऽहमुर्विजा पतिं ॥
 प्रसीद मे नमामि ते । पदाब्ज भक्ति देहि मे ॥

पठंति ये स्तवं इदं । नरादरेण ते पदं ॥
 ब्रजंति नात्र संशयं । त्वदीय भक्ति संयुताः ॥

दो०—बिनती करि मुनि नाइ सिरु कह कर जोरि बहोरि ।

चरन सरोरुह नाथ जनि कबहुँ तजै मति मोरि ॥ ४ ॥

अनुसुइया के पद गहि सीता । मिली बहोरि सुसील विनीता ॥
 रिषिपतिनी मन सुख अधिकाई । आसिष देइ निकट बैठाई ॥
 दिव्य वसन भूषन पहिराए । ले नित नूतन अमल सुहाए ॥
 कह रिषिवधू सरस मृदु बानी । नारिधर्म कछु व्याज बखानी ॥
 मातु पिता भ्राता हितकारी । मितप्रद सब सुनु राजकुमारी ॥
 अमित दानि भर्ता बयदेही । अधम सो नारि जो सेव न तेही ॥
 धीरज धर्म मित्र अरु नारी । आपद कालपरिखिअहिं चारी ॥
 वृद्ध रोगवस जड़ धन हीना । अंध बधिर क्रोधी अति दीना ॥
 ऐसेहु पति करकिँ अपमाना । नारि पाव जमपुर दुख नाना ॥
 एकइ धर्म एक व्रत नेमा । कायँ वचन मन पति पद प्रेमा ॥
 जग पतिव्रता चारि विधि अहहीं । बेद पुरान संत सब कहहीं ॥
 उत्तम के अस बस मन माहीं । सपनेहुँ आन पुरुष जग नाहीं ॥
 मध्यम परपति देखइ कैसैं । भ्राता पिता पुत्र निज जैसैं ॥
 धर्मविचारि समुझि कुल रहई । सो निक्किष्ट त्रिय श्रुति अम कहई ॥
 बिनु अवसर भय तैं रह जोई । जानेहु अधम नारि जग सोई ॥
 पति बंचक परपति रति करई । रौरव नरक कल्प सत परई ॥

छन सुख लागि जनम सत कोटी । दुख न समुझ तेहि सम को खोटी
बिनु श्रम नारि परम गति लहई । पतिव्रत धर्म छाड़ि छल गहई ॥
पति प्रतिकूल जनम जहँ जाई । विधवा होइ पाइ तरुनाई ॥

सो०—सहज अपावनि नारि पति सेवत सुभ गति लहइ ।

जसु गावत श्रुति चारि अजहुँ तुलसिका हरिहि प्रिय ॥५(क)॥

सुनु सीता तव नाम सुमिरि नारि पतिव्रत करहिं ।

तोहि प्रानप्रिय राम कहिउँ कथा संसार हित ॥५(ख)॥

सुनि जानकीं परम सुखु पावा । सादर तासु चरन सिरु नावा ॥
तब मुनि सन कह कृपानिधाना । आयसु होइ जाउँ बन आना ॥
संतत मो पर कृपा करेहु । सेवक जानि तजेहु जनि नेहू ॥
धर्म धुरंधर प्रभु कै बानी । सुनि सप्रेम बोले मुनि ग्यानी ॥
जासु कृपा अज सिव सनकादी । चहत सकल परमारथ बादी ॥
ते तुम्ह राम अकाम पिआरे । दीन बंधु मृदु बचन उचारे ॥
अब जानी मैं श्री चतुराई । भजी तुम्हहि सब देव विहाई ॥
जेहि समान अतिसय नहिं कोई । ता कर सील कस न अस होई ॥
केहि विधि कहौ जाहु अब स्वामी । कहहु नाथ तुम्ह अंतरजामी ॥
अस कहि प्रभु बिलोकि मुनि धीरा । लोचन जल बह पुलक सरीरा ॥

छं०—तन पुलक निर्भर प्रेम पूरन नयन मुख पंकज दिष्ट ।

मन ग्यान गान गोतीत प्रभु मैं दीख जप तप का किरण ॥

जप जोग धर्म समूह तें नर भगति अनुपम पावई ।
रघुवीर चरित पुनीत निसि दिन दास तुलसी गावई ॥

दो०—कलिमल समन दमन मन राम सुजस सुख मूल ।

सादर सुनहिं जे तिन्ह पर राम रहहिं अनुकूल ॥६(क)॥

सो०—कठिन काल मल कोस धर्म न ग्यान न जोग जप ।

परिहरि सकल भरोस रामहि भजहिं ते चतुर नर ॥६(ख)॥

मुनि पद कमल नाइ करि सीसा । चले बनहि सुर नर मुनि ईसा ॥

आगें राम अनुज पुनि पाछें । मुनि बर वेष बने अति काछें ॥

उभय बीच श्री सोहइ कैसी । ब्रह्म जीव विच माया जैसी ॥

सरिता बन गिरि अवघट घाटा । पति पहिचानि देहिं बर बाटा ॥

जहँ जहँ जाहिं देव रघुराया । करहिं मेघ तहँ तहँ नभ छाया ॥

मिला अमुर विराध मग जाता । आवतही रघुवीर निपाता ॥

तुरतहिं रुचिर रूप तेहिं पावा । देखि दुखी निज धाम पठावा ॥

पुनि आए जहँ मुनि सरभंगा । सुंदर अनुज जानकी संगी ॥

दो०—देखि राम मुख पंकज मुनिबर लोचन भृंग ।

सादर पान करत अति धन्य जन्म सरभंग ॥ ७ ॥

कह मुनि सुनु रघुवीर कृपाला । संकर मानस राजमराला ॥

जात रहेउँ विरंचि के धामा । सुनेउँ श्रवन बन ऐहहिं रामा ॥

चितवत पंथ रहेउँ दिन राती । अब प्रभु देखि जुड़ानी छाती ॥

नाथ सकल साधन मैं हीना । कीन्ही कृपा जानि जन दीना ॥

सो कछु देव न मोड़ि निशेरा । निज पन राखेउ जन मन चोरा ॥
 तब लगि रहहु दीन हित लागी । जब लगि मिलौ तुम्हहि तनु त्यागी
 जोग जग्य जप तब व्रत कीन्हा । प्रभु कहँ देइ भगति बर लीन्हा ॥
 एहि विधि सर रचि मुनि सरभंगा । बैठे हृदयँ छाड़ि सब संगी ॥
 दो०—सीता अनुज समेत प्रभु नील जलद तनु स्याम ।

मम हियँ बसहु निरंतर सगुनरूप श्रीराम ॥ ८ ॥
 अस कहि जोग अगिनितनु जारा । राम कृपाँ बैकुण्ठ सिधारा ॥
 ताते मुनि हरि लीन न भयऊ । प्रथमहिं भेद भगति बर लयऊ ॥
 रिषि निकाय मुनिवर गति देखी । सुखी भए निज हृदयँ विसेषी ॥
 अस्तुति करहिं सकल मुनि बृन्दा । जयति प्रनत हित करुना कंदा ॥
 पुनि रघुनाथ चले बन आगे । मुनिवर बृन्द विपुल संग लागे ॥
 अस्थि समूह देखि रघुराया । पूछी मुनिन्ह लागि अति दाया ॥
 जानतहूँ पूछिअ कस स्वामी । सबदरसी तुम्ह अंतरजामी ॥
 निसिचर निकर सकल मुनि खाए । मुनि रघुवीर नयन जल छाए ॥
 दो०—निसिचर हीन करउँ महि भुज उठाइ पन कीन्ह ।

सकल मुनिन्ह के आश्रमन्हि जाइ जाइ सुख दीन्ह ॥ ९ ॥
 मुनि अगस्ति कर सिष्य सुजाना । नाम सुतीछन रति भगवाना ॥
 मन क्रम बचन राम पद सेवक । सपनेहुँ आन भरोस न देवक ॥
 प्रभु आगवनु श्रवन सुनि पावा । करत मनोरथ आतुर धावा ॥

दो०—विधि हीनगंध रघुनाथ । सोसे सठ पद करिहिं राखि

सहित अनुज मोहि राम गोसाई । मिलिहहि निज सेवक की नाई ॥
 मोरे जियँ भरोस दृढ़ नाहीं । भगति बिरति न ग्यान मन माहीं
 नहिं मतसंग जोग जप जागा । नहिं दृढ़ चरन कमल अनुरागा ॥
 एक बानि करुनानिधान की । सो प्रिय जाकें गति न आन की ॥
 होइहैं सुफल आजु मम लोचन । देखि बदन पंकज भव मोचन ॥
 निर्भर प्रेम मगन मुनि ग्यानी । कहि न जाइ सो दसा भवानी ॥
 दिसि अरु बिदिसि पंथ नहिं सूझा । को मैं चलेउँ कहाँ नहिं बूझा ॥
 कबहुँक फिरि पाछें पुनि जाई । कबहुँक नृत्य करइ गुन गाई ॥
 अबिरल प्रेम भगति मुनि पाई । प्रभु देखैं तरु ओट लुकाई ॥
 अतिमय प्रीति देखि रघुवीरा । प्रगटे हृदयँ हरन भव भीरा ॥
 मुनि मग माझ अचल होइ बैसा । पुलक सरीर पनस फल जैसा ॥
 तव रघुनाथ निकट चलि आए । देखि दसा निज जन मन भाए ॥
 मुनिहि राम बहु भाँति जगावा । जाग न ध्यान जनित सुख पावा ॥
 भूप रूप तव राम दुरावा । हृदयँ चतुर्भुज रूप देखावा ॥
 मुनि अकुलाइ उठा तव कैसैं । बिकल हीन मनि फनिबर जैसैं ॥
 आगें देखि राम तन स्यामा । सीता अनुज सहित सुख धामा ॥
 परेउ लकुट इव चरनन्हि लागी । प्रेम मगन मुनिबर बड़भागी ॥
 भुज बिसाल गहि लिए उठाई । परम प्रीति राखे उर लाई ॥
 मुनिहि मिलत अस सोह कृपाला । कनक तरुहि जनु भेंट तमाला ॥
 राम बदनु बिलोक मुनि ठाढ़ा । मानहुँ चित्र माझ लिखि काढ़ा ॥

दो०—तब मुनि हृदयँ धीर धरि गहि पद बारहिं बार ।

निज आश्रम प्रभु आनि करि पूजा बिबिध प्रकार ॥१०॥

कह मुनि प्रभु सुनु विनती मोरी । अस्तुति करौं कवन विधि तोरी ॥
 महिमा अमित मोरि मति थोरी । रवि सन्मुख खद्योत अँजोरी ॥
 श्याम तामरस दाम शरीरं । जटा मुकुट परिधन मुनिचीरं ॥
 पाणि चाप शर कटि तूणीरं । नौमि निरंतर श्रीरघुवीरं ॥
 मोह विपिन घन दहन कृशानुः । संत सरोरुह कानन भानुः ॥
 निशिचर करि वरूथ मृगराजः । त्रातु सदा नो भव खग बाजः ॥
 अरुण नयन राजीव सुवेशं । सीता नयन चकोर निशेशं ॥
 हर हृदि मानस बाल मरालं । नौमि राम उर बाहु विशालं ॥
 संशय सर्प ग्रसन उरगादः । शमन सुकर्कश तर्क विषादः ॥
 भव भंजन रंजन सुर यूथः । त्रातु सदा नो कृपा वरूथः ॥
 निर्गुण सगुण विषम सम रूपं । ज्ञान गिरा गोतीतमनूपं ॥
 अमलमखिलमनवद्यमपारं । नौमि राम भंजन महि भारं ॥
 भक्त कल्पपादप आरामः । तर्जन क्रोध लोभ मद कामः ॥
 अति नागर भव सागर सेतुः । त्रातु सदा दिनकर कुल केतुः ॥
 अतुलित भुज प्रताप बल धामः । कलि मल विपुल विभंजन नामः ॥
 धर्म वर्म नर्मद गुण ग्रामः । संतत शं तनोतु मम रामः ॥
 जदपि विरज व्यापक अविनासी । सब के हृदयँ निरंतर बासी ॥
 तदपि अनुज श्री सहित खरारी । बसतु मनसि मम काननचारी ॥
 जे जानहिं ते जानहुँ रामी ॥ सधुना अगुन उर अंतर जानी ॥

Vinay Avasthi Sahib Bhuvan Vani Trust Donations

जो कोसल पति राजिव नयना । करउ सो राम हृदय मम अयना
अस अभिमान जाइ जनि भोरे । मैं सेवक रघुपति पति मोरे ॥
मुनि मुनि बचन राम मन भाए । बहुरि हरषि मुनिवर उर लाए ॥
परम प्रसन्न जानु मुनि मोही । जो बर मागहु देउं सो तोही ॥
मुनि कह मैं बर कबहुँ न जाचा । समुझि न परइ झूठ का साचा ॥
तुम्हहि नीक लागै रघुराई । सो मोहि देहु दास सुखदाई ॥
अविरल भगति बिरति बिग्याना । होहु सकल गुन ग्यान निधाना ॥
प्रभु जो दीन्ह सो बरु मैं पावा । अब सो देहु मोहि जो भावा ॥

दो०—अनुज जानकी सहित प्रभु चाप बान धर राम ।

मम हिय गगन इंदु इव बसहु सदा निहकाम ॥११॥

एवमस्तु करि रमानिवासा । हरषि चले कुंभज रिषि पासा ॥
बहुत दिवस गुर दरसनु पाएँ । भए मोहि एहिं आश्रम आएँ ॥
अब प्रभु संग जाउँ गुर पाहीं । तुम्ह कहँ नाथ निहोरा नाहीं ॥
देखि कृपानिधि मुनि चतुराई । लिए संग बिहसे द्रौ भाई ॥
पंथ कहत निज भगति अनूपा । मुनि आश्रम पहुँचे सुरभूपा ॥
तुरत सुतीछन गुर पहिं गयऊ । करि दंडवत कहत अस भयऊ ॥
नाथ कोसलाधीस कुमारा । आए मिलन जगत आधार ॥
राम अनुज समेत बैदेही । निसि दिनु देव जपत हहु जेही ॥
सुनत अगस्ति तुरत उठि धाए । हरि बिलोकि लोचन जल छाए ॥
मुनि पद कमल परे द्रौ भाई । रिषि अति प्रीति लिए उर लाई ॥

सादर कुसल पूछि मुनि ग्यानी । आसन बर बैठारे आनी ॥
 पुनि करि बहु प्रकार प्रभु पूजा । मोहि सम भाग्यवंत नहिं दूजा ॥
 जहँ लगि रहे अपर मुनि बृंदा । हरषे सब बिलोकि सुखकंदा ॥

दो०-मुनि समूह महुँ बैठे सन्मुख सब की ओर ।

सरद इंद्रु तन चितवत मानहुँ निकर चकोर ॥१२॥

तब रघुवीर कहा मुनि पाहीं । तुम्ह सन प्रभु दुराव कछु नाहीं ॥
 तुम्ह जानहु जेहि कारन आयउँ । ताते तात न कहि समुझायउँ ॥
 अब सो मंत्र देहु प्रभु मोही । जेहि प्रकार मारौं मुनिद्रोही ॥
 मुनि मुसुकाने सुनि प्रभु बानी । पूछेहु नाथ मोहि का जानी ॥
 तुम्हरेई भजन प्रभाव अधारी । जानउँ महिमा कछुक तुम्हारी ॥
 ऊमरि तरु विसाल तब माया । फल ब्रह्मांड अनेक निकाया ॥
 जीव चराचर जंतु समाना । भीतर बसहिं न जानहिं आना ॥
 ते फल भच्छक कठिन कराला । तब भयँ डरत सदा सोउ काला ॥
 ते तुम्ह सकल लोकपति साई । पूछेहु मोहि मनुज की नाई ॥
 यह बर मागउँ कृपानिकेता । बसहु हृदयँ श्री अनुज समेता ॥
 अबिरल भगति बिरति सतसंगा । चरन सरोरुह प्रीति अभंगा ॥
 जद्यपि ब्रह्म अखंड अनंता । अनुभव गम्य भजहिं जेहि संता ॥
 अस तब रूप बखानउँ जानउँ । फिरि फिरि सगुन ब्रह्म रति मानउँ ॥
 संतत दासन्ह देहु बड़ाई । तातें मोहि पूछेहु रघुराई ॥
 है प्रभु परम मनोहर ठाऊँ । पावन पंचवटी तेहि नाऊँ ॥

दंडक बने धुनीत प्रभु करहु । उपर सय मुनि पर डोकरा करहु ॥
बास करहु तहँ रघुकुल राया । कीजे सकल मुनिन्ह पर दाया ॥
चले राम मुनि आयसु पाई । तुरतहि पंचवटी निअराई ॥
दो०—गीधरोज सैं भेंट भइ बहु बिधि प्रीति बढ़ाइ ।

गोदावरी निकट प्रभु रहे परन गृह छाई ॥१३॥
जब ते राम कीन्ह तहँ बासा । सुखी भए मुनि बीती त्रासा ॥
गिरि बन नदी ताल छवि छाए । दिन दिन प्रति अति होहि सुहाए ॥
खग मृग वृंद अनंदित रहहीं । मधुप मधुर गुंजत छवि लहहीं ॥
सो बन बरनि न सक अहिराजा । जहाँ प्रगट रघुवीर विराजा ॥
एक बार प्रभु सुख आसीना । लछिमन बचन कहे छलहीना ॥
सुर नर मुनि सचराचर साई । मैं पूछउँ निज प्रभु की नाई ॥
मोहि समुझाइ कहहु सोइ देवा । सब तजि करौं चरन रज सेवा ॥
कहहु ग्यान बिराग अरु माया । कहहु सो भगति करहु जेहि दाया ॥
दो०—ईस्वर जीव भेद प्रभु सकल कहौ समुझाइ ।

जातैं होइ चरन रति सोक मोह भ्रम जाइ ॥१४॥
थोरेहि मँहँ सब कहउँ बुझाई । सुनहु तात मति मन चित लाई ॥
मैं अरु मोर तोर तैं माया । जेहि बस कीन्हे जीव निकाया ॥
गो गोचर जहँ लगि मन जाई । सो सब माया जानेहु भाई ॥
तेहि कर भेद सुनहु तुम्ह सोऊ । बिद्या अपर अबिद्या दोऊ ॥
एक दुष्ट अतिसय दुखरूपा । जा बस जीव परा भवकृपा ॥

गु० रा० १४—

एकरूपेइ जगुनि बैसे जाके । प्रभु प्ररित नहि निज बल ताके ॥
 ग्यान मान जहँ एकउ नाही । देख ब्रह्म समान सब माहीं ॥
 कहिअ तात सो परम विरागी । तृन सम सिद्धि तीनि गुन त्यागी ॥
 दो०—माया ईस न आपु कहूँ जान कहिअ सो जीव ।

बंध मोच्छ प्रद सर्वपर माया प्रेरक सीव ॥१५॥

धर्म तें विरति जोग तें ग्याना । ग्यान मोच्छप्रद वेद बखाना ॥
 जातें वेगि द्रवउँ मैं भाई । सो मम भगति भगत सुखदाई ॥
 सो सुतंत्र अवलंब न आना । तेहि आधीन ग्यान विग्याना ॥
 भगति तात अनुपम सुखमूला । मिलइ जो संत होई अनुकूला ॥
 भगति कि साधन कहउँ बखानी । सुगम पंथ मोहि पावहिं प्रानी ॥
 प्रथमहिं विप्र चरन अति प्रीती । निज निज कर्म निरत श्रुति रीती
 एहि कर फल पुनि विषय विरागा । तब मम धर्म उपज अनुरागा ॥
 भवनादिक नव भक्ति दृढ़ाहीं । मम लीलारति अति मन माहीं ॥
 संत चरन पंकज अति प्रेमा । मन क्रम बचन भजन दृढ़ नेमा ॥
 गुरु पितु मातु बंधु पति देवा । सब मोहि कहँ जानै दृढ़ सेवा ॥
 मम गुन गावत पुलक सरीरा । गदगद गिरा नयन बह नीरा ॥
 काम आदि मद दंभ न जाके । तात निरंतर बस मैं ताके ॥
 दो०—बचन कर्म मन मोरि गति भजनु करहिं निःकाम ।

तिन्ह के हृदय कमल महुँ करउँ सदा विश्राम ॥१६॥

भगति जोग सुनि अति सुख पावा । लछिमन प्रभु चरनन्हि सिरु नावा

एहि विधि गए कछुक दिन बीती । कहत विराग ग्यान गुन नीती ॥
 सूपनखा रावन कै बहिनी । दुष्ट हृदय दारुन जस अहिनी ॥
 पंचवटी सो गइ एक बारा । देखि बिकल भइ जुगल कुमारा ॥
 भ्राता पिता पुत्र उरगारी । पुरुष मनोहर निरखत नारी ॥
 होइ बिकल सक मनहि न रोकी । जिमि रविमनि द्रव रविहि बिलोकी
 रुचिर रूप धरि प्रभु पहिं जाई । बोली बचन बहुत मुसुकाई ॥
 तुम्ह सम पुरुष न मो सम नारी । यह सँजोग बिधिरचा बिचारी ॥
 मम अनुरूप पुरुष जग माहीं । देखेउँ खोजि लोक तिहु नाहीं ॥
 तातें अग्र लगि रहिउँ कुमारी । मनु माना कछु तुम्हहि निहारी ॥
 सीतहि चितइ कही प्रभु बाता । अहइ कुआर मोर लघु भ्राता ॥
 गइ लछिमन रिपु भगिनी जानी । प्रभु बिलोकि बोले मृदु बानी ॥
 सुंदरि सुनु मैं उन्ह कर दासा । पराधीन नहिं तोर सुपासा ॥
 प्रभु समर्थ कोसलपुर राजा । जो कछु करहिं उनहि सब छाजा ॥
 सेवक सुख चह मान भिखारी । व्यसनी धन सुभ गति विभिचारी
 लोभी जसु चह चार गुमानी । नभ दुहि दूध चहत ए प्राणी ॥
 पुनि फिरि राम निकट सो आई । प्रभु लछिमन पहिं बहुरि पठाई ॥
 लछिमन कहा तोहि सो बरई । जो तृन तोरि लाज परिहरई ॥
 तब खिसिआनि राम पहिं गई । रूप भयंकर प्रगटत भई ॥
 सीतहि सभय देखि रघुराई । कहा अनुज सन सयन बुझाई ॥
 दो०—लछिमन अति लाघवँ सो नाक कान बिनु कीन्हि ।

ताके कर रावन कहँ मनौ चुनौती दीन्हि ॥१७॥

नाक कान बिनु भइ बिकरारा । जनु सब सैल गेरु कै धारा ॥
 खर दूधन पहिं गइ बिलपाता । धिग धिग तव पौरुष बल भ्राता ॥
 तेहिं पूछा सब कहेसि बुझाई । जातुधान सुनि सेन बनाई ॥
 घाए निसिचर निकर बरुथा । जनु सपच्छ कजल गिरि जूथा ॥
 नाना बाहन नानाकारा । नानायुध धर घोर अपारा ॥
 सूपनखा आगें करि लीनी । असुभ रूप श्रुति नासा हीनी ॥
 असगुन अमित होहिं भयकारी । गनहिं न मृत्यु विवस सब झारी ॥
 गर्जहिं तर्जहिं गगन उड़ाहीं । देखि कटकु भट अति हरषाहीं ॥
 कोउ कह जिअत धरहु द्रौ भाई । धरि मारहु तिय लेहु छड़ाई ॥
 धूरि पूरि नभ मंडल रहा । राम बोलाइ अनुज सन कहा ॥
 लै जानकिहि जाहु गिरि कंदर । आवा निसिचर कटकु भयंकरा ॥
 रहेहु सजग सुनि प्रभु कै बानी । चले सहित श्री सर धनु पानी ॥
 देखि राम रिपुदल चलि आवा । विहसि कठिन कोदंड चढ़ावा ॥

छं०—कोदंड कठिन चढ़ाइ सिर जट जूट बाँधत सोह क्यों ।
 मरकत सयल पर लरत दामिनि कोटि सों जुग भुजग ज्यों ॥
 कटि कसि निषंग बिसाल भुज गहि चाप बिसिख सुधारि कै
 चितवत मनहुँ मृगराज प्रभु गजराज घटा निहारि कै ॥

सौ०—आइ गए बगमेल धरहु धरहु धावत सुभट ।

जथा बिलोकि अकेल बाल रबिहि घेरत दनुज ॥१८॥

प्रभु बिलोकि सर सकहिं न डारी । थकित भई रजनीचर धारी ॥

सचिव बोलि बोले खर दूषन । यह कोउ नृप बालक नर भूषन ॥
 नाग असुर सुर नर मुनि जेते । देखे जिते हते हम केते ॥
 हम भरि जन्म सुनहु सब भाई । देखी नहिं असि सुंदरताई ॥
 जद्यपि भगिनी कीन्हि कुरूपा । बध लायक नहिं पुरुष अनूपा ॥
 देहु तुरत निज नारि दुराई । जीअत भवन जाहु द्वौ भाई ॥
 मोर कहा तुम्ह ताहि सुनावहु । तासु वचन सुनि आतुर आवहु ॥
 दूतन्ह कहा राम सन जाई । सुनत राम बोले मुसुकाई ॥
 हम छत्री मृगया बन करहीं । तुम्ह से खल मृग खोजत फिरहीं ॥
 रिपु बलवंत देखि नहिं डरहीं । एक बार कालहु सन लरहीं ॥
 जद्यपि मनुज दनुज कुलघालक । मुनि पालक खल सालक बालक ॥
 जौं न होइ बल घर फिरि जाहू । समर विमुख मैं हतउँ न काहू ॥
 रन चढ़ि करिअ कपट चतुराई । रिपु पर कृपा परम कदराई ॥
 दूतन्ह जाइ तुरत सब कहेऊ । सुनि खर दूषन उर अति दहेऊ ॥
 छं०—उर दहेउ कहेउ कि धरहु धाए बिकट भट रजनीचरा ।
 सर चाप तोमर सक्ति सूल कृपान परिघ परसु धरा ॥
 प्रभु कीन्हि धनुष टकोर प्रथम कठोर घोर भयावहा ।
 भए बधिर व्याकुल जातुधान न ग्यान तेहि अवसर रहा ॥
 दो०—सावधान होइ धाए जानि सबल आराति ।

लागे वरषन राम पर अस्त्र सस्त्र बहुभाँति ॥१९(क)॥

तिन्ह के आयुध तिल सम करि काटे रघुबीर ।

तानि सरासन श्रवन लागि पुनि छाँड़े निज तीर ॥ १९(ख) ॥

छं०-तब चले बान कराल । फुंकरत जनु बहु ब्याल ॥

कोपेउ समर श्रीराम । चले बिसिख निसित निकाम ॥

अवलोकि खरतर तीर । मुरि चले निसिचर बीर ॥

भए क्रुद्ध तीनिउ भाइ । जो भागि रन ते जाइ ॥

तेहि बधब हम निज पानि । फिरे मरन मन महुँ ठानि ॥

आयुध अनेक प्रकार । सनमुख ते करहि प्रहार ॥

रिपु परम कोपे जानि । प्रभु धनुष सर संधानि ॥

छाँड़े बिपुल नाराच । लगे कटन बिकट पिसाच ॥

उर सीस भुज कर चरन । जहँ तहँ लगे महि परन ॥

चिक्करत लागत बान । धर परत कुधर समान ॥

भट कटत तन सतखंड । पुनि उठत करि पाषंड ॥

नभ उड़त बहु भुज मुंड । बिनु मौलि धावत रुंड ॥

खग कंक काक सृगाल । कटकटहिं कठिन कराल ॥

छं०-कटकटहिं जंबुक भूत प्रेत पिसाच खर्पर संचहीं ।

बेताल बीर कपाल ताल बजाइ जोगिनि नंचहीं ॥

रघुबीर बान प्रचंड खंडहिं भटन्ह के उर भुज सिरा ।

जहँ तहँ परहिं उठि लरहिं धर धरु धरु करहिं भयकर गिरा ॥

अंतावरीं गहि उड़त गीध पिसाच कर गहि धावहीं ।
 संग्राम पुर बासी मनहुं बहु बाल गुड़ी उड़ावहीं ॥
 मारे पछारे उर बिदारे बिपुल भट कहँरत परे ।
 अवलोकि निज दल विकल भट तिसिरादि खर दूषन फिरे ॥
 सर सक्ति तोमर परसु सूल कृपान एकहि बारहीं ।
 करि कोष श्रीरघुवीर पर अगनित निसाचर डारहीं ॥
 प्रभु निमिष महुं रिपु सर निवारि पचारि डारे सायका ।
 दस दस बिसिख उर माझ मारे सकल निसिचर नायका ॥
 महि परत उठि भट भिरत मरत न करत माया अति घनी ।
 सुर डरत चौदह सहस प्रेत बिलोकि एक अवध धनी ॥
 सुर मुनि सभय प्रभु देखि मायानाथ अति कौतुक करयो ।
 देखहि परसपर राम करि संग्राम रिपुदल लरि मरयो ॥

दो०—राम राम कहि तनु तजहिं पावहिं पद निर्बान ।

करि उपाय रिपु मारे छन महुं कृपानिधान ॥२०(क)॥

हरषित बरषहिं सुमन सुर बाजहिं गगन निसान ।

अस्तुति करि करि सब चले सोभित विविध विमान २०(ख)

जब रघुनाथ समर रिपु जीते । सुर नर मुनि सब के भय वीते ॥

तब लछिमन सीतहि लै आए । प्रभु पद परत हरषि उर लाए ॥

सीता चितव स्याम मृदु गाता । परम प्रेम लोचन न अघाता ॥

पंचवटी बसि श्रीरघुनाथक । करत जरित सुर मुनि धृतदासक

धुआ देखि खर दूषन केरा। जाइ सुपनखाँ रावन प्रेरा ॥
 बोली बचन क्रोध करि भारी। देस कोस कै सुरति विसारी ॥
 करसि पान सोवसि दिनु राती। सुधि नहिं तव सिर पर आराती ॥
 राज नीति विनु धन विनु धर्मा। हरिहि समपैं विनु सतकर्मा ॥
 विद्या विनु विवेक उपजाएँ। श्रम फल पढ़ें किएँ अरु पाएँ ॥
 संग तैं जती कुमंत्र ते राजा। मान ते ग्यान पान तैं लाजा ॥
 प्रीति प्रनय विनु मद ते गुनी। नासहिं बेगि नीति अस सुनी ॥

सो०—रिपु रुज पावक पाप प्रभु अहि गनिअ न छोट करि ।

अस कहि बिबिध बिलाप करि लागी रोदन करन ॥२१(क)॥

दो०—सभा माझ परि व्याकुल बहु प्रकार कह रोइ ।

तोहि जिअत दसकंधर मोरि कि असि गति होइ ॥२१(ख)॥

सुनत सभासद उठे अकुलाई। समुझाई गहि बाँह उठाई ॥
 कह लंकेस कहसि निज बाता। केहँ तव नासा कान निपाता ॥
 अवध नृपति दसरथ के जाए। पुरुष सिंघ बन खेलन आए ॥
 समुझि परी मोहि उन्ह कै करनी। रहित निसाचर करिहहिं धरनी ॥
 जिन्ह कर भुजबल पाइ दसानन। अभय भए विचरत मुनि कानन
 देखत बालक काल समाना। परम धीर धन्वी गुन जाना ॥
 अतुलित बल प्रताप द्वौ भ्राता। खल बध रत सुर मुनि सुखदाता
 सोभा धाम राम अस नामा। तिन्ह के संग नारिएक स्यामा ॥
 रूप रासि बिधि नारि सँवारी। रति सत कोटि तासु बलिहारी ॥

तासु अनुज काटे श्रुति नासा । सुनि तव भगिनि कराँहि परिहासा
खर दूपन सुनि लगे पुकारा । छन महुँ सकल कटक उन्ह मारा
खर दूपन तिसिरा कर घाता । सुनि दससीस जरे सब गाता ॥
दो०—सूपनखहि समुझाइ करि बल बोलेसि बहु भाँति ।

गयउ भवन अति सोचबस नीद परइ नहिं राति ॥२२॥

सुर नर असुर नाग खग माहीं । मोरे अनुचर कहँ कोउ नाहीं ॥
खर दूपन मोहि सम बलवंता । तिन्हहि को मारइ बिनु भगवंता
सुर रंजन भंजन महि भारा । जाँ भगवंत लीन्ह अवतारा ॥
तौ मैं जाइ बैरु हठि करऊँ । प्रभु सर प्रान तजें भव तरऊँ ॥
होइहि भजनु न तामस देहा । मन क्रम वचन मंत्र दृढ़ एहा ॥
जाँ नररूप भूपसुत कोऊ । हरिहउँ नारि जीति रन दोऊ ॥
चला अकेल जान चढ़ि तहवाँ । बस मारीच सिंधु तट जहवाँ ॥
इहाँ राम जसि जुगुति बनाई । सुनहु उमा सो कथा सुहाई ॥

दो०—लछिमन गए बनहिं जब लेन मूल फल कंद ।

जनकसुता सन बोले बिहसि कृपा सुख बृंद ॥२३॥

सुनहु प्रिया व्रत रुचिर सुसीला । मैं कछु करबि ललित नरलीला
तुम्ह पावक महुँ करहु निवासा । जौ लगि करौ निसाचर नासा ॥
जबहिं राम सब कहा बखानी । प्रभु पद धरि हियँ अनल समानी
निज प्रतिबिंब राखि तहँ सीता । तैसइ सील रूप सुविनीता ॥

लछिमनहुँ यह मरमु न जाना । जो कछु चरित रचा भगवाना ॥

दसमुख गयउ जहाँ मारीचा । नाइ माथ स्वारथ रत नीचा ॥
 नवनि नीच कै अति दुखदाई । जिमि अंकुस धनु उरग बिलाई ॥
 भयदायक खल कै प्रिय बानी । जिमि अकाल के कुसुम भवानी
 दो०—करि पूजा मारीच तब सादर पूछी बात ।

कवन हेतु मन व्यग्र अति अकसर आयहु तात ॥ २४ ॥

दसमुख सकल कथा तेहि आगें । कही सहित अभिमान अभागें ॥
 होहु कपट मृग तुम्ह छलकारी । जेहि विधि हरि आनों नृपनारी ॥
 तेहि पुनि कहा सुनहु दससीसा । ते नररूप चराचर ईसा ॥
 तासों तात बयरु नहिं कीजै । मारें मरिअ जिआएँ जीजै ॥
 मुनि मख राखन गयउ कुमारा । बिनु फर सर रघुपति मोहि मारा
 सत जोजन आयउँ छन माहीं । तिन्ह सन बयरु किँ भल नाहीं
 भइ मम कीट भृंग की नाई । जहँ तहँ मैं देखउँ दोउ भाई ॥
 जाँ नर तात तदपि अति सूरा । तिन्हहि विरोधि न आइहि पूरा ॥

दो०—जेहि ताड़का सुबाहु हति खंडेउ हर कोदंड ।

खर दूषन तिसिरा बधेउ मनुज कि अस बरिबंड ॥ २५ ॥

जाहु भवन कुल कुसल विचारी । सुनत जरा दीन्हिसि बहु गारी
 गुरु जिमि मूढ़ करसि मम बोधा । कहु जग मोहि समान को जोधा
 तब मारीच हृदयँ अनुमाना । नवहि विरोधैं नहिं कल्याना ॥
 सखी ममीं प्रभु सठ धनी । वैद बंदि कवि भानस गुनी ॥

उभय भाँति देखा निज मरना । तब ताकिसि रघुनायक सरना ॥

उतर देत मोहि बधब अभागें । कस न मरौ रघुपति सर लागें ॥

अस जियँ जानि दसानन संगी । चला राम पद प्रेम अभंगा ॥

मन अति हरष जनाव न तेही । आजु देखिहउँ परम सनेही ॥

छं०—निज परम प्रीतम देखि लोचन सुफल करि सुख पाइहौं ।

श्री सहित अनुज समेत कृपानिकेत पद मन लाइहौं ॥

निर्बान दायक क्रोध जा कर भगति अबसहि बसकरी ।

निज पानि सर संधानि सो मोहि बधिहि सुखसागर हरी ॥

दो०—मम पाछें धर धावत धरें सरासन बान ।

फिरि फिरि प्रभुहि बिलोकिहउँ धन्य न मो सम आन ॥२६॥

तेहि वन निकट दसानन गयऊ । तब मारीच कपटमृग भयऊ ॥

अति बिचित्र कछु बरनि न जाई । कनक देह मनि रचित बनाई ॥

सीता परम रुचिर मृग देखा । अंग अंग सुमनोहर बेषा ॥

सुनहु देव रघुवीर कृपाला । एहि मृग कर अति सुंदर छाला ॥

सत्यसंध प्रभु बधि करि एही । आनहु चर्म कहति वैदेही ॥

तब रघुपति जानत सब कारन । उठे हरषि सुर काजु सँवारन ॥

मृग बिलोकि कटि परिकर बाँधा । करतल चाप रुचिर सर साँधा ॥

प्रभु लछिमनहि कहा समुझाई । फिरत विपिन निसिचर बहु भाई ॥

सीता केरि करेहु रखवारी । बुधि बिबेक बल समय विचारी ॥

प्रभुहि बिलोकि चला मृग भाजी । धाए रामु सरासन साजी ॥

निगम नेति सिव ध्यान न पावा । मायामृग पाछें सो धावा ॥

Vinay Avasthi Sahib Bhuvan Vani Trust Donations

कबहु निकट पुन दूर पराई । कबहुक प्रगटइ कबहु छपाई ॥
 प्रगटत दुरत करत छल भूरी । एहि विधि प्रभुहि गयउ लै दूरी ॥
 तब तकि राम कठिन सर मारा । धरनि परेउ करि घोर पुकारा ॥
 लछिमन कर प्रथमहि लै नामा । पाछें सुमिरेसि मन महुँ रामा ॥
 प्रान तजत प्रगटेसि निज देहा । सुमिरेसि रामु समेत सनेहा ॥
 अंतर प्रेम तासु पहिचाना । सुनि दुर्लभ गति दीन्हि सुजाना ॥
 दो०—बिपुल सुमन सुर बरषहि गावहिं प्रभु गुन गाथ ।

निज पद दीन्ह असुर कहुँ दीनबंधु रघुनाथ ॥२७॥

खल बधि तुरत फिरे रघुबीरा । सोह चाप कर कटि तूनीरा ॥
 आरत गिरा सुनी जब सीता । कह लछिमन सन परम समीता ॥
 जाहु बेगि संकट अति भ्राता । लछिमन बिहसि कहा सुनु माता
 भृकुटि बिलास सृष्टि लय होई । सपनेहुँ संकट परइ कि सोई ॥
 मरम वचन जब सीता बोला । हरि प्रेरित लछिमन मन डोला ॥
 बन दिसि देव सौंपि सब काहू । चले जहाँ रावन ससि राहू ॥
 सून बीच दसकंधर देखा । आवा निकट जती कें बेधा ॥
 जाकें डर सुर असुर डेराहीं । निसि न नीद दिन अन्न न खाहीं
 सो दससीस स्वान की नाई । इत उत चितइ चला भड़िहाई ॥
 इमि कुपंथ पग देत खगेसा । रहन तेजस्तन बुधि बल लेसा ॥
 नाना विधि करि कथा सुहाई । राजनीति भय प्रीति देखाई ॥
 कह सीता सुनु जती गोसाई । बोलेहु बचन दुष्ट की नाई ॥

Vinay Avasthi Sahib Bhuvan Vani Trust Donations
तब रावन निज रूप देखावा । भई सभय जब नाम सुनावा ॥

कह सीता धरि धीरजु गाढ़ा । आइ गयउ प्रभु रहु खलठाढ़ा ॥

जिमि हरि बधुहि छुद्र सस चाहा । भएसि कालबस निसिचर नाहा

सुनत बचन दससीस रिसाना । मन महुँ चरन बंदि सुख माना ॥

दो०—क्रोधवंत तब रावन लीन्हिसि रथ बैठाइ ।

चला गगनपथ आतुर भयँ रथ हाँकि न जाइ ॥२८॥

हा जग एक बीर रघुराया । केहि अपराध विसारेहु दाया ॥

आरति हरन सरन सुखदायक । हा रघुकुल सरोज दिननायक ॥

हा लछिमन तुम्हार नहिं दोसा । सो फलु पायउँ कीन्हेउँ रोसा ॥

विविध बिलाप करति वैदेही । भूरि कृपा प्रभु दूरि सनेही ॥

बिपति मोरि को प्रभुहि सुनावा । पुरोडास चह रासभ खावा ॥

सीता कै बिलाप सुनि भारी । भए चराचर जीव दुखारी ॥

गौधराज सुनि आरत बानी । रघुकुलतिलक नारि पहिचानी ॥

अधम निसाचर लीन्हें जाई । जिमि मलेछ बस कपिला गाई ॥

सीते पुत्रि करसि जनि त्रासा । करिहउँ जातुधान कर नासा ॥

घावा क्रोधवंत खग कैसैं । छूटइ पवि परबत कहूँ जैसैं ॥

रे रे दुष्ट ठाढ़ किन होही । निर्भय चलेसि नजानेहि मोही ॥

आवत देखि कृतांत समाना । फिरि दसकंधर कर अनुमाना ॥

की मैनाक कि खगपति होई । मम बल जान सहित पति सोई ॥

जाना जरठ जटायू एहा । मम कर तीरथ छाँड़िहि देहा ॥

सुनत विधेय क्रोधोत्तुर धावा । कह सुनु रावन भर सिखावा ॥
 तजि जानकिहि कुसल गृह जाहू । नाहिं त अस होइहि बहुबाहू ॥
 राम रोष पावक अति घोरा । होइहि सकल सलभ कुल तोरा ॥
 उतरु न देत दसानन जोधा । तबहिं गीध धावा करि क्रोधा ॥
 धरि कच बिरथ कीन्ह महि गिरा । सीतहि राखि गीध पुनि फिरा
 चोचन्ह मारि बिदारेसि देही । दंड एक भइ मुरुछा तेही ॥
 तब सक्रोध निसिचर खिसिआना । काढ़ेसि परम कराल कृपाना ॥
 काटेसि पंख परा खग धरनी । सुमिरिराम करि अदभुत करनी ॥
 सीतहि जान चढ़ाइ बहोरी । चला उताइल त्रास न थोरी ॥
 करति बिलाप जाति नभ सीता । ब्याध बिवस जुनु मृगी सभीता ॥
 गिरि पर बैठे कपिन्ह निहारी । कहि हरि नाम दीन्ह पट डारी ॥
 एहि विधि सीतहि सो लै गयऊ । बन असोक महुँ राखत भयऊ ॥

दो०—हारि परा खल बहु विधि भय अरु प्रीति देखाइ ।

तब असोक पादप तर राखिसि जतन कराइ ॥२९(क)॥

नवाह्नपारायण, छठा विश्राम

जेहि विधि कपट कुरंग सँग धाइ चले श्रीराम ।

सो छबि सीता राखि उर रटति रहति हरिनाम ॥२९(ख)॥

रघुपति अनुजहि आवत देखी । बाहिज चिंता कीन्हि बिसेषी ॥

जनकसुता परिहरिहु अकेली । आयहु तात बचन मम पेली ॥

निसिचर निकर फिरहिं बन माहीं । मम मन सीता आश्रम नाहीं ॥

गहिपद कमल अनुज कर जोरी । कहेउ नाथ कछु मोहि न खोरी
 अनुज समेत गए प्रभु तहवाँ । गोदावरि तट आश्रम जहवाँ ॥
 आश्रम देखि जानकी हीना । भए विकल जस प्राकृत दीना ॥
 हा गुन खानि जानकी सीता । रूप सील व्रत नेम पुनीता ॥
 लछिमन समुझाए बहु भाँती । पूछत चले लता तरु पाँती ॥
 है खग मृग हे मधुकर श्रेणी । तुम्ह देखी सीता मृगनैनी ॥
 खंजन सुक कपोत मृग मीना । मधुप निकर कोकिला प्रवीना ॥
 कुंद कली दाड़िम दामिनी । कमल सरद ससि अहिभामिनी ॥
 बरुन पास मनोज धनु हंसा । गज केहरि निज सुनत प्रसंसा ॥
 श्रीफल कनक कदलि हरषाहीं । नेकु न संक सकुच मन माहीं ॥
 सुनु जानकी तोहि बिनु आजू । हरषे सकल पाइ जनु राजू ॥
 किमि सहि जात अनख तोहि पाहीं । प्रिया बेगि प्रगटसि कस नाहीं
 एहि बिधि खोजत बिलपत स्वामी । मनहुँ महा बिरही अति कामी
 पूरनकाम राम सुख रासी । मनुज चरित कर अज अविनासी ॥
 आगें परा गीधपति देखा । सुमिरत राम चरन जिन्ह रेखा ॥

दो०—कर सरोज सिर परसेउ कृपासिंधु रघुबीर ।

निरखि राम छवि धाम मुख बिगत भई सब पीर ॥३०॥

तब कह गीध वचन धरि धीरा । सुनहु राम भंजन भव भीरा ॥
 नाथ दसानन यह गति कीन्ही । तेहिं खल जनकसुता हरि लीन्ही ॥
 लै दन्छिन दिसि गयउ गोसाईं । बिलपति अति कुररी कीनाई ॥

दरस लागि प्रभु राखेउँ प्राणा । चलन चहत अब कृपा निधान ॥
 राम कहा तनु राखहु ताता । मुख मुसुकाइ कही तेहिं बाता ॥
 जा कर नाम मरत मुख आवा । अधमउ मुकुत होइ श्रुति गावा ॥
 सो मम लोचन गोचर आगें । राखौं देह नाथ केहि खाँगें ॥
 जल भरि नयन कहहिं रघुराई । तात कर्म निज तें गति पाई ॥
 परहित बस जिन्ह के मन माहीं । तिन्ह कहँ जग दुर्लभ कछु नार्हीं ॥
 तनु तजि तात जाहु मम धामा । देउँ काह तुम्ह पूरनकामा ॥

दो०—सीता हरन तात जनि कहहु पिता सन जाइ ।

जौं मैं राम त कुल सहित कहिहि दसानन आइ ॥३१॥

गीध देह तजि धरि हरि रूपा । भूषन बहु पट पीत अनूपा ॥
 स्याम गात बिसाल भुज चारी । अस्तुति करत नयन भरि बारी ॥

छं०—जय राम रूप अनूप निर्गुन सगुन गुन प्रेरक सही ।

दससीस बाहु प्रचंड खंडन चंड सर मंडन मही ॥

पाथोद गात सरोज मुख राजीव आयत लोचन ।

नित नौमि रामु कृपाल बाहु बिसाल भव भय मोचन ॥१॥

बलमप्रमेयमनादिमजमव्यक्तमेकमगोचरं ।

गोबिंद गोपर द्वंद्वहर बिग्यानघन धरनीधरं ॥

जे राम मंत्र जपंत संत अनंत जन मन रंजन ।

नित नौमि राम अकाम प्रिय कामादि खल दल गंजन ॥२॥

जेहि श्रुति निरंजन ब्रह्म व्यापक बिरज अज कहि गावहीं ।
 करि ध्यान ग्यान बिराग जोग अनेक मुनि जेहि पावहीं ॥
 सो प्रगट करुना कंद सोभा बृंद अग जग मोहई ।
 मम हृदय पंकज भृंग अंग अनंग बहु छबि सोहई ॥३॥
 जो अगम सुगम सुभाव निर्मल असम सम सीतल सदा ।
 पस्यंति जं जोगी जतन करि करत मन गो बस सदा ॥
 सो राम रमा निवास संतत दास बस त्रिभुवन धनी ।
 मम उर बसउ सो समन संसृति जासु कीरति पावनी ॥४॥

दो०—अबिरल भगति सागि बर गीध गयउ हरिधाम ।

तेहि की क्रिया जथोचित निज कर कीन्ही राम ॥३२॥

कोमल चित अति दीनदयाला । कारन विनु रघुनाथ कृपाला ॥
 गीध अधम खग आमिषभोगी । गति दीन्हीं जो जाचत जोगी ॥
 सुनहु उमा ते लोग अभागी । हरि तजि होहिं बिषय अनुरागी ॥
 पुनि सीतहि खोजत द्रौभाई । चले विलोकत बन बहुताई ॥
 संकुल लता विटप घन कानन । बहु खग मृग तहँ गज पंचानन ॥
 आवत पंथ कबंध निपाता । तेहिं सब कही साप कै बाता ॥
 दुरबासा मोहि दीन्ही सापा । प्रभु पद पेखि मिटा सो पापा ॥
 सुनु गंधर्व कहउँ मैं तोही । मोहि न सोहाइ ब्रह्मकुल द्रोही ॥

दो०—मन क्रम बचन कपट तजि जो कर भूसुर सेव ।

मोहि समेत बिरंचि सिव बस ताकें सब देव ॥३३॥

सापत तोड़त पश्य कहंता । विप्र पूज्य अस गावहिं संता ॥
 पूजिअ विप्र सील गुन हीना । सूद्र न गुन गन ग्यान प्रवीना ॥
 कहि निज धर्म ताहि समुझावा । निज पद प्रीति देखि मन भावा ॥
 रघुपति चरन कमल सिरु नाई । गयउ गगन आपनि गति पाई ॥
 ताहि देइ गति राम उदारा । सबरी कें आश्रम पगु धारा ॥
 सबरी देखि राम गृहँ आए । मुनि के वचन समुझि जियँ भाए ॥
 सरसिज लोचन बाहु बिसाला । जटा मुकुट सिर उर वनमाला ॥
 स्याम गौर सुंदर दोउ भाई । सबरी परी चरन लपटाई ॥
 प्रेम मगन मुख बचन न आवा । पुनि पुनि पद सरोज सिर नावा ॥
 सादर जल लै चरन पखारे । पुनि सुंदर आसन बैठारे ॥

१०-कंद मूल फल सुरस अति दिए राम कहूँ आनि ।

प्रेम सहित प्रभु खाए बारंबार बखानि ॥३४॥

पानि जोरि आगें भइ ठाढ़ी । प्रभुहि विलोकि प्रीति अति बाढ़ी
 केहि विधि अस्तुति करौं तुम्हारी । अधम जाति मैं जड़मति भारी ॥
 अधम ते अधम अधम अति नारी । तिन्ह महुँ मैं मतिमंद अधारी ॥
 कह रघुपति सुनु भामिनि बाता । मानउँ एक भगति कर नाता ॥
 जाति पाँति कुल धर्म बड़ाई । धन बल परिजन गुन चतुराई ॥
 भगति हीन नर सोहइ कैसा । बिनु जल बारिद देखिअ जैसा ॥
 नवधा भगति कहउँ तोहि पाहीं । सावधान सुनु घर मन माहीं ॥

प्रथम भगति संतन्ह कर संगी । दूसरि रति मम कथा प्रसंगी ॥

दो०—गुर पद पंकज सेवा हासि भगति अमोघ ।

चौथि भगति मम गुन गन करइ कपट तजि गान ॥३५॥

मंत्र जाप मम दृढ़ बिस्वासा । पंचम भजन सो वेद प्रकासा ॥
छठ दम सील बिरति बहु करमा । निरत निरंतर सजन धरमा ॥
सातवँ सम मोहि मय जग देखा । मोतैं संत अधिक करि लेखा ॥
आठवँ जयालाभ संतोषा । सपनेहुँ नहि देखइ परदोषा ॥
नवम सरल सब सन छलहीना । मम भरोस हियँ हरष न दीना ॥
नव महुँ एकउ जिन्ह कें होई । नारि पुरुष सचराचर कोई ॥
सोइ अतिसय प्रिय भामिनि मोरें । सकल प्रकार भगति दृढ़ तोरें ॥
जोगि बृंद दुरलभ गति जोई । तो कहूँ आजु सुलभ भइ सोई ॥
मम दरसन फल परम अनूपा । जीव पाव निज सहज सरूपा ॥
जनकसुता कह सुधि भामिनी । जानहि कहु करिबरगामिनी ॥
पंपा सरहि जाहु रघुराई । तहँ होइहि सुग्रीव मिताई ॥
सो सब कहिहि देव रघुबीरा । जानतहूँ पूछहु मतिधीरा ॥
बार बार प्रभु पद सिरु नाई । प्रेम सहित सब कथा सुनाई ॥

छं०—कहि कथा सकल बिलोकि हरि मुख हृदयँ पद पंकज धरे ।
तजि जोग पावक देह हरि पद लीन भइ जहँ नहि फिरे ॥
नर बिबिध कर्म अधर्म बहु मत सोकप्रद सब त्यागहु ।
बिस्वास करि कह दास तुलसी राम पद अनुरागहु ॥

Vinay Avasthi Sahib Bhuvan Vani Trust Donations

दो०—जाति हान अघ जन्म मोहि मुक्त कीन्ह असि नारि ।

महामंद मन सुख चहसि ऐसे प्रभुहि बिसारि ॥३६॥

चले राम त्यागा बन सोऊ । अतुलित बल नर केहरि दोऊ ॥
 बिरही इव प्रभु करत विषादा । कहत कथा अनेक संवादा ॥
 लछिमन देखु विपिन कइ सोभा । देखत केहि कर मन नहिं छोभा ॥
 नारि सहित सब खग मृग बृंदा । मानहुँ मोरि करत हहिं निंदा ॥
 हमहि देखि मृग निकर पराहीं । मृगीं कहहिं तुम्ह कहँ भय नहिं ॥
 तुम्ह आनंद करहु मृग जाए । कंचन मृग खोजन ए आए ॥
 संग लाइ करिनीं करि लेहीं । मानहुँ मोहि सिखावनु देहीं ॥
 सास्त्र सुचिंतित पुनि पुनि देखिअ । भूप सुसेवित बस नहिं लेखिअ
 राखिअ नारि जदपि उर माहीं । जुवती सास्त्र नृपति बस नहिं ॥
 देखहु तात बसंत सुहावा । प्रिया हीन मोहि भय उपजावा ॥

दो०—बिरह बिकल बलहीन मोहि जानेसि निपट अकेल ।

सहित बिपिन मधुकर खग मदन कीन्ह बगमेल ॥३७(क)॥

देखि गयउ भ्राता सहित तासु दूत सुनि बात ।

डेरा कीन्हेउ मनहुँ तब कटकु हटकि मनजात ॥३७(ख)॥

बिटप बिसाल लता अरुझानी । बिबिध वितान दिए जनु तानी ॥

कदलि ताल बर धुजा पताका । देखि न मोह धीर मन जाका ॥

बिबिध भाँति फूले तरु नाना । जनु बानैत बने बहु बाना ॥

कहुँ कहुँ सुंदर बिटप सुहाए । जनु भट बिलग बिलग होइ छाए

कूजत पिक मानहु गज माते । ठेक महाख ऊट विसराते ॥
 मोर चकोर कीर बर बाजी । पारावत मराल सब ताजी ॥
 तीतिर लावक पदचर जूथा । बरनि न जाइ मनोज बरूथा ॥
 रथ गिरि सिला दुंदुभीं झरना । चातक बंदी गुन गन बरना ॥
 मधुकर मुखर भेरि सहनाई । त्रिविध बयारि बसीठीं आई ॥
 चतुरंगिनी सेन सँग लीन्हें । विचरत सबहि चुनौती दीन्हें ॥
 लछिमन देखत काम अनीका । रहहिं धीर तिन्ह कै जग लीका ॥
 एहि कें एक परम बल नारी । तेहि तें उबर सुभट सोइ भारी ॥

दो०—तात तीनि अति प्रबल खल काम क्रोध अरु लोभ ।

मुनि बिग्यान धाम मन करहिं निमिष महुँ छोभ ॥ ३८ (क) ॥

लोभ कें इच्छा दंभ बल काम कें केवल नारि ।

क्रोध कें परुष बचन बल मुनिबर कहहिं बिचारि ॥ ३८ (ख) ॥

गुनातीत सचराचर स्वामी । राम उमा सब अंतरजामी ॥
 कामिन्ह कै दीनता देखाई । धीरन्ह कें मन बिरति दढ़ाई ॥
 क्रोध मनोज लोभ मद माया । छूटहिं सकल राम कीं दाया ॥
 सो नर इंद्रजाल नहिं भूला । जापर होइ सो नट अनुकूला ॥
 उमा कहउँ मैं अनुभव अपना । सत हरि भजनु जगत सब सपना ॥
 पुनि प्रभु गए सरोबर तीरा । पंपा नाम सुभग गंभीरा ॥
 संत हृदय जस निर्मल बारी । बाँधे घाट मनोहर चारी ॥
 जहँ तहँ पिअहिं विविध मृग नीरा । जनु उदार गृह जाचक भीरा ॥

दो०—^{Vinay Avasthi Sahib Bhuvan Vani Trust Donations}पुरहीन सखन ओट जल बाग न पाइअ मम ।

मायाछन्न न देखिए जैसँ निर्गुन ब्रह्म ॥३९(क)॥

सुखी मीन सब एकरस अति अगाध जल माहिं ।

जथा धर्मसीलन्ह के दिन सुख संजुत जाहिं ॥३९(ख)॥

बिकसे सरसिज नाना रंगा । मधुर मुखर गुंजत बहु भृंगा ॥

बोलत जलकुक्कुट कलहंसा । प्रभु बिलोकि जनु करत प्रसंसा ॥

चक्रबाक बक खग समुदाई । देखत बनइ बरनि नहिं जाई ॥

सुंदर खग गन गिरा सुहाई । जात पथिक जनु लेत बोलाई ॥

ताल समीप मुनिन्ह गृह छाए । चहु दिसि कानन बिटप सुहाए ॥

चंपक बकुल कदंब तमाला । पाटल पनस परास रसाला ॥

नव पल्लव कुसुमित तरु नाना । चंचरीक पटली कर गाना ॥

सीतल मंद सुगंध सुभाऊ । संतत बहइ मनोहर बाऊ ॥

कुहू कुहू कोकिल धुनि करहीं । सुनि रव सरस ध्यान मुनि टरहीं ॥

दो०—फल भारन नमि बिटप सब रहे भूमि निभराइ ।

पर उपकारी पुरुष जिमि नवहिं सुसंपत्ति पाइ ॥४०॥

देखि राम अति रुचिर तलावा । मजनु कीन्ह परम सुख पावा ॥

देखी सुंदर तरुवर छाया । बैठे अनुज सहित रघुराया ॥

तहँ पुनि सकल देव मुनि आए । अस्तुति करि निज धाम सिधाए ॥

बैठे परम प्रसन्न कृपाला । कहत अनुज सन कथा रसाला ॥

बिरहवंत भगवंतहि देखी । नारद मन भा सोच विसेषी ॥

Vinay Avasthi Sahib Bhuvan Vani Trust Donations

मोर साप करि अगीकारा । सहित राम नानी दुख भारा ॥
ऐसे प्रभुहि बिलोकउँ जाई । पुनि न बनिहि अस अवसर आई ॥
यह बिचारि नारद कर बीना । गए जहाँ प्रभु सुख आसीना ॥
गावत राम चरित मृदु बानी । प्रेम सहित बहु भाँति बखानी ॥
करत दंडवत लिए उठाई । राखे बहुत बार उर लाई ॥
स्वागत पूँछि निकट बैठारे । लछिमन सादर चरन पखारे ॥

दो०—नाना बिधि बिनती करि प्रभु प्रसन्न जियँ जानि ।

नारद बोले बचन तब जोरि सरोरुह पानि ॥४१॥

सुनहु उदार सहज रघुनायक । सुंदर अगम सुगम बर दायक ॥
देहु एक बर मागउँ स्वामी । जद्यपि जानत अंतरजामी ॥
जानहु मुनि तुम्ह मोर सुभाऊ । जन सन कबहुँ कि करउँ दुराऊ
कवन वस्तु असि प्रिय मोहि लागी । जो मुनिबर न सकहु तुम्ह मागी
जन कहूँ कछु अदेय नहिँ मोरें । अस बिस्वास तजहु जनि भोरें ॥
तब नारद बोले हरषाई । अस बर मागउँ करउँ ढिठाई ॥
जद्यपि प्रभु के नाम अनेका । श्रुति कह अधिक एक तैं एका ॥
राम सकल नामन्ह ते अधिका । होउ नाथ अब खग गन बधिका ॥

दो०—राका रजनी भगति तब राम नाम सोइ सोम ।

अपर नाम उडगन बिमल बसहुँ भगत उर व्योम ॥४२(क)॥

एवमस्तु मुनि सन कहेउ कृपासिंधु रघुनाथ ।

तब नारद मन हरष अति प्रभु पद नायउ माथ ॥४२(ख)॥

अति प्रसन्न रघुनाथहि जानी । पुनि नारद बोले मृदु बानी ॥
 राम जबहिं प्रेरेउ निज माया । मोहेहु मोहि सुनहु रघुराया ॥
 तब विवाह मैं चाहउँ कीन्हा । प्रभु केहि कारन करै न दीन्हा ॥
 सुनु मुनि तोहि कहउँ सहरोसा । भजहिं जे मोहि तजि सकल भरोसा
 करउँ सदा तिन्ह कै रखवारी । जिमि बालक राखइ महतारी ॥
 गहसिसु बच्छ अनल अहि धाई । तहँ राखइ जननी अरगाई ॥
 प्रौढ़ भएँ तेहि सुत पर माता । प्रीति करइ नहिं पाछिलि बाता ॥
 मोरे प्रौढ़ तनय सम ग्यानी । बालक सुत सम दास अमानी ॥
 जनहि मोर बल निज बल ताही । दुहु कहँ काम क्रोध रिपु आही ॥
 यह विचारि पंडित-मोहि भजहीं । पाएहुँ ग्यान भगति नहिं तजहीं ॥

दो०-काम क्रोध लोभादि मद प्रबल मोह कै धारि ।

तिन्ह महँ अति दारुन दुखद मायारूपी नारि ॥४३॥

सुनु मुनि कह पुरान श्रुति संता । मोह विपिन कहँ नारि बसंता ॥
 जप तप नेम जलाश्रय झारी । होइ ग्रीष्म सोषइ सब नारी ॥
 काम क्रोध मद मत्सर भेका । इन्हहि हरषप्रद वरषा एका ॥
 दुर्वासना कुमुद समुदाई । तिन्ह कहँ सरद सदा सुखदाई ॥
 धर्म सकल सरसीरुह बृंदा । होइ हिम तिन्हहि दहइ सुख मंदा ॥
 पुनि ममता जवास बहुताई । पलुइइ नारि सिसिर रितु पाई ॥
 पाप उलूक निकर सुखकारी । नारि निबिड़ रजनी अँधिआरी ॥
 बुधि बल सील सत्य सब मीना । बनसी सम त्रिय कहहिं प्रवीना ॥

Vinay Avasthi Sahib Bhuvan Vani Trust Donations

दो०—अवगुन मूल मूलप्रद प्रमदा सब दुख खानि ।

ताते कीन्ह निवारन मुनि मैं यह जियँ जानि ॥४४॥

मुनि रघुपति के बचन सुहाए । मुनि तन पुलक नयन भरि आए ॥
कहहु कवन प्रभु कै असि रीती । सेवक पर ममता अरु प्रीती ॥
जे न भजहिँ अस प्रभु भ्रम त्यागी । ग्यान रंक नर मंद अभागी ॥
पुनि सादर बोले मुनि नारद । सुनहु राम विग्यान विसारद ॥
संतन्ह के लच्छन रघुवीरा । कहहु नाथ भव भंजन भीरा ॥
सुनु मुनि संतन्ह के गुन कहऊँ । जिन्ह तें मैं उन्ह कैं बस रहऊँ ॥
षट विकार जित अनघ अकामा । अचल अकिंचन सुचि सुखधामा ॥
अमितबोध अनीह मितभोगी । सत्यसार कवि कोविद जोगी ॥
सावधान मानद मदहीना । धीर धर्म गति परम प्रवीना ॥

दो०—गुनागार संसार दुख रहित बिगत संदेह ।

तजि मम चरन सरोज प्रिय तिन्ह कहूँ देह न गेह ॥४५॥

निज गुन श्रवन सुनत सकुचाहीं । पर गुन सुनत अधिक हरषाहीं ॥
सम सीतल नहिँ त्यागहिँ नीती । सरल सुभाउ सबहिसन प्रीती ॥
जप तप व्रत दम संजम नेमा । गुरु गोविंद विप्र पद प्रेमा ॥
श्रद्धा छमा मयत्री दाया । मुदिता ममपद प्रीति अमाया ॥
विरति विवेक विनय विग्याना । बोध जथारथ वेद पुराना ॥
दंभ मान मद करहिँ न काऊ । भूलि न देहिँ कुमारग पाऊ ॥
गावहिँ सुनहिँ सदा मम लीला । हेतु रहित परहित रत सीला ॥

मुनि सुनु साधुन्ह के गुन जेते । कहि न सकहिं सारद श्रुति तेते ॥

छं०—कहि सक न सारद सैष नारद सुनत पद पंकज गहे ।

अस दीनबंधु कृपाल अपने भगत गुन निज मुख कहे ॥

सिरु नाइ बारहिं बार चरनन्हि ब्रह्मपुर नारद गए ।

ते धन्य तुलसीदास आस बिहाइ जे हरि रँग रँग ॥

दो०—रावनारि जसु पावन गावहिं सुनहिं जे लोग ।

राम भगति दृढ़ पावहिं बिनु बिराग जप जोग ॥४६(क)॥

दीप सिखा सम जुबति तन मन जनि होसि पतंग ।

भजहि राम तजि काम मद करहि सदा सतसंग ॥४६(ख)॥

मासपारायण, बाईसवाँ विश्राम

इति श्रीमद्रामचरितमानसे सकलकलिकलुषविध्वंसने

तृतीयः सोपानः समाप्तः ।

(अरण्यकाण्ड समाप्त)



॥ श्रीरामाय नमः ॥


श्रीरामचरितमानस

किष्किन्धाकाण्ड



Vinay Avasthi Sahib Bhuvan Vani Trust Donations

समुद्रतटपर—(सीताकी खोज)



अस कहि लवनसिंधु तट जाई ।

बैठे कपि सब दर्भ डसाई ॥


श्रीगणेशाय नमः

श्रीजानकीवल्लभो विजयते

श्रीरामचरितमानस



चतुर्थ सोपान
(किष्किन्धाकाण्ड)



श्लोक

कुन्देन्दीवरसुन्दरावतिबलौ विज्ञानधामाबुभौ
शोभाढ्यौ वरधन्विनौ श्रुतिनुतौ गोविप्रवृन्दप्रियौ ।
मायामानुषरूपिणौ रघुवरौ सद्धर्मवर्मौ हितौ
सीतान्वेषणतत्परौ पथिगतौ भक्तिप्रदौ तौ हि नः ॥ १ ॥
ब्रह्माम्भोधिसमुद्भवं कलिमलप्रध्वंसनं चाव्ययं
श्रीमच्छम्भुमुखेन्दुसुन्दरवरे संशोभितं सर्वदा ।

धन्यास्ते कृतिनः पिबन्ति सततं श्रीरामनामामृतम् ॥ २ ॥

सो०—मुक्ति जन्म महि जानि ग्यान खानि अघ हानि कर ।

जहँ बस संभु भवानि सो कासी सेइअ कस न ॥

जरत सकल सुर बृंद बिषम गरल जेहि पान किय ।

तेहि न भजसि मन मंद को कृपाल संकर सरिस ॥

आगें चले बहुरि रघुराया । रिष्यमूक पर्वत निअराया ॥

तहँ रह सचिव सहित सुग्रीवा । आवत देखि अतुल बल सींवा ॥

अति सभीत कह सुनु हनुमाना । पुरुष जुगलबल रूप निधाना ॥

धरि बटु रूप देखु तैं जाई । कहेसु जानि जियँ सयन बुझाई ॥

पठए वालि होहिं मन मैला । भागौं तुरत तजौं यह सैला ॥

विप्र रूप धरि कपि तहँ गयऊ । माथ नाइ पूछत अस भयऊ ॥

को तुम्ह स्यामल गौर सरीरा । छत्री रूप फिरहु बन बीरा ॥

कठिन भूमि कोमल पद गामी । कवन हेतु विचरहु बन स्वामी ॥

मृदुल मनोहर सुंदर गाता । सहत दुसह बन आतप वाता ॥

की तुम्ह तीनि देव मँहँ कोऊ । नर नारायन की तुम्ह दोऊ ॥

दो०—जग कारन तारन भव भंजन धरनी भार ।

की तुम्ह अखिल भुवन पति लीन्ह मनुज अवतार ॥ १ ॥

कोसलेस दसरथ के जाए । हम पितु वचन मानि बन आए ॥

नाम राम लछिमन दोउ भाई । संग नारि सुकुमारि सहाई ॥

इहाँ हरा निसचर वेदही। विप्र फिरहि हम खोजत तेही ॥
 आपन चरित कहा हम गाई। कहहु विप्र निज कथा बुझाई ॥
 प्रभु पहिचानि परेउ गहि चरना। सो सुख उमा जाइ नहिं बरना ॥
 पुलकित तन मुख आव न बचना। देखत रुचिर वेष कै रचना ॥
 पुनि धीरजु धरि अस्तुति कीन्ही। हरष हृदयँ निज नाथहि चीन्ही ॥
 मोर न्याउ मैं पूछा साईं। तुम्ह पूछहु कस नर की नाईं ॥
 तव माया बस फिरउँ भुलाना। ता ते मैं नहिं प्रभु पहिचाना ॥

दो०—एकु मैं मंद मोहवस कुटिल हृदय अग्यान ।

पुनि प्रभु मोहि बिसारेउ दीनबंधु भगवान ॥ २ ॥

जदपि नाथ बहु अवगुन मोरें। सेवक प्रभुहि परै जनि भोरें ॥
 नाथ जीव तव मायाँ मोहा। सो निस्तरइ तुम्हारेहिं छोहा ॥
 ता पर मैं रघुबीर दोहाई। जानउँ नहिं कछु भजन उपाई ॥
 सेवक सुत पति मातु भरोसैं। रहइ असोच बनइ प्रभु पोसैं ॥
 अस कहि परेउ चरन अकुलाई। निज तनु प्रगटि प्रीति उर छाई ॥
 तव रघुपति उठाइ उर लावा। निज लोचन जल सींचि जुड़ावा ॥
 सुनु कपि जियँ मानसि जनि ऊना। तैं मम प्रिय लछिमन ते दूना ॥
 समदरसी मोहि कह सत्र कोऊ। सेवक प्रिय अनन्यगति सोऊ ॥

दो०—सो अनन्य जाकें असि मति न टरइ हनुमंत ।

मैं सेवक सचराचर रूप स्वामि भगवंत ॥ ३ ॥

देखि पवनसुत पति अनुकूला। हृदयँ हरष वीती सब सूला ॥

Vinay Avasthi Sahib Bhuvan Vani Trust Donations

नाथ सल पर कापिपति रहइ । सो सुग्रीव दस तव अहई ॥
 तेहि सन नाथ मयंत्री कीजे । दीन जानि तेहि अभय करीजे ॥
 सो सीता कर खोज कराइहि । जहँ तहँ मरकट कोटि पठाइहि ॥
 एहि विधि सकल कथा समुझाई । लिए दुऔ जन पीठि चढ़ाई ॥
 जब सुग्रीवँ राम कहँ देखा । अतिसय जन्म धन्य करि लेखा ॥
 सादर मिलेउ नाइ पद माथा । भेंटेउ अनुज सहित रघुनाथा ॥
 कपि कर मन विचार एहि रीती । करिहहिं विधि मो सन ए प्रीती ॥

दो०—तब हनुमंत उभय दिसि की सब कथा सुनाइ ।

पावक साखी देइ करि जोरी प्रीति दढ़ाइ ॥ ४ ॥

कीन्हि प्रीति कछु बीच न राखा । लछिमन रामचरित सब भाषा ॥
 कह सुग्रीव नयन भरि बारी । मिलिहि नाथ मिथिलेसकुमारी ॥
 मंत्रिन्ह सहित इहाँ एक बारा । बैठ रहेउँ मैं करत विचारा ॥
 गगन पंथ देखी मैं जाता । परवस परी बहुत बिलपाता ॥
 राम राम हा राम पुकारी । हमहि देखि दीन्हेउ पट डारी ॥
 मागा राम तुरत तेहिं दीन्हा । पट उर लाइ सोच अति कीन्हा ॥
 कह सुग्रीव सुनहु रघुवीरा । तजहु सोच मन आनहु धीरा ॥
 सब प्रकार करिहउँ सेवकाई । जेहि विधि मिलिहि जानकी आई

दो०—सखा बचन सुनि हरषे कृपासिंधु बलसींव ।

कारन कवन बसहु बन मोहि कहहु सुग्रीव ॥ ५ ॥

नाथ बालि अरु मैं द्वौ भाई । प्रीति रही कछु बरनि न जाई ॥

Vinay Avasthi Sahib Bhuvan Vani Trust Donations

मय सुत मायावी तोहि नाऊ । आवा सो प्रभु हमर गाऊ ॥
 अर्ध राति पुर द्वार पुकारा । बाली रिपु बल सहै न पारा ॥
 धावा बालि देखि सो भागा । मै पुनि गयउँ बंधु संग लगा ॥
 गिरिबर गुहाँ पैठ सो जाई । तब बाली मोहि कहा बुझाई ॥
 परिखेसु मोहि एक पखवारा । नहि आवौ तब जानेसु मारा ॥
 मास दिवस तहँ रहेउँ खरारी । निसरी रुधिर धार तहँ भारी ॥
 बालि हतेसि मोहि मारिहि आई । सिला देइ तहँ चलेउँ पराई ॥
 मंत्रिन्ह पुर देखा बिनु साई । दीन्हेउ मोहि राज बरिआई ॥
 बाली ताहि मारि गृह आवा । देखि मोहि जियँ भेद बढ़ावा ॥
 रिपु सम मोहि मारेसि अति भारी । हरि लीन्हेसि सर्वसु अरु नारी ॥
 ताकें भय रघुवीर कृपाला । सकल भुवन मै फिरेउँ बिहाला ॥
 इहाँ साप बस आवत नहि । तदपि सभीत रहउँ मन माहीं ॥
 सुनि सेवक दुख दीनदयाला । फरकि उठीं द्वै भुजा बिसाला ॥

दो०—सुनु सुग्रीव मारिहउँ बालिहि एकहि बान ।

ब्रह्म रुद्र सरनागत गएँ न उबरिहिं प्रान ॥ ६ ॥

जे न मित्र दुख होहिं दुखारी । तिन्हहि बिलोकत पातक भारी ॥
 निज दुख गिरि सम रज करि जाना । मित्रक दुख रज मेरु समाना ॥
 जिन्ह केँ असि मति सहज न आई । ते सठ कत हठि करत मिताई ॥
 कुपथ निवारि सुपथ चलावा । गुन प्रगटै अवगुनहि दुरावा ॥

देत लेत मन संक न धरई । बल अनुमान सदा हित करई ॥

विपत्ति का अन्तर सांभु भिषेण । श्रुति कहै संत मित्र गुन एहा ॥
 आगें कह मृदु बचन बनाई । पाछें अनहित मन कुटिलाई ॥
 जा कर चित अहि गति सम भाई । अस कुमित्र परिहरेहिं भलाई ॥
 सेवक सठ नृप कृपन कुनारी । कपटी मित्र सूल सम चारी ॥
 सखा सोच त्यागहु बल मोरें । सब विधि घटव काज मैं तोरें ॥
 कह सुग्रीव सुनहु रघुबीरा । बालि महाबल अति रनधीरा ॥
 दुंदुभि अस्थि ताल देखराए । विनु प्रयास रघुनाथ ढहाए ॥
 देखि अमित बल बाढ़ी प्रीती । बालि बधव इन्ह भइ परतीती ॥
 बार बार नावइ पद सीसा । प्रभुहि जानि मन हरष कपीसा ॥
 उपजा ग्यान बचन तब बोला । नाथ कृपाँ मन भयउ अलोला ॥
 सुख संपत्ति परिवार बड़ाई । सब परिहरि करिहउँ सेवकाई ॥
 ए सब राम भगति के बाधक । कहहिं संत तव पद अवराधक ॥
 सत्रु मित्र सुख दुख जग माहीं । माया कृत परमारथ नाहीं ॥
 बालि परम हित जासु प्रसादा । मिलेहु राम तुम्ह समन विषादा ॥
 सपनें जेहि सन होइ लराई । जागें समुझत मन सकुचाई ॥
 अब प्रभु कृपा करहु एहि भाँती । सब तजि भजनु करौं दिन राती ॥
 सुनि विराग संजुत कपि बानी । बोले विहँसि रामु धनुपानी ॥
 जो कछु कहेहु सत्य सब सोई । सखा बचन मम मृषा न होई ॥
 नट मरकट इव सबहि नचावत । रामु खगेस बेद अस गावत ॥
 लै सुग्रीव संग रघुनाथा । चले चाप सायंक गहि हाथा ॥
 तब रघुपति सुग्रीव पठावा । गर्जेसि जाइ निकट बल पावा ॥

सुनत बालि क्रोधातुर धावा । गहि कर चरन नारि समुझावा ॥
सुनु पति जिन्हहि मिलेउ सुग्रीवा । ते द्वौ बंधु तेज बल सींवा ॥
कोसलेस सुत लछिमन रामा । कालहु जीति सकहिं संग्रामा ॥

दो०—कह बाली सुनु भीरु प्रिय समदरसी रघुनाथ ।

जौं कदाचि मोहि मारहिं तौ पुनि होउँ सनाथ ॥ ७ ॥

अस कहि चला महा अभिमानी । तृन समान सुग्रीवहि जानी ॥
भिरे उभौ बाली अति तर्जा । मुठिका मारि महाधुनि गर्जा ॥
तब सुग्रीव विकल होइ भागा । मुष्टि प्रहार बज्र सम लागा ॥
मैं जो कहा रघुवीर कृपाला । बंधु न होइ मोर यह काला ॥
एकरूप तुम्ह भ्राता दोऊ । तेहि भ्रम तैं नहिं मारेउँ सोऊ ॥
कर परसा सुग्रीव सरीरा । तनु भा कुलिस गई सब पीरा ॥
मेली कंठ सुमन कै माला । पठवा पुनि बल देइ विसाला ॥
पुनि नाना विधि भई लराई । बिटप ओट देखहिं रघुराई ॥

दो०—बहु छल बल सुग्रीव कर हियँ हारा भय मानि ।

मारा बालि राम तब हृदय माझ सर तानि ॥ ८ ॥

परा विकल महि सर के लागें । पुनि उठि बैठ देखि प्रभु आगें ॥
स्याम गात सिर जटा बनाएँ । अरुन नयन सर चाप चढ़ाएँ ॥
पुनि पुनि चितइ चरन चित दीन्हा । सुफल जन्म माना प्रभु चीन्हा ॥
हृदयँ प्रीति मुख वचन कठोरा । बोला चितइ राम की ओरा ॥

मैं Vinay Avasthi Sahib Bhuvan Vani Trust Donations

मैं बरौ सुग्राव पिआरा । अवगुन कवन नाथ मोहि मारा ॥

अनुज बधू भगिनी सुत नारी । सुनु सठ कन्या सम ए चारी ॥

इन्हहि कुदृष्टि बिलोकइ जोई । ताहि बधैं कछु पाप न होई ॥

मूढ़ तोहि अतिसय अभिमाना । नारि सिखावन करसिन काना ॥

मम भुज बल आश्रित तेहि जानी । मारा चहसि अधम अभिमानी ॥

दो०-सुनहु राम स्वामी सन चल न चातुरी मोरि ।

प्रभु अजहूँ मैं पापी अंतकाल गति तोरि ॥ ९ ॥

सुनत राम अति कोमल बानी । बालि सीस परसेउ निज पानी ॥

अचल करौं तनु राखहु प्राणा । बालि कहा सुनु कृपानिधाना ॥

जन्म जन्म मुनि जतनु कराहीं । अंत राम कहि आवत नाहीं ॥

जासु नाम बल संकर कासी । देत सबहि सम गति अविनासी ॥

मम लोचन गोचर सोइ आवा । बहुरि कि प्रभु अस बनिहि बनावा

छं०-सो नयन गोचर जासु गुन नित नेति कहि श्रुति गावहीं ।

जिति पवन मन गो निरस करि मुनि ध्यान कबहुँक पावहीं ॥

मोहि जानि अति अभिमान बस प्रभु कहेउ राखु सरीरही ।

अस कवन सठ हठि काटि सुरतरु बारि करिहि बबूरही ॥ १॥

अब नाथ करि करुना बिलोकहु देहु जो बर मागऊँ ।

जेहिं जोनि जन्मों कर्म बस तहँ राम पद अनुरागऊँ ॥

यह तनय मम सम बिनय बल कल्याणप्रद प्रभु लीजिए ।

गहि बाँह सुर नर नाह आपन दास अंगद कीजिए ॥ २॥

दो०—रामचरन दद प्रीति करि बालि कीन्ह तनु त्याग ।

सुमन माल जिमि कंठ ते गिरत न जानइ नाग ॥ १० ॥

राम बालि निज धाम पठावा । नगर लोग सब व्याकुल धावा ॥
 नाना विधि बिलाप कर तारा । छूटे केस न देह सँभारा ॥
 तारा विकल देखि रघुराया । दीन्ह ग्यान हरि लीन्ही माया ॥
 छिति जल पावक गगन समीरा । पंचरचित अति अधम सरीरा ॥
 प्रगट सो तनु तव आगे सोवा । जीव नित्य केहि लगि तुम्ह रोवा ॥
 उपजा ग्यान चरन तव लागी । लीन्हेसि परम भगति बर मागी ॥
 उमा दारु जोषित की नाई । सबहि नचावत रामु गोसाई ॥
 तव सुग्रीवहि आयसु दीन्हा । मृतक कर्म विधिवत सब कीन्हा ॥
 राम कहा अनुजहि समुझाई । राज देहु सुग्रीवहि जाई ॥
 रघुपति चरन नाइ करि माथा । चले सकल प्रेरित रघुनाथा ॥

दो०—लछिमन तुरत बोलाए पुरजन बिप्र समाज ।

राजु दीन्ह सुग्रीव कहँ अंगद कहँ जुबराज ॥ ११ ॥

उमा राम सम हित जग माहीं । गुरु पितु मातु बंधु प्रभु नाहीं ॥
 सुर नर मुनि सब कै यह रीती । स्वारथ लागि करहिं सब प्रीती ॥
 बालि त्रास व्याकुल दिन राती । तन बहु ब्रन चिंताँ जर छाती ॥
 सोइ सुग्रीव कीन्ह कपिराऊ । अति कृपाल रघुबीर सुभाऊ ॥
 जानतहूँ अस प्रभु परिहरहीं । काहे न विपति जाल नर परहीं ॥

पुनि सुग्रीवहि लीन्ह बोलाई । बहु प्रकार तपनीति सिखाई ॥

Vinay Avasthi Sahib Bhuvan Vani Trust Donations

कह प्रभु सुनु सुग्रीव हरीसा । पुरन जाउ दस चारि बरीसा ॥
 गत ग्रीषम बरषा रितु आई । रहिहउँ निकट सैल पर छाई ॥
 अंगद सहित करहु तुम्ह राजू । संतत हृदयँ धरेहु मम काजू ॥
 जब सुग्रीव भवन फिरि आए । रामु प्रवरषन गिरि पर छाए ॥
 दो०—प्रथमहिं देवन्ह गिरि गुहा राखेउ रुचिर बनाइ ।

राम कृपानिधि कछु दिन बास करहिंगे आइ ॥ १२ ॥

सुंदर बन कुसुमित अति सोभा । गुंजत मधुप निकर मधु लोभा ॥
 कंद मूल फल पत्र सुहाए । भए बहुत जब ते प्रभु आए ॥
 देखि मनोहर सैल अनूपा । रहे तहँ अनुज सहित सुर भूपा ॥
 मधुकर खग मृग तनु धरि देवा । करहिं सिद्ध मुनि प्रभु कै सेवा ॥
 मंगलरूप भयउ बन तब ते । कीन्ह निवासरमापति जब ते ॥
 फटिक सिला अति सुभ्र सुहाई । सुख आसीन तहाँ द्वौ भाई ॥
 कहत अनुज सन कथा अनेका । भगति विरति नृपनीति बिवेका ॥
 बरषा काल मेघ नभ छाए । गरजत लागत परम सुहाए ॥

दो०—लछिमन देखु मोर गन नाचत बारिद पेखि ।

गृही विरति रत हरष जस बिष्णुभगत कहूँ देखि ॥ १३ ॥

घन घमंड नभ गरजत घोरा । प्रिया हीन डरपत मन मोरा ॥
 दामिनि दमकरह न घन माहीं । खल कै प्रीति जथा थिर नाही ॥
 बरषहिं जलद भूमि निअराएँ । जथा नवहिं बुध बिद्या पाएँ ॥
 बूँद अघात सहहिं गिरि कैसैं । खल के वचन सुंत सह जैसैं ॥

छुद्र नदीं भरि चलीं तोराई । जस थोरेहुँ धन खल इतराई ॥
भूमि परत भा ढावर पानी । जनु जीवहि माया लपटानी ॥
समिटि समिटि जल भरहिं तलावा । जिमि सदगुन सज्जन पहिं आवा
सरिता जल जलनिधि महुँ जाई । होइ अचल जिमि जिव हरि पाई

दो०—हरित भूमि तृन संकुल समुझि परहिं नहिं पंथ ।

जिमि पाखंड बाद तें गुप्त होहिं सदग्रंथ ॥ १४ ॥

दादुर धुनि चहु दिसा सुहाई । वेद पढ़हिं जनु बटु समुदाई ॥
नव पल्लव भए बिटप अनेका । साधक मन जस मिलें बिबेका ॥
अर्क जवास पात बिनु भयऊ । जस सुराज खल उद्यम गयऊ ॥
खोजत कतहुँ मिलइ नहिं धूरी । करइ क्रोध जिमि धरमहि दूरी ॥
ससि संपन्न सोह महि कैसी । उपकारी कै संपति जैसी ॥
निसि तम धन खद्योत विराजा । जनु दंभिन्ह कर मिला समाजा ॥
महावृष्टि चलि फूटि किआरीं । जिमि सुतंत्र भएँ बिगरहिं नारीं ॥
कृषी निरावहिं चतुर किसाना । जिमि बुध तजहिं मोह मद माना
देखिअत चक्रवाक खग नाहीं । कलिहि पाइ जिमि धर्म पराहीं ॥
ऊपर वरषइ तृन नहिं जामा । जिमि हरिजन हियँ उपजन कामा
विविध जंतु संकुल महि भ्राजा । प्रजा बाढ़ जिमि पाइ सुराजा ॥
जहँ तहँ रहे पथिक थकि नाना । जिमि इंद्रिय गन उपजें ग्याना ॥

दो०—कबहुँ प्रबल बह मारुत जहँ तहँ मेघ बिलाहि ।

कबहुँ दिवस महँनिबिड़ तम कबहुँक प्रगट पतंग ।

बिनसइ उपजइ ग्यान जिमि पाइ कुसंग सुसंग ॥ १५ (ख) ॥

बरषा बिगत सरद रितु आई । लछिमन देखहु परम सुहाई ॥
 फूलें कास सकल महि छाई । जनु बरषाँ कृत प्रगट बुढ़ाई ॥
 उदित अगस्ति पंथ जल सोषा । जिमि लोभहि सोषइ संतोषा ॥
 सरिता सर निर्मल जल सोहा । संत हृदय जस गत मद मोहा ॥
 रस रस सूख सरित सर पानी । ममता त्याग करहिं जिमि ग्यानी
 जानि सरद रितु खंजन आए । पाइ समय जिमि सुकृत सुहाए ॥
 पंक न रेनु सोह असि धरनी । नीति निपुन नृप कै जसि करनी ॥
 जल संकोच बिकल भई मीना । अबुध कुटुंबी जिमि धनहीना ॥
 विनु घन निर्मल सोह अकासा । हरिजन इव परिहरि सब आसा ॥
 कहूँ कहूँ बृष्टि सारदी थोरी । कोउ एक पाव भगति जिमि मोरी

दो०—चले हरषि तजि नगर नृप तापस बनिक भिखारि ।

जिमि हरिभगति पाइ श्रम तजहिं आश्रमी चारि ॥ १६ ॥

सुखी मीन जे नीर अगाधा । जिमि हरि सरन न एकउ बाधा ॥
 फूलें कमल सोह सर कैसा । निर्गुन ब्रह्म सगुन भएँ जैसा ॥
 गुंजत मधुकर मुखर अनूपा । सुंदर खग रव नाना रूपा ॥
 चक्रवाक मन दुख निसि पेखी । जिमि दुर्जन पर संपति देखी ॥
 चातक रटत तृषा अति ओही । जिमि सुख लहइ न संकर द्रोही ॥

सुखदातुप निसि सति अपहृष्ट । संत दरस जिमि पातक सहई ॥

देखि इहु चकार समुदाइ । चितवहि जिमि हरिजन हरि पाई ॥

मसक दंस बीते हिम त्रासा । जिमि द्विज द्रोह किएँ कुल नासा ॥

दो०—भूमि जीव संकुल रहे गए सरद रितु पाइ ।

सदगुर मिलें जाहिं जिमि संसय भ्रम समुदाइ ॥ १७ ॥

बरषा गत निर्मल रितु आई । सुधि न तात सीता कै पाई ॥

एक बार कैसेहुँ सुधि जानौ । कालहु जीति निमिष महुँ आनौ ॥

कतहुँ रहउ जाँ जीवति होई । तात जतन करि आनउँ सोई ॥

सुग्रीवहुँ सुधि मोरि बिसारी । पावा राज कोस पुर नारी ॥

जेहिं सायक मारा मैं बाली । तेहिं सर हतौं मूढ़ कहँ काली ॥

जासु कृपाँ छूटहिं मद मोहा । ता कहुँ उमा कि सपनेहुँ कोहा ॥

जानहिं यह चरित्र मुनि ग्यानी । जिन्ह रघुबीर चरन रति मानी ॥

लछिमन क्रोधवन्त प्रभु जाना । धनुष चढ़ाइ गहे कर बाना ॥

दो०—तब अनुजहि समुझावा रघुपति करुना सीव ।

भय देखाइ लै, आवहु तात सखा सुग्रीव ॥ १८ ॥

इहाँ पवनसुत हृदयँ विचारा । राम काजु सुग्रीवँ बिसारा ॥

निकट जाइ चरनन्हि सिरु नावा । चारिहु विधि तेहि कहि समुझावा

सुनि सुग्रीवँ परम भय माना । विषयँ मोर हरि लीन्हेउ ग्याना ॥

अब मारुतसुत दूत समूहा । पठवहु जहँ तहँ बानर जूहा ॥

कहहु पाख महुँ आव न जोई । मोरें कर ता कर बध होई ॥

तब हनुमंत बोलाए दत्ता । सब कर करि सनमान बहुता ॥

Vinay Avasthi Sahib Bhuvan Vani Trust Donations

भय अरु प्राति नाति देखराइ । चल सकल चरनान्ह सिर नाई ॥

एहि अवसर लछिमन पुर आए । क्रोध देखि जहँ तहँ कपि धाए ॥

दो०—धनुष चढ़ाह कहा तब जारि करउँ पुर छार ।

ब्याकुल नगर देखि तब आयउ बालिकुमार ॥ १९ ॥

चरन नाइ सिरु बिनती कीन्ही । लछिमन अभय बाँह तेहि दीन्ही ॥

क्रोधवंत लछिमन सुनि काना । कह कपीस अति भयँ अकुलाना ॥

सुनु हनुमंत संग लै तारा । करि बिनती समुझाउ कुमारा ॥

तारा सहित जाइ हनुमाना । चरन बंदि प्रभु सुजस बखाना ॥

करि बिनती मंदिर लै आए । चरन पखारि पलंग बैठाए ॥

तब कपीस चरनन्हि सिरु नावा । गहि भुज लछिमन कंठ लगावा ॥

नाथ विषय सम मद कछु नाहीं । मुनि मन मोह करइ छन माहीं ॥

सुनत बिनती वचन सुखपावा । लछिमन तेहि बहु विधि समुझावा ॥

पवन तनय सब कथा सुनाई । जेहि विधि गए दूत समुदाई ॥

दो०—हरषि चले सुग्रीव तब अंगदादि कपि साथ ।

रामानुज आगें करि आए जहँ रघुनाथ ॥ २० ॥

नाइ चरन सिरु कह कर जोरी । नाथ मोहि कछु नाहिन खोरी ॥

अतिसय प्रबल देव तव माया । छूटइ राम करहु जौं दाया ॥

विषय बस्य सुर नर मुनि स्वामी । मैं पावँर पसु कपि अति कामी ॥

नारि नयन सर जाहि न लगा । घोर क्रोध तम निसि जो जागा ॥

लोभ पाँस जेहि गरन बँधाया । सो नर तम्ह समान रहनाया ॥

यह गुन साधन तैं नहिं होई । तुम्हरी कृपाँ पाव कोइ कोई ॥
तब रघुपति बोले मुसुकाई । तुम्ह प्रिय मोहि भरत जिमि भाई ॥
अब सोइ जतनु करहु मन लाई । जेहि विधि सीता कै सुधि पाई ॥
दो०—एहि विधि होत बतकही आए बानर जूथ ।

नाना बरन सकल दिसि देखिअ कीस बरूथ ॥ २१ ॥

बानर कटक उमा मैं देखा । सो मूरख जोकरन चह लेखा ॥
आइ राम पद नावहिं माथा । निरखि बदन सव होहिं सनाथा ॥
अस कपि एक न सेना माहीं । राम कुसल जेहि पूछी नाहीं ॥
यह कछु नहिं प्रभु कह अधिकारी । विस्वरूप व्यापक रघुराई ॥
ठाढ़े जहँ तहँ आयसु पाई । कह सुग्रीव सवहि समुझाई ॥
राम काजु अरु मोर निहोरा । बानर जूथ जाहु चहुँ ओरा ॥
जनकसुता कहँ खोजहु जाई । मास दिवस महँ आएहु भाई ॥
अवधि मेटि जोविनु सुधि पाएँ । आवइ बनिहि सो मोहि मराएँ ॥

दो०—बचन सुनत सब बानर जहँ तहँ चले तुरंत ।

तब सुग्रीवँ बोलाए अंगद नल हनुमंत ॥ २२ ॥

सुनहु नील अंगद हनुमाना । जामवंत मतिधीर सुजाना ॥
सकल सुभट मिलि दच्छिन जाहू । सीता सुधि पूछेहु सब काहू ॥
मन क्रम बचन सो जतन विचारेहु । रामचंद्र कर काजु सँवारेहु ॥
भानु पीठ सेइअ उर आगी । स्वामिहि सर्व भाव छल त्यागी ॥

देह धर कर यह फल भाई । भजिअ राम सब काम बिहाई ॥
 सोइ गुनग्य सोई बड़भागी । जो रघुवीर चरन अनुरागी ॥
 आयसु मागि चरन सिरु नाई । चले हरषि सुमिरत रघुराई ॥
 पाछें पवन तनय सिरु नावा । जानि काज प्रभु निकट बोलावा ॥
 परसा सीस सरोरुह पानी । करमुद्रिका दीन्हि जन जानी ॥
 बहु प्रकार सीतहि समुझाएहु । कहि बल बिरह बेगि तुम्ह आएहु ॥
 हनुमत जन्म सुफल करि माना । चलेउ हृदयँ धरि कृपानिधाना ॥
 जद्यपि प्रभु जानत सब बाता । राजनीति राखत सुरत्राता ॥

दो०—चले सकल बन खोजत सरिता सर गिरि खोह ।

राम काज लयलीन मन बिसरा तन कर छोह ॥ २३ ॥

कतहुँ होइ निसिचर सैं भेटा । प्रान लेहिँ एक एक चपेटा ॥
 बहु प्रकार गिरि कानन हेरहिँ । कोउ मुनि मिलइ ताहि सब घेरहिँ
 लागि तृषा अतिसय अकुलाने । मिलइ न जल घन गहन भुलाने
 मन हनुमान कीन्ह अनुमाना । मरन चहत सब बिनु जल पाना ॥
 चढ़ि गिरि सिखर चहुँ दिसि देखा । भूमि विवर एक कौतुक पेखा ॥
 चक्रवाक वक हंस उड़ार्हीं । बहुतक खग प्रविसहिँ तेहि माहीं ॥
 गिरि ते उतरि पवन सुत आवा । सब कहुँ लै सोइ विवर देखावा ॥
 आगें कै हनुमंतहि लीन्हा । पैठे विवर बिलंबु न कीन्हा ॥

दो०—दीख जाइ उपवन वर सर विगसित बहु कंज ।

मंदिर एक रुचिर तहुँ बैठि नारि तप पूज ॥ २४ ॥

Vinay Avasthi Sahib Bhuvan Vani Trust Donations

दूरि ते ताहि सबन्हि सिरु नावा । पूछे निज बृत्तात सुनावा ॥
 तेहिं तब कहा करहु जल पाना । खाहु सुरस सुंदर फल नाना ॥
 मजनु कीन्ह मधुर फल खाए । तासु निकट पुनि सब चलि आए
 तेहिं सब आपनि कथा सुनाई । मैं अब जाव जहाँ रघुराई ॥
 मूदहु नयन बिबर तजि जाहू । पैहहु सीतहि जनि पछिताहू ॥
 नयन मूदि पुनि देखहिं बीरा । ठाढ़े सकल सिंधु कैं तीरा ॥
 सो पुनि गई जहाँ रघुनाथा । जाइ कमल पद नाएसि माथा ॥
 नाना भाँति विनय तेहिं कीन्ही । अनपायनी भगति प्रभु दीन्ही ॥

दो०—बदरीवन कहूँ सो गई प्रभु अग्या धरि सीस ।

उर धरि राम चरन जुग जे बंदत अज ईस ॥ २५ ॥

इहाँ विचारहिं कपि मन माहीं । बीती अवधि काज कछु नाहीं ॥
 सब मिलि कहहिं परस्पर वाता । विनु सुधि लएँ करव का भ्राता ॥
 कह अंगद लोचन भरि बारी । दुहुँ प्रकार भइ मृत्यु हमारी ॥
 इहाँ न सुधि सीता कै पाई । उहाँ गएँ मारिहि कपिराई ॥
 पिता बधे पर मारत मोही । राखा राम निहोर न ओही ॥
 पुनि पुनि अंगद कह सब पाहीं । मरन भयउ कछु संसय नाहीं ॥
 अंगद वचन सुनत कपि बीरा । बोलि न सकहिं नयन बह नीरा ॥
 छन एक सोच मगन होइ रहे । पुनि अस वचन कहत सब भए ॥
 हम सीता कै सुधि लीन्हें विना । नहिं जैहैं जुवराज प्रवीना ॥

जामवंत अंगद सुख देखी कहौ कथा उपदेस बिसेषी ॥
 तात राम कहूँ नर जनि मानहु । निर्गुन ब्रह्म अजित अज जानहु ॥
 हम सब सेवक अति बड़भागी । संतत सगुन ब्रह्म अनुरागी ॥
 दो०—निज हृच्छाँ प्रभु अवतरइ सुर सहि गो द्विज लागि ।

सगुन उपासक संग तहँ रहहिं मोच्छ सब त्यागि ॥२६॥

एहि बिधि कथा कहहिं बहु भाँती । गिरि कंदराँ सुनी संपाती ॥
 बाहेर होइ देखि बहु कीसा । मोहि अहार दीन्ह जगदीसा ॥
 आजु सबहि कहँ भच्छन करऊँ । दिन बहु चले अहार विनु मरऊँ ॥
 कबहुँ न मिल भरि उदर अहारा । आजु दीन्ह बिधि एकहिं बारा ॥
 डरपे गीध बचन सुनि काना । अब भा मरन सत्य हम जाना ॥
 कपि सब उठे गीध कहँ देखी । जामवंत मन सोच बिसेषी ॥
 कह अंगद विचारि मन माहीं । धन्य जटायू सम कोउ नाहीं ॥
 राम काज कारन तनु त्यागी । हरि पुर गयउ परम बड़भागी ॥
 सुनि खग हरष सोक जुत बानी । आवा निकट कपिन्ह भय मानी ॥
 तिन्हहि अभय करि पूछेसि जाई । कथा सकल तिन्ह ताहि सुनाई ॥
 सुनि संपाति बंधु कै करनी । रघुपति महिमा बहुबिधि बरनी ॥

दो०—मोहि लै जाहु सिंधुतट देउँ तिलांजलि ताहि ।

बचन सहाइ करबि मैं पैहुहु खोजहु जाहि ॥ २७ ॥

अनुज क्रिया करि सागर तीरा । कहि निज कथा सुनहु कपि बीरा ॥

हम द्वौ बंधु प्रथम तरुनाई । गगन गए रवि निकट उड़ाई ॥

Vinay Avasthi Sahib Bhuvan Vani Trust Donations

तेज न सहि सक सो फिर आवा । मै अभिमानी राव निअरावा ॥
 जे पंख अति तेज अपारा । परेउँ भूमि करि घोर चिकारा ॥
 मुनि एक नाम चंद्रमा ओही । लागी दया देखि करि मोही ॥
 बहु प्रकार तेहि ग्यान सुनावा । देह जनित अभिमान छड़ावा ॥
 त्रेता ब्रह्म मनुज तनु धरिही । तासु नारि निसिचर पति हरिही ॥
 तासु खोज पठइहि प्रभु दूता । तिन्हहि मिलें तैं होव पुनीता ॥
 जमिहहि पंख करसि जनि चिंता । तिन्हहि देखाइ देहेसु तैं सीता ॥
 मुनि कइ गिरा सत्य भइ आजू । मुनि मम वचन करहु प्रभु काजू ॥
 गिरि त्रिकूट ऊपर बस लंका । तहँ रह रावन सहज असंका ॥
 तहँ असोक उपवन जहँ रहई । सीता बैठि सोच रत अहई ॥
 दो०—मैं देखउँ तुम्ह नाहीं गीधहि दृष्टि अपार ।

बूढ़ भयउँ न त करतेउँ कछुक सहाय तुम्हार ॥ २८ ॥

जो नाघइ सत जोजन सागर । करइ सो राम काज मति आगर ॥
 मोहि बिलोकि धरहु मन धीरा । राम कृपाँ कस भयउ सरीरा ॥
 पापिउ जा कर नाम सुमिरहीं । अति अपार भवसागर तरहीं ॥
 तासु दूत तुम्ह तजि कदराई । राम हृदयँ धरि करहु उपाई ॥
 अस कहि गरुड़ गीध जब गयऊ । तिन्ह केँ मन अति बिसमय भयऊ ॥
 निज निज बल सब काहूँ भाषा । पार जाइ कर संसय राखा ॥
 जरठ भयउँ अब कहइ रिछेसा । नहिं तन रहा प्रथम बल लेसा ॥

जबहिं त्रिविक्रम भए खरारी । तब मैं तरुन रहेउँ बल भारी ॥

दो Yinyan Avasthi Sahib Bhuwan Vani Trust Donations
 दो—अलौकिक प्रभु बाहु उ सी तनु बरान न जाइ ।

उभय घरी महुँ दीन्हों सात प्रदच्छिन धाइ ॥ २९ ॥

अंगद कहइ जाउँ मैं पारा । जियँ संसय कछु फिरती बारा ॥
 जामवंत कह तुम्ह सब लायक । पठइअ किमि सबही कर नायक ॥
 कहइ रीछपति सुनु हनुमाना । का चुप साधि रहेहु बलवाना ॥
 पवन तनय बल पवन समाना । बुधि विवेक विग्यान निधाना ॥
 कवन सो काज कठिन जग माहीं । जो नहिं होइ तात तुम्ह पाहीं ॥
 राम काज लागि तव अवतारा । सुनतहिं भयउ पर्वताकारा ॥
 कनक बरन तन तेज विराजा । मानहुँ अपर गिरिन्ह कर राजा ॥
 सिंहनाद करि बारहिं बारा । लीलहिं नाघउँ जलनिधि खारा ॥
 सहित सहाय रावनहि मारी । आनउँ इहाँ त्रिकूट उपारी ॥
 जामवंत मैं पूँछउँ तोही । उचित सिखावनु दीजहु मोही ॥
 एतना करहु तात तुम्ह जाई । सीतहि देखि कहहु सुधि आई ॥
 तबनिज भुज बल राजिवनैना । कौतुक लागि संग कपि सेना ॥

छं०—कपि सेन संग सँघारि निसिचर रामु सीतहि आनिहैं ।

त्रैलोक पावन सुजसु सुर मुनि नारदादि बखानिहैं ॥

जो सुनत गावत कहत समुझत परम पद नर पावई ।

रघुबीर पद पाथोज मधुकर दास तुलसी गावई ॥

दो०—भव भेषज रघुनाथ जसु सुनहिं जे नर अरु नारि ।

तिन्ह कर सकल मनोरथ सिद्ध करहिं त्रिसिरारि ॥३०(क)॥

सो०—नीलोत्पल तन स्याम काम कोटि सोभा अधिक ।

सुनिअ तासु गुन ग्राम जासु नाम अघ खग बधिक ॥३०(ख)॥

मासपास्यण, तेईसवाँ विश्राभ

इति श्रीमद्रामचरितमानसे सकलकलिकलुषविध्वंसने


चतुर्थः सोपानः समाप्तः ।

(किष्किन्धाकाण्ड समाप्त)



Vinay Avasthi Sahib Bhuvan Vani Trust Donations

शरणागत विभीषण



श्रवन सुजसु सुनि आयउँ प्रभु भंजन भव भीर ।
त्राहि त्राहि आरति हरन सरन सुखद रघुबीर ॥

श्रीगणेशाय नमः

श्रीजानकीवल्लभो विजयते

श्रीरामचरितमानस

पञ्चम सोपान

(सुन्दरकाण्ड)

—:०-०-०:—

श्लोक

शान्तं शाश्वतमप्रमेयमनघं निर्वाणशक्तिप्रदं
ब्रह्माशम्भुफणीन्द्रसेव्यमनिशं वेदान्तवेद्यं विभुम् ।
रामाख्यं जगदीश्वरं सुरगुरुं मायामनुष्यं हरिं
वन्देऽहं करुणाकरं रघुवरं भूपालचूडामणिम् ॥१॥

नान्या स्पृहा रघुपते हृदयेऽस्मदीये

सदां ब्रह्मणि च भवानखिलान्तरात्मा ।

भक्तिं वाच्यते वासुदेवाय विष्णवे नमः Trust Donations

कामादिदोषरहितं कुरु मानसं च ॥ २ ॥

अतुलितबलधामं हेमशैलाभदेहं

दनुजवनकृशानुं ज्ञानिनामग्रगण्यम् ।

सकलगुणनिधानं वानराणामधीशं

रघुपतिप्रियभक्तं वातजातं नमामि ॥ ३ ॥

जामवंत के बचन सुहाए । सुनि हनुमंत हृदय अति भाए ॥
तब लगि मोहि परिखेहु तुम्ह भाई । सहि दुख कंद मूल फल खाई
जब लगि आवौं सीतहि देखी । होइहि काजु मोहि हरष बिसेषी ॥
यह कहि नाइ सयन्हि कहूँ माथा । चलेउ हरषि हियँ धरि रघुनाथा
सिंधु तीर एक भूधर सुंदर । कौतुक कूदि चढ़ेउ ता ऊपर ॥
बार बार रघुवीर सँभारी । तरकेउ पवन तनय बल भारी ॥
जेहिं गिरि चरन देखि हनुमंता । चलेउ सो गा पाताल तुरंता ॥
जिमि अमोघ रघुपति कर बाना । एही भाँति चलेउ हनुमाना ॥
जलनिधि रघुपति दूत बिचारी । तैं मैनाक होहि श्रमहारी ॥
दो०—हनूमान तेहि परसा कर पुनि कीन्ह प्रनाम ।

राम काजु कीन्हें बिनु मोहि कहाँ विश्राम ॥ १ ॥

जात पवनसुत देवन्ह देखा । जानै कहूँ बल बुद्धि बिसेषा ॥
सुरसा नाम अहिन्ह कै माता । पठइन्हि आइ कही तेहिं बाता ॥
आजु सुरन्ह मोहि दीन्ह अहारा । सुनत बचन कह पवनकुमारा ॥

राम काजु करि करि मैं अधी । सीता कहै बुधि प्रनुहि सुनावौ ॥
 तब तब बदन पैठिहउँ आई । सत्य कहउँ मोहि जान दे माई ॥
 कवनेहुँ जतन देइ नहिं जाना । प्रससि न मोहि कहेउ हनुमाना ॥
 जोजन भरि तेहिं बदनु पसारा । कपि तनु कीन्ह दुगुन विस्तारा ॥
 सोरह जोजन मुख तेहिं ठयऊ । तुरत पवनसुत बत्तिस भयऊ ॥
 जस जस सुरसा बदनु बढ़ावा । तासु दून कपि रूप देखावा ॥
 सत जोजन तेहिं आनन कीन्हा । अतिलघु रूप पवनसुत लीन्हा ॥
 बदन पइठि पुनि बाहेर आवा । मागा बिदा ताहि सिरु नावा ॥
 मोहि सुरन्ह जेहि लागि पठावा । बुधि बल मरमु तोर मैं पावा ॥

दो०—राम काजु सबु करिहहु तुम्ह बल बुद्धि निधान ।

आसिष देइ गई सो हरषि चलेउ हनुमान ॥ २ ॥

निसिचरि एक सिंधु महुँ रहई । करि माया नभु के खग गहई ॥
 जीव जंतु जे गगन उड़ाहीं । जल त्रिलोकि तिन्ह कै परिछाहीं ॥
 गहइ छाहैं सक सो न उड़ाई । एहि विधि सदा गगनचर खाई ॥
 सोइ छल हनूमान कहैं कीन्हा । तासु कपटु कपि तुरतहिं चीन्हा ॥
 ताहि मारि मारुतसुत वीरा । वारिधि पार गयउ मतिधीरा ॥
 तहाँ जाइ देखी, बन सोभा । गुंजत चंचरीक मधु लोभा ॥
 नाना तरु फल फूल सुहाए । खग मृग वृंद देखि मन भाए ॥
 सैल बिसाल देखि एक आगें । ता पर धाइ चढ़ेउ भय त्यागें ॥

उमान कहु कपि कै अधिकारि । प्रभु प्रताप जो कालहि खाई ॥

गिरि परिनय दिखं बानी देखिं देसी । कहिना जाइ पतिबानी सिसेपी ॥
अति उतंग जलनिधि चहु पासा । कनक कोट कर परम प्रकासा ॥

छं०—कनक कोट बिचित्र मनि कृत सुंदरायतना घना ।
चउहट्ट हट्ट सुबट्ट बीथीं चारु पुर बहु बिधि बना ॥
गज बाजि खच्चर निकर पदचर रथ बरूथन्हि को गनै ।
बहुरूप निसिचर जूथ अतिबल सेन बरनत नहिं बनै ॥ १ ॥
बन बाग उपबन बाटिका सर कूप बापीं सोहहीं ।
नर नाग सुर गंधर्व कन्या रूप मुनि मन मोहहीं ॥
कहुं माल देह बिसाल सैल समान अतिबल गर्जहीं ।
नाना अखारेन्ह भरिहिं बहुबिधि एक एकन्ह तर्जहीं ॥ २ ॥
करि जतन भट कोटिन्ह बिकट तन नगर चहुं दिसि रच्छहीं ।
कहुं महिष मानुष धेनु खर अज खल निसाचर भच्छहीं ॥
एहि लागि तुलसीदास इन्ह की कथा कछु एक है कही ।
रघुबीर सर तीरथ सरीरन्हि त्यागि गति पैहहिं सही ॥ ३ ॥

दो०—पुर रखवारे देखि बहु कपि मन कीन्ह बिचार ।
अति लघु रूप धरौं निसि नगर करौं पइसार ॥ ३ ॥
मसक समान रूप कपि धरी । लंकहि चलेउ सुमिरि नरहरी ॥
नाम लंकिनी एक निसिचरी । सो कह चलेसि मोहि निंदरी ॥
जानेहि नहीं मरमु सठ मोरा । मोर अहार जहाँ लगि चोरा ॥
मुठिका एक महा कपि हनी । रुधिर बमत धरनीं ढनमनी ॥

पुनि ^{Vinay Avasthi Sahib Bhuvan Varanasi Trust, Dohadition} समार उठी सो लकी । जोर पानि कर विमय ससंका ॥
जब रावनहि ब्रह्म वर दीन्हा । चलत विरंचि कहा मोहि चीन्हा ॥
बिकल होसि तैं कपि कें मारे । तब जानेसु निसिचर संघारे ॥
तात मोर अति पुन्य ब्रहूता । देखेउँ नयन राम कर दूता ॥
दो०—तात स्वर्ग अपवर्ग सुख धरिअ तुला एक अंग ।

तूल न ताहि सकल मिलि जो सुख लव सतसंग ॥ ४ ॥

प्रविसि नगर कीजे सब काजा । हृदयँ राखि कोसलपुर राजा ॥
गरल सुधा रिपु करहिं मिताई । गोपद सिंधु बनल सितलाई ॥
गरुड़ सुमेरु रेनु सम ताही । राम कृपा करि चितवा जाही ॥
अति लघु रूप धरेउ हनुमाना । पैठा नगर सुमिरि भगवाना ॥
मंदिर मंदिर प्रति करि सोधा । देखे जहँ तहँ अगनित जोधा ॥
गयउ दसानन मंदिर माहीं । अति विचित्र कहि जात सो नाहीं ॥
सयन किएँ देखा कपि तेही । मंदिर महुँ न दीखि बैदेही ॥
भवन एक पुनि दीख सुहावा । हरि मंदिर तहँ भिन्न बनावा ॥

दो०—रामायुध अंकित गृह सोभा बरनि न जाइ ।

नव तुलसिका बृंद तहँ देखि हरष कपिराइ ॥ ५ ॥

लंका निसिचर निकर निवासा । इहाँ कहाँ सजन कर बासा ॥
मन महुँ तरक करैं कपि लागा । तेहीं समय विभीषनु जागा ॥
राम राम तेहिं सुमिरन कीन्हा । हृदयँ हरष कपि सजन चीन्हा ॥

एहि सन हठि करिहुँ पहिचानी । साधु ते होइ न कारज हानी ॥

विप्र स्वामी विद्वान् सुत भुक्तानि भीषण उदितान् आए ॥
 करि प्रनाम पूछी कुसलाई । बिप्र कहहु निज कथा बुझाई ॥
 की तुम्ह हरि दासन्ह महुँ कोई । मोरें हृदय प्रीति अति होई ॥
 की तुम्ह रामु दीन अनुरागी । आयहु मोहि करन बड़भागी ॥
 दो०—तब हनुमंत कही सब राम कथा निज नाम ।

सुनत जुगल तन पुलक मन मगन सुमिरि गुन ग्राम ॥ ६ ॥
 सुनहु पवनसुत रहनि हमारी । जिमि दसनन्हि महुँ जीभ विचारी ॥
 तात कबहुँ मोहि जानि अनाथा । करिहहि कृपा भानुकुल नाथा ॥
 तामस तनु कछु साधन नाहीं । प्रीति न पद सरोज मन माहीं ॥
 अब मोहि भा भरोस हनुमंता । विनु हरि कृपा मिलहिं नहिं संता ॥
 जाँ रघुवीर अनुग्रह कीन्हा । तौ तुम्ह मोहि दरसु हठि दीन्हा ॥
 सुनहु विभीषन प्रभु कै रीती । करहिं सदा सेवक पर प्रीती ॥
 कहहु कवन मैं परम कुलीना । कंपि चंचल सबहीं विधि हीना ॥
 प्रात लेइ जो नाम हमारा । तेहि दिन ताहि न मिलै अहारा ॥
 दो०—अस मैं अधम सखा सुनु मोहू पर रघुवीर ।

कीन्ही कृपा सुमिरि गुन भरे बिलोचन नीर ॥ ७ ॥
 जानतहुँ अस स्वामि बिसारी । फिरहिं ते काहे न होहिं दुखारी ॥
 एहि विधि कहत राम गुन ग्रामा । पावा अनिर्वाच्य विश्रामा ॥
 पुनि सब कथा विभीषन कही । जेहि विधि जनकसुता तहँ रही ॥
 तब हनुमंत कहा सुनु भ्राता । देखी चहउँ जानकी माता ॥

जुगुति विभाषन सकल सुनाई । चलेउ पवनसुत विदा कराई ॥
 करि सोइ रूप गयउ पुनि तहवाँ । बन असोक सीता रह जहवाँ ॥
 देखि मनहि महुँ कीन्ह प्रनामा । बैठेहिं वीति जात निसि जामा ॥
 कृस तनु सीस जटा एक बेनी । जपति हृदयँ रघुपति गुन श्रेनी ॥
 दो०—निज पद नयन दिउँ मन राम पद कमल लीन ।

परम दुखी भा पवनसुत देखि जानकी दीन ॥ ८ ॥
 तरु पल्लव महुँ रहा लुकाई । करइ विचार करौं का भाई ॥
 तेहि अवसर रावनु तहँ आवा । संग नारि बहु किएँ बनावा ॥
 बहु विधि खल सीतहि समुझावा । साम दान भय भेद देखावा ॥
 कह रावनु सुनु सुमुखि सयानी । मंदोदरी आदि सब रानी ॥
 तव अनुचरीं करउँ पन मोरा । एक बार बिलोकु मम ओरा ॥
 तृन धरि ओट कहति बैदेही । सुमिरि अवधपति परम सनेही ॥
 सुनु दसमुख खद्योत प्रकासा । कबहुँ कि नलिनी करइ बिकासा ॥
 अस मन समुझ कहति जानकी । खल सुधि नहिं रघुवीर बान की ॥
 सठ सूनें हरि आनेहि मोही । अधम निलज लाज नहिं तोही ॥
 दो०—आपुहि सुनि खद्योत सम रामहि भानु समान ।

परुष बचन सुनि काढ़ि असि बोला अति खिसिआन ॥ ९ ॥

सीता तैं मम कृत अपमाना । कटिहउँ तव सिर कठिन कृपाना ॥
 नाहिं त सपदि मानु मम बानी । सुमुखि होति न त जीवन हानी ॥
 स्याम सरोज दाम सम सुंदर । प्रभु भुज करि कर सम दसकुंभार ॥

सो भुज कैंठ किसैंध आसि धारा । सुनु सठ अस प्रवान पन मोरा ॥
 चंद्रहास हरु मम परिताप । रघुपति विरह अनल संजात ॥
 सीतल निसित बहसि बर धारा । कह सीता हरु मम दुख भारा ॥
 सुनत बचन पुनि मारन धावा । मयतनयाँ कहि नीति बुझावा ॥
 कहेसि सकल निसिचरिन्ह बोलाई । सीतहि बहु विधि त्रासहु जाई ॥
 मास दिवस महुँ कहा न माना । तौ मैं मारबि काढ़ि कृपाना ॥
 दो०—भवन गयउ दसकंधर इहाँ पिसाचिनि बृंद ।

सीतहि त्रास देखावहि धरहि रूप बहु मंद ॥ १० ॥
 त्रिजटा नाम राच्छसी एका । राम चरन रति निपुन विवेका ॥
 सबन्हौ बोलि सुनाएसि सपना । सीतहि सेइ करहु हित अपना ॥
 सपनें बानर लंका जारी । जातुधान सेना सब मारी ॥
 खर आरूढ़ नगन दससीसा । मुंडित सिर खंडित भुज बीसा ॥
 एहि विधि सो दच्छिन दिसि जाई । लंका मनहुँ विभीषन पाई ॥
 नगर फिरी रघुवीर दोहाई । तब प्रभु सीता बोलि पठाई ॥
 यह सपना मैं कहउँ पुकारी । होइहि सत्य गएँ दिन चारी ॥
 तासु बचन सुनि ते सब डरीं । जनकसुता के चरनन्हि परीं ॥
 दो०—जहँ तहँ गई सकल तब सीता कर मन सोच ।

मास दिवस बीतें मोहि मारिहि निसिचर पोच ॥ ११ ॥
 त्रिजटा सन बोलीं कर जोरी । मातु विपति संगिनि तैं मोरी ॥
 तजौं देह करु बेगि उपाई । दुसह विरहु अब नहिं सहि जाई ॥

Vinay Avasthi Sahib Bhuvan Vani Trust Donations

आनि काठ रचु चिता बनाई । मातु अनल धुनि दीहि लगाई ॥
 सत्य करहि मम प्रीति सयानी । सुनै को श्रवन सूल सम बानी ॥
 सुनत बचन पद गहि समुझाएसि । प्रभु प्रताप बल सुजसु सुनाएसि
 निसि न अनल मिल सुनु सुकुमारी । अस कहि सो निज भवन सिधारी
 कह सीता विधि भा प्रतिकूला । मिलिहि न पावक मिटिहि न सूला
 देखिअत प्रगट गगन अंगारा । अवनि न आवत एकउ तारा ॥
 पावकमय ससि स्रवत न आगी । मानहुँ मोहि जानै हतभागी ॥
 सुनहि विनय मम बिटप असोका । सत्य नाम करु हरु मम सोका ॥
 नूतन किसलय अनल समाना । देहि अगिनि जनि करहि निदाना
 देखि परम विरहाकुल सीता । सो छन कपिहि कल्प सम बीता ॥

सो०—कपि करि हृदयँ बिचार दीन्हि मुद्रिका डारि तब ।

जनु असोक अंगार दीन्ह हरषि उठि कर गहेउ ॥ १२ ॥

तब देखी मुद्रिका मनोहर । राम नाम अंकित अति सुंदर ॥
 चकित चितव मुदरी पहिचानी । हरष विषाद हृदयँ अकुलानी ॥
 जीति को सकइ अजय रघुराई । माया तैं असि रचि नहिं जाई ॥
 सीता मन विचार कर नाना । मधुर बचन बोलेउ हनुमाना ॥
 रामचंद्र गुन बरनै लगा । सुनतहिं सीता कर दुख भागा ॥
 लागीं सुनै श्रवन मन लाई । आदिहु तैं सब कथा सुनाई ॥
 श्रवनामृत जेहिं कथा सुहाई । कहीसो प्रगट होति किन भाई ॥

तब हनुमंत निकट चलि गयऊ । फिरि बैठौं मन विसमय भयऊ ॥

राम वचन मैं आनी साहिब भूपति वानी Trust Donations
 यह मुद्रिका मातु मैं आनी । दीन्हि राम तुम्ह कहँ सहिदानी ॥
 नर बानरहि संग कहु कैसें । कही कथा भइ संगति जैसें ॥

दो०—कपि के बचन सप्रेम सुनि उपजा मन बिस्वास ।

जाना मन क्रम बचन यह कृपासिंधु कर दास ॥१३॥

हरिजन जानि प्रीति अति गाढ़ी । सजल नयन पुलकावलि बाढ़ी ॥
 बूड़त विरह जलधि हनुमाना । भयउ तात मो कहँ जलजाना ॥
 अब कहु कुसल जाउँ बलिहारी । अनुज सहित सुख भवन खरारी
 कोमलचित कृपाल रघुराई । कपि केहि हेतु धरी निठुराई ॥
 सहज बानि सेवक सुख दायक । कबहुँक सुरति करत रघुनायक ॥
 कबहुँ नयन मम सीतल ताता । होइहहिं निरखि स्याम मृदु गाता
 बचनु न आव नयन भरे वारी । अहह नाथ हौं निपट विसारी ॥
 देखि परम विरहाकुल सीता । बोला कपि मृदु बचन बिनीता ॥
 मातु कुसल प्रभु अनुज समेता । तव दुख दुखी सुकृपा निकेता ॥
 जनि जननी मानहु जियँ ऊना । तुम्ह ते प्रेमु राम कें दूना ॥

दो०—रघुपति कर संदेसु अब सुनु जननी धरि धीर ।

अस कहि कपि गदगद भयउ भरे बिलोचन नीर ॥१४॥

कहेउ राम वियोग तव सीता । मो कहँ सकल भए बिपरीता ॥
 नव तरु किसलय मनहुँ कसानू । कालनिसा सम निशि ससि भानू ॥
 कुबलय बिपिन कुंतवन सरिसा । बारिद तपत तेल जनु वरिसा ॥

Vinay Avasthi, Sahib Bhuvan Vani Trust Donations

जे हित रहे करत तेइ पीरा । उरग स्वास सम त्रिविध समीरा ॥
 कहेहू तैं कछु दुख घटि होई । काहि कहैं यह जान न कोई ॥
 तत्व प्रेम करं मम अरु तोरा । जानत प्रिया एकु मनु मोरा ॥
 सोमनु सदा रहत तोहि पाहीं । जानु प्रीति रसु एतनेहि माहीं ॥
 प्रभु संदेसु सुनत बैदेही । मगन प्रेम तन सुधि नहिं तेही ॥
 कह कपि हृदयँ धीर धरु माता । सुमिरु राम सेवक सुखदाता ॥
 उर आनहु रघुपति प्रभुताई । सुनि मम वचन तजहु कदराई ॥
 दो०—निसिचर निकर पतंग सम रघुपति बान कृसानु ।

जननी हृदयँ धीर धरु जरे निसाचर जानु ॥ १५ ॥
 जौं रघुवीर होति सुधि पाई । करते नहिं विलंबु रघुराई ॥
 राम बान रवि उएँ जानकी । तम बरूथ कहँ जातुधान की ॥
 अवहिं मातु मैं जाउँ लवाई । प्रभु आयसु नहिं राम दोहाई ॥
 कछुक दिवस जननी धरु धीरा । कपिन्ह सहित अइहहिं रघुवीरा ॥
 निसिचर मारि तोहि लै जैहहिं । तिहुँ पुर नारदादि जसु गैहहिं ॥
 हैं सुत कपि सब तुम्हहि समाना । जातुधान अति भट बलवाना ॥
 मोरें हृदय परम संदेहा । सुनि कपि प्रगट कीन्हि निज देहा ॥
 कनक भूधराकार सरीरा । समर भयंकर अतिबल बीरा ॥
 सीता मन भरोस तव भयऊ । पुनि लघु रूप पवनसुत लयऊ ॥
 दो०—सुनु माता साखामृग नहिं बल बुद्धि बिसाल ।

प्रभु प्रताप तैं गरुड़हि खाइ परम लघु ब्याल ॥ १६ ॥

मन संतोष अपुन सीपि बानी भगीति प्रताप तज बल सानी ॥
 आसिष दीन्हि रामप्रिय जाना । होहु तात बल सील निधाना ॥
 अजर अमर गुननिधि सुत होहू । करहुँ बहुत रघुनायक छोहू ॥
 करहुँ कृपा प्रभु अस सुनि काना । निर्भर प्रेम मगन हनुमाना ॥
 बार बार नाएसि पद सीसा । बोला बचन जोरि कर कीसा ॥
 अब कृतकृत्य भयउँ मैं माता । आसिष तव अमोघ बिख्याता ॥
 सुनहु मातु मोहि अतिसय भूखा । लागि देखि सुंदर फल रूखा ॥
 सुनु सुत करहिं बिपिन रखवारी । परम सुभट रजनीचर भारी ॥
 तिन्ह कर भय माता मोहि नाही । जौं तुम्ह सुख मानहु मन माहीं ॥
 दो०-देखि बुद्धि बल निपुन कपि कहेउ जानकी जाहु ।

रघुपति चरन हृदयँ धरि तात मधुर फल खाहु ॥ १७ ॥
 चलेउ नाइ सिरु पैठेउ बागा । फल खाएसि तरु तोरैं लागा ॥
 रहे तहाँ बहु भट रखवारे । कछु मारेसि कछु जाइ पुकारे ॥
 नाथ एक आवा कपि भारी । तेहिं असोक बाटिका उजारी ॥
 खाएसि फल अरु बिटप उपारे । रच्छक मर्दि मर्दि महि डारे ॥
 सुनि रावन पठए भट नाना । तिन्हहि देखि गर्जेउ हनुमाना ॥
 सब रजनीचर कपि संघारे । गए पुकारत कछु अधमारे ॥
 पुनि पठयउ तेहिं अच्छकुमारा । चला संग लै सुभट अपारा ॥
 आवत देखि बिटप गहि तर्जा । ताहि निपाति महाधुनि गर्जा ॥
 दो०-कछु मारेसि कछु मर्देसि कछु मिलएसि धरि धूरि ।

कछु पुनि जाइ पुकारे प्रभु मर्कट बल भूरि ॥ १८ ॥

सुनि सुत बंध लंकेस रिसना। पठएसि मेधनादि धलवाना ॥
 मारसि जनि सुत बाँधेसु ताही। देखिअ कपिहि कहाँ कर आही ॥
 चला इंद्रजित अतुलित जोधा। बंधु निधन सुनि उपजा क्रोधा ॥
 कपि देखा दारुन भट आवा। कटकटाइ गर्जा अरु धावा ॥
 अति बिसाल तरु एक उपारा। विरथ कीन्ह लंकेस कुमारा ॥
 रहे महाभट ताके संगी। गहिगहि कपि मर्दइ निज अंगा ॥
 तिन्हहि निपाति ताहि सन बाजा। भिरे जुगल मानहुँ गजराजा ॥
 मुठिका मारि चढ़ा तरु जाई। ताहि एक छन मुरुछा आई ॥
 उठि बहोरि कीन्हिसि बहु माया। जीति न जाइ प्रभंजन जाया ॥
 दो०—ब्रह्म अस्त्र तेहिं साँधा कपि मन कीन्ह विचार ।

जौं न ब्रह्मसर मानउँ महिमा मिटइ अपार ॥ १९ ॥

ब्रह्मवान कपि कहूँ तेहिं मारा। परतिहुँ बार कटकु संघारा ॥
 तेहिं देखा कपि मुरुछित भयऊ। नागवास बाँधेसि लै गयऊ ॥
 जासु नाम जपि सुनहु भवानी। भव बंधन काटहिं नर ग्यानी ॥
 तासु दूत कि बंध तरु आवा। प्रभु कारज लागि कपिहिं बँधावा ॥
 कपि बंधन सुनि निसिचर धाए। कौतुक लागि सभाँ सब आए ॥
 दसमुख सभा दीखि कपि जाई। कहि न जाइ कछु अति प्रभुताई
 कर जोरें सुर दिसिप विनीता। भृकुटि बिलोकत सकल सभीता ॥
 देखि प्रताप न कपि मन संका। जिमि अहिगन महुँ गरुड़ असंका
 दो०—कपिहि बिलोकि दसानन बिहसा कहि दुर्बाद ।

सुत बध सुरति कीन्ह पुनि उपजा हृदय बिषाद ॥ २० ॥

Vinay Avasthi Sahib Bhuvan Vani Trust Donations

कह लकेस कवन ते कोसा । कहि के बल घालिह बन खीसा ॥
 की धौं श्रवन सुनेहि नहिं मोही । देखउँ अति असंक सठ तोही ॥
 मारे निसिचर केहिं अपराधा । कहु सठ तोहि न प्रान कइ बाधा
 सुनु रावन ब्रह्मांड निकाया । पाइ जासु बलविरचति माया ॥
 जाकें बल विरंचि हरि ईसा । पालत सृजत हरत दससीसा ॥
 जा बल सीस धरत सहसानन । अंडकोस समेत गिरि कानन ॥
 धरइ जो विविध देह सुरत्राता । तुम्ह से सठन्ह सिखावनु दाता ॥
 हर कोदंड कठिन जेहिं भंजा । तेहि समेत नृप दल मद गंजा ॥
 खर दूषन त्रिसिरा अरु बाली । बधे सकल अतुलित बलसाली ॥

दो०—जाके बल लवलेस तें जितेहु चराचर झारि ।

तासु दूत मैं जा करि हरि आनेहु प्रिय नारि ॥ २१ ॥

जानउँ मैं तुम्हारि प्रभुताई । सहसबाहु सन परी लराई ॥
 समरबालि सन करि जसु पावा । सुनि कपि वचन बिहसि बिहरावा
 खायउँ फल प्रभु लागी भूँखा । कपि सुभाव तें तोरेउँ रूखा ॥
 सब कें देह परम प्रिय स्वामी । मारहिं मोहि कुमारग गामी ॥
 जिन्ह मोहि मारा ते मैं मारे । तेहि पर बाँधेउँ तनयँ तुम्हारे ॥
 मोहि न कछु बाँधे कइ लाजा । कीन्ह चहउँ निज प्रभु कर काजा
 बिनती करउँ जोरि कर रावन । सुनहु मान तजि मोर सिखावन ॥
 देखहु तुम्ह निज कुलहि बिचारी । भ्रम तजि भजहु भगत भयहारी
 जाकें डर अति काल डेराई । जो सुर असुर चराचर खाई ॥

तासों बयर कबहुं नहिं काजै। मोरे कहै जानकी दीजै ॥

दो०-प्रनतपाल रघुनायक करुनासिंधु खरारि ।

गएँ सरन प्रभु राखिहैं तव अपराध बिसारि ॥ २२ ॥

राम चरन पंकज उर धरहू। लंका अचल राजु तुम्ह करहू ॥

रिषि पुलस्ति जसु विमल मयंका। तेहि ससि महँ जनि होहु कलंका

राम नाम बिनु गिरा न सोहा। देखु बिचारि त्यागि मद मोहा ॥

बसन हीन नहिं सोह सुरारी। सब भूषन भूषित बर नारी ॥

राम विमुख संपति प्रभुताई। जाइ रही पाई बिनु पाई ॥

सजल मूल जिन्ह सरितन्ह नाहीं। बरषि गएँ पुनि तबहिं सुखाहीं ॥

सुनु दसकंठ कहउँ पन रोपी। विमुख राम त्राता नहिं कोपी ॥

संकर सहस बिष्णु अज तोही। सकहिं न राखि राम कर द्रोही ॥

दो०-मोहमूल बहु सूल प्रद त्यागहु तम अभिमान ।

भजहु राम रघुनायक कृपा सिंधु भगवान ॥ २३ ॥

जदपि कही कपि अति हित बानी। भगति बिबेक बिरति नय सानी

बोला बिहसि महा अभिमानी। मिला हमहि कपि गुर बड़ ग्यानी

मृत्यु निकट आई खल तोही। लागेसि अधम सिखावन मोही ॥

उलटा होइहि कह हनुमाना। मतिभ्रम तोर प्रगट मैं जाना ॥

सुनि कपि बचन बहुत खिसिआना। बेगि न हरहु मूढ़ कर प्राना ॥

सुनत निसाचर मारन धाए। सचिवन्ह सहित बिभीषनु आए ॥

नाइ सीस करि बिनय बहूता। नीति बिरोध न मारिअ दूता ॥

Vinay Avasthi, Sahib Bhai Vani Trust Donations

आनि देख कछु करिअ गौसाई । सबही कहा मंत्र भल भाई ॥
 सुनत बिहसि बोला दसकंधर । अंग भंग करि पठइअ बंदर ॥
 दो०—कपि कें ममता पूँछ पर सबहि कहउँ समुझाई ।

तेल बोरि पट बाँधि पुनि पावक देहु लगाइ ॥ २४ ॥
 पूँछहीन बानर तहँ जाइहि । तब सठ निज नाथहि लइ आइहि
 जिन्ह कै कीन्हिसि बहुत बड़ाई । देखउँ मैं तिन्ह कै प्रभुताई ॥
 बचन सुनत कपि मन मुसुकाना । भइ सहाय सारद मैं जाना ॥
 जातुधान सुनि रावन बचना । लागे रचैं मूढ़ सोइ रचना ॥
 रहा न नगर बसन घृत तेला । वाढ़ी पूँछ कीन्ह कपि खेला ॥
 कौतुक कहँ आए पुरवासी । मारहिं चरन करहिं बहु हाँसी ॥
 बाजहिं ढोल देहिं सब तारी । नगर फेरि पुनि पूँछ प्रजारी ॥
 पावक जरत देखि हनुमंता । भयउ परम लघुरूप तुरंता ॥
 निबुकि चढ़ेउ कपि कनक अटारीं । भई सभीत निसाचर नारीं ॥
 दो०—हरि प्रेरित तेहि अवसर चले मरुत उनचास ।

अट्टहास करि गर्जा कपि बढि लाग अकास ॥ २५ ॥
 देह बिसाल परम हरुआई । मंदिर तैं मंदिर चढ़ धाई ॥
 जरइ नगर भा लोग बिहाला । झपट लपट बहु कोटि कराला ॥
 तात मातु हा सुनिअ पुकारा । एहिं अवसर को हमहि उवारा ॥
 हम जो कहा यह कपि नहिं होई । बानर रूप धरें सुर कोई ॥
 साधु अवग्या कर फलु ऐसा । जरइ नगर अनाथ कर जैसा ॥

जारा नगर निमिष एक माही । एक विभीषन कर गृह नार्ही ॥
ता कर दूत अनलजेहिं सिरिजा । जरा न सो तेहि कारन गिरिजा ॥
उलटि पलटि लंका सब जारी । कूदि परा पुनि सिंधु मझारी ॥
दो०—पूँछ बुझाइ खोइ श्रम धरि लघुरूप बहोरि ।

जनकसुता कें आगें ठाढ़ भयउ कर जोरि ॥ २६ ॥

मातु मोहि दीजे कछु चीन्हा । जैसैं रघुनायक मोहि दीन्हा ॥
चूड़ामनि उतारि तब दयऊ । हरष समेत पवनसुत लयऊ ॥
कहेहु तात अस मोर प्रनामा । सब प्रकार प्रभु पूरनकामा ॥
दीन दयाल विरिदु संभारी । हरहु नाथ मम संकट भारी ॥
तात सकसुत कथा सुनाएहु । बान प्रताप प्रभुहि समुझाएहु ॥
मास दिवस महुँ नाथु न आवा । तौ पुनि मोहि जिअत नहिं पावा ॥
कहु कपि केहि विधि राखौं प्राणा । तुम्हहू तात कहत अब जाना ॥
तोहि देखि सीतलि भइ छाती । पुनि मो कहुँ सोइ दिनु सोराती ॥
दो०—जनकसुतहि समुझाइ करि बहु विधि धीरजु दीन्ह ।

चरन कमल सिरु नाइ कपि गवनु राम पहिं कीन्ह ॥ २७ ॥

चलत महाधुनि गर्जैसि भारी । गर्भ खवहिं सुनि निसिचर नारी
नाधि सिंधु एहि पारहि आवा । सबद किलिकिला कपिन्ह सुनावा
हरषे सब बिलोकि हनुमाना । नूतन जन्म कपिन्ह तब जाना ॥
मुख प्रसन्न तन तेज बिराजा । कीन्हेसि रामचंद्र कर काजा ॥
मिले सकल अति भए सुखारी । तलफत मीन पाव जिमि बारी ॥

चले हरषि रघुनायक पासा । पूछत कहत नवल इतिहासा ॥
 तब मधुवन भीतर सब आए । अंगद संमत मधु फल खाए ॥
 रखवारे जब वरजन लागे । मुष्टि प्रहार हनत सब भागे ॥
 दो०-जाइ पुकारे ते सब बन उजार जुबराज ।

सुनि सुग्रीव हरष कपि करि आए प्रभु काज ॥२८॥
 जौ न होति सीता सुधि पाई । मधुवन के फल सकहिं कि खाई ॥
 एहि विधि मन विचार कर राजा । आइ गए कपि सहित समाजा ॥
 आइ सबन्हि नावा पद सीसा । मिलेउ सबन्हि अति प्रेम कपीसा
 पूँछी कुसल कुसल पद देखी । राम कृपाँ भा काजु बिसेषी ॥
 नाथ काजु कीन्हेउ हनुमाना । राखे सकल कपिन्ह के प्राणा ॥
 सुनि सुग्रीव बहुरि तेहि मिलेऊ । कपिन्ह सहित रघुपति पहिं चलेऊ
 राम कपिन्ह जब आवत देखा । किँएँ काजु मन हरष बिसेषा ॥
 फटिक सिला बैठे द्रौ भाई । परे सकल कपि चरनन्हि जाई ॥

दो०-प्रीति सहित सब भेटे रघुपति कहना पुंज ।

पूँछी कुसल नाथ अब कुसल देखि पद कंज ॥ २९ ॥

जामवंत कह सुनु रघुराया । जा पर नाथ करहु तुम्ह दाया ॥
 ताहि सदा सुभ कुसल निरंतर । सुर नर मुनि प्रसन्न ता ऊपर ॥
 सोइ बिजई बिनई गुन सागर । तासु सुजसु त्रैलोक उजागर ॥
 प्रभु कीं कृपा भयउ सब काजू । जन्म हमार सुफल भा आजू ॥
 नाथ पवनसुत कीन्हि जो करनी । सहसहुँ मुख न जाइ सो बरनी ॥

पवनतनय के चरित सुहाए। जामवंत रघुपतिहि सुनाए ॥
 सुनत कृपानिधि मन अति भाए। पुनि हनुमान हरषि हियँ लाए ॥
 कहहु तात केहि भाँति जानकी। रहति करति रच्छा स्वप्रान की ॥
 दो०-नाम पाहरू दिवस निसि ध्यान तुम्हार कपाट ।

लोचन निज पद जंत्रित जाहिं प्रान केहिं बाट ॥ ३० ॥

चलत मोहि चूड़ामनि दीन्ही। रघुपति हृदयँ लाइ सोइ लीन्ही ॥
 नाथ जुगल लोचन भरि बारी। बचन कहे कछु जनक कुमारी ॥
 अनुज समेत गहेहु प्रभु चरना। दीन बंधु प्रनतारति हरना ॥
 मन क्रम बचन चरन अनुरागी। केहिं अपराध नाथ हैं त्यागी ॥
 अवगुन एक मोर मैं माना। बिछुरत प्रान न कीन्ह पयाना ॥
 नाथ सो नयनन्हि को अपराधा। निसरत प्रान करहिं हठि बाधा ॥
 बिरह अगिनि तनु तूल समीरा। स्वास जरइ छन माहिं सरीरा ॥
 नयन स्रवाहिं जलु निज हित लागी। जरैं न पाव देह बिरहागी ॥
 सीता कै अति बिपति बिसाला। बिनहिं कहें भलि दीन दयाला ॥
 दो०-निमिष निमिष करुनानिधि जाहिं कलप सम बीति ।

बेगि चलिअ प्रभु आनिअ भुज बल खल दल जीति ॥ ३१ ॥

सुनि सीता दुख प्रभु सुख अयना। भरि आए जल गजिव नयना
 बचन कायँ मन मम गति जाही। सपनेहुँ बूझिअ बिपति कि ताही
 कह हनुमंत बिपति प्रभु सोई। जब तव सुमिगन भजन न होई ॥
 केतिक बात प्रभु जातुधान की। रिपुहि जीति आनिबी जानकी ॥

सुनु कपि तोहि समान उपकारी । नहि कोउ सुर नर मुनि तनुधारी
 प्रति उपकार करौं का तोरा । सनमुख होइ न सकत मन मोरा ॥
 सुनु सुत तोहि उरिन मैं नाहीं । देखेउँ करि विचार मन माहीं ॥
 पुनि पुनि कपिहि चितव सुरत्राता । लोचन नीर पुलक अति गाता
 दो०—सुनि प्रभु बचन बिलोकि मुख गात हरषि हनुमंत ।

चरन परेउ प्रेमाकुल त्राहि त्राहि भगवंत ॥३२॥

बार बार प्रभु चहइ उठावा । प्रेम मगन तेहि उठव न भावा ॥
 प्रभु कर पंकज कपि कैं सीसा । सुमिरि सो दसा मगन गौरीसा ॥
 सावधान मन करि पुनि संकर । लागे कहन कथा अति सुंदर ॥
 कपि उठाइ प्रभु हृदयँ लगावा । कर गहि परम निकट बैठावा ॥
 कहु कपि रावन पालित लंका । केहि विधि दहेउ दुर्ग अति बंका
 प्रभु प्रसन्न जाना हनुमाना । बोलावचन विगत अभिमाना ॥
 साखामृग कै बड़ि मनुसाई । साखा तैं साखा पर जाई ॥
 नाधि सिंधु हाटकपुर जारा । निसिचर गन बधि विपिन उजारा
 सो सब तव प्रताप रघुराई । नाथ न कछू मोरि प्रभुताई ॥
 दो०—ता कहूँ प्रभु कछु अगम नहिं जा पर तुम्ह अनुकूल ।

तव प्रभावं बड़वानलहि जारि सकइ खलु तूल ॥३३॥

नाथ भगति अति सुखदायनी । देहु कृपा करि अनपायनी ॥
 सुनि प्रभु परम सरल कपि बानी । एवमस्तु तब कहेउ भवानी ॥

उमा राम सुभाउ जेहिं जाना । ताहि भजन तजि भाव न आना ॥

यह संवाद जासु उर आवा । रघुपति चरन भगति सोइ पावा ॥
 सुनि प्रभु वचन कहहिं कपिवृन्दा । जय जय जय कृपाल सुखकंदा ॥
 तव रघुपति कपिपतिहि बोलावा । कहा चलै कर करहु बनावा ॥
 अब बिलंबु केहि कारन कीजे । तुरत कपिन्ह कहूँ आयसु दीजे ॥
 कौतुक देखि सुमन बहु बरषी । नभ तैं भवन चले सुर हरषी ॥
 दो०—कपिपति बेगि बोलाए आए जूथप जूथ ।

नाना बरन अतुल बल बानर भालु बरूथ ॥३४॥

प्रभु पद पंकज नावहिं सीसा । गर्जहिं भालु महाबल कीसा ॥
 देखी राम सकल कपि सेना । चितइ कृपा करि राजिव नैना ॥
 राम कृपा बल पाइ कपिंदा । भए पच्छजुत मनहुँ गिरिंदा ॥
 हरषि राम तव कीन्ह पयाना । सगुन भए सुंदर सुभ नाना ॥
 जासु सकल मंगलमय कीती । तासु पयान सगुन यह नीती ॥
 प्रभु पयान जाना बैदेहीं । फरकि बाम अँग जनु कहि देहीं ॥
 जोइ जोइ सगुन जानकिहि होई । असगुन भयउ रावनहि सोई ॥
 चला कटकु को बरनै पारा । गर्जहिं बानर भालु अपारा ॥
 नख आयुध गिरि-पादपधारी । चले गगन महि इच्छाचारी ॥
 केहरिनाद भालु कपि करहीं । डगमगाहिं दिग्गज चिक्करहीं ॥

छं०—चिक्करहिं दिग्गज डोल महि गिरि लोल सागर खरभरे ।

मन हरष सभ गंधर्व सुर मुनि नाग किंनर दुख टरे ॥

Vinay Ayasthi Sahib Bhuvan Vani Trust Donations

कटकटहि मकट बिकट भट बहु कोटि कोटिन्ह धावहीं ।

जय राम प्रबल प्रताप कोसलनाथ गुन गन गावहीं ॥

सहि सक न भार उदार अहिपति बार बारहिं मोहई ।

गह दसन पुनि पुनि कमठ पृष्ठ कठोर सो किमि सोहई ॥

रघुबीर रुचिर प्रथान प्रस्थिति जानि परम सुहावनी ।

जनु कमठ खर्पर सर्पराज सो लिखत अबिचल पावनी ॥

दो०—एहि बिधि जाइ कृपानिधि उतरे सागर तीर ।

जहँ तहँ लागे खान फल भालु बिपुल कपि बीर ॥३५॥

उहाँ निसाचर रहहिं ससंका । जब तैं जा रि गयउ कपि लंका ॥

निज निज गृहँ सब करहिं विचारा । नहिं निसिचर कुल केर उवारा ॥

जासु दूत बल बरनि न जाई । तेहि आएँ पुर कवन भलाई ॥

दूतिन्ह सन सुनि पुरजन बानी । मंदोदरी अधिक अकुलानी ॥

रहसि जोरि करपति पग लागी । बोली बचन नीति रस पागी ॥

कंत करष हरि सन परिहरहू । मोर कहा अति हिन हियँ धरहू ॥

समुझत जासु दूत कइ करनी । स्वहिं गर्भ रजनीचर धरनी ॥

तासु नारि निज सचिव बोलाई । पठवहु कंत जो चहहु भलाई ॥

तव कुल कमल बिधिन दुखदाई । सीता सीत निसा सम आई ॥

सुनहु नाथ सीता बिनु दीन्हें । हित न तुम्हार संभु अज कीन्हें ॥

दो०—राम बान अहिगन सरिस निकर निसाचर भेक ।

नब लगि प्रसत न तब लगि जतनु करहु तजि टेक ॥३६॥

श्रवन सुनी सठ ता करि बानी । बिहसा जगत बिदित अभिमानी ॥
 सभय सुभाउ नारि कर साचा । मंगल महुँ भय मन अति काचा ॥
 जौ आवइ मर्कट कटकाई । जिअहिं बिचारे निसिचर खाई ॥
 कंपहिं लोकप जाकीं त्रासा । तासु नारि सभीत बड़ि हासा ॥
 अस कहि बिहसि ताहि उरलाई । चलेउ सभाँ ममता अधिकाई ॥
 मंदोदरी हृदयँ कर चिंता । भयउ कंत पर बिधि बिपरीता ॥
 बैठेउ सभाँ खबरि असि पाई । सिंधु पार सेना सब आई ॥
 बूझेसि सचिव उचित मत कहहू । ते सब हँसे मष्ट करि रहहू ॥
 जितेहु सुरासुर तब श्रम नाही । नर बानर केहि लेखे माहीं ॥

दो०—सचिव बैद गुर तीनि जौ प्रिय बोलहिं भय आस ।

राज धर्म तन तीनि कर होइ बेगिहीं नास ॥ ३७ ॥

सोइ रावन कहूँ बनी सहाई । अस्तुति करहिं सुनाइ सुनाई ॥
 अवसर जानि बिभीषनु आवा । भ्राता चरन सीसु तेहि नावा ॥
 पुनि सिरु नाइ बैठ निज आसन । बोला बचन पाइ अनुसासन ॥
 जौ कृपाल पूँछिहु मोहि बाता । मति अनुरूप कहउँ हित ताता ॥
 जो आपन चाहै कल्याना । सुजसु सुमति सुभ गति सुख नाना
 सो परनारि लिलार गोसाई । तजउ चउथि के चंद कि नाई ॥
 चौदह भुवन एक पति होई । भूतद्रोह तिष्ठइ नहिं सोई ॥

गुन सागर नागर नर जोऊ । अलप लोभ भल कहइ न कोऊ ॥

दो०—काम क्रोध मद लोभ सब नाथ नरक के पथ ।

सब परिहरि रघुबीरहि भजहु भजहिं जेहि संत ॥ ३८ ॥

तात राम नहिं नर भूपाला । भुवनेस्वर कालहु कर काला ॥
 ब्रह्म अनामय अज भगवंता । व्यापक अजित अनादि अनंता ॥
 गो द्विज धेनु देव हितकारी । कृपा सिंधु मानुष तनुधारी ॥
 जन रंजन भंजन खल ब्राता । वेद धर्म रच्छक सुनु भ्राता ॥
 ताहि बयरु तजि नाइअ माथा । प्रनतारति भंजन रघुनाथा ॥
 देहु नाथ प्रभु कहूँ बैदेही । भजहु राम बिनु हेतु सनेही ॥
 सरन गएँ प्रभु ताहु न त्यागा । बिस्व द्रोह कृत अघ जेहि लागा ॥
 जासु नाम त्रय ताप नसावन । सोइ प्रभु प्रगट समुझु जियँ रावन ॥

दो०—बार बार पद लागउँ बिनय करउँ दससीस ।

परिहरि मान मोह मद भजहु कोसलाधीस ॥ ३९(क) ॥

मुनि पुलस्तिनिज सिष्य सन कहि पठई यह बात ।

तुरत सो मैं प्रभु सन कही पाइ सुअवसरु तात ॥ ३९(ख) ॥

माल्यवंत अति सचिव सयाना । तासु बचन मुनि अति सुख माना ॥
 तात अनुज तव नीति बिभूषन । सो उर धरहु जो कहत बिभीषन ॥
 रिपु उतकरष कहत सठ दोऊ । दूरि न करहु इहाँ हइ कोऊ ॥
 माल्यवंत गृह गयउ बहोरी । कहइ बिभीषनु पुनि कर जोरी ॥
 सुमति कुमति सब कै उर रहहीं । नाथ पुरान निगम अस कहहीं ॥
 जहाँ सुमति तहाँ संपति नाना । जहाँ कुमति तहाँ बिपति निदाना ॥

तव उर कुमति बसी विपरीता । हित अनहित मानहु रिपु प्रीता ॥
कालराति निसिचर कुल केरी । तेहि सीता पर प्रीति घनेरी ॥

दो०—तात चरन गहि मागउँ राखहु मोर दुलार ।

सीता देहु राम कहूँ अहित न होइ तुम्हार ॥ ४० ॥

बुध पुरान श्रुति संमत बानी । कही विभीषन नीति बखानी ॥
सुनत दसानन उठा रिसाई । खल तोहि निकट मृत्यु अब आई
जिअसि सदा सठ मोर जिआवा । रिपु कर पच्छ मूढ़ तोहि भावा ॥
कहसि न खल अस को जग माहीं । भुज बल जाहि जिता मैं नाहीं ॥
मम पुर बसि तपसिन्ह पर प्रीती । सठ मिलु जाइतिन्हहि कहु नीती
अस कहि कीन्हेसि चरन प्रहारा । अनुज गहे पद बारहिं बारा ॥
उमा संत कइ इहइ बड़ाई । मंद करत जो करइ भलाई ॥
तुम्ह पितु सरिस भलेहि मोहि मारा । रामु भजैं हित नाथ तुम्हारा ॥
सचिव संग लैन भ पथ गयऊ । सबहि सुनाइ कहत अस भयऊ ॥

दो०—रामु सत्यसंकल्प प्रभु सभा कालबस तोरि ।

मैं रघुबीर सरन अब जाउँ देहु जनि खोरि ॥ ४१ ॥

अस कहि चला विभीषनु जबहीं । आयूहीन भए सब तबहीं ॥
साधु अवग्या तुरत भवानी । कर कल्याण अखिल कै हानी ॥
रावन जबहिं विभीषन त्यागा । भयउ विभव बिनु तबहिं अभागा
चलेउ हरषि रघुनायक पाहीं । करत मनोरथ बहु मन माहीं ॥

देखिहुँ जाइ चरन जलजाता । अरुन मृदुल सेवक सुखदाता ॥

जे पद परसि तरा रिषिनारी । दंडक कानन पावनकारी ॥
 जे पद जनकसुताँ उर लाए । कपट कुरंग संग धर धाए ॥
 हर उर सर सरोज पद जेई । अहोभाग्य मैं देखिहउँ तेई ॥
 दो०—जिन्ह पायन्ह के पादुकन्हि भरतु रहे मन लाइ ।

ते पद आजु बिलोकिहउँ इन्ह नयनन्हि अब जाइ ॥ ४२ ॥

एहि बिधि करत सप्रेम विचारा । आयउ सपदि सिंधु एहिं पारा ॥
 कपिन्ह विभीषनु आवत देखा । जाना कोउ रिपु दूत बिसेषा ॥
 ताहि राखि कपीस पहिं आए । समाचार सब ताहि सुनाए ॥
 कह सुग्रीव सुनहु रघुराई । आवा मिलन दसानन भाई ॥
 कह प्रभु सखा बूझिऐ काहा । कहइ कपीस सुनहु नरनाहा ॥
 जानि न जाइ निसाचर माया । कामरूप केहि कारन आया ॥
 भेद हमार लेन सठ आवा । राखिअ बाँधि मोहि अस भावा ॥
 सखा नीति तुम्ह नीकि विचारी । मम पन सरनागत भयहारी ॥
 सुनि प्रभु बचन हरष हनुमाना । सरनागत बच्छल भगवाना ॥
 दो०—सरनागत कहूँ जे तजहिं निज अनहित अनुमानि ।

ते नर पावँर पापमय तिन्हहि बिलोकत हानि ॥ ४३ ॥

कोटि त्रिप्र बध लागहिं जाहू । आएँ सरन तजउँ नहिं ताहू ॥
 सनमुख होइ जीव मोहि जबहीं । जन्म कोटि अघ नासहिं तबहीं ॥
 पापवंत कर सहज सुभाऊ । भजनु मोर तेहि भाव न काऊ ॥
 जौ पै दुष्टहृदय सोइ होई । मोरें सनमुख आव कि सोई ॥

निर्मल मन जन सो मोहि पावा । मोहि कपट छल छिद्र न भावा ॥
 भेद लेन पठवा दससीसा । तबहुँ न कछु भय हानि कपीसा ॥
 जग महुँ सखा निसाचर जेते । लछिमनु हनइ निमिष महुँ तेते ॥
 जौं सभीत आवा सरनाई । रखिहउँ ताहि प्रान की नाई ॥
 दो०-उभय भाँति तेहि आनहुँ हँसि कह कृपानिकेत ।

जय कृपाल कहि कपि चले अंगद हनू समेत ॥ ४४ ॥
 सादर तेहि आगें करि बानर । चले जहाँ रघुपति करुनाकर ॥
 दूरिहि ते देखे द्वौ भ्राता । नयनानंद दान के दाता ॥
 बहुरि राम छविधाम विलोकी । रहेउ ठटुकि एकटक पल रोकी ॥
 भुज प्रलंब कंजारुन लोचन । स्यामल गात प्रनत भय मोचन ॥
 सिंघ कंध आयत उर सोहा । आनन अमित मदन मन मोहा ॥
 नयन नीर पुलकित अति गाता । मन धरि धीर कही मृदु बाता ॥
 नाथ दसानन कर मैं भ्राता । निसिचर बंस जनम सुरत्राता ॥
 सहज पापप्रिय तामस देहा । जथा उलूकहि तम पर नेहा ॥
 दो०-श्रवन सुजसु सुनि आयउँ प्रभु भंजन भव भीर ।

त्राहि त्राहि आरति हरन सरन सुखद रघुबीर ॥ ४५ ॥

अस कहि करत दंडवत देखा । तुरत उठे प्रभु हरष बिसेषा ॥
 दीन बचन सुनि प्रभु मन भावा । भुज बिसाल गहि हृदयें लगावा ॥
 अनुज सहित मिलि ढिग बैठारी । बोले बचन भगत भयहारी ॥
 कहू लंकेस सहित परिवारा । कुसल कुठाहर बास तुम्हारा ॥

खल मंडलीं बसहु दिनु राती । सखा धरम निवहइ केहि भाँती ॥
 मैं जानउँ तुम्हारि सब रीती । अति नय निपुन न भाव अनीती ॥
 बरु भल बास नरक कर ताता । दुष्ट संग जनि देइ विधाता ॥
 अब पद देखि कुसल रघुराया । जौं तुम्ह कीन्हि जानि जन दाया ॥
 दो०—तब लागि कुसल न जीव कहुँ सपनेहुँ मन बिश्राम ।

जब लागि भजत न राम कहुँ सोक धाम तजि काम ॥ ४६ ॥

तब लागि हृदयँ बसत खल नाना । लोभ मोह मच्छर मद माना ॥
 जब लागि उर न बसत रघुनाथा । धरें चाप सायक कटि भाथा ॥
 ममता तरुन तमी अँधिआरी । राग द्वेष उलूक सुखकारी ॥
 तब लागि बसति जीव मन माहीं । जब लागि प्रभु प्रताप रवि नाहीं ॥
 अब मैं कुसल मिटे भय भारे । देखि राम पद कमल तुम्हारे ॥
 तुम्ह कृपाल जा पर अनुकूल । ताहि न व्याप त्रिविध भव सूला ॥
 मैं निसिचर अति अधम सुभाऊ । सुभ आचरनु कीन्ह नहिँ काऊ ॥
 जासु रूप मुनि ध्यान न आवा । तेहिँ प्रभु हरषि हृदयँ मोहि लावा ॥
 दो०—अहोभाग्य मम अमित अति राम कृपा सुख पुंज ।

देखेउँ नयन बिरंचि सिव सेव्य जुगल पद कंज ॥ ४७ ॥

सुनहु सखा निज कहउँ सुभाऊ । जान भुसुंडि संभु गिरिजाऊ ॥
 जौं नर होइ चराचर द्रोही । आवै सभय सरन तकि मोही ॥
 तजि मद मोह कपट छल नाना । करउँ सद्य तेहि साधु समाना ॥

जननी जनक बंधु सुत दारा । तनु धनु भवन सुहृद परिवारा ॥

Vinay Avasthi Sahib Bhuvan Vani Trust Donations

सब कै ममता ताग बटोरी । मम पद मनाहि बाध बरि डोरी ॥
समदरसी इच्छा कछु नाहीं । हरष सोक भय नहिं मन माहीं ॥
अस सज्जन मम उर बस कैसैं । लोभी हृदयँ बसइ धनु जैसैं ॥
तुम्ह सारिखे संत प्रिय मोरें । धरउँ देह नहिं आन निहोरें ॥

दो०—सगुन उपासक परहित निरत नीति दृढ़ नेम ।

ते नर प्राण समान मम जिन्ह कैं द्विज पद प्रेम ॥ ४८ ॥

सुनु लंकेस सकल गुन तोरें । तातें तुम्ह अतिसय प्रिय मोरें ॥
राम वचन सुनि बानर जूथा । सकल कहहिं जय कृपा बरूथा ॥
सुनत बिभीषनु प्रभु कै बानी । नहिं अघात श्रवनामृत जानी ॥
पद अंबुज गहि बारहिं बारा । हृदयँ समात न प्रेमु अपारा ॥
सुनहु देव सचराचर स्वामी । प्रनतपाल उर अंतरजामी ॥
उर कछु प्रथम बासना रही । प्रभु पद प्रीति सरित सो बही ॥
अब कृपाल निज भगति पावनी । देहु सदा सिव मन भावनी ॥
एवमस्तु कहि प्रभु रनधीरा । मागा तुरत सिंधु कर नीरा ॥
जदपि सखा तव इच्छा नाहीं । मोर दरसु अमोघ जग माहीं ॥
अस कहि राम तिलक तेहि सारा । सुमन वृष्टि नभ भई अपारा ॥

दो०—रावन क्रोध अनल निज स्वास समीर प्रचंड ।

जरत बिभीषनु राखेउ दीन्हेउ राजु अखंड ॥ ४९(क) ॥

जो संपति सिव रावनहि दीन्हि दिउँ दस माथ ।

सोइ संपदा बिभीषनहि सकुचि दीन्हि रघुनाथ ॥ ४९(ख) ॥

अस प्रभु छाड़ि भजहिं जे आना । ते नर पसु बिनु पूँछ विषाना ॥
 निज जन जानि ताहि अपनावा । प्रभु सुभाव कपि कुलमन भावा ॥
 पुनि सर्वग्य सर्व उर बासी । सर्वरूप सब रहित उदासी ॥
 बोले बचन नीति प्रतिपालक । कारन मनुज दनुज कुल घालक ॥
 सुनु कगीस लंकापति वीरा । केहि विधि तरिअ जलधि गंभीरा ॥
 संकुल मकर उरग झष जाती । अति अगाध दुस्तर सब भाँती ॥
 कह लंकेस सुनहु रघुनायक । कोटि सिंधु सोषक तव सायक ॥
 जद्यपि तदपि नीति असि गाई । विनय करिअ सागर सन जाई ॥
 दो०—प्रभु तुम्हार कुलगुर जलधि कहिहि उपाय बिचारि ।

बिनु प्रयास सागर तरिहि सकल भालु कपि धारि ॥५०॥

सखा कही तुम्ह नीकि उपाई । करिअ दैव जौं होइ सहाई ॥
 मंत्र न यह लछिमन मन भावा । राम बचन सुनि अति दुख पावा ॥
 नाथ दैव कर कवन भरोसा । सोषिअ सिंधु करिअ मन रोसा ॥
 कादर मन कहूँ एक अधारा । दैव दैव आलसी पुकारा ॥
 सुनत बिहसि बोले रघुवीरा । ऐसेहिं करब धरहु मन धीरा ॥
 अस कहि प्रभु अनुजहि समुझाई । सिंधु समीप गए रघुराई ॥
 प्रथम प्रनाम कीन्ह सिरुं नाई । बैठे पुनि तट दर्भ डसाई ॥
 जबहिं बिभीषन प्रभु पहिं आए । पाछें रावन दूत पठाए ॥
 दो०—सकल चरित तिन्ह देखे धरें कपट कपि देह ।

प्रगट बखानहि राम सुभाऊ । अति सप्रेम गा विसरि दुराऊ ॥
 रिपु के दूत कपिन्ह तब जाने । सकल बाँधि कपीस पहिँ आने ॥
 कह सुग्रीव सुनहु सब बानर । अंग भंग करि पठवहु निसिचर ॥
 सुनि सुग्रीव बचन कपि धाए । बाँधि कटक चहु पास फिराए ॥
 बहु प्रकार मारन कपि लागे । दीन पुकारत तदपि न त्यागे ॥
 जो हमार हर नासा काना । तेहि कोसलाधीस कै आना ॥
 सुनि लछिमन सब निकट बोलाए । दया लागि हँसि तुरत छोड़ाए ॥
 रावन कर दीजहु यह पाती । लछिमन बचन बाचु कुलघाती ॥

दो०—कहेहु सुखागर मूढ़ सन मम संदेसु उदार ।

सीता देखि मिलहु न त आवा कालु तुम्हार ॥५२॥

तुरत नाइ लछिमन पद माथा । चले दूत बरनत गुन गाथा ॥
 कहत राम जसु लंकाँ आए । रावन चरन सीस तिन्ह नाए ॥
 बिहसि दसानन पूँछी बाता । कहसि न सुक आपनि कुसलाता ॥
 पुनि कहु खबरि विभीषन केरी । जाहि मृत्यु आई अति नेरी ॥
 करत राज लंका सठ त्यागी । होइहि जव कर कीट अभागी ॥
 पुनि कहु भालु कीस कटकाई । कठिन काल प्रेरित चलि आई ॥
 जिन्ह के जीवन कर रखवारा । भयउ मृदुल चित सिंधु बिचारा ॥
 कहु तपसिन्ह कै बात बहोरी । जिन्ह के हृदयँ त्रास अति मोरी ॥

दो०—की भइ भेंट कि फिरि गए श्रवन सुजसु सुनि मोर ।

कहसि न रिपु दल तेज बल बहुत चकित चित तोर ॥५३॥

नाथ कृपा करि पूछेहु जैसे । मानहु कहा क्रोध तजि तैसे ॥
 मिला जाइ जब अनुज तुम्हारा । जातहिं राम तिलक तेहि सारा ॥
 रावन दूत हमहि सुनि काना । कपिन्ह बाँधि दीन्हे दुख नाना ॥
 श्रवन नासिका काटैं लागे । राम सपथ दीन्हें हम त्यागे ॥
 पूँछिहु नाथ राम कटकाई । बदन कोटि सत बरनि न जाई ॥
 नाना बरन भालु कपि धारी । बिकटानन बिसाल भयकारी ॥
 जेहिं पुर दहेउ हतेउ सुत तोरा । सकल कपिन्ह मँहें तेहि बलु थोरा ॥
 अमित नाम भट कठिन कराला । अमित नाग बल विपुल बिसाला ॥
 दो०—द्विबिद मयंद नील नल अंगद गद बिकटासि ।

दधिमुख केहरि निसठ सठ जामवंत बलरासि ॥५४॥

ए कपि सब सुग्रीव समाना । इन्ह सम कोटिन्ह गनइ को नाना ॥
 राम कृपाँ अतुलित बल तिन्हहीं । तृन समान त्रैलोकहि गनहीं ॥
 अस मैं सुना श्रवन दसकंधर । पदुम अठारह जूथप बंदर ॥
 नाथ कटक मँहें सो कपि नाहीं । जो न तुम्हहि जीतै रन माहीं ॥
 परम क्रोध मीजहिं सब हाथा । आयसु पै न देहिं रघुनाथा ॥
 सोषहिं सिंधु सहित श्लष ब्याला । पूरहिं न त भरि कुधर बिसाला ॥
 मर्दि गर्द मिलवहिं दससीसा । ऐसेइ बचन कहहिं सब कीसा ॥
 गर्जहिं तर्जहिं सहज असंका । मानहुँ ग्रसन चहत हहिं लंका ॥

दो०—सहज सूर कपि भालु सब पुनि सिर पर प्रभु राम ।

रावन काल कोटि कहुँ जीति सकहिं संगाम ॥५५॥

राम तेज बल बुधि विपुलाई । सषि सहस्र सत सकहि न गाई ॥
 सक सर एक सोषि सत सागर । तव भ्रातहि पूँछेउ नय नागर ॥
 तासु बचन सुनि सागर पाहीं । मागत पंथ कृपा मन माहीं ॥
 सुनत बचन बिहसा दससीसा । जौँ असि मति सहाय कृत कीसा ॥
 सहज भीरु कर बचन दृढ़ाई । सागर सन ठानी मचलाई ॥
 मूढ़ मृषा का करसि बड़ाई । रिपु बल बुद्धि याह मैं पाई ॥
 सचिव सभीत बिभीषन जाकें । बिजय बिभूति कहाँ जग ताकें ॥
 सुनि खल बचन दूत रिस बाढ़ी । समय विचारि पत्रिका काढ़ी ॥
 रामानुज दीन्ही यह पाती । नाथ बचाइ जुड़ावहु छाती ॥
 बिहसि बाम कर लीन्ही रावन । सचिव बोलि सठ लाग बचावन ॥

दो०—बातन्ह मनहि रिझाइ सठ जनि घालसि कुल खीस ।

राम बिरोध न उबरसि सरन बिष्णु अज ईस ॥५६(क)॥
 की तजि मान अनुज इव प्रभु पद पंकज भृंग ।

होहि कि राम सरानल खल कुल सहित पतंग ॥५६(ख)॥

सुनत सभय मन मुख मुसुकाई । कहत दसानन सबहि सुनाई ॥
 भूमि परा कर गहत अकासा । लघु तापस कर बाग बिलासा ॥
 कह सुक नाथ सत्य सब बानी । समुझहु छाड़ि प्रकृति अभिमानी ॥
 सुनहु बचन मम परिहरि क्रोधा । नाथ राम सन तजहु बिरोधा ॥
 अति कोमल रघुवीर सुभाऊ । जद्यपि अखिल लोक कर राज ॥
 मिलत कृपा तुम्ह पर प्रभु करिही । उर अपराध न एकउ धरिही ॥

जनकसुता रघुनाथहि दीजे । एतना कहा मोर प्रभु कीजे ॥
 जब तेहिं कहा देन वैदेही । चरन प्रहार कीन्ह सठ तेही ॥
 नाइ चरन सिरु चला सो तहाँ । कृपासिंधु रघुनायक जहाँ ॥
 करि प्रनामु निज कथा सुनाई । राम कृपाँ आपनि गति पाई ॥
 रिषि अगस्ति कीं साप भवानी । राछस भयउ रहा मुनि ग्यानी ॥
 बंदि राम पद बारहिं बारा । मुनि निज आश्रम कहँ पगु धारा
 दो०—बिनय न मानत जलधि जड़ गए तीनि दिन बीति ।

बोले राम सकोप तब भय बिनु होइ न प्रीति ॥५७॥

लछिमन बान सरासन आनू । सोझौं बारिधि बिसिख कृसानू ॥
 सठ सन बिनय कुटिल सन प्रीती । सहज कृपन सन सुंदर नीती ॥
 ममता रत सन ग्यान कहानी । अति लोभी सन विरति बखानी ॥
 क्रोधिहि सम कामिहि हरि कथा । ऊसर बीज बाँँ फल जथा ॥
 अस कहि रघुपति चाप चढ़ावा । यह मत लछिमन के मन भावा ॥
 संधानेउ प्रभु बिसिख कराला । उठी उदधि उर अंतर ज्वाला ॥
 मकर उरग झष गन अकुलाने । जरत जंतु जलनिधि जब जाने ॥
 कनक थार भरि मनि गन नाना । विप्र रूप आयउ तजि माना ॥
 दो०—काटेहिं पइ कदरी फरइ कोटि जतन कोउ सींच ।

बिनय न मान खगेस सुनु डाटेहिं पइ नव नीच ॥५८॥

सभय सिंधु गहि पद प्रभु केरे । छमहु नाथ सब अवगुन मेरे ॥

गगन समीर अनल जल धरनी । इन्ह कह नाथ सहज जड़ करनी ॥

तव प्रेरित माया उपजाए। सृष्टि हेतु सब प्रथमि गाए ॥
 प्रभु आयसु जेहि कहँ जस अहई। सो तेहि भाँति रहें सुख लहई ॥
 प्रभु भल कीन्ह मोहि मिख दीन्ही। मरजादा पुनि तुम्हरी कीन्ही ॥
 ढोल गवाँर सूद्र पसु नारी। सकल ताड़ना के अधिकारी ॥
 प्रभु प्रताप मैं जाब सुखाई। उतरिहि कटकु न मोरि बड़ाई ॥
 प्रभु अग्या अपेल श्रुति गाई। करौं सो बेगि जो तुम्हहि सोहाई ॥

दो०—सुनत बिनीत बचन अति कह कृपाल मुसुकाइ ।

जेहि बिधि उतरै कपि कटकु तात सो कहहु उपाइ ॥५९॥

नाथ नील नल कपि दोउ भाई। लरिकाईं रिषि आसिष पाई ॥
 तिन्ह कें परस किएँ गिरि भारे। तरिहहिं जलधि प्रताप तुम्हारे ॥
 मैं पुनि उर धरि प्रभु प्रभुताई। करिहउँ बल अनुमान सहाई ॥
 एहि विधि नाथ पयोधि बँधाइअ। जेहिं यह सुजसु लोक तिहुँ गाइअ
 एहिं सर मम उत्तर तट बासी। हतहु नाथ खल नर अघ रासी ॥
 सुनि कृपाल सागर मन पीरा। तुरतहिं हरी राम रनधीरा ॥
 देखि राम बल पौरुष भारी। हरषि पयोनिधि भयउ सुखारी ॥
 सकल चरित कहि प्रभुहि सुनावा। चरन बंदि पायोधि सिधावा ॥

छं०—निज भवन गवनेउ सिंधु श्रीरघुपतिहि यह मत भायऊ ।

यह चरित कलि मलहर जथामति दास तुलसी गायऊ ॥

सुख भवन संसय समन दवन बिषाद रघुपति गुन गना ।

तजि सकल आस भरोस गावहि सुनहि संतत सठमना ॥

दो०-सकल सुमंगल दायक रघुनायक गुन गान ।

सादर सुनहिं ते तरहिं भव सिंधु बिना जलजान ॥ ६० ॥

मासपारायण, चौबीसवाँ विश्राम

इति श्रीमद्रामचरितमानसे सकलकलिकलुषविध्वंसने

पञ्चमः सोपानः समाप्तः ।

(सुन्दरकाण्ड समाप्त)




॥ श्रीरामाय नमः ॥

श्रीरामचरितमानस

लंकाकाण्ड



रामके लिये देव-रथ



तेजपुंज रथ दिव्य अनूपा

हरषि चढे कोसलपुर भूपा ॥

श्रीगणेशाय नमः

श्रीजानकीवल्लभो विजयते

श्रीरामचरितमानस

षष्ठ सोपान

(लंकाकाण्ड)

श्लोक

रामं कामारिसेव्यं भवभयहरणं कालमत्तेभसिंहं
योगीन्द्रं ज्ञानगम्यं गुणनिधिमजितं निर्गुणं निर्विकारम् ।
मायातीतं सुरेशं खलवधनिरतं ब्रह्मवृन्दैकदेवं
वन्दे कन्दावदातं सरसिजनयनं देवमुर्वीशरूपम् ॥१॥
शङ्खेन्द्राभमतीवसुन्दरतनुं शार्दूलचर्माम्बरं
कालव्यालकरालभूषणधरं गङ्गाशशाङ्कप्रियम् ।

काशीशं कलिकल्मषौघशमनं कल्याणकल्पद्रुमं
नौमीडयं गिरिजापतिं गुणनिधिं कन्दर्पहं शङ्करम् ॥२॥

यो ददाति सतां शम्भुः कैवल्यमपि दुर्लभम् ।
खलानां दण्डकृद्योऽसौ शङ्करः शं तनोतु मे ॥ ३ ॥

दो०—लव निमेष परमानु जुग बरष कल्प सर चंड ।
भजसि न मन तेहि राम को कालु जासु कोदंड ॥

सो०—सिंधु बचन सुनि राम सचिव बोलि प्रभु अस कहेउ ।
अब बिलंबु केहि काम करहु सेतु उतरै कटक ॥
सुनहु भानुकुल केतु जामवंत कर जोरि कह ।
नाथ नाम तव सेतु नर चढ़ि भव सागर तरहिं ॥

यह लघु जलधि तरत कति बारा । अस सुनि पुनि कह पवन कुमारा
प्रभु प्रताप बड़वानल भारी । सोषेउ प्रथम पयोनिधि बारी ॥
तव रिपु नारि रुदन जल धारा । भरेउ बहोरि भयउ तेहिं खारा ॥
सुनि अति उकुति पवन सुत केरी । हरषे कपि रघुपति तन हेरी ॥
जामवंत बोले दोउ भाई । नल नीलहि सब कथा सुनाई ॥
राम प्रताप सुमिरि मन माहीं । करहु सेतु प्रयास कछु नाहीं ॥
बोलि लिए कपि निकर बहोरी । सकल सुनहु विनती कछु मोरी ॥
राम चरन पंकज उर धरहू । कौतुक एक भालु कपि करहू ॥
धावहु मर्कट बिकट बरूथा । आनहु बिटप गिरिन्ह के जूया ॥
सुनि कपि भालु चले करि दूहा । जय रघुबीर प्रताप समूहा ॥

दो०—अति उत्तंग गिरि पादप लीलहिं लेहिं उठाइ ।

आनि देहिं नल नीलहि रचहिं ते सेतु बनाइ ॥ १ ॥

सैल बिसाल आनि कपि देहीं । कंदुक इव नल नील ते लेहीं ॥
देखि सेतु अति सुंदर रचना । बिहसि कृपानिधि बोले बचना ॥
परम रम्य उत्तम यह धरनी । महिमा अमित जाइ नहिं बरनी ॥
करिहउँ इहाँ संभु थापना । मोरे हृदयँ परम कल्पना ॥
मुनि कपीस बहु दूत पठाए । मुनिवर सकल बोलि लै आए ॥
लिंग थापि बिधिवत करि पूजा । सिव समान प्रिय मोहि न दूजा ॥
सिव द्रोही मम भगत कहावा । सो नर सपनेहुँ मोहि न पावा ॥
संकर विमुख भगति चह मोरी । सो नारकी मूढ़ मति थोरी ॥
दो०—संकरप्रिय मम द्रोही सिव द्रोही मम दास ।

ते नर करहिं कल्प भरि घोर नरक महुँ बास ॥ २ ॥

जे रामेस्वर दरसनु करिहहिं । ते तनु तजि मम लोक सिधरिहहिं
जो गंगाजल आनि चढ़ाइहि । सो साजुज्य मुक्ति नर पाइहि ॥
होइ अकाम जो छल तजि सेइहि । भगति मोरि तेहि संकर देइहि ॥
मम कृत सेतु जो दरसनु करिही । सो बिनु श्रम भवसागर तरिही ॥
राम बचन सब के जिय भाए । मुनिवर निज निज आश्रम आए ॥
गिरिजा रघुपति कै यह रीती । संतत करहिं प्रनत पर प्रीती ॥
बाँधा सेतु नील नल नागर । राम कृपाँ जसु भयउ उजागर ॥
बुडहिं आनहि बोरहिं जेई । भए उपल बोहित सम तेई ॥

महिमा यह न जलधि कह बरनी । पाहन गुन न कपिन्ह कह करनी
दो०—श्री रघुबीर प्रताप ते सिंधु तरे पाषाण ।

ते मतिमंद जे राम तजि भजहि जाइ प्रभु आन ॥ ३ ॥

बाँधि सेतु अति सुदृढ़ बनावा । देखि कृपानिधि के मन भावा ॥
चली सेन कछु बरनि न जाई । गर्जहि मर्कट भट समुदाई ॥
सेतुबंध ढिग चढ़ि रघुराई । चितव कृपाल सिंधु बहुताई ॥
देखन कहूँ प्रभु करुना कंदा । प्रंगट भए सब जलचर बृंदा ॥
मकर नक्र नाना झष ब्याला । सत जोजन तन परम बिसाला ॥
अइसेउ एक तिन्हहि जे खाहीं । एकन्ह के डर तेपि डेराहीं ॥
प्रभुहि बिलोकहिं टरहिं न टारे । मन हरषित सब भए सुखारे ॥
तिन्ह कीं ओट न देखिअ बारी । मगन भए हरि रूप निहारी ॥
चला कटकु प्रभु आयसु पाई । को कहि सक कपि दल विपुलाई ॥
दो०—सेतुबंध भइ भीर अति कपि नभ पंथ उड़ाहि ।

अपर जलचरन्हि ऊपर चढ़ि चढ़ि पारहि जाहिं ॥ ४ ॥
अस कौतुक बिलोकि द्वौ भाई । बिहँसि चले कृपाल रघुराई ॥
सेन सहित उतरे रघुबीरा । कहि न जाइ कपि जूथप भीरा ॥
सिंधु पार प्रभु डेरा कीन्हा । सकल कपिन्ह कहूँ आयसु दीन्हा ॥
खाहु जाइ फल मूल सुहाए । सुनत भालु कपि जहँ तहँ धाए ॥
सब तरु फरे राम हित लागी । रितु अरु कुरितु काल गति त्यागी ॥
खाहिं मधुर फल बिटप हलावहिं । लंका सन्मुख सिखर चलावहिं ॥

Vinay Avasthi Sahib Bhuvan Vani Trust Donations

जहँ कहँ फिरत निसाचर पावहि । घेरि सकल बहु नाच नचावहि॥
दसनन्हि काटि नासिका काना । कहि प्रभु सुजसु देहिं तब जाना॥
जिन्ह कर नासा कान निपाता । तिन्ह रावनहि कही सब वाता ॥
सुनत श्रवन बारिधि बंधाना । दस मुख बोलि उठा अकुलाना ॥

दो०—बाँध्यो बननिधि नीरनिधि जलधि सिंधु बारीस ।

सत्य तोयनिधि कंपति उदधि पयोधि नदीस ॥ ५ ॥

निज विकलता विचारि बहोरी । बिहँसि गयउ गृह करि भय भोरी॥
मंदोदरीं सुन्यो प्रभु आयो । कौतुकीं पायोधि बँधायो ॥
कर गहि पतिहि भवन निज आनी । बोली परम मनोहर बानी ॥
चरन नाइ सिरु अंचलु रोपा । सुनहु बचन पिय परिहरि कोपा
नाथ बयरु कीजे ताही सों । बुधि बल सकिअ जीति जाही सों
तुम्हहि रघुपतिहि अंतर कैसा । खलु खद्योत दिनकरहि जैसा ॥
अतिबल मधु कैटभ जेहिं मारे । महावीर दितिसुत संघारे ॥
जेहि बलि बाँधि सहसभुज मारा । सोइ अवतरेउ हरन महि भारा ॥
तासु विरोध न कीजिअ नाथा । काल करम जिव जाकें हाथा ॥
दो०—रामहि सौंपि जानकी नाइ कमल पद माथ ।

सुत कहँ राज समर्पि बन जाइ भजिअ रघुनाथ ॥ ६ ॥

नाथ दीनदयाल रघुराई । बाघउ सनमुख गएँ न खाई ॥
चाहिअ करन सो सब करि बीते । तुम्ह सुर असुर चराचर जीते ॥
संत कहहिं असि नीति दसानन । चौथेंपन जाइहि नृप कानन ॥

Vinay Ayasthi Sahib Bhuvan Vani Trust Donations

तासु भजनु कीजिअ तह भती । जो कतो पालक संहती ॥
 सोइ रघुवीर प्रनत अनुरागी । भजहु नाथ ममता सब त्यागी ॥
 मुनिवर जतनु करहिं जेहि लागी । भूप राजु तजि होहिं विरागी ॥
 सोइ कोसलाधीस रघुराया । आयउ करन तोहि पर दाया ॥
 जौं पिय मानहु मोर सिखावन । सुजसु होइ तिहुँ पुर अति पावन
 दो०—अस कहि नयन नीर भरि गहि पद कंपित गात ।

नाथ भजहु रघुनाथहि अचल होइ अहिवात ॥ ७ ॥

तब रावन मयसुता उठाई । कहै लाग खल निज प्रभुताई ॥
 सुनु तैं प्रिया वृथा भय माना । जग जोधा को भोहि समाना ॥
 बरुन कुबेर पवन जम काला । भुजबल जितेउँ सकल दिगपाला ॥
 देव दनुज नर सब बस मोरें । कवन हेतु उपजा भय तोरें ॥
 नाना विधि तेहि कहेसि बुझाई । सभाँ बहोरि बैठ सो जाई ॥
 मंदोदरीं हृदयँ अस जाना । काल वस्य उपजा अभिमाना ॥
 सभाँ आइ मंत्रिन्ह तेहिं बूझा । करव कवन विधिरिपु सैंजूझा ॥
 कहहिं सचिव सुनु निसिचर नाहा । बार बार प्रभु पूछहु काहा ॥
 कहहु कवन भय करिअ विचारा । नर कपि भालु अहार हमारा ॥
 दो०—सब के बचन श्रवन सुनि कह प्रहस्त कर जोरि ।

नीति बिरोध न करिअ प्रभु मंत्रिन्ह मति अति थोरि ॥ ८ ॥

कहहिं सचिव सठ ठकुर सोहाती । नाथ न पूर आव एहि भाँती ॥

बारिधि नाधि एक कपि आवा । तासु चरित मन महुँ सब गावा ॥

छुधा न रही तुम्हहि तब कहूँ । जिरत नगर कस न धरि खाहूँ ॥
 सुनत नीक आगें दुख पावा । सचिवन अस मत प्रभुहि सुनावा
 जेहि बारीस बँधायउ हेली । उतरेउ सेन समेत सुबेला ॥
 सो भनु मनुज खाव हम भाई । बचन कहहिं सब गाल फुलाई ॥
 तात बचन मम सुनु अति आदर । जनि मन गुनहु मोहि करि कादर
 प्रिय बानी जे सुनहिं जे कहहीं । ऐसे नर निकाय जग अहहीं ॥
 बचन परम हित सुनत कठोरे । सुनहिं जे कहहिं ते नर प्रभु थोरे ॥
 प्रथम बसीठ पठउ सुनु नीती । सीता देइ करहु पुनि प्रीती ॥

दो०—नारि पाइ फिरि जाहिं जौं तौ न बढाइअ रारि ।

नाहिं त सन्मुख समर महि तात करिअ हठि मारि ॥ ९ ॥
 यह मत जौं मानहु प्रभु मोरा । उभय प्रकार सुजसु जग तोरा ॥
 सुत सन कह दसकंठ रिसाई । असि मति सठ केहिं तोहि सिखाई
 अबहीं ते उर संसय होई । बेनुमूल सुत भयहु घमोई ॥
 सुनि पितु गिरा परुष अति घोरा । चला भवन कहि बचन कठोरा ॥
 हित मत तोहि न लागत कैसें । काल बिबस कहूँ भेषज जैसें ॥
 संध्या समय जानि दससीसा । भवन चलेउ निरखत भुजबीसा ॥
 लंका सिखर उपर आगारा । अति बिचित्र तहँ होइ अखारा ॥
 बैठ जाइ तेहिं मंदिर रावन । लागे किंनर गुन गन गावन ॥
 बाजहिं ताल पखाउज बीना । नृत्य करहिं अपछरा प्रबीना ॥

दो०-सुनासीर सत सरिस सो सतत करइ बिलास ।

परम प्रबल रिपु सीस पर तद्यपि सोच न त्रास ॥ १० ॥

इहाँ सुवेल सैल रघुवीरा । उतरे सेन सहित अति भीरा ॥
 सिखर एक उतंग अति देखी । परम रम्य सम सुभ्र बिसेषी ॥
 तहँ तरु किसलय सुमन सुहाए । लछिमन रचि निज हाथ डसाए ॥
 ता पर रुचिर मृदुल मृगछाला । तेहिं आसन आसीन कृपाला ॥
 प्रभु कृत सीस कपीस उछंगा । बाम दहिन दिसि चाप निषंगा ॥
 दुहुँ कर कमल सुधारत बाना । कह लंकेस मंत्र लगि काना ॥
 बड़भागी अंगद हनुमाना । चरन कमल चापत बिधि नाना ॥
 प्रभु पाछें लछिमन बीरासन । कटि निषंग कर बान सरासन ॥

दो०-एहि बिधि कृपा रूप गुन धाम रामु आसीन ।

धन्य ते नर एहिं ध्यान जे रहत सदा लयलीन ॥ ११(क) ॥

पूरब दिसा बिलोकि प्रभु देखा उदित मयंक ।

कहत सबहि देखहु ससिहि मृगपति सरिस असंक ॥ ११(ख) ॥

पूरब दिसि गिरिगुहा निवासी । परम प्रताप तेज बल रासी ॥
 मत्त नाग तम कुंभ बिदारी । ससि केसरी गगन बन चारी ॥
 बिथुरे नभ मुकुताहल तारा । निसि सुंदरी केर सिंगारा ॥
 कह प्रभु ससि महुँ मेचकताई । कहहु काह निज निज मति भाई ॥
 कह सुग्रीव सुनहु रघुराई । ससि महुँ प्रगट भूमि कै झाई ॥
 मारेउ राहु ससिहि कह कोई । उर महुँ परी स्यामता सोई ॥

कोउ कह जेब विधिरति मुख कोन्ही । सार भाग ससि पर हबि लीन्हा ॥
छिद्र सो प्रगट इंदु उर माहीं । तेहि मग देखि अनभ परिछाहीं ॥
प्रभु कह गरल बंधु ससि केरा । अति प्रिय निज उर दीन्ह बसेरा
विष संजुत कर निकर पसारी । जारत विरहवंत नर नारी ॥

दो०—कह हनुमंत सुनहु प्रभु ससि तुम्हार प्रिय दास ।

तव मूरति बिधु उर बसति सोइ स्यामता अभास ॥ १२(क) ॥

नवाह्नपारायण, सातवाँ विश्राम

पवन तनय के बचन सुनि विहँसे राम सुजान ।

दच्छिन दिसि अवलोकि प्रभु बोले कृपा निधान ॥ १२(ख) ॥

देखु विभीषन दच्छिन आसा । घन घमंड दामिनी विलासा ॥
मधुर मधुर गरजइ घन घोरा । होइ वृष्टि जनु उपल कठोरा ॥
कहत विभीषन सुनहु कृपाला । होइ न तड़ित न बारिद माला ॥
लंका सिखर उपर आगारा । तहँ दसकंधर देख अखारा ॥
छत्र मेघडंबर सिर धारी । सोइ जनु जलद घटा अति कारी
मंदोदरी श्रवन ताटंका । सोइ प्रभु जनु दामिनी दमंका ॥
बाजहिं ताल मृदंग अनूपा । सोइ रव मधुर सुनहु सुरभूपा ॥
प्रभु मुसुकान समुझि अभिमाना । चाप चढ़ाइ बान संधाना ॥

दो०—छत्र मुकुट ताटंक तब हते एक ही बान ।

सब कें देखत महि परे मरमु न कोऊ जान ॥ १३(क) ॥

Vinay Avasthi Sahib Bhuvan Vani Trust Donations
अस कानुक कर राम सर प्रबिसेउ आइ निषण ।

रावन सभा ससंक सब देखि महा रसभंग ॥ १३ (ख) ॥
कंप न भूमि न मरुत विसेषा । अस्त्र सस्त्र कछु नयन न देखा ॥
सोचहिं सब निज हृदय मझारी । असगुन भयउ भयंकर भारी ॥
दसमुख देखि सभा भय पाई । बिहसि बचन कह जुगुति बनाई
सिरउ गिरे संतत सुभ जाही । मुकुट परे कस असगुन ताही ॥
सयने करहु निज निज गृह जाई । गवने भवन सकल सिर नाई ॥
मंदोदरी सोच उर बसेऊ । जव ते श्रवनपूर महि खसेऊ ॥
सजल नयन कह जुग कर जोरी । सुनहु प्रानपति विनती मोरी ॥
कंत राम विरोध परिहरहू । जानि मनुज जनि हठ मन धरहू

दो०-बिस्वरूप रघुवंस मनि करहु बचन बिस्वासु ।

लोक कल्पना वेद कर अंग अंग प्रति जासु ॥ १४ ॥

पद पाताल सीस अज धामा । अपर लोक अँग अँग विश्रामा ॥
भृकुटि विलास भयंकर काला । नयन दिवाकर कच घनमाला ॥
जासु घ्रान अस्विनीकुमारा । निसि अरु दिवस निमेष अपारा ॥
श्रवन दिसा दस वेद बखानी । मारुत स्वास निगम निज बानी
अधर लोभ जम दसन कराला । माया हास बाहु दिगपाला ॥
आनन अनल अंबुपति जीहा । उतपति पालन प्रलय समीहा ॥
रोम राजि अष्टादस भारा । अस्थि सैल सरिता नस जारा ॥

उदर उदधि अधगो जातना । जगमय प्रभु का बह कल्पना ॥

Vinay Avasthi Sahib Bhuvan Vani Trust Donations

दो०—अहंकार सिव बुद्धि अज मन ससि चित महिमा

मनुज बास सचराचर रूप राम भगवान ॥१५(क)॥

अस विचारि सुनु प्रानपति प्रभु सन बयरु बिहाइ ।

प्रीति करहु रघुबीर पद सम अहिवात न जाइ ॥१५(ख)॥

बिहँसा नारि वचन सुनि काना । अहो मोह महिमा बलवाना ॥
नारि सुभाउ सत्य सब कहहीं । अवगुन आठ सदा उर रहहीं ॥
साहस अनृत चपलता माया । भय अवित्रेक असौच अदाया ॥
रिपु कर रूप सकल तैं गावा । अति विसाल भय मोहि सुनावा ॥
सो सब प्रिया सहज बस मोरें । समुझि परा प्रसाद अब तोरें ॥
जानिउँ प्रिया तोरि चतुराई । एहि विधि कहहु मोरि प्रभुताई ॥
तव बतकही गूढ़ मृगलोचनि । समुझत सुखद सुनत भय मोचनि
मंदोदरि मन महुँ अस ठयऊ । पियहि काल बस मति भ्रम भयऊ
दो०—एहि विधि करत विनोद बहु प्रात प्रगट दसकंध ।

सहज असंक लंकपति सभाँ गयउ मद अंध ॥१६(क)॥

सो०—फूलइ फरइ न बेत जदपि सुधा बरपहि जलद ।

मूरूख हृदयँ न चेत जौं गुर मिलहिं बिरंचि सम ॥१६(ख)॥

इहाँ प्रात जागे रघुराई । पूछा मत सब सचिव बोलाई ॥
कहहु बेगि काँ करिअ उपाई । जामवंत कह पद सिरु नाई ॥

सुनु सर्वग्य सकल उर बासी । बुधि बल तेज धर्म गुन रासी ॥

मंत्र कहउँ निज मति अनुसार । दूत पठाइअ बालिकुमारा ॥

नीक मैत्र सब के मन मनी अंगद सन कह कृपानिधाना ॥
 बालितनय बुधि बल गुन धामा । लंका जाहु तात मम कामा ॥
 बहुत बुझाई तुम्हहि का कहउँ । परम चतुर मैं जानत अहउँ ॥
 काजु हमार तासु हित होई । रिपु सन करेहु बतकही सोई ॥
 सो०—प्रभु अग्या धरि सीस चरन बंदि अंगद उठेउ ।

सोइ गुनसागर ईस सम कृपा जा पर करहु ॥१७(क)॥

स्वयंसिद्ध सब काज नाथ मोहि आदरु दियउ ।

अस विचारि जुबराज तन पुलकित हरषित हियउ ॥१७(ख)॥

बंदि चरन उर धरि प्रभुताई । अंगद चलेउ सबहि सिरु नाई ॥
 प्रभु प्रताप उर सहज असंका । रन बाँकुरा बालिसुत बंका ॥
 पुर पैठत रावन कर बेटा । खेलत रहा सो होइ गै भेटा ॥
 बातहिं बात करष बढ़ि आई । जुगल अतुल बल पुनि तरुनाई ॥
 तेहिं अंगद कहूँ लात उठाई । गहि पद पटकेउ भूमि भवाँई ॥
 निसिचर निकर देखि भट भारी । जहँ तहँ चले न सकहिं पुकारी ॥
 एक एक सन मरमु न कहहीं । समुझि तासु बध चुप करि रहहीं ॥
 भयउ कोलाहल नगर मझारी । आवा कपि लंका जेहिं जारी ॥
 अब धौं कहा करिहि करतारा । अति सभीत सब करहिं विचारा ॥
 बिनु पूछें मगु देहिं दिखाई । जेहि विलोक सोइ जाइ सुखाई ॥

दो०—गयउ सभा दरबार तब सुमिरि राम पद कंज ।

सिंह ठवनि इत उत चितव धीर बीर बल पुंज ॥१८॥

तुरत निसाचर एक पठावा। समाचार रावनहि जनावा ॥
 सुनत बिहँसि बोला दससीसा। आनहु बोलि कहाँ कर कीसा ॥
 आयसु पाइ दूत बहु धाए। कपिकुंजरहि बोलि लै आए ॥
 अंगद दीख दसानन वैसैं। सहित प्रान कजलगिरि जैसैं ॥
 भुजा बिटप सिर सुंग समाना। रोमावली लता जनु नाना ॥
 मुख नासिका नयन अरु काना। गिरि कंदरा खोह अनुमाना ॥
 गयउ सभाँ मन नेकु न मुरा। बालितनय अतिबल बाँकुरा ॥
 उठे सभासद कपि कहूँ देखी। रावन उर भा क्रोध बिसेप्री ॥

दो०—जथा मत्त गज जूथ महुँ पंचानन चलि जाइ ।

राम प्रताप सुमिरि मन बैठ सभाँ सिरु नाइ ॥१९॥

कह दसकंठ कवन तैं बंदर। मैं रघुबीर दूत दसकंधर ॥
 मम जनकहि तोहि रही मितार्ई। तव हित कारन आयउँ भाई ॥
 उत्तम कुल पुलस्ति कर नाती। सिव विरंचि पूजेहु बहु भाँती ॥
 बर पायहु कीन्हेहु सब काजा। जीतेहु लोकपाल सब राजा ॥
 नृप अभिमान मोह बस किंवा। हरि आनिहु सीता जगदंबा ॥
 अब सुभ कहा सुनहु तुम्ह मोरा। सब अपराध छमिहि प्रभु तोरा ॥
 दसन गहहु तृन कंठ कुठारी। परिजन सहित संग निज नारी ॥
 सादर जनकसुता करि आगैं। एहि विधि चलहु सकल भय त्यागैं ॥

दो०—प्रनतपाल रघुवंसमनि त्राहि त्राहि अब मोहि ।

भारत गिरा सुनत प्रभु अभय करैगो तोहि ॥२०॥

रे कपिपोत बोलु संभारी। मूढ़ न जानेहि मोहि सुरारी॥
 कहु निज नाम जनक कर भाई। केहि नातें मानिऐ मिताई॥
 अंगद नाम बालि कर बेटा। तासों कबहुँ भई ही भेटा॥
 अंगद बचन सुनत सकुचाना। रहा बालि बानर मैं जाना॥
 अंगद तहीं बालि कर बालक। उपजेहु बंस अनल कुल घालक॥
 गर्भ न गयउ व्यर्थ तुम्ह जायहु। निज मुख तापस दूत कहायहु॥
 अब कहु कुसल बालि कहँ अहई। बिहँसि बचन तब अंगद कहई॥
 दिन दस गएँ बालि पहिं जाई। बूझेहु कुसल सखा उर लाई॥
 राम बिरोध कुसल जसि होई। सो सब तोहि सुनाइहि सोई॥
 सुनु सठ भेद होइ मन ताकें। श्रीरघुवीर हृदय नहिं जाकें॥

दो०-हम कुल घालक सत्य तुम्ह कुल पालक दससीस।

अंधउ बधिर न अस कहहिं नयन कान तब बीस ॥२१॥

सिव बिरंचि सुर मुनि समुदाई। चाहत जासु चरन सेवकाई॥
 तासु दूत होइ हम कुल बोरा। अइसिहुँ मति उर बिहर न तोरा॥
 सुनि कठोर बानी कपि केरी। कहत दसानन नयन तरेरी॥
 खल तब कठिन बचन सब सहऊँ। नीति धर्म मैं जानत अहऊँ॥
 कह कपि धर्मसीलता तोरी। हमहुँ सुनी कृत पर त्रिय चोरी॥
 देखी नयन दूत रखवारी। बूढ़ि न मरहु धर्म व्रतधारी॥
 कान नाक बिनु भगिनि निहारी। छमा कीन्हि तुम्ह धर्म बिचारी॥

धर्मसीलता तब जग जागी। पावा दरसु हमहुँ बड़ा भारी॥

दो०—जनि जल्पसि जड़ जंतु कपि सठ बिलोकु मम बाहु ।

लोकपाल बल बिपुल ससि ग्रसन हेतु सब राहु ॥२२(क)॥

पुनि नभ सर मम कर निकर कमलन्हि पर करि बास ।

सोभत भयउ मराल इव संभु सहित कैलास ॥२२(ख)॥

तुम्हरे कटक माझ सुनु अंगद । मोसन भिरिहि कवन जोधा बद

तव प्रभु नारि बिरहँ बलहीना । अनुज तासु दुख दुखी मलीना ॥

तुम्ह सुग्रीव कूलद्रुम दोऊ । अनुज हमार भीरु अति सोऊ ॥

जामवंत मंत्री अति बूढ़ा । सो कि होइ अब समरारूढ़ा ॥

सिल्पि कर्म जानहिं नल नीला । है कपि एक महा बलसीला ॥

आवा प्रथम नगरु जेहिं जारा । सुनत बचन कह बालिकुमारा ॥

सत्य बचन कहु निसिचर नाहा । साँचेहुँ कीस कीन्ह पुर दाहा ॥

रावन नगर अल्प कपि दहई । सुनि अस बचन सत्य को कहई

जो अति सुभट सराहेहु रावन । सो सुग्रीव केर लघु धावन ॥

चलइ बहुत सो बीर न होई । पठवा खबरि लेन हम सोई ॥

दो०—सत्य नगरु कपि जारेउ बिनु प्रभु आयसु पाइ ।

फिरि न गयउ सुग्रीव पहिं तेहिं भय रहा लुकाइ ॥२३(क)॥

सत्य कहहि दसकंठ सब मोहि न सुनि कछु कोह ।

कोउ न हमारें कटक अस तो सन लरत जो सोह ॥२३(ख)॥

प्रीति बिरोध समान सन करिअ नीति असि आहि ।

जौं मृगपति बध मेडुकन्हि भल कि कहइ कोउ ताहि ॥२३(ग)॥

जद्यपि लघुता राम कहूँ तोहि बधैं बड़ दोष ।

तदपि कठिन दसकंठ सुनु छत्र जाति कर रोष ॥२३(घ)॥

बक्र उक्ति धनु बचन सर हृदय दहेउ रिपु कीस ।

प्रतिउत्तर सड़सिन्ह मनहु काढ़त भट दससीस ॥२३(ङ)॥

हँसि बोलेउ दसमौलि तब कपि कर बड़ गुन एक ।

जो प्रतिपालइ तासु हित करइ उपाय अनेक ॥२३(च)॥

धन्य कीस जो निज प्रभु काजा । जहँ तहँ नाचइ परिहरि लाजा ॥

नाचि कूदि करि लोग रिझाई । पति हित करइ धर्म निपुनाई ॥

अंगद स्वामिभक्त तब जाती । प्रभु गुन कस न कहसि एहि भाँती

मैं गुन गाहक परम सुजाना । तव कटु रटनि करउँ नहिं काना ॥

कह कपि तव गुन गाहकताई । सत्य पवनसुत मोहि सुनाई ॥

बन विधंसि सुत बधि पुर जारा । तदपि न तेहिं कछु कृत अपकारा

सोइ विचारि तव प्रकृति सुहाई । दसकंधर मैं कीन्हि ढिठाई ॥

देखेउँ आइ जो कछु कपि भाषा । तुम्हरेँ लाज न रोष न माखा ॥

जौं असि मति पितु खाए कीसा । कहि अस बचन हँसा दससीसा ॥

पितहि खाइ खातेउँ पुनि तोही । अबहीं समुझि परा कछु मोही ॥

बालि त्रिमल जस भाजन जानी । हतउँ न तोहि अधम अभिमानी ॥

कहु रावन रावन जग केते । मैं निज श्रवन सुने सुनु जेते ॥

बलिहि जितन एक गयउ पताला । राखेउ बाँधि सिसुन्ह हयसाला

खेलहि बालक मारहि जाई । दया लागि बलि दीन्ह छोडाई ॥

एक बहोरि सहसभुज देखा । धाइ घरा जिमि जंतु बिसेषा ॥
कौतुक लागि भवन लै आवा । सो पुलस्ति मुनि जाइ छोड़ावा ॥

श्लोक-एक कहत मोहि सकुच अति रहा बालि कीं काँख ।

इन्ह महुँ रावन तैं कवन सत्य बढहि तजि माख ॥२४॥

सुनु सठ सोइ रावन बलसीला । हरगिरि जान जासु भुज लीला ॥
जान उमापति जासु सुराई । पूजेउँ जेहि सिर सुमन चढ़ाई ॥
सिर सरोज निज करन्हि उतारी । पूजेउँ अमित बार त्रिपुरारी ॥
भुज विक्रम जानहिं दिगपाला । सठ अजहूँ जिन्ह कें उर साला ॥
जानहिं दिग्गज उर कठिनाई । जव जव भिरउँ जाइ वरिआई ॥
जिन्ह के दसन कराल न फूटे । उर लागत मूलक इव टूटे ॥
जासु चलत डोलति इमि धरनी । चढ़त मत्त गज जिमि लघु तरनी ॥
सोइ रावन जग विदित प्रतापी । सुनेहि न श्रवन अलीक प्रलापी ॥

दो०-तेहि रावन कहँ लघु कहसि नर कर करसि बखान ।

रे कपि बर्यर खर्व खल अब जाना तव ग्यान ॥२५॥

मुनि अंगद सकोप कह बानी । बोलु सँभारि अधम अभिमानी ॥
सहसबाहु भुज गहन अपारा । दहन अनल सम जासु कुठारा ॥
जासु परसु सागर खर धारा । बूड़े नृप अगनित बहु बारा ॥
तासु गर्व जेहि देखत भागा । सो नर क्यों दससीस अभागा ॥
राम मनुज कस रे सठ बंगा । धन्वी कामु नदी पुनि गंगा ॥

पसु सुरधेनु कल्पतरु रूखा । अन्न दान अरु रस पीयूषा ॥

बैनतेय खग अहि सहसानन । चिंतामनि पुनि उपल दसानन ॥
 सुनु मतिमंद लोक बैकुंठा । लाभकिरघुपतिभगतिअकुंठा ॥

दो०—सेन सहित तव मान मथि बन उजारि पुरजारि ।

कस रे सठ हनुमान कपि गयउ जो तव सुत मारि ॥२६॥

सुनु रावन परिहरि चतुराई । भजसि न कृपासिंधु रघुराई ॥
 जौं खल भएसि राम कर द्रोही । ब्रह्म रुद्र सक राखि न तोही ॥
 मूढ़ बृथा जनि मारसि गाला । राम बयर अस होइहि हाला ॥
 तव सिर निकर कपिन्ह के आगें । परिहहिं धरनि राम सर लागें ॥
 ते तव सिर कंदुक सम नाना । खेलिहहिं भालु कीस चौगाना ॥
 जबहिं समर कोपिहि रघुनायक । छुटिहहिं अति कराल बहु सायक ॥
 तब कि चलिहि अस गाल तुम्हारा । अस बिचारि भजु राम उदारा ॥
 सुनत वचन रावन परजरा । जरत महानल जनु धृत परा ॥

दो०—कुंभकरन अस बंधु मम सुत प्रसिद्ध सकारि ।

मोर पराक्रम नहिं सुनेहि जितेउँ चराचर झारि ॥२७॥

सठ साखामृग जोरि सहाई । बाँधा सिंधु इहइ प्रभुताई ॥
 नाघहिं खग अनेक बारीसा । सूर न होहिं ते सुनु सब कीसा ॥
 मम भुज सागर बल जल पूरा । जहँ बूड़े बहु सुर नर सूरा ॥
 बीस पयोधि अगाध अपारा । को अस वीर जो पाइहि पारा ॥
 दिगपालन्ह मैं नीर भरावा । भूप सुजस खल मोहि सुनावा ॥

जौं पै समर सुभद्र तव नाथा । सुनि पुनि कहसि जायु गुनगाथा ॥

तौ बसीठ पठवत केहि काजा । रिपु सन प्रीति करत नहि लाजा ॥

हरगिरि मथन निरखु मम बाहु । पुनि सठ कपि निज प्रभुहि सराहु ॥

दो०—सूर कवन रावन सरिस स्वकर काटि जेहिं सीस ।

हुने अनल अति हरष बहु बार साखि गौरीस ॥२८॥

जरत बिलोकेउँ जबहिं कपाला । बिधि के लिखे अंक निज भाला ॥

नर कैं कर आपन बध बाँची । हसेउँ जानि बिधि गिरा असाँची ॥

सोउ मन समुझि त्रास नहिं मोरें । लिखा विरंचि जरठ मति भोरें ॥

आन बीर बल सठ मम आगें । पुनि पुनि कहसि लाज पति त्यागें

कह अंगद सलज्ज जग माहीं । रावन तोहि समान कोउ नाहीं ॥

लाजवंत तव सहज सुभाऊ । निज मुख निज गुन कहसि न काऊ

सिर अरु सैल कथा चित रही । ताते बार बीस तैं कही ॥

सो भुजबल राखेहु उर घाली । जीतेहु सहसबाहु बलि वाली ॥

सुनु मतिमंद देहि अब पूरा । काटें सीस कि होइअ सूरा ॥

इंद्रजालि कहूँ कहिअ न बीरा । काटइ निज कर सकल सरीरा ॥

दो०—जरहिं पतंग मोह बस भार बहहिं खर बृंद ।

ते नहिं सूर कहावहिं समुझि देखु मतिमंद ॥२९॥

अब जनि बतबढ़ाव खल करही । सुनु मम वचन मान परिहरही ॥

दसमुख मैं न बसीठीं आयउँ । अस बिचारि रघुबीर पठायउँ ॥

बार बार अस कहइ कृपाला । नहिं गजारि जसु बधैं सुकाला ॥

मन महुँ समुझि वचन प्रभु केरे । सहेउँ कठोर वचन सठ तेरे ॥

नाहिं ते करि मुख भजन तारा । लै जातेउ सीताहि वरजोरा ॥
 जानेउँ तव बल अधम सुरारी । सूनें हरि आनिहि परनारी ॥
 तैं निसिचर पति गर्व बहूता । मै रघुपति सेवक कर दूता ॥
 जौं न राम अपमानहि डरऊँ । तोहि देखत अस कौतुक करऊँ ॥
 दो०—तोहि पटक महि सेन हति चौपट करि तव गाउँ ।

तव जुबतिन्ह समेत सठ जनकसुतहि लै जाउँ ॥३०॥
 जौं अस करौं तदपि न बड़ाई । मुएहि बधे नहिं कछु मनुसाई ॥
 कौल कामवस कृपिन विमूढ़ा । अति दरिद्र अजसी अति बूढ़ा ॥
 सदा रोगवस संतत क्रोधी । विष्णु विमुख श्रुति संत विरोधी ॥
 तनु पोषक निंदक अघ खानी । जीवत सब सम चौदह प्रानी ॥
 अस विचारि खल बधेउँ न तोही । अव जनि रिस उपजावसि मोही ॥
 सुनि सकोप कह निसिचर नाथा । अधर दसन दसि मीजत हाथा ॥
 रे कपि अधम मरन अव चहसी । छोटे बदन बात बड़ि कहसी ॥
 कटु जल्पसि जड़ कपि बल जाकें । बल प्रताप बुधि तेज न ताकें ॥

दो०—अगुन अमान जानि तेहि दीन्ह पिता बनबास ।

सो दुख अरु जुबती बिरह पुनि निसि दिन मम त्रास ॥३१(क)॥

जिन्ह के बल कर गर्व तोहि अइसे मनुज अनेक ।

खाहिं निसाचर दिवस निसि मूढ़ समुद्धु तजि टेक ॥३१(ख)॥

जब तेहिं कीन्हि राम कै निंदा । क्रोधवंत अति भयउ कपिंदा ॥

हरि हर निंदा सुनइ जो काना । होइ पाप गोघात समाना ॥

कटकटान कपिकुंजर भारी । दुहु भुजदंड तमकि महि मारी ॥
 डोलत धरनि सभासद खसे । चले भाजि भय मारुत ग्रसे ॥
 गिरत सँभारि उठा दसकंधर । भूतल परे मुकुट अति सुंदर ॥
 कछु तेहिं लै निज सिरन्हि सँवारे । कछु अंगद प्रभु पास पवारे ॥
 आवत मुकुट देखि कपि भागे । दिनहीं लूक परन विधि लागे ॥
 की रावन करि कोप चलाए । कुलिस चारि आवत अति धाए ॥
 कह प्रभु हँसि जनि हृदयँ डेराहू । लूक न असनि केतु नहिं राहू ॥
 ए किरीट दसकंधर केरे । आवत बालितनय के प्रेरे ॥

दो०—तरकि पवनसुत कर गहे आनि धरे प्रभु पास ।

कौतुक देखहिं भालु कपि दिनकर सरिस प्रकास ॥३२(क)॥

उहाँ सकोपि दसानन सब सन कहत रिसाइ ।

धरहु कपिहि धरि मारहु सुनि अंगद मुसुकाइ ॥३२(ख)॥

एहि विधि बेगि सुभट सब धावहु । खाहु भालु कपि जहँ जहँ पावहु
 मर्कटहीन करहु महि जाई । जिअत धरहु तापस द्वौ भाई ॥
 पुनि सकोप बोलेउ जुवराजा । गाल बजावत तोहि न लाजा ॥
 मरु गर काटि निलज कुलघाती । बल बिलोकि बिहरति नहिं छाती
 रे त्रिय चोर कुमारग गामी । खल मल रासि मंदमतिकामी ॥
 सन्यपात जल्पसि दुर्बादा । भएसि कालवस खल मनुजादा ॥
 याको फलु पावहिगो आगें । वानर भालु चपेटन्हि लागें ॥
 रामु मनुज बोलत असि बानी । गिरहिं न तव रूसना अभिमानी ॥

गिरिहिं रसना संसय नाहीं । सिरन्हि समेत समर महि माहीं ॥

सो०—सो नर क्यों दसकंध बालि बध्यो जेहि एक सर ।

बीसहुँ लोचन अंध धिग तव जन्म कुजाति जड़ ॥३३(क)॥

तव सोनित कीं प्यास तृषित राम सायक निकर ।

तजउँ तोहि तेहि त्रास कटु जल्पक निसिचर अधम ॥३३(ख)॥

मैं तव दसन तोरिबे लायक । आयसु मोहि न दीन्ह रघुनायक ॥

असि रिस होति दसउ मुख तोरौं । लंका गहि समुद्र मँह बोरौं ॥

गूलरि फल समान तव लंका । बसहु मध्य तुम्ह जंतु असंका ॥

मैं बानर फल खात न बारा । आयसु दीन्ह न राम उदारा ॥

जुगुति सुनत रावन मुसुकाई । मूढ़ सिखिहि कहँ बहुत झुठाई ॥

बालि न कयहुँ गाल अस मारा । मिलि तपसिन्ह तैं भएसि लबारा ॥

साँचेहुँ मैं लवार भुज बीहा । जौं न उपारिउँ तव दस जीहा ॥

समुझि राम प्रताप कपि कोपा । सभा माझ पन करि पद रोपा ॥

जौं मम चरन सकसि सठ टारी । फिरहिं रामु सीता मैं हारी ॥

सुनहु सुभट सब कह दससीसा । पद गहि धरनि पछारहु कीसा ॥

इंद्रजीत आदिक बलवाना । हरषि उठे जहँ तहँ भट नाना ॥

झपटहिं करि बल त्रिपुल उपाई । पद न टरइ बैठहिं सिरु नाई ॥

पुनि उठि झपटहिं सुर आराती । टरइन कीस चरन एहि भाँती ॥

पुरुष कुजोगी जमि उरगारी । मोह बिटप नहिं सकहिं उपारी ॥

Vinay Avasthi Sahib Bhuvan Vani Trust Donations

दो०-कोटिन्ह मधनाद सम सुभट उठे हरषाई ।

क्षपटहिं टरै न कपि चरन पुनि बैठहिं सिर नाइ ॥३४(क)॥

भूमि न छाँड़त कपि चरन देखत रिपु मद भाग ।

कोटि बिघ्न ते संत कर मन जिमि नीति न त्याग ॥३४(ख)॥

कपि बल देखि सकल हियँ हारे । उठा आपु कपि कें परचारे ॥
गहत चरन कह बालिकुमारा । मम पद गहें न तोर उवारा ॥
गहसि न राम चरन सठ जाई । सुनत फिरा मन अति सकुचाई ॥
भयउ तेजहत श्री सब गई । मध्य दिवस जिमि ससि सोहई ॥
सिंघासन बैठेउ सिर नाई । मानहुँ संपति सकल गँवाई ॥
जगदातमा प्रानपति रामा । तासु विमुख किमि लह विश्रामा ॥
उमा राम की भृकुटि बिलासा । होइ बिस्व पुनि पावइ नासा ॥
तृन ते कुलिस कुलिस तृन करई । तासु दूत पन कहु किमि टरई ॥
पुनि कपि कही नीति विधि नाना । मान न ताहि कालु निअराना ॥
रिपु मद मथि प्रभु सुजसु सुनायो । यह कहि चल्यो बालि नृप जायो
हतौं न खेत खेलाइ खेलाई । तोहि अबहिं का करौं बड़ाई ॥
प्रथमहिं तासु तनय कपि मारा । सो सुनि रावन भयउ दुखारा ॥
जातुधान अंगद पन देखी । भय व्याकुल सब भए बिसेषी ॥

दो०-रिपु बल धरषि हरषि कपि बालितनय बल पुंज ।

पुलक सरीर नयन जल गहे राम पद कंज ॥३५(क)॥

Vijay Avasthi Sahib Bhuvan Vani Trust Donations
साक्ष जानि दसकंधर भवन गयउ बिलखाइ ।

मंदोदरीं रावनहि बहुरि कहा समुझाइ ॥३५(ख)॥

कंत समुझि मन तजहु कुमतिही । सोह न समर तुम्हहि रघुपतिही ॥
रामानुज लघु रेख खचाई । सोउ नहिं नाघेहु असि मनुसाई ॥
पिय तुम्ह ताहि जितब संग्रामा । जाके दूत केर यह कामा ॥
कौतुक सिंधु नाधि तव लंका । आयउ कपि केहरी असंका ॥
रखवारे हति विपिन उजारा । देखत तोहि अच्छ तेहिं मारा ॥
जारि सकल पुर कीन्हेसि छारा । कहाँ रहा बल गर्व तुम्हारा ॥
अब पति मृषा गाल जनि मारहु । मोर कहा कछु हृदयँ बिचारहु ॥
पति रघुपतिहि नृपति जनि मानहु । अग जग नाथ अतुल बल जानहु ॥
बाँन प्रताप जान मारीचा । तासु कहा नहिं मानेहि नीचा ॥
जनक सभाँ अगनित भूपाला । रहे तुम्हउ बल अतुल बिसाला ॥
भंजि धनुष जानकी विआही । तब संग्राम जितेहु किन ताही ॥
सुरपति सुत जानइ बल थोरा । राखा जिअत आँखि गहि फोरा ॥
सूपनखा कै गति तुम्ह देखी । तदपि हृदयँ नहिं लाज बिसेषी ॥
दो०-बधि विराध खर दूषनहि लीलाँ हत्यो कबंध ।

बालि एक सर मारयो तेहि जानहु दसकंध ॥ ३६ ॥

जेहिं जलनाथ बँधायउ हेल । उतरे प्रभु दल सहित सुबेला ॥
कारुनीक दिनकर कुल केतू । दूत पठायउ तव हित हेतू ॥

सभा माझ जेहिं तव बल मथ्य । करि बरुथ महुँ सुरपति जथा ॥

Vinay Avasthi Sahib Bhuvan Vani Trust Donations

अंगद हनुमत अनुचर जाके । रन बाँकुरे धीर अति बाँके ॥
तेहि कहँ पिय पुनि पुनि नर कहहू । मुधा मान ममता मद बहहू ॥
अहह कंत कृत राम विरोधा । काल विवस मन उपज न बोधा ॥
काल दंड गहि काहु न मारा । हरइ धर्म बल बुद्धि विचारा ॥
निकट काल जेहि आवत साई । तेहि भ्रम होइ तुम्हारिहि नाई ॥

दो०—हुइ सुत मरे दहेउ पुर अजहुँ पूर पिय देहु ।

कृपासिंधु रघुनाथ भजि नाथ विमल जसु लेहु ॥३७॥

नारि वचन सुनि विसिख समाना । सभाँ गयउ उठि होत बिहाना ॥
बैठ जाइ सिंघासन फूली । अति अभिमान त्रास सब भूली ॥
इहाँ राम अंगदहि बोलावा । आइ चरन पंकज सिरु नावा ॥
अति आदर समीप बैठारी । बोले विहँसि कृपाल खरारी ॥
बालितनय कौतुक अति मोही । तात सत्य कहु पूछउँ तोही ॥
रावनु जातुधान कुल टीका । भुज बल अतुल जासु जग लीका ॥
तासु मुकुट तुम्ह चारि चलाए । कहहु तात कवनी विधि पाए ॥
सुनु सर्वग्य प्रनत सुखकारी । मुकुट न होहिं भूप गुन चारी ॥
साम दान अरु दंड विभेदा । नृप उर बसहिं नाथ कह वेदा ॥
नीति धर्म के चरन सुहाए । अस जियँ जानि नाथ पहिं आए ॥

दो०—धर्महीन प्रभु पद बिमुख काल बिबस दससीस ।

तेहि परिहरि गुन आए सुनहु कोसलाधीस ॥३८(क)॥

समाचार पुनि सब कहे गढ़ के बालिकुमार ॥३८(ख)॥

रिपु के समाचार जब पाए । राम सचिव सब निकट बोलाए ॥
 लंका बाँके चारि दुआरा । केहि विधि लागिअ करहु विचारा ॥
 तब कपीस रिच्छेस विभीषन । सुमिरि हृदयँ दिनकर कुल भूषन
 करि विचार तिन्ह मंत्र दृढ़ावा । चारि अनी कपि कटक बनावा ॥
 जथाजोग सेनापति कीन्हे । जूथप सकल बोलि तब लीन्हे ॥
 प्रभु प्रताप कहि सब समुझाए । सुनि कपि सिंघनाद करि धाए ॥
 हरषित राम चरन सिर नावहिं । गहि गिरि सिखर वीर सब धावहिं
 गर्जहिं तर्जहिं भालु कपीसा । जय रघुवीर कोसलाधीसा ॥
 जानत परम दुर्ग अति लंका । प्रभु प्रताप कपि चले असंका ॥
 घटाटोप करि चहुँ दिसि घेरी । मुखहिं निसान बजावहिं भेरी ॥
 दो०—जयति राम जय लछिमन जय कपीस सुग्रीव ।

गर्जहिं सिंघनाद कपि भालु महा बल सीव ॥३९॥

लंकाँ भयउ कोलाहल भारी । सुना दसानन अति अहँकारी ॥
 देखहु बनरन्ह केरि ढिठाई । विहँसि निसाचर सेन बोलाई ॥
 आए कीस काल के प्रेरे । छुधावत सब निसिचर मेरे ॥
 अस कहि अट्टहास सठ कीन्हा । गृह बैठे अहार विधि दीन्हा ॥
 सुभट सकल चारिहुँ दिसि जाहू । धरि धरि भालु कीस सब खाहू ॥

उमा रावतहि अस अभिसार । जमि दिविभ खग सुत उतार ॥

चले निसाचर आयसु मागी । गहि कर भिडिपाल बर सांगी ॥
 तोमर मुद्गर परसु प्रचंडा । सूल कृपान परिघ गिरिखंडा ॥
 जिमि अरुनोपल निकर निहारी । धावहिं सठ खग मांस अहारी ॥
 चोन्नभंग दुख तिन्हहि न सूझा । तिमि धाए मनुजाद अबूझा ॥
 दो०—नानायुध सर चाप धर जातुधान बल बीर ।

कोट कँगूरन्हि चढ़ि गए कोटि कोटि रनधीर ॥४०॥

कोट कँगूरन्हि सोहहिं कैसे । मेरु के संगनि जनु घन बैसे ॥
 बाजहिं ढोल निसान जुझाऊ । सुनि धुनि होइ भटन्हि मन चाऊ ॥
 बाजहिं भेरि नफीरि अपारा । सुनि कादर उर जाहिं दरारा ॥
 देखिन्ह जाइ कपिन्ह के ठट्टा । अति बिसाल तनु भालु सुभट्टा ॥
 धावहिं गनहिं न अवघट घाटा । पर्वत फोरि करहिं गहि बाटा ॥
 कटकटाहिं कोटिन्ह भट गर्जहिं । दसन ओठ काटहिं अति तर्जहिं ॥
 उत रावन इत राम दोहाई । जयति जयति जय परी लराई ॥
 निसिचर सिखर समूह ढहावहिं । कूदि धरहिं कपि फेरि चलावहिं ॥

छं०—धरि कुधर खंड प्रचंड मर्कट भालु गढ़ पर डारहिं
 झपटहिं चरन गहि पटक महि भजि चलत बहुरि पचारहिं ॥
 अति तरल तरुन प्रताप तरपहिं तमकि गढ़ चढ़ि चढ़ि गए ।
 कपि भालु चढ़ि मंदिरन्ह जहँ तहँ राम जसु गावत भए ॥

दो०—एकु एकु निसिचर गहि पुनि कपि चले पराइ ।

ऊपर आपु हेठ भट गिरहिं धरनि पर आइ ॥४१॥

राम प्रताप प्रबल कपिजूथा । मर्दहिं निसिचर सुभट वरूथा ॥
 चढ़े दुर्ग पुनि जहँ तहँ वानर । जय रघुवीर प्रताप दिवाकर ॥
 चले निसाचर निकर पराई । प्रबल पवन जिमि घन समुदाई ॥
 हाहाकार भयउ पुर भारी । रोवहिं बालक आतुर नारी ॥
 सब मिलि देहिं रावनहि गारी । राज करत एहिं मृत्यु हँकारी ॥
 निज दल बिचल सुनी तेहिं काना । फेरि सुभट लंकेस रिसाना ॥
 जो रन बिमुख सुना मैं काना । सो मैं हतब कराल कृपाना ॥
 सर्वसु खाइ भोग करि नाना । समर भूमि भए बल्लभ प्राना ॥
 उग्र वचन सुनि सकल डेराने । चले क्रोध करि सुभट लजाने ॥
 सन्मुख मरन वीर कै सोभा । तब तिन्ह तजा प्रान कर लोभा ॥

दो०—बहु आयुध धर सुभट सब भिरहिं पचारि पचारि ।

ब्याकुल किए भालु कपि परिघ त्रिसूलन्ह मारि ॥४२॥

भय आतुर कपि भागन लागे । जद्यपि उमा जीतिहहिं आगे ॥
 कोउ कह कहँ अंगद हनुमंता । कहँ नल नील दुविद बलवंता ॥
 निज दल बिकल सुना हनुमाना । पच्छिम द्वार रहा बलवाना ॥
 मेघनाद तहँ करइ लराई । दूट न द्वार परम कठिनाई ॥
 पवनतनय मन भा अति क्रोधा । गर्जेउ प्रबल काल सम जोधा ॥
 कूदि लंक गढ़ ऊपर आवा । गहि गिरि मेघनाद कहँ धावा ॥
 भंजेउ रथ सारथी निपाता । ताहि हृदय महुँ मारेसि लाता ॥

दुसरें सुत बिकल तेहि जाना । सांदन घालि वारत सह आना ॥

श्लो०—अंगद सुना पवनसुत गढ़ पर गयउ अकेल ।

रन बाँकुरा बालिसुत तरकि चढ़ेउ कपि खेल ॥४३॥

जुद्ध विरुद्ध क्रुद्ध द्वौ बंदर । राम प्रताप सुमिरि उर अंतर ॥
 रावन भवन चढ़े द्वौ धाई । करहिं कोसलाधीस दोहाई ॥
 कलस सहित गहि भवनु ढहावा । देखि निसाचरपति भय पावा ॥
 नारि बृंद कर पीटहिं छाती । अब दुइ कपि आए उतपाती ॥
 कपिलीला करि तिन्हहि डेरावहिं । रामचंद्र कर सुजसु सुनावहिं ॥
 पुनि कर गहि कंचन के खंभा । कहेन्हि करिअ उतपात अरंभा ॥
 गर्जि परे रिपु कटक मझारी । लागे मदैँ भुज बल भारी ॥
 काहुहि लात चपेटन्हि केहू । भजहु न रामहि सो फल लेहू ॥

श्लो०—एक एक सों मर्दहिं तोरि चलावहिं मुंड ।

रावन आगें परहिं ते जनु फूटहिं दधि कुंड ॥४४॥
 महा महा मुखिआ जे पावहिं । ते पद गहि प्रभु पास चलावहिं ॥
 कहइ बिभीषनु तिन्ह के नामा । देहिं राम तिन्हहू निज धामा ॥
 खल मनुजाद द्विजामिष भोगी । पावहिं गति जो जाचत जोगी ॥
 उमा राम मृदु चित करुनाकर । बयर भाव सुमिरत मोहि निसिंचर
 देहिं परम गति सो जियँ जानी । अस कृपाल को कहहु भवानी ॥
 अस प्रभु सुनि न भजहिं भ्रम त्यागी । नर मतिमंद ते परम अभागी
 अंगद अरु हनुमंत प्रवेशा । कीन्ह दुर्ग अस कह अवधेसा ॥
 लंकाँ द्वौ कपि सोहहिं कैसैं । मथहिं सिंधु दुइ मंदर जैसैं ॥

दो०-भुज बल रिपु दल दलमलि देखि दिवस कर अंत ।

कूदे जुगल बिगत श्रम आए जहँ भगवंत ॥४५॥

प्रभु पद कमल सीस तिन्ह नाए । देखि सुभट रघुपति मन भाए ॥
 राम कृपा करि जुगल निहारे । भए बिगतश्रम परम सुखारे ॥
 गए जानि अंगद हनुमाना । फिरे भालु मर्कट भट नाना ॥
 जातुधान प्रदोष बल पाई । धाए करि दससीस दोहाई ॥
 निसिचर अनी देखि कपि फिरे । जहँ तहँ कटकटाइ भट भिरे ॥
 द्वौ दल प्रबल पचारि पचारी । लरत सुभट नहिं मानहिं हारी ॥
 महावीर निसिचर सब कारे । नाना बरन बलीमुख भारे ॥
 सबल जुगल दल सबल जोधा । कौतुक करत लरत करि क्रोधा ॥
 प्राविट सरद पयोद घनेरे । लरत मनहुँ मारुत के प्रेरे ॥
 अनिप अकंपन अरु अतिकाया । बिचलत सेन कीन्हि इन्ह माया ॥
 भयउ निमिष महुँ अति अँधिआरा । वृष्टि होइ रुधिरोपल छारा ॥
 दो०-देखि निबिड़ तम दसहुँ दिसि कपिदल भयउ खभार ।

एकहि एक न देखई जहँ तहँ करहिं पुकार ॥४६॥
 सकल मरमु रघुनायक जाना । लिए बोलि अंगद हनुमाना ॥
 समाचार सब कहि समुझाए । सुनत कोपि कपिकुंजर धाए ॥
 पुनि कृपाल हँसि चाप चढ़ावा । पावक सायक सपदि चलावा ॥
 भयउ प्रकास कतहुँ तम नाही । ग्यान उदयँ जिमि संसय जाहीं ॥

भालु बलीमुख पाइ प्रकासा । धाए हरष बिगत श्रम जासा ॥

सूमान अंगद रन गाजे । हाक सुनत रजनीचर भाजे ॥
भागत भट पटकहिं धरि धरनी । करहिं भालु कपि अद्भुत करनी ॥
गहि पद डारहिं सागर माहीं । मकर उरग झष धरि धरि खाहीं ॥
दो०—कछु मारे कछु घायल कछु गढ़ चढ़े पराइ ।

गर्जहिं भालु बलीमुख रिपु दल बल बिचलाइ ॥४७॥
निसा जानि कपि चारिउ अनी । आए जहाँ कोसला धनी ॥
राम कृपा करि चितवा सबही । भए बिगतश्रम वानर तबही ॥
उहाँ दसानन सचिव हँकारे । सब सन कहेसि सुभट जे मारे ॥
आधा कटकु कपिन्ह संघारा । कहहु वेगि का करिअ बिचारा ॥
माल्यवंत अति जरठ निसाचर । रावन मातु पिता मंत्री वर ॥
बोला बचन नीति अति पावन । सुनहु तात कछु मोर सिखावन ॥
जब ते तुम्ह सीता हरि आनी । असगुन होहिं न जाहिं बखानी ॥
वेद पुरान जासु जसु गायो । राम विमुख काहुँ न सुख पायो ॥
दो०—हिरन्याच्छ भ्राता सहित मधु कैटभ बलवान ।

जेहिं मारे सोइ अवतरेउ कृपासिंधु भगवान ॥४८(क)॥

मासपारायण, पचीसवाँ विश्राम

कालरूप खल बन दहन गुनागार घनबोध ।

सिव बिरंचि जेहि सेवहिं तासों कवन बिरोध ॥४८(ख)॥

परिहरि बयरु देहु बैदेही । भजहु कृपानिधि परम सनेही ॥

ताके बचन बान सम लागे । करिआ मुह करिजाहि अभागे ॥

बूढ़ भएसि न त भरतेउ ताही । अब जनि नयन देखावसि मोही ।
 तेहिं अपने मन अस अनुमाना । बध्यो चहत एहि कृपानिधाना ॥
 सो उठि गयउ कहत दुर्वादा । तब सकोप बोलेउ घननादा ॥
 कौतुक प्रात देखिअहु मोरा । करिहउँ बहुत कहौं का थोरा ॥
 सुनि सुत बचन भरोसा आवा । प्रीति समेत अंक बैठावा ॥
 करत बिचार भयउ भिनुसारा । लागे कपि पुनि चहूँ दुआरा ॥
 कोपि कपिन्ह दुर्घट गढ़ घेरा । नगर कोलाहलु भयउ घनेरा ॥
 विविधायुध धर निसिचर धाए । गढ़ ते पर्वत सिखर ढहाए ॥

छं०—ढाहे महीधर सिखर कोटिन्ह विविध विधि गोला चले ।
 घहरात जिमि पबिपात गर्जत जनु प्रलय के बादले ॥
 मर्कट बिकट भट जुटत कटत न लटत तन जर्जर भए ।
 गहि सैल तेहि गढ़ पर चलावहिं जहँ सो तहँ निसिचर हए ॥

दो०—मेघनाद सुनि श्रवन अस गढ़ पुनि छंका आइ ।

उतरयो बीर दुर्ग तें सन्मुख चलयो बजाइ ॥४९॥

कहँ कोसलाधीस द्वौ भ्राता । धन्वी सकल लोक बिख्याता ॥
 कहँ नल नील दुबिद सुग्रीवा । अंगद हनूमंत बल सींवा ॥
 कहाँ विभीषनु भ्राता द्रोही । आजु सबहि हठि मारउँ ओही ॥
 अस कहि कठिन बान संधाने । अतिसय क्रोध श्रवन लगि ताने ॥
 सर समूह सो छाड़ै लागा । जनु सपच्छ धावहिं बहु नागा ॥

जहँ तहँ परत देखिअहिं बानर । सन्मुख होइ न सके तेहि आनस ॥

जहँ तहँ भागि चले कपि रीछा । विसरी सबहि जुद्ध कै ईछा ॥
सो कपि भालु नरन मँहँ देखा । कीन्हैसि जेहि न प्रान अवसेषा ॥

दो०—दस दस सर सब मारेसि परे भूमि कपि बीर ।

सिंहनाद करि गर्जा मेघनाद बल धीर ॥५०॥

देखि पवनसुत कटक विहाला । क्रोधवंत जनु धायउ काला ॥
महासैल एक तुरत उपारा । अति रिस मेघनाद पर डारा ॥
आवत देखि गयउ नभ सोई । रथ सारथी तुरग सब खोई ॥
बार बार पचार हनुमाना । निकट न आव मरसु सो जाना ॥
रघुपति निकट गयउ घननादा । नाना भाँति करेसि दुर्वादा ॥
अस्त्र सस्त्र आयुध सब डारे । कौतुकहीं प्रभु काटि निवारे ॥
देखि प्रताप मूढ़ खिसिआना । करै लाग माया विधि नाना ॥
जिमि कोउ करै गरुड़ सँ खेला । डरपावै गहि स्वल्प सपेला ॥

दो०—जासु प्रबल माया बस सिव विरंचि बड़ छोट ।

ताहि दिखावइ निसिचर निज माया मति खोट ॥५१॥

नभ चढ़ि वरष विपुल अंगारा । महि ते प्रगट होहिं जलधारा ॥
नाना भाँति पिसाच पिसाची । मारु काटु धुनि बोलहिं नाची ॥
विष्टा पूय रुधिर कच हाड़ा । वरषइ कबहुँ उपल बहु छाड़ा ॥
बरषि धूरि कीन्हैसि अँधिआरा । सूझ न आपन हाथ पसारा ॥
कपि अकुलाने माया देखें । सब कर मरन बना एहि लेखें ॥
कौतुक देखि राम मुसुकाने । भए सभीत सकल कपि जाने ॥

एक बान काटी सब माया । जिमि दिनकर हर तिमिरनिकाया
कृपादृष्टि कपि भालु बिलोके । भए प्रबल रन रहहिं न रोके ॥

दो०—आयसु मागि राम पहिं अंगदादि कपि साथ ।

लछिमन चले क्रुद्ध होइ बान सरासन हाथ ॥ ५२ ॥

छतज नयन उर बाहु बिसाला । हिमगिरि निभतनु कछु एक लाला
इहाँ दसानन सुभट पठाए । नाना अस्त्र सस्त्र गहि धाए ॥
भूधर नख बिटपायुध धारी । धाए कपि जय राम पुकारी ॥
भिरे सकल जोरिहि सन जोरी । इत उत जय इच्छा नहिं थोरी ॥
मुठिकन्ह लातन्ह दातन्ह काटहिं । कपि जयसील मारि पुनि डाटहिं
मारु मारु धरु धरु धरु मारु । सीस तोरि गहि भुजा उपारु ॥
असि रव पूरि रही नव खंडा । धावहिं जहँ तहँ रुंड प्रचंडा ॥
देखहिं कौतुक नभ सुर बृन्दा । कबहुँक बिसमय कबहुँ अनंदा ॥

दो०—रुधिर गाढ़ भरि भरि जग्गो ऊपर धूरि उड़ाइ ।

जनु अँगार रासिन्ह पर मृतक धूम रह्यो छाड़ ॥ ५३ ॥

घायल वीर बिराजहिं कैसे । कुसुमित किसुक के तरु जैसे ॥
लछिमन मेघनाद द्वौ जोधा । भिरहिं परसपर करि अति क्रोधा ॥
एकहि एक सकइ नहिं जीती । निसिचर छल बल करइ अनीती ॥
क्रोधवंत तब भयउ अनंता । भंजेउ रथ सारथी तुरंता ॥
नाना बिधि प्रहार कर सेवा । राच्छस भयउ प्रान अवसेषा ॥

रावन सब निज मन अनुमाना । संकट भयउ हरिहि मम माना ॥

बीरधातिनी छाड़िसि सांगी । तेज पुंज लछिमन उर लागी ॥
मुरुछा भई सक्ति के लागें । तब चलि गयउ निकट भय त्यागें ॥

दो०—सेवनाद सम कोटि सत जोधा रहे उठाइ ।

जगदाधार सेष किमि उठै चले खिसिआइ ॥५४॥

सुनु गिरिजा क्रोधानल जासू । जारइ भुवन चारिदस आसू ॥

सक संग्राम जीति को ताही । सेवहिं सुर नर अग जग जाही ॥

यह कौतूहल जानइ सोई । जा पर कृपा राम कै होई ॥

संध्या भइ फिरि द्वौ बाहनी । लगे सँभारन निज निज अनी ॥

व्यापक ब्रह्म अजित भुवनेस्वर । लछिमन कहाँ बूझ करुनाकर ॥

तब लगि लै आयउ हनुमाना । अनुज देखि प्रभु अति दुख माना ॥

जामवंत कह बैद सुषेना । लंकाँ रहइ को पठई लेना ॥

धरि लघु रूप गयउ हनुमंता । आनेउ भवन समेत तुरंता ॥

दो०—राम पदारबिंद सिर नायउ आइ सुषेन ।

कहा नाम गिरि औषधी जाहु पवनसुत लेन ॥५५॥

राम चरन सरसिज उर राखी । चला प्रभंजनसुत बल भाषी ॥

उहाँ दूत एक मरमु जनावा । रावनु कालनेमि गृह आवा ॥

दसमुख कहा मरमु तेहिं सुना । पुनि पुनि कालनेमि सिर धुना ॥

देखत तुम्हहि नगर जेहिं जारा । तासु पंथ को रोकन पारा ॥

भजिरघुपति करु हित आपना । छाँड़हु नाथ मृषा जल्पना ॥

नील कंज तनु सुंदर स्यामा । हृदयँ राखु लोचनाभिरामा ॥

मैं तैं मोर मूढ़ता त्यागू। महा मोह निसि सूतत जागू ॥
काल ब्याल कर भच्छक जोई। सपनेहुँ समर कि जीतिअ सोई ॥

दो०-सुनि दसकंठ रिसान अति तेहिं मन कीन्ह बिचार ।

राम दूत कर मरौं बरु यह खल रत मल भार ॥५६॥

अस कहि चला रचिसि मग माया। सर मंदिर बर बाग बनाया ॥
मारुतसुत देखा सुभ आश्रम। मुनिहि बूझि जल पियौं जाइ श्रम
राच्छस कपट बेष तहँ सोहा। मायापति दूतहि चह मोहा ॥
जाइ पवनसुत नायउ माया। लाग सो कहै राम गुन गाथा ॥
होत महा रन रावन रामहिं। जितिहहिं राम न संसय या महिं ॥
इहाँ भएँ मैं देखउँ भाई। ग्यानदृष्टि बल मोहि अधिकाई ॥
मागा जल तेहिं दीन्ह कमंडल। कह कपि नहिं अघाउँ थोरें जल ॥
सर मजन करि आतुर आवहु। दिच्छा देउँ ग्यान जेहिं पावहु ॥

दो०-सर पैठत कपि पद गहा मकरीं तब अकुलान ।

मारी सो धरि दिव्य तनु चली गगन चढ़ि जान ॥५७॥

कपि तव दरस भइउँ निष्पापा। मिटा तात मुनिवर कर सापा ॥
मुनिन होइ यह निसिचर घोरा। मानहु सत्य वचन कपि मोरा ॥
अस कहि गई अपछरा जबहीं। निसिचर निकट गयउ कपि तबहीं
कह कपि मुनि गुरदछिना लेहू। पाछें हमहि मंत्र तुम्ह देहू ॥
सिर लंगूर लपेटि पछारा। निज तनु प्रगटेसि मरती बारा ॥

राम राम कहि लाइसि प्राना। सुनि मन हरि चलेउ हनुमान ॥

देखा सैल न ओषध चीन्हा । सहसा कपि उपारि गिरि लीन्हा ॥

गहि गिरि निसि नभ धावत भयऊ । अवधपुरी ऊपर कपि गयऊ ॥

दो०-देखा भरत बिसाल अति निसिचर मन अनुमानि ।

बिनु फर सायक मारेउ चाप श्रवन लगि तानि ॥५८॥

परेउ मुरुछि महि लागत सायक । सुमिरत राम राम रघुनायक ॥

सुनि प्रिय बचन भरत तब धाए । कपि समीप अति आतुर आए ॥

बिकल बिलोकि कीस उर लावा । जागत नहिं बहु भाँति जगावा ॥

मुख मलीन मन भए दुखारी । कहत बचन भरि लोचन बारी ॥

जेहिं बिधि राम विमुख मोहि कीन्हा । तेहिं पुनि यह दारुन दुख दीन्हा ॥

जौं मोरें मन बच अरु काया । प्रीति राम पद कमल अमाया ॥

तौ कपि होउ विगत श्रम सूला । जौं मो पर रघुपति अनुकूला ॥

सुनत बचन उठि बैठ कपीसा । कहि जय जयति कोसलाधीसा ॥

सो०-लीन्हा कपिहि उर लाइ पुलकित तनु लोचन सजल ।

प्रीति न हृदयँ समाइ सुमिरि राम रघुकुल तिलक ॥५९॥

तात कुसल कहु सुखनिधान की । सहित अनुज अरु मातु जानकी ॥

कपि सब चरित समास बखाने । भए दुखी मन महुँ पछिताने ॥

अहह दैव मैं कत जग जायउँ । प्रभु के एकहु काज न आयउँ ॥

जानि कुअवसर मन धरि धीरा । पुनि कपि सन बोले बलवीरा ॥

तात गहरु होइहि तोहि जाता । काजु नसाइहि होत प्रभाता ॥

चढु मम सायक सैल समेता । पठवौं तोहि जहुँ कृपानिकेता ॥

सुनि कपि मन उपजा अभिमाना । मारे भार चलिहि किमि बाना ॥

राम प्रभाव विचारि बहोरी । बंदि चरन कह कपि करजोरी ॥

दो०—तव प्रताप उर राखि प्रभु जैहउँ नाथ सुरंत ।

अस कहि आयसु पाइ पद बंदि चलेउ हनुमंत ॥६०(क)॥

भरत बाहु बल सील गुन प्रभु पद प्रीति अपार ।

मन महुँ जात सराहत पुनि पुनि पवनकुमार ॥६०(ख)॥

उहाँ राम लछिमनहि निहारी । बोले बचन मनुज अनुसारी ॥

अर्ध राति गइ कपि नहिं आयउ । राम उठाइ अनुज उर लायउ ॥

सकहु न दुखित देखि मोहि काऊ । बंधु सदा तव मृदुल सुभाऊ ॥

मम हित लागि तजेहु पितु माता । सहेहु विपिन हिम आतप बाता ॥

सो अनुराग कहाँ अब भाई । उठहु न सुनि मम बच विकलाई

जौं जनतेउँ बन बंधु बिछोहू । पिता बचन मनतेउँ नहिं ओहू ॥

सुत बित नारि भवन परिवारा । होहिं जाहिं जग बारहिं बारा ॥

अस विचारि जियँ जागहु ताता । मिलइ न जगत सहोदर भ्राता ॥

जथा पंख बिनु खग अति दीना । मनि बिनु फनि करिवर कर हीना

अस मम जिवन बंधु बिनु तोही । जौं जड़ दैव जिआवै मोही ॥

जैहउँ अवध कौन मुहु लाई । नारि हेतु प्रिय भाइ गँवाई ॥

बरु अपजस सहतेउँ जग माहीं । नारि हानि विशेष छति नाहीं ॥

अब अपलोकु सोकु सुत तोरा । सहिहि निदुर कठोर उर मोरा ॥

निज जननी के एक कुमारा । तात तासु तुम्ह प्रान अधारा ॥

सौंपेसि मोहि तुम्हहि गाहि पानी । सब विधि सुखद परमहि जानी
उतरु काह दैहउँ तेहि जाई । उठि किन मोहि सिखावहु भाई
बहु विधि सोचत सोच विमोचन । स्वत सलिल राजिव दल लोचन
उमा एक अखंड रघुराई । नर गति भगत कृपाल देखाई ॥

सो०—प्रभु प्रलाप सुनि कान विकल भए बानर निकर ।

आइ गयउ हनुमान जिमि करुना महुँ बीर रस ॥६१॥

हरषि राम भेटेउ हनुमाना । अति कृतग्य प्रभु परम सुजाना ॥
तुरत वैद तव कीन्हि उपाई । उठि बैठे लछिमन हरपाई ॥
हृदयँ लाइ प्रभु भेटेउ भ्राता । हरषे सकल भालु कपि ब्राता ॥
कपि पुनि वैद तहाँ पहुँचावा । जेहि विधि तबहिं ताहि लइ आवा
यह वृत्तांत दसानन सुनेऊ । अति विषाद पुनि पुनि सिर धुनेऊ
व्याकुल कुंभकरन पहिं आवा । विविध जतन करि ताहि जगावा
जागा निसिचर देखिअ कैसा । मानहुँ कालु देह धरि बैसा ॥
कुंभकरन बूझा कहु भाई । काहे तव मुख रहे सुखाई ॥
कथा कही सब तेहि अभिमानी । जेहि प्रकार सीता हरि आनी ॥
तात कपिन्ह सब निसिचर मारे । महा महा जोधा संघारे ॥
दुर्मुख सुररिपु मनुज अहारी । भट अतिकाय अकंपन भारी ॥
अपर महोदर आदिक बीरा । परे समर महि सब रनधीरा ॥

दो०—सुनि दसकंधर बचन तब कुंभकरन बिलखान ।

जगदंबा हरि आनि अब सठ चाहत कल्याण ॥६२॥

भल न कीन्ह तैं निसिचर नाहा । अब मोहि आइ जगाएहि काहा
 अजहूँ तात त्यागि अभिमाना । भजहु राम होइहि कल्याना ॥
 हैं दससीस मनुज रघुनायक । जाके हनूमान से पायक ॥
 अहह बंधु तैं कीन्ह खोटाई । प्रथमहिं मोहि न सुनाएहि आई ॥
 कीन्हेहु प्रभु विरोध तेहि देवक । सिव विरंचि सुर जाके सेवक ॥
 नारद मुनि मोहि ग्यान जो कहा । कहतेउँ तोहि समय निरवहा ॥
 अब भरि अंक भेंदु मोहि भाई । लोचन सुफल करौं मैं जाई ॥
 स्याम गात सरसीरुह लोचन । देखौं जाइ ताप त्रय मोचन ॥
 दो०—राम रूप गुन सुमिरत मगन भयउ छन एक ।

रावन मागेउ कोटि घट मद अरु महिष अनेक ॥६३॥
 महिष खाइ करि मदिरा पाना । गर्जा बज्राघात समाना ॥
 कुंभकरन दुर्मंद रन रंगा । चला दुर्ग तजि सेन न संग्गा ॥
 देखिं विभीषनु आगें आयउ । परेउ चरननिज नाम सुनायउ ॥
 अनुज उठाइ हृदयँ तेहि लायो । रघुपति भक्त जानि मन भायो ॥
 तात लात रावन मोहि मारा । कहत परम हित मंत्र विचारा ॥
 तेहिं गलानि रघुपति पहिं आयउँ । देखि दीन प्रभु के मन भायउँ ॥
 सुनु सुत भयउ कालबस रावन । सो कि मान अब परम सिखावन ॥
 धन्य धन्य तैं धन्य विभीषन । भयहु तात निसिचर कुल भूपन ॥
 बंधु बंस तैं कीन्ह उजागर । भजेहु राम सोभा सुख सागर ॥
 दो०—बचन कर्म मन कपट तजि भजेहु राम रनधीर ।

जाहु न तजि पर सुख मोहि भयउँ काल बस बीर ॥६४॥

बन्धु वचन सुनि चला विभीषन । आयउ जह त्रैलोक्य विभूषन ॥
 नाथ भूधराकार सरीरा । कुंभकरन आवत रनधीरा ॥
 एतना कपिन्ह सुना जब काना । किलकिलाइ धाए बलवाना ॥
 लिए उठाइ बिटप अरु भूधर । कटकटाइ डारहिं ता ऊपर ॥
 कोटि कोटि गिरि सिखर प्रहारा । करहिं भालु कपि एक एक बारा ॥
 मुरयो न मनु तनु टारयो न टारयो । जिमि गज अर्क फलनि को मारयो
 तब मारुतसुत सुठिका हन्यो । परयो धरनि व्याकुल सिर धुन्यो
 पुनि उठि तेहिं मारेउ हनुमंता । घुमिंत भूतल परेउ तुरंता ॥
 पुनि नल नीलहि अवनि पछारेसि । जहँ तहँ पटक पटक भट डारेसि
 चली बलीमुख सेन पराई । अति भय त्रसित न कोउ समुहाई ॥

दो०—अंगदादि कपि मुरुछित करि समेत सुग्रीव ।

काँख दाबि कपिराज कहँ चला अमित बल सीव ॥ ६५ ॥

उमा करत रघुपति नरलीला । खेलत गरुड़ जिमि अहिगन मीला ॥
 भृकुटि भंग जो कालहि खाई । ताहि कि सोहइ ऐसि लराई ॥
 जग पावनि कीरति बिस्तरिहहिं । गाइ गाइ भवनिधि नर तरिहहिं
 मुरुछा गइ मारुतसुत जागा । सुग्रीवहि तब खोजन लागा ॥
 सुग्रीवहु कै मुरुछा बीती । निबुकि गयउ तेहि मृतक प्रतीती
 काटेसि दसन नासिका काना । गरजि अकास चलेउ तेहिं जाना
 गहेउ चरन गहि भूमि पछारा । अति लाघवँ उठि पुनि तेहि मारा
 पुनि आयउ प्रभु पहिं बलवाना । जयति जयति जय कृपानिधाना ॥

नाक कान काटे जिय जानी । फिरा क्रोध करि भइ मन ग्लानी ॥
 सहज भीम पुनि विनु श्रुति नासा । देखत कपि दल उपजी त्रासा
 दो०—जय जय जय रघुवंस मनि धाए कपि दै हूह ।

एकहि बार तासु पर छाड़ैन्हि गिरि तरु जूह ॥६६॥

कुंभकरन रन रंग बिरुद्धा । सन्मुख चला काल जनु क्रुद्धा ॥
 कोटि कोटि कपि धरि धरि खाई । जनु टीढ़ी गिरि गुहाँ समाई ॥
 कोटिन्ह गहि सरीर सन मर्दा । कोटिन्ह मीजि मिलव महि गर्दा
 मुख नासा श्रवनन्हि कीं बाटा । निसरि पराहिं भालु कपि ठाटा ॥
 रन मद मत्त निसाचर दर्पा । बिस्व ग्रसिहि जनु एहि विधि अपा
 मुरे सुभट सब फिरहिं न फेरे । सूझ न नयन सुनहिं नहिं टेरे ॥
 कुंभकरन कपि फौज बिडारी । सुनि धाई रजनीचर धारी ॥
 देखी राम विकल कटकाई । रिपु अनीक नाना विधि आई ॥
 दो०—सुनु सुग्रीव बिभीषन अनुज सँभारेहु सैन ।

मैं देखउँ खल बल दलहि बोले राजिवनैन ॥ ६७ ॥

कर सारंग साजि कटि भाथा । अरि दल दलन चले रघुनाथा ॥
 प्रथम कीन्हि प्रभु धनुष टँकोरा । रिपु दल बधिर भयउ सुनि सोरा
 सत्यसंध छाँड़े सर लच्छा । कालसर्प जनु चले सपच्छा ॥
 जहँ तहँ चले विपुल नाराचा । लगे कटन भट बिकट पिसाचा ॥
 कटहिं चरन उर सिर भुजदंडा । बहुतक बीर होहिं सत खंडा ॥
 घुमि घुमि घायल महि परहीं । उठि संभारि सुभट पुनि लरहीं ॥

लागत वान जलद जिमि गजहि । बहुतेक देखि कोटि सर माजहि
रुंड प्रचंड मुंड विनु धावहि । धरु धरु मारु मारु धुनि गावहि
दो०—छन महुँ प्रभु के सायकन्हि काटे बिकट पिसाच ।

पुनि रघुबीर निषंग महुँ प्रबिसे सब नाराच ॥ ६८ ॥

कुंभकरन मन दीख विचारी । हति छन माझ निसाचर धारी ॥
भा अति क्रुद्ध महाबल बीरा । कियो मृगनायक नाद गँभीरा ॥
कोपि महीधर लेइ उपारी । डारइ जहँ मर्कट भट भारी ॥
आवत देखि सैल प्रभु भारे । सरन्हि काटि रज सम करि डारे ॥
पुनि धनु तानि कोपि रघुनायक । छाँड़े अति कराल बहु सायक ॥
तनु महुँ प्रविसि निसरि सर जाहीं । जिमि दामिनि घन माझ समार्हीं
सोनित खवत सोह तन कारे । जनु कज्जल गिरि गेरु पनारे ॥
विकल बिलोकि भालु कपि धाए । बिहँसा जबहि निकट कपि आए
दो०—महानाद करि गर्जा कोटि कोटि गहि कीस ।

महि पटकइ गजराज इव सपथ करइ दससीस ॥ ६९ ॥

भागे भालु बलीमुख जूथा । वृकु बिलोकि जिमि मेष बरूथा ॥
चले भागि कपि भालु भवानी । विकल पुकारत आरत बानी ॥
यह निसिचर दुकाल सम अहई । कपिकुल देस परन अब चहई ॥
कृपा बारिधर राम खरारी । पाहि पाहि प्रनतारति हारी ॥
सकरुन बचन सुनत भगवाना । चले सुधारि सरासन बाना ॥
राम सेन निज पाछें घाली । चले सकोप महा बलसाली ॥

खैचि धनुष सर सत सधाने छूट तार सरार समाने ॥
 लागत सर धावा रिस भरा। कुधर डगमगत डोलति धरा ॥
 लीन्ह एक तेहिं सैल उपाटी। रघुकुलतिलक भुजा सोइ काटी ॥
 धावा बाम बाहु गिरि धारी। प्रभु सोउ भुजा काटि महि पारी ॥
 काटें भुजा सोह खल कैसा। पच्छहीन मंदर गिरि जैसा ॥
 उग्र बिलोकनि प्रभुहि बिलोका। ग्रसन चहत मानहुँ त्रैलोका ॥

दो०—करि चिह्नार घोर अति धावा बदनु पसारि ।

गगन सिद्ध सुर त्रासित हा हा हेति पुकारि ॥ ७० ॥

सभय देव करुनानिधि जान्यो। श्रवन प्रजंत सरासनु तान्यो ॥
 बिसिख निकर निसिचर मुख भरेऊ। तदपि महाबल भूमि न परेऊ ॥
 सरन्हि भरा मुख सन्मुख धावा। काल त्रोन सजीव जनु आवा ॥
 तब प्रभु कोपि तीव्र सर लीन्हा। धर ते भिन्न तासु सिर कीन्हा ॥
 सो सिर परेउ दसानन आगें। विकल भयउ जिमि फनि मनि त्यागें
 धरनि धसइ धर धाव प्रचंडा। तब प्रभु काटि कीन्ह दुइ खंडा ॥
 परे भूमि जिमि नभ तैं भूधर। हेठ दाबि कपि भालु निसाचर ॥
 तासु तेज प्रभु बदन समाना। सुर मुनि सबहिं अचंभव माना ॥
 सुर दुंदुभीं बजावहिं हरषहिं। अस्तुति करहिं सुमन बहु बरषहिं
 करि बिनती सुर सकल सिधाए। तेही समय देवरिषि आए ॥
 गगनोपरि हरि गुन गन गाए। रुचिर बीररस प्रभु मन भाए ॥
 बेगि हतहु खल कहि मुनि गए। राम समर महि सोभत भए ॥

छं०—संग्राम भूमि बिराज रघुपति अतुल बल कोसल धनी ।
 श्रम बिंदु मुख राजीव लोचन अरुन तन सोनित कनी ॥
 भुजे जुगल फेरत सर सरासन भालु कपि चहु दिसि बने ।
 कह दास तुलसी कहि न सक छबि सेष जेहि आनन घने ॥
 दो०—निसिचर अधम मलाकर ताहि दीन्ह निज धाम ।

गिरिजा ते नर मंदमति, जे न भजहिं श्रीराम ॥ ७१ ॥
 दिन कें अंत फिरीं द्वौ अनी । समर भई सुभटन्ह श्रम घनी ॥
 राम कृपाँ कपि दल बल बाढ़ा । जिमि तून पाइ लागि अति डाढ़ा
 छीजहिं निसिचर दिनु अरु राती । निज मुख कहें सुकृत जेहि भाँती
 बहु बिलाप दसकंधर करई । बंधु सीस पुनि पुनि उर धरई ॥
 रोवहिं नारि हृदय हति पानी । तासु तेज बल विपुल बखानी ॥
 मेघनाद तेहि अवसर आयउ । कहि बहु कथा पिता समुझायउ ॥
 देखेहु कालि मोरि मनुसाई । अबहिं बहुत का करौं बड़ाई ॥
 इष्टदेव सैं बल रथ पायउँ । सो बल तात न तोहि देखायउँ ॥
 एहि विधि जल्पत भयउ विहाना । चहुँ दुआर लागे कपि नाना ॥
 इत कपि भालु काल सम बीरा । उत रजनीचर अति रनधीरा ॥
 लरहिं सुभट निज निज जय हेतू । बरनि न जाइ समर खगकेतू ॥
 दो०—मेघनाद मायामय रथ चढ़ि गयउ अकास ।

गर्जेउ अट्टहास करि भइ कपि कटकहि त्रास ॥ ७२ ॥

सक्ति सूल तरवारि कृपाना । अस्त्र सस्त्र कुलिसायुध नाना ॥

डारइ परसु परिघ पाषाणा । लागेउ वृष्टि करै बहु बाना ॥
 दस दिसि रहे बान नभ छाई । मानहुँ मघा मेघ झरि लाई ॥
 धरु धरु मारु सुनिअ धुनि काना । जो मारइ तेहि कोउ न जाना ॥
 गहि गिरि तरु अकास कपि धावहि । देखहि तेहि न दुखित फिरि आवहि ॥
 अवघट घाट वाट गिरि कंदर । माया बल कीन्हेसि सर पंजर ॥
 जाहि कहाँ ब्याकुल भए बंदर । सुरपति बंदि परे जनु मंदर ॥
 मारुतसुत अंगद नल नीला । कीन्हेसि बिकल सकल बलसीला ॥
 पुनि लछिमन सुग्रीव विभीषन । सरन्हि मारि कीन्हेसि जर्जर तन ॥
 पुनि रघुपति सैं जूझै लागा । सरु छाँड़इ होइ लागहि नागा ॥
 ब्याल पास बस भए खरारी । स्वबस अनंत एक अबिकारी ॥
 नट इव कपट चरित कर नाना । सदा स्वतंत्र एक भगवाना ॥
 रन सोभा लगि प्रभुहि बँधायो । नागपास देवन्ह भय पायो ॥

दो०-गिरिजा जासु नाम जपि मुनि काटहिं भव पास ।

सो कि बंध तर आवइ ब्यापक बिस्व निवास ॥ ७३ ॥

चरित राम के सगुन भवानी । तर्किन जाहिं बुद्धि बल बानी ॥
 अस बिचारि जे तग्य विरागी । रामहि भजहिं तर्क सब त्यागी ॥
 ब्याकुल कटकु कीन्ह घननादा । पुनि भा प्रगट कहइ दुर्वादा ॥
 जामवंत कह खल रहु ठाढ़ा । सुनि करि ताहि क्रोध अति बाढ़ा ॥
 बूढ़ जानि सठ छाँड़ेउँ तोही । लागेसि अधम पचारै मोही ॥

अस कहि तरल त्रिसूल चलायो । जामवंत कर गहि सोइ धायो ॥

मारिसि मेघनाद के छाती परा भूमि धुमिल सुरघाती ॥
पुनि रिसान गहि चरन फिरायो । महि पछारि निज बल देखरायो ॥
बर प्रसाद सो मरइ न मारा । तब गहि पद लंका पर डारा ॥
इहाँ देवरिषि गरुड़ पठायो । राम समीप सपदि सो आयो ॥

दो०—खगपति सब धरि खाए माया नाग बरूथ ।

माया बिगत भए सब हरषे बानर जूथ ॥७४(क)॥

गहि गिरि पादप उपल नख धाए कीस रिसाइ ।

चले तमीचर विकलतर गढ़ पर चढ़े पराइ ॥७४(ख)॥

मेघनाद कै मुरुछा जागी । पितहि बिलोकिलाज अतिलागी
तुरत गयउ गिरिवर कंदरा । करौं अजय मख अस मन धरा ॥
इहाँ बिभीषन मंत्र विचारा । सुनहु नाथ बल अतुल उदारा ॥
मेघनाद मख करइ अपावन । खल मायावी देव सतावन ॥
जौ प्रभु सिद्ध होइ सो पाइहि । नाथ बेगि पुनि जीति न जाइहि ॥
सुनिरघुपति अतिसय सुख माना । बोले अंगदादि कपि नाना ॥
लछिमन संग जाहु सब भाई । करहु विधंस जग्य कर जाई ॥
तुम्ह लछिमन मारेहु रन ओही । देखि सभय सुर दुख अति मोही ॥
मारेहु तेहि बल बुद्धि उपाई । जेहिं छीजै नितिचर सुनु भाई ॥
जामवंत सुग्रीव बिभीषन । सेन समेत रहेहु तीनिउ जन ॥
जब रघुबीर दीन्ह अनुसासन । कटि निषंग कसि साजि सरासन ॥
प्रभु प्रताप उर धरि रनधीरा । बोले धन इव गिरा गँभीरा ॥

जौ तेहि आहु बध विनु आवा तौ रघुपति सबक न कहावौ ॥
जौ सत संकर करहिं सहाई । तदपि हतउँ रघुवीर दोहाई ॥

दो०—रघुपति चरन नाइ सिरु चलेउ तुरंत अनंत ।

अंगद नील मयंद नल संग सुभट हनुमंत ॥ ७५ ॥

जाइ कपिन्ह सो देखा बैसा । आहुति देत रुधिर अरु भैंसा ॥
कीन्ह कपिन्ह सब जग्य बिधंसा । जब न उठइ तब करहिं प्रसंसा ॥
तदपि न उठइ धरेन्हि कच जाई । लातन्हि हति हति चले पराई ॥
लै त्रिसूल धावा कपि भागे । आए जहँ रामानुज आगे ॥
आवा परम क्रोध कर मारा । गर्ज घोर रव बारहिं बारा ॥
कोपि मरुतसुत अंगद धाए । हति त्रिसूल उर धरनि गिराए ॥
प्रभु कहँ छाँड़ेसि सूल प्रचंडा । सर हति कृत अनंत जुग खंडा ॥
उठि बहोरि मारुति जुवराजा । हतहिं कोपि तेहि घाउ न बाजा ॥
फिरे बीर रिपु मरइ न मारा । तब धावा करि घोर चिकारा ॥
आवत देखि क्रुद्ध जनु काला । लछिमन छाड़े बिसिख कराला ॥
देखेसि आवत पवि सम बाना । तुरत भयउ खल अंतरधाना ॥
बिबिध बेष धरि करइ लराई । कबहुँक प्रगट कबहुँ दुरि जाई ॥
देखि अजय रिपु डरपे कीसा । परम क्रुद्ध तब भयउ अहीसा ॥
लछिमन मन अस मंत्र दृढ़ावा । एहि पापिहि मैं बहुत खेलावा ॥
सुमिरि कोसलाधीस प्रतापा । सर संधान कीन्ह करि दापा ॥
छाड़ा बान माझ उर लागा । मरती बार कपटु सब त्यागा ॥

दो०—रामानुज कहँ रामु कहँ अस कहि छाँदेसि प्रान ।

धन्य धन्य तव जननी कह अंगद हनुमान ॥७६॥

बिनु प्रयास हनुमान उठायो । लंका द्वार राखि पुनि आयो ॥
तासु मरन सुनि सुर गंधर्वा । चढ़ि विमान आए नभ सर्वा ॥
वरषि सुमन दुंदुभी बजावहिं । श्रीरघुनाथ विमल जसु गावहिं ॥
जय अनंत जय जगदाधारा । तुम्ह प्रभु सब देवन्हि निस्तारा ॥
अस्तुतिकरि सुर सिद्ध सिधाए । लछिमन कृपासिंधु पहिं आए ॥
सुत बध सुना दसानन जबहीं । मुरुछित भयउ परेउ महि तबहीं ॥
मंदोदरी रुदन कर भारी । उर ताड़न बहु भाँति पुकारी ॥
नगर लोग सब व्याकुल सोचा । सकल कहहिं दसकंधर पोचा ॥

दो०—तब दसकंठ बिबिधि बिधि समुझाई सब नारि ।

नस्वर रूप जगत सब देखहु हृदयँ बिचारि ॥ ७७ ॥

तिन्हहि ग्यान उपदेसा रावन । आपुन मंद कथा सुभ पावन ॥
पर उपदेस कुसल बहुतेरे । जे आचरहिं ते नर न घनेरे ॥
निसा सिरानि भयउ भिनुसारा । लगे भालु कपि चारिहुँ द्वारा ॥
सुभट बोलाइ दसानन बोला । रन सन्मुख जा कर मन डोला ॥
सो अवहीं बरु जाउ पराई । संजुग विमुख भएँ न भलाई ॥
निज भुज बल मैं बयरु बढ़ावा । देहउँ उतरु जो रिपु चढ़ि आवा ॥
अस कहि मरुत बेग रथ साजा । बाजे सकल जुझाऊ बाजा ॥

चले वीर सब अतुलित बली । जनु कजल कै आँधी चली ॥

असगुन अमित होहिं तेहि काला । गनइ न भुज बल गर्ब विसाला ॥

छं०—अति गर्ब गनइ न सगुन असगुन खवहिं आयुध हाथ ते ।
भट गिरत रथ ते बाजि गज चिकरत भाजहिं साथ ते ॥
गोमाय गीध कराल खर रव स्वान बोलहिं अति घने ।
जनु कालदूत उलूक बोलहिं बचन परम भयावने ॥

दो०—ताहि कि संपति सगुन सुभ सपनेहुं मन विश्राम ।

भूत द्रोह रत मोहबस राम बिमुख रति काम ॥ ७८ ॥

चलेउ निसाचर कटकु अपारा । चतुरंगिनी अनी बहु धारा ॥
बिबिधि भाँति बाहन रथ जाना । बिपुल वरन पताक ध्वज नाना ॥
चले मत्त गज जूथ घनेरे । प्राविट जलद मरुत जनु प्रेरे ॥
बरन बरन विरदैत निकाया । समर सूर जानहिं बहु माया ॥
अति विचित्र बाहिनी बिराजी । वीर बसंत सेन जनु साजी ॥
चलत कटक दिगसिंधुर डगहीं । छुभित पयोधि कुधर डगमगहीं ॥
उठी रेनु रवि गयउ छपाई । मरुत थकित बसुधा अकुलाई ॥
पनव निसान घोर रव बाजहिं । प्रलय समय के घन जनु गाजहिं ॥
भेरि नफीरि बाज सहनाई । मारू राग सुभट सुखदाई ॥
केहरि नाद वीर सब करहीं । निज निज बल पौरुष उच्चरहीं ॥
कहइ दसानन सुनहु सुभट्टा । मर्दहु भालु कपिन्ह के ठट्टा ॥
हौं मारिहउँ भूप द्रौ भाई । अस कहि सन्मुख फौज रेंगाई ॥

छं०—धाए बिसाल कराल मर्कट भालु काल समान ते ।

मानहुँ सपच्छ उड़ाहिं भूधर बृंद नाना बान ते ॥

नख दसन सैल महाद्रुमायुध सबल संक न मानहीं ।

जय राम रावन मत्त गज मृगराज सुजसु बखानहीं ॥

दो०—दुहु दिसि जय जयकार करि निज निज जोरी जानि।

भिरे बीर इत रामहि उत रावनहि बखानि ॥७९॥

रावनु रथी विरथ रघुवीरा । देखि विभीषन भयउ अधीरा ॥

अधिक प्रीति मन भा संदेहा । बंदि चरन कह सहित सनेहा ॥

नाथ नरथ नहिं तन पद त्राना । केहि विधि जितव वीर बलवाना ॥

सुनहु सखा कह कृपानिधाना । जेहिं जय होइ सो स्यंदन आना ॥

सौरज धीरज तेहि रथ चाका । सत्य सील दृढ़ ध्वजा पताका ॥

बल विवेक दम परहित घोरे । छमा कृपा समता रजु जोरे ॥

ईस भजनु सारथी सुजाना । विरति चर्म संतोष कृपाना ॥

दान परसु बुधि सक्ति प्रचंडा । वर विग्यान कठिन कोदंडा ॥

अमल अचल मन त्रोन समाना । सम जम नियम सिलीमुख नाना ॥

कवच अभेद विप्र गुर पूजा । एहि सम विजय उपाय न दूजा ॥

सखा धर्ममय अस रथ जाकें । जीतन कहँ न कतहुँ रिपु ताकें ॥

दो०—महा अजय संसार रिपु जीति सकइ सो बीर ।

जाकें अस रथ होइ दृढ़ सुनहु सखा मतिधीर ॥८०(क)॥

सुनि प्रभु बचन विभीषन हरषि गहे पद कंज ।

एहि मिस मोहि उपदेसेहु राम कृपा सुख पुंज ॥८०(ख)॥

उत पचार दुसकधर इत अगद हनुमान ।

लरत निसाचर भालु कपि करि निज निज प्रभु आन ॥ ८० (ग) ॥

सुर ब्रह्मादि सिद्ध मुनि नाना । देखत रन नभ चढ़े विमाना ॥
 हमहू उमा रहे तेहिं संगी । देखत राम चरित रन रंगा ॥
 सुभट समर रस दुहु दिसि माते । कपि जयसील राम बल ताते ॥
 एक एक सन भिरहिं पचारहिं । एकन्ह एक मर्दि महि पारहिं ॥
 मारहिं काटहिं धरहिं पछारहिं । सीस तोरि सीसन्ह सन मारहिं ॥
 उदर बिदारहिं भुजा उपारहिं । गहि पद अवनि पटकि भट डारहिं
 निसिचर भट महि गाड़हिं भालू । ऊपर ढारि देहिं बहु बालू ॥
 बीर बलीमुख जुद्ध बिरुद्धे । देखिअत विपुल काल जनु क्रुद्धे ॥

छं०—क्रुद्धे कृतांत समान कपि तन खवत सोनित राजहीं ।
 मर्दिहिं निसाचर कटक भट बलवंत घन जिमि गाजहीं ॥
 मारहिं चपेटन्हि डाटि दातन्ह काटि लातन्ह मीजहीं ।
 चिकरहिं मर्कट भालु छल बल करहिं जेहिं खल छीजहीं ॥ १ ॥
 धरि गाल फारहिं उर बिदारहिं गल अँतावरि मेलहीं ।
 प्रह्लादपति जनु बिबिध तनु धरि समर अंगन खेलहीं ॥
 धरु मारु काटु पछारु घोर गिरा गगन महि भरि रही ।
 जय राम जो तृन ते कुलिस कर कुलिस ते कर तृन सही ॥ २ ॥

दो०—निज दल बिचलत देखेसि बीस भुजाँ दस चाप ।

रथ चदि चलेउ दसानन फिरहु फिरहु करि दाय ॥ ४१ ॥

धायउ परम क्रुद्ध दसकंधर । सन्मुख चले हूह दै बंदर ॥
 गहि कर पादप उपल पहारा । डारेन्हि ता पर एकहिं बारा ॥
 लागहिं सैल बज्र तन तासू । खंड खंड होइ फूटहिं आसू ॥
 चला न अचल रहा रथ रोपी । रन दुर्मंद रावन अति कोपी ॥
 इत उत झपटि दपटि कपि जोधा । मदैं लाग भयउ अति क्रोधा ॥
 चले पराइ भालु कपि नाना । त्राहि त्राहि अंगद हनुमाना ॥
 पाहि पाहि रघुवीर गोसाईं । यह खल खाइ काल की नाई ॥
 तेहिं देखे कपि सकल पराने । दसहुँ चाप सायक संधाने ॥

छं०—संधानि धनु सर निकर छाड़ेसि उरग जिमि उड़ि लागहीं।
 रहे पूरि सर धरनी गगन दिसि बिदिसि कहँ कपि भागहीं ॥
 भयो अति कोलाहल बिकल कपि दल भालु बोलहिं आतुरे ।
 रघुवीर करुना सिंधु आरत बंधु जन रच्छक हरे ॥
 दो०—निज दल बिकल देखि कटि कसि निषंग धनु हाथ ।

लछिमन चले क्रुद्ध होइ नाइ राम पद माथ ॥८२॥

रे खल का मारसि कपि भालू । मोहि बिलोकु तोर मैं कालू ॥
 खोजत रहेउँ तोहि सुतघाती । आजु निपाति जुड़ावउँ छाती ॥
 अस कहि छाड़ेसि बान प्रचंडा । लछिमन किए सकल सत खंडा ॥
 कोटिन्ह आयुध रावन डारे । तिल प्रवान करि काटि निवारे ॥
 पुनि निज बानन्ह कीन्ह प्रहारा । स्यंदनु भंजि सारथी मारा ॥
 सत सत सर मारे दस भाला । गिरि संगन्ह जनु प्रबिसहिं ब्याला ॥

पुनिसत सर मारा उर माहीं । परेउ धरनि तल सुधि कछु नाहीं॥
उठा प्रबल पुनि मुरुछा जागी । छाड़िसि ब्रह्म दीन्हि जो साँगी ॥

छं०—सो ब्रह्म दत्त प्रचंड सक्ति अनंत उर लागी सही ।
परयो बीर बिकल उठाव दसमुख अतुल बल महिमा रही ॥
ब्रह्मांड भवन बिराज जाकें एक सिर जिमि रज कनी ।
तेहि चह उठावन मूढ़ रावन जान नहिं त्रिभुवन धनी ॥

दो०—देखि पवनसुत धायउ बोलत बचन कठोर ।

आवत कपिहि हन्यो तेहिं मुष्टि प्रहार प्रघोर ॥८३॥
जानु टेकि कपि भूमि न गिरा । उठा सँभारि बहुतरिस भरा ॥
मुठिका एक ताहि कपि मारा । परेउ सैल जनु बज्र प्रहारा ॥
मुरुछा गै बहोरि सो जागा । कपि बल विपुल सराहन लागा ॥
धिग धिग मम पौरुष धिग मोही । जाँ तैं जिअत रहेसि सुरद्रोही ॥
अस कहि लछिमन कहूँ कपि ल्यायो । देखि दसानन बिसमय पायो ॥
कह रघुबीर समुझु जियँ भ्राता । तुम्ह कृतांत भच्छक सुर त्राता ॥
सुनत बचन उठि बैठ कृपाला । गई गगन सो सकति कराला ॥
पुनि कोदंड बान गहि धाए । रिपु सन्मुख अति आतुर आए ॥

छं०—आतुर बहोरि बिभंजि स्यंदन सूत हति व्याकुल कियो ।
गिरयो धरनि दसकंधर बिकलतर बान सत बेध्यो हियो ॥
सारथी दूसर घालि रथ तेहि तुरत लंका लै गयो ।

रघुबीर बंधु प्रताप पुंज बहोरि प्रभु चरनन्हि नयो ॥

Vinay Avasthi Sahib Bhuvan Vani Trust Donations

दो०—उहाँ दसानन जागि करि कर लाग कछु जग्य ।

राम विरोध बिजय चह सठ हठ बस अति अग्य ॥८४॥

इहाँ विभीषन सब सुधि पाई । सपदि जाइ रघुपतिहि सुनाई ॥

नाथ करइ रावन एक जागा । सिद्ध भएँ नहिं मरिहि अभागा ॥

पठवहु नाथ बेगि भट बंदर । करहिं बिधंस आव दसकंधर ॥

प्रात होत प्रभु सुभट पठाए । हनुमदादि अंगद सब धाए ॥

कौतुक कूदि चढ़े कपि लंका । पैठे रावन भवन असंका ॥

जग्य करत जबहीं सो देखा । सकल कपिन्ह भाक्रोध बिसेषा ॥

रन ते निलज भाजि गृह आवा । इहाँ आइ बक ध्यान लगावा ॥

अस कहि अंगद मारा लाता । चितव न सठ स्वारथ मन राता ॥

छं०—नहिं चितव जब करि कोप कपि गहि दसन लातन्ह मारहीं ।

धरि केस नारि निकारि बाहेर तेऽतिदीन पुकारहीं ॥

तब उठेउ क्रुद्ध कृतांत सम गहि चरन बानर डारई ।

एहि बीच कपिन्ह बिधंस कृत मख देखि मन महुँ हारई ॥

दो०—जग्य बिधंसि कुसल कपि आए रघुपति पास ।

चलेउ निसाचर क्रुद्ध होइ त्यागि जिवन कै आस ॥८५॥

चलत होहिं अति असुभ भयंकर । बैठहिं गीध उड़ाइ सिरन्ह पर ॥

भयउ कालबस काहु न माना । कहेसि बजावहु जुद्ध निसाना ॥

चली तमीचर अनी अपारा । बहु गज रथ पदाति असवारा ॥

प्रभु सन्मुख धाए खल कैसें । सलभ समूह अनल कहैं जैसें ॥

Vinay Avasthi Sahib Bhuvan Vani Trust Donations

इहाँ देवतन्ह अस्तुति कान्हो । दारुन बिपति हमहि एहि दीन्ही ॥
 अब जनि राम खेलावहु एही । अतिसय दुखित होति बैदेही ॥
 देव बचन सुनि प्रभु सुसुकाना । उठि रघुबीर सुधारे बाना ॥
 जटा बूट दृढ़ बाँधे माथे । सोहहिं सुमन बीच बिच गाथे ॥
 अरुन नयन बारिद तनु स्यामा । अखिल लोक लोचनाभिरामा ॥
 कटितट परिकर कस्यो निषंगा । कर कोदंड कठिन सारंगा ॥

छं०-सारंग कर सुंदर निषंग सिलीमुखाकर कटि कस्यो ।
 भुजदंड पीन मनोहरायत उर धरासुर पद लस्यो ॥
 कह दास तुलसी जबहिं प्रभु सर चाप कर फेरन लगे ।
 ब्रह्मांड दिग्गज कमठ अहि महि सिंधु भूधर डगमगे ॥

दो०-सोभा देखि हरषि सुर वरषहिं सुमन अपार ।
 जय जय जय करुनानिधि छवि बल गुन आगार ॥८६॥

एहीं बीच निसाचर अनी । कसमसात आई अति घनी ॥
 देखि चले सन्मुख कपि भट्टा । प्रलयकाल के जनु घन घट्टा ॥
 बहु कृपान तरवारि चमंकहिं । जनु दहँ दिसि दामिनीं दमंकहिं ॥
 गज रथ तुरग चिकार कठोरा । गर्जहिं मनहुँ बलाहक घोरा ॥
 कपि लंगूर विपुल नभ छाए । मनहुँ इंद्रधनु उए सुहाए ॥
 उठइ धूरि मानहुँ जलधारा । बान बुंद मै बृष्टि अपारा ॥
 दुहुँ दिसि पर्वत करहिं प्रहारा । बज्रपात जनु बारहिं वारा ॥
 रघुपति कोपि बान झरि लाई । घायल मै निसिचर समुदाई ॥

लागत बान बीर चिकरहीं । धुर्मि धुर्मि जहँ तहँ महि परहीं ॥
सखहिँ सैल जनु निश्रं भारी । सोनित सरि कादर भयकारी ॥

छं०—कादर भयंकर रुधिर सरिता चली परम अपावनी ।
दोउ कूल दल रथ रेत चक्र अबर्त बहति भयावनी ॥
जलजंतु गज पदचर तुरग खर विविध बाहन को गने ।
सर सक्ति तोमर सर्प चाप तरंग चर्म कमठ घने ॥

दो०—बीर परहिं जनु तीर तरु मज्जा बहु बह फेन ।
कादर देखि डरहिं तहँ सुभटन्ह के मन चेन ॥८७॥

मज्जहिं भूत पिसाच बेताला । प्रमथ महा झोटिंग कराला ॥
काक कंक लै भुजा उड़ाहीं । एक ते छीनि एक लै खाहीं ॥
एक कहहिं ऐसिउ सौंघाई । सठहु तुम्हार दरिद्र न जाई ॥
कहँरत भट घायल तट गिरे । जहँ तहँ मनहुँ अर्धजल परे ॥
खैचहिं गीध आँत तट भए । जनु बंसी खेलत चित दए ॥
बहु भट बहहिं चढ़े खग जाहीं । जनु नावरि खेलहिं सरि माहीं ॥
जोगिनि भरि भरि खप्पर संचहिं । भूत पिसाच बधू नभ नंचहिं ॥
भट कपाल करताल बजावहिं । चामुंडा नाना विधि गावहिं ॥
जंबुक निकर कटकट कटहिं । खाहिं हुआहिं अघाहिं दपट्टहिं ॥
कोटिन्ह रुंड मुंड विनु डोलहिं । सीस परे महि जय जय बोलहिं ॥

छं०—बोलहिं जो जय जय मुंड रुंड प्रचंड सिर विनु धावहीं ।

खप्परिन्ह खग अलुज्झि जुज्झहिं सुभट भटन्ह ढहावहीं ॥

जीतेहु जे भट संजुग माहीं । सुनु तापस मैं तिन्ह सम नाहीं ॥
 रावन नाम जगत जस जाना । लोकप जाकें बंदीखाना ॥
 खर दूपन विराध तुम्ह मारा । बधेहु व्याध इव बालि बिचारा ॥
 निसिचर निकर सुभट संघारेहु । कुंभकरन घननादहि मारेहु ॥
 आजु बयरु सबु लेउँ निवाही । जौं रन भूप भाजि नहिं जाही ॥
 आजु करउँ खलु काल हवाले । परेहु कठिन रावन के पाले ॥
 सुनि दुर्वचन कालबस जाना । बिहँसि बचन कह कृपानिधाना ॥
 सत्य सत्य सब तव प्रभुताई । जल्पसि जनि देखाउ मनुसाई ॥

छं०—जनि जल्पना करि सुजसु नासहि नीति सुनहि करहि छमा ।
 संसार महुँ पूरुष त्रिविध पाटल रसाल पनस समा ॥
 एक सुमनप्रद एक सुमन फल एक फलइ केवल लागहीं ।
 एक कहहिं कहहिं करहिं अपर एक करहिं कहत न बागहीं ॥

दो०—राम बचन सुनि बिहँसा मोहि सिखावत ग्यान ।
 बयरु करत नहिं तब डरे अब लागे प्रिय प्रान ॥९०॥

कहि दुर्वचन क्रुद्ध दसकंधर । कुलिस समान लाग छाँड़ै सर ॥
 नानाकार सिलीमुख धाए । दिसि अरु विदिसि गगन महि छाए
 पावक सर छाँड़ेउ रघुवीरा । छन महुँ जरे निसाचर तीरा ॥
 छाड़िसि तीव्र सक्ति खिसिआई । बान संग प्रभु फेरि चलाई ॥
 कोटिन्ह चक्र त्रिसूल पवारै । बिनु प्रयास प्रभु काटि निवारै ॥
 निफल होहिं रावन सर कैसैं । खल के सकल मनोरथ जैसैं ॥

तब सत बान सारथी मारेसि । परेउ भूमि जय राम पुकारेसि ॥

राम कृपा करि सूत उठावा । तब प्रभु परम क्रोध कहूँ पावा ॥

छं०-भए क्रुद्ध जुद्ध विरुद्ध रघुपति त्रोन सायक कसमसे ।

कोदंड धुनि अति चंड सुनि मनुजाद सब मारुत ग्रसे ॥

मंदोदरी उर कंप कंपति कमठ भू भूधर त्रसे ।

चिक्करहिं दिग्गज दसन गहि महि देखि कौतुक सुर हँसे ॥

दो०-तानेउ चाप श्रवन लागि छाँड़े बिसिख कराल ।

राम मारगन गन चले लहलहात जनु व्याल ॥९१॥

चले बान सपच्छ जनु उरगा । प्रथमहिं हतेउ सारथी तुरगा ॥

रथ विभंजि हति केतु पताका । गर्जा अति अंतर बल थाका ॥

तुरत आन रथ चढ़ि खिसिआना । अस्त्र सस्त्र छाँड़ेसि विधि नाना

बिफल होहिं सब उद्यम ताके । जिमि परद्रोह निरत मनसा के ॥

तब रावन दस सूल चलावा । बाजि चारि महि मारि गिरावा ॥

तुरग उठाइ कोपि रघुनायक । खैंचि सरासन छाँड़े सायक ॥

रावन सिर सरोज बन चारी । चलि रघुवीर सिलीमुख धारी ॥

दस दस बान भाल दस मारे । निसरि गए चले रुधिर पनारे ॥

खवत रुधिर धायउ बलवाना । प्रभु पुनि कृत धनु सर संधाना ॥

तीस तीर रघुवीर पनारे । भुजन्हि समेत सीस महि पारे ॥

काटतहीं पुनि भए नवीने । राम बहोरि भुजा सिर छीने ॥

पुनि पुनि प्रभु काटत भुज सीसा । अति कौतुकी कोसलाधीसा ॥
रहे छाड़ नभ सिर अरु बाहू । मानहुँ अमित केतु अरु राहू ॥

छं०—जनु राहु केतु अनेक नभ पथ स्रवत सोनित धावहीं ।
रघुवीर तीर प्रचंड लागहिं भूमि गिरन न पावहीं ॥
एक एक सर सिर निकर छेदे नभ उड़त इमि सोहहीं ।
जनु कोपि दिनकर कर निकर जहँ तहँ बिधुंतुद पोहहीं ॥

दो०—जिमि जिमि प्रभु हर तासु सिर तिमि तिमि होहिं अपार ।
सेवत विषय विबर्ध जिमि नित नित नूतन मार ॥९२॥

दसमुख देखि सिरन्ह कै बाढ़ी । विसरा मरन भई रिस गाढ़ी ॥
गजेंउ मूढ़ महा अभिमानी । धायउ दसहु सरासन तानी ॥
समर भूमि दसकंधर कोप्यो । वरषि बान रघुपति रथ तोप्यो ॥
दंड एक रथ देखि न परेऊ । जनु निहार महुँ दिनकर दुरेऊ ॥
हाहाकार सुरन्ह जब कीन्हा । तब प्रभु कोपि कारमुक लीन्हा ॥
सर निवारि रिपु के सिर काटे । ते दिसि विदिसि गगन महि पाटे
काटे सिर नभ मारग धावहिं । जय जय धुनि करि भय उपजावहिं
कहँ लछिमन सुग्रीव कपीसा । कहँ रघुवीर कोसलाधीसा ॥

छं०—कहँ रासु कहि सिर निकर धाए देखि मर्कट भजि चले ।
संधानि धनु रघुवंसमनि हँसि सरन्हि सिर बेधे भले ॥
सिर मालिका कर कालिका गहि बृंद बृंदन्हि बहु मिलीं ।
करि रुधिर सरि मज्जनु मनहुँ संग्राम बट पूजन चलीं ॥

दो०—पुनि दसकंठ क्रुद्ध होइ छाँड़ी सक्ति प्रचंड ।

चली बिभीषन सन्मुख मनहुँ काल कर दंड ॥९३॥

आवत देखि सक्ति अति घोरा । प्रनतारति भंजन पन मोरा ॥
 तुरत बिभीषन पाछें मेला । सन्मुख राम सहेउ सोइ सेला ॥
 लागि सक्ति मुरुछा कछु भई । प्रभु कृत खेल सुरन्ह बिकलई ॥
 देखि बिभीषन प्रभु श्रम पायो । गहि कर गदा क्रुद्ध होइ धायो ॥
 रे कुभाग्य सठ मंद कुबुद्धे । तैं सुर नर मुनि नाग बिरुद्धे ॥
 सादर सिव कहूँ सीस चढ़ाए । एक एक के कोटिन्ह पाए ॥
 तेहि कारन खल अब लगि बाँच्यो । अब तव कालु सीस पर नाच्यो
 राम बिमुख सठ चहसि संपदा । अस कहि हनेसि माझ उर गदा

छं०—उर माझ गदा प्रहार घोर कठोर लागत महि परयो ।
 दस बदन सोनित स्रवत पुनि संभारि धायो रिस भरयो ॥
 द्वौ भिरे अतिबल मल्लजुद्ध बिरुद्ध एकु एकहि हनै ।
 रघुबीर बल दर्पित बिभीषनु घालि नहिं ता कहूँ गनै ॥

दो०—उमा बिभीषनु रावनहि सन्मुख चितव कि काउ ।

सो अब भिरत काल ज्यों श्रीरघुबीर प्रभाउ ॥९४॥

देखा श्रमित बिभीषनु भारी । धायउ हनूमान गिरि धारी ॥
 रथ तुरंग सारथी निपाता । हृदय माझ तेहि मारेसि लाता ॥
 ठाढ़ रहा अति कंपित गाता । गयउ बिभीषनु जहँ जनत्राता ॥

पुनि रावन कपि हतेउ मत्तसी चढेउ रागत बढि गँड पलादी ॥

गहिसि पूँछ कपि सहित उड़ाना । पुनि फिरि भिरेउ प्रबल हनुमाना
लरत अकास जुगल सम जोधा । एकहि एकु हनत करि क्रोधा ॥
सोहहिं नभ छल बल बहु करहीं । कजलगिरि सुमेरु जनु लरहीं ॥
बुधि बल निसिचर परइ न पारयो । तब मारुत सुत प्रभु संभारयो ॥

छं०—संभारि श्रीरघुबीर धीर पचारि कपि रावनु हन्यो ।
महि परत पुनि उठि लरत देवन्ह जुगल कहूँ जय जय भन्यो ॥
हनुमंत संकट देखि मर्कट भालु क्रोधातुर चले ।
रन मत्त रावन सकल सुभट प्रचंड भुज बल दलमले ॥

दो०—तब रघुबीर पचारे धाए कीस प्रचंड ।

कपि बल प्रबल देखि तेहिं कीन्ह प्रगट पाषंड ॥ ९५ ॥

अंतरधान भयउ छन एका । पुनि प्रगटे खल रूप अनेका ॥
रघुपति कटक भालु कपि जेते । जहँ तहँ प्रगट दसानन तेते ॥
देखे कपिन्ह अमित दससीसा । जहँ तहँ भजे भालु अरु कीसा ॥
भागे वानर धरहिं न धीरा । त्राहि त्राहि लछिमन रघुबीरा ॥
दहँ दिसि धावहिं कोटिन्ह रावन । गर्जहिं घोर कठोर भयावन ॥
डरे सकल सुर चले पराई । जय कै आस तजहु अब भाई ॥
सब सुर जिते एक दसकंधर । अब बहु भए तकहु गिरि कंदरा ॥
रहे विरंचि संभु मुनि ग्यानी । जिन्ह जिन्ह प्रभु महिमा कह्यु जानी ॥

छं०—जाना प्रताप ते रहे निर्भय कपिन्ह रिपु माने फुरे ।

चले बिचलि मर्कट भालु सकल कृपाल पाहि भयातुरे ॥

हनुमंत अंगद नील नल अतिबल लरत रन धाँकुरे ।

मर्दाहिं दसानन कोटि कोटिन्ह कपट भू भट अंकुरे ॥

१०-सुर बानर देखे बिकल हँस्यो कोसलाधीस ।

सजि सारंग एक सर हते सकल दससीस ॥९६॥

प्रभु छन महुँ माया सब काटी । जिमि रवि उएँ जाहिं तम फाटी

रावनु एकु देखि सुर हरषे । फिरे सुमन बहु प्रभु पर वरषे ॥

भुज उठाइ रघुपति कपि फेरे । फिरे एक एकन्ह तब टेरे ॥

प्रभु बलु पाइ भालु कपि धाए । तरल तमकि संजुग महि आए ॥

अस्तुति करत देवतन्हि देखें । भयउँ एक मैं इन्ह के लेखें ॥

सठहु सदा तुम्ह मोर मरायल । अस कहि कोपि गगन पर धायल

हाहाकार करत सुर भागे । खलहु जाहु कहँ मोरें आगे ॥

देखि बिकल सुर अंगद धायो । कूदि चरन गहि भूमि गिरायो ॥

छं०-गहि भूमि पारयो लात मारयो बालिसुत प्रभु पहिं गयो ।

संभारि उठि दसकंठ घोर कठोर रव गर्जत भयो ॥

करि दाप चाप चढ़ाइ दस संधानि सर बहु बरषई ।

किए सकल भट धायल भयाकुल देखि निज बल हरषई ॥

दो०-तब रघुपति रावन के सीस भुजा सर चाप ।

काटे बहुत बड़े पुनि जिमि तीरथ कर पाप ॥९७॥

सिर भुज बाढ़ि देखि रिपु केरी । भालु कपिन्ह रिस भई घनेरी ॥

मरत न महुँ कटेहुँ भुज सीसा । भाए कोपि भालु भट कीसा ॥

Vinay Avasthi Sahib Bhuvan Vani Trust Donations.

बालितनय मारुति नल नीला । बानरराज दुबिद बलसीला ॥
 बिटप महीधर करहिं प्रहारा । सोइ गिरि तरु गहि कपिन्ह सो मारा
 एक नखन्हि रिपु वपुष बिदारी । भागि चलहिं एक लातन्ह मारी
 तब नल नील सिरन्हि चढ़ि गयऊ । नखन्हि लिलार बिदारत भयऊ
 रुधिर देखि बिषाद उर भारी । तिन्हहि धरन कहूँ भुजा पसारी
 गहे न जाहिं करन्हि पर फिरहीं । जनु जुग मधुप कमल बन चरहीं
 कोपि कूदि द्वौ धोरेसि बहोरी । महि पटकत भजे भुजा मरोरी ॥
 पुनि सकोप दस धनु कर लीन्हे । सरन्हि मारि घायल कपि कीन्हे ॥
 हनुमदादि मुरुछित करि बंदर । पाइ प्रदोष हरष दसकंधर ॥
 मुरुछित देखि सकल कपि बीरा । जामवंत धायउ रनधीरा ॥
 संग भालु भूधर तरु धारी । मारन लगे पचारि पचारी ॥
 भयउ क्रुद्ध रावन बलवाना । गहि पद महि पटकइ भट नाना ॥
 देखि भालुपति निज दल घाता । कोपि माझ उर मारेसि लाता ॥

छं०—उर लात घात प्रचंड लागत बिकल रथ ते महि परा ।

गहि भालु बीसहुँ कर मनहुँ कमलन्हि बसे निसि मधुकरा ॥

मुरुछित बिलोकि बहोरि पद हति भालुपति प्रभु पहिं गयो ।

निसि जानि स्यंदन घालि तेहि तब सूत जतनु करत भयो ॥

दो०—मुरुछा बिगत भालु कपि सब आए प्रभु पास ।

निसिचर सकल रावनहि घेरि रहे अति त्रास ॥९८॥

मासपारायण, छब्बीसवाँ विश्राम

तेही निधि सीता धरि जाई त्रिजटा कहि सब कथा सुनाई ॥
 सिर भुज बाढ़ि सुनतरिपु केरी । सीता उर भइ त्रास घनेरी ॥
 मुख मलीन उपजी मन चिंता । त्रिजटा सन बोली तब सीता ॥
 होइहि कहा कहसि किन माता । केहि बिधि मरिहि बिस्व दुखदाता
 रघुपति सर सिर कटेहुँ न मरई । बिधि बिपरीत चरित सब करई ॥
 मोर अभाग्य जिआवत ओही । जेहिं हौं हरि पद कमल बिछोही ॥
 जेहिं कृत कपट कनक मृग झूठा । अजहुँ सो दैव मोहि पर रूठा ॥
 जेहिं बिधि मोहि दुख दुसह सहाए । लछिमन कहूँ कटु बचन कहाए
 रघुपति बिरह सविष सर भारी । तकि तकि मार बार बहु मारी ॥
 ऐसेहुँ दुख जो राख मम प्राना । सोइ बिधि ताहि जिआव न आना
 बहु बिधि कर बिलाप जानकी । करि करि सुरति कृपानिधान की ॥
 कह त्रिजटा सुनु राजकुमारी । उर सर लागत मरइ सुरारी ॥
 प्रभु ताते उर हतइ न तेही । एहि के हृदयँ बसति बैदेही ॥

छं०—एहि के हृदयँ बस जानकी जानकी उर मम बास है ।

मम उदर भुअन अनेक लागत वान सब कर नास है ॥

सुनि बचन हरष बिषाद मन अति देखि पुनि त्रिजटाँ कहा ।

अब मरिहि रिपु एहि बिधि सुनहि सुंदरि तजहि संसय महा

दो०—काटत सिर होइहि बिकल छुटि जाइहि तब ध्यान ।

तब रावनहि हृदय महुँ मरिहहि रामु सुजान ॥९९॥

अस कहि बहुत भाँति समझाई । पुनि त्रिजटा निज भवन सिधाई ॥

राम सुभाउ सुमिरि बदेही । उपजी बिरह बिधा अति तेही ॥
 निसिहि ससिहि निंदति बहु भाँती । जुग सम भई सिराति न राती ॥
 करति बिलाप मनहिं मन भारी । राम बिरहँ जानकी दुखारी ॥
 जब अति भयउ बिरह उर दाहू । फरकेउ बामनयन अरु बाहू ॥
 सगुन बिचारि धरी मन धीरा । अब मिलिहहिं कृपाल रघुबीरा ॥
 इहाँ अर्धनिसि रावनु जागा । निज सारथि सन खीझन लागा ॥
 सठ रनभूमि छड़ाइसि मोही । धिग धिग अधम मंदमति तोही ॥
 तेहिं पद गहि बहुविधि समुझावा । भोरु भएँ रथ चढ़ि पुनि धावा ॥
 सुनि आगवनु दसानन केरा । कपि दल खरभर भयउ घनेरा ॥
 जहँ तहँ भूधर बिटप उपारी । धाए कटकटाइ भट भारी ॥

छं०—धाए जो मर्कट बिकट भालु कराल कर भूधर धरा ।

अति कोप करहिं प्रहार मारत भजि चले रजनीचरा ॥

बिचलाइ दल बलवंत कीसन्ह घेरि पुनि रावनु लियो ।

चहुँ दिसि चपेटन्ह मारि नखन्हि बिदारि तनु व्याकुल क्रियो

दो०—देखि महा मर्कट प्रबल रावन कीन्ह बिचार ।

अंतरहित होइ निमिष महुँ कृत माया बिस्तार ॥ १०० ॥

छं०—जब कीन्ह तेहिं पाषंड । भए प्रगट जंतु प्रचंड ॥

बेताल भूत पिसाच । कर धरें धनु नाराच ॥ १ ॥

जोगिनि गहें करबाल । एक हाथ मनुज कपाल ॥

करि सद्य सोनित पान । नाचहिं करहिं बहु गान ॥ २ ॥

Vinay Avasthi Sahib Bhuwan Vani Trust Donations

धरु मारु बोलहि वार । राह पूर धुनि चहु ओर ॥

मुख बाइ धावहिं खान । तब लगे कीस परान ॥ ३ ॥

जहँ जाहिं मर्कट भागि । तहँ बरत देखहिं आगि ॥

भए विकल बानर भालु । पुनि लाग बरषै बालु ॥ ४ ॥

जहँ तहँ थकित करि कीस । गर्जेउ बहुरि दससीस ॥

लछिमन कपीस समेत । भए सकल बीर अचेत ॥ ५ ॥

हा राम हा रघुनाथ । कहि सुभट मीजहिं हाथ ॥

एहि विधि सकल बल तोरि । तेहिं कीन्ह कपट बहोरि ॥ ६ ॥

प्रगटेसि विपुल हनुमान । धाए गहे पाषाण ॥

तिन्ह रामु घेरे जाइ । चहुँ दिसि बरूथ बनाइ ॥ ७ ॥

मारहु धरहु जनि जाइ । कटकटहिं पूँछ उठाइ ॥

दहँ दिसि लँगूर विराज । तेहिं मध्य कोसलराज ॥ ८ ॥

छं०-तेहिं मध्य कोसलराज सुंदर स्याम तन सोभा लही ।

जनु इंद्रधनुष अनेक की बर बारि तुंग तमालही ॥

प्रभु देखि हरष विषाद उर सुर बदत जय जय जय करी ।

रघुबीर एकहिं तीर कोपि निमेष महुँ माया हरी ॥ १ ॥

माया बिगत कपि भालु हरषे बिटप गिरि गहि सब फिरे ।

सर निकर छाड़े राम रावन बाहु सिर पुनि महि गिरे ॥

श्रीराम रावन समर चरित अनेक कल्प जो गावहीं ।

सत सेष सारद निगम कबि तेउ तदपि पार न पावहीं ॥ २ ॥

दो०—ताक गुन गन कछु कहै जइ माति तुलसीदास ।

जिमि निज बल अनुरूप ते माछी उड़इ अकास ॥ १०१ (क) ॥

काटे सिर भुज बार बहु मरत न भट लंकेस ।

प्रभु क्रीड़त सुर सिद्ध मुनि व्याकुल देखि कलेस ॥ १०१ (ख) ॥

काटत बढ़हिं सीस समुदाई । जिमि प्रति लाभ लोभ अधिकाई
मरइ न रिपु श्रम भयउ विशेष । राम विभीषन तन तब देखा ॥
उमा काल मर जाकीं ईछा । सो प्रभु जन कर प्रीति परीछा ॥
सुनु सरवग्य चराचर नायक । प्रनतपाल सुर मुनि सुखदायक ॥
नाभिकुंड पियूष बस याकें । नाथ जिअत रावनु बल ताकें
सुनत विभीषन बचन कृपाला । हरषि गहे कर बान कराला ॥
असुभ होन लागे तब नाना । रोवहिं खर सुकाल बहु स्वाना ॥
बोलहिं खग जग आरति हेतू । प्रगट भए नभ जहँ तहँ केतू ॥
दसदिसि दाह होन अति लागा । भयउ परब विनु रवि उपरागा ॥
मंदोदरि उर कंपति भारी । प्रतिमा खवहिं नयन मग बारी ॥

छं०—प्रतिमा रुदहिं पविपात नभ अति बात बह डोलति मही ।

बरषहिं बलाहक रुधिर कच रज असुभ अति सक को कही ॥

उतपात अमित बिलोकि नभ सुर बिकल बोलहिं जय जए ।

सुर सभय जानि कृपाल रघुपति चाप सर जोरत भए ॥

दो०—खैंचि सरासन श्रवन लागि छाड़े सर एकतीस ।

रघुनायक सायक चले मानहुँ काल फनीस ॥ १०२ ॥

सायक एक नामि सर सीसा । अपर लग भुज सर कर रोषा ॥
 लै सिर बाहु चले नाराचा । सिर भुज हीन खंड महि नाचा ॥
 धरनि धसइ धर धाव प्रचंडा । तब सर हति प्रभु कृत दुइ खंडा ॥
 गर्जेउ मरत घोर रव भारी । कहाँ रामु रन हतौं पचारी ॥
 डोली भूमि गिरत दसकंधर । छुभित सिंधु सरि दिग्गज भूधर ॥
 धरनि परेउ द्वौ खंड बढ़ाई । चापि भालु मर्कट समुदाई ॥
 मंदोदरि आगे भुज सीसा । धरि सर चले जहाँ जगदीसा ॥
 प्रविसे सब निषंग महँ जाई । देखि सुरन्ह दुंदुभी बजाई ॥
 तासु तेज समान प्रभु आनन । हरषे देखि संभु चतुरानन ॥
 जय जय धुनि पूरी ब्रह्मंडा । जय रघुवीर प्रबल भुजदंडा ॥
 वरषहिं सुमन देव मुनि बृन्दा । जय कृपाल जय जयति मुकुन्दा ॥

छं०-जय कृपा कंद मुकुंद द्वंद हरन सरन सुखप्रद प्रभो ।

खल दल बिदारन परम कारन कारुणीक सदा बिभो ॥

सुर सुमन वरषहिं हरष संकुल बाज दुंदुभि गहगही ।

संग्राम अंगन राम अंग अनंग बहु सोभा लही ॥१॥

सिर जटा मुकुट प्रसून बिच बिच अति मनोहर राजहीं ।

जनु नीलगिरि पर तड़ित पटल समेत उडुगन आजहीं ॥

भुजदंड सर कोदंड फेरत रुधिर कन तन अति बने ।

जनु रायमुनीं तमाल पर बैठीं बिपुल सुख आपने ॥२॥

दो०-कृपादृष्टि करि वृष्टि प्रभु अभय किए सुर बृंद ।

भालु कीस सब हरषे जय सुख धाम मुकुंद ॥१०३॥

पति सिर देखत मंदोदरी । मुह छित विकल धरनि लखि परी
जुवति बृंद रोवत उठि धाई । तेहि उठाइ रावन पहि आई ॥
पति गति देखि ते करहिं पुकारा । छूटे कच नहिं बपुष सँभारा ॥
उर ताड़ना करहिं विधि नाना । रोवत करहिं प्रताप बखाना ॥
तव बल नाथ डोल नित धरनी । तेज हीन पावक ससि तरनी ॥
शेष कमठ सहि सकहिं न भारा । सो तनु भूमि परेउ भरि छारा ॥
बरुन कुबेर सुरेस समीरा । रन सन्मुख धरि काहुँ न धीरा ॥
भुजबल जितेहु काल जम साई । आजु परेहु अनाथ की नाई ॥
जगत बिदित तुम्हारि प्रभुताई । सुत परिजन बल बरनि न जाई ॥
राम विमुख अस हाल तुम्हारा । रहा न कोउ कुल रोवनिहारा ॥
तव बस विधि प्रपंच सब नाथा । सभ्य दिसिप नित नावहिं माथा ॥
अब तव सिर भुज जंबुक खाहीं । राम विमुख यह अनुचित नाहीं ॥
काल विवस पति कहा न माना । अग जग नाथु मनुज करि जाना ॥

छं०-जान्यो मनुज करि दनुज कानन दहन पावक हरि स्वयं ।
जेहि नमत सिव ब्रह्मादि सुर पिय भजेहु नहिं करुनामयं ॥
आजन्म ते परद्रोह रत पापौघमय तव तनु अयं ।
तुम्हहू दियो निज धाम राम नमामि ब्रह्म निरामयं ॥

दो०-अहह नाथ रघुनाथ सम कृपासिंधु नहिं आन ।

जोगि बृंद दुर्लभ गति तोहि दीन्हि भगवान् ॥१०४॥

मंदोदरी बचन सुनि काना । सुर मुनि सिद्ध सबन्हि सुख माना ॥

Vinay Avasthi Sahib Bhuvan Vani Trust Donations

अज मेहस नारद सनकादी । ज मुनिवर परमारथवादी ॥
 भरि लोचन रघुपतिहि निहारी । प्रेम मगन सब भए सुखारी ॥
 रुदन करत देखीं सब नारी । गयउ बिभीषनु मन दुख भारी ॥
 बंधु दसा बिलोकि दुख कीन्हा । तब प्रभु अनुजहि आयसु दीन्हा ॥
 लछिमन तेहि बहु बिधि समुझायो । बहुरि बिभीषन प्रभु पहिं आयो
 कृपादृष्टि प्रभु ताहि बिलोका । करहु क्रिया परिहरि सब सोका ॥
 कीन्हि क्रिया प्रभु आयसु मानी । बिधिवत देस काल जियँ जानी ॥
 दो०—मंदोदरी आदि सब देइ तिलांजलि ताहि ।

भवन गई रघुपति गुन गन बरनत मन माहि ॥१०५॥
 आइ बिभीषन पुनि सिर नायो । कृपासिंधु तब अनुज बोलायो ॥
 तुम्ह कपीस अंगद नल नीला । जामवंत मारुति नयसीला ॥
 सब मिलि जाहु बिभीषन साथ । सारेहु तिलक कहेउ रघुनाथा ॥
 पिता बचन मैं नगर न आवउँ । आपु सरिस कपि अनुज पठावउँ
 तुरत चले कपि सुनि प्रभु बचना । कीन्ही जाइ तिलक की रचना ॥
 सादर सिंहासन बैठारी । तिलक सारि अस्तुति अनुसारी ॥
 जोरि पानि सबहीं सिर नाए । सहित बिभीषन प्रभु पहिं आए ॥
 तब रघुबीर बोलि कपि लीन्हे । कहि प्रिय बचन सुखी सब कीन्हे
 छं०—किए सुखी कहि बानी सुधा सम बल तुम्हारें रिपु हयो ।

पायो बिभीषन राज तिहुँ पुर जसु तुम्हारो नित नयो ॥

मोहि सहित सुभ कीरति तुम्हारी परम प्रीति जो गाइहैं ।
संसार सिंधु अपार पार प्रयास बिनु नर पाइहैं ॥

दो०—प्रभु के बचन श्रवन सुनि नहिं अघाहिं कपि पुंज ।

बार बार सिर नावहिं गहहिं सकल पद कंज ॥१०६॥

पुनि प्रभु बोलि लियउ हनुमाना । लंका जाहु कहेउ भगवाना ॥
समाचार जानकिहि सुनावहु । तासु कुसल लै तुम्ह चलिं आवहु
तब हनुमंत नगर महुँ आए । सुनि निसिचरी निसाचर धाए ॥
बहु प्रकार तिन्ह पूजा कीन्ही । जनकसुता देखाइ पुनि दीन्ही ॥
दूरिहि ते प्रनाम कपि कीन्हा । रघुपति दूत जानकीं चीन्हा ॥
कहहु तात प्रभु कृपानिकेता । कुसल अनुज कपि सेन समेता ॥
सब विधि कुसल कोसलाधीसा । मातु समर जीत्यो दससीसा ॥
अबिचल राजु विभीषन पायो । सुनि कपि बचन हरष उर छायो ॥

छं०—अति हरष मन तन पुलक लोचन सजल कह पुनि पुनि रमा ।

का देखँ तोहि त्रैलोक महुँ कपि किमपि नहिं बानी समा ॥

सुनु मातु मैं पायो अखिल जग राजु आजु न संसयं ।

रन जीति रिपुदल बंधु जुत पस्यामि राममनामयं ॥

दो०—सुनु सुत सदगुन सकल तब हृदयँ बसहुँ हनुमंत ।

सानुकूल कोसलपति रहहुँ समेत अनंत ॥१०७॥

अब सोइ जतन करहु तुम्ह ताता । देखौं नयन स्याम मृदु गाता ॥

तब हनुमान राम पहिं जाई । जनकसुता कै कुसल सुनाई ॥

सुनि संदेसु भानुकुलभूषन । बोलि लिए जुवराज बिभीषन ॥
 मारुतसुत के संग सिधावहु । सादर जनकसुतहि लै आवहु ॥
 तुरतहिं सकल गए जहँ सीता । सेवहिं सब निसिचरिं विनीता ॥
 बेगि बिभीषन तिन्हहि सिखायो । तिन्ह बहु विधि मज्जन करवायो
 बहु प्रकार भूषन पहिराए । सिविकारुचिरसाजि पुनिल्याए
 ता पर हरषि चढ़ी बैदेही । सुमिरि राम सुखधाम सनेही ॥
 बेतपानि रच्छक चहु पासा । चले सकल मन परस हुलासा ॥
 देखन भालु कीस सब आए । रच्छक कोपि निवारन धाए ॥
 कह रघुवीर कहा मम मानहु । सीतहि सखा पयादें आनहु ॥
 देखहुँ कपि जननी की नाई । बिहसि कहा रघुनाथ गोसाई ॥
 सुनि प्रभु बचन भालु कपि हरषे । नभ ते सुरन्ह सुमन बहु वरषे ॥
 सीता प्रथम अनल महुँ राखी । प्रगट कीन्हि चह अंतर साखी ॥
 दो०—तेहि कारन करुनानिधि कहे कछुक दुर्बाद ।

सुनत जातुधानीं सब लागीं करै बिषाद ॥१०८॥

प्रभु के बचन सीस धरि सीता । बोली मन क्रम बचन पुनीता ॥
 लछिमन होहु घरम के नेगी । पावक प्रगट करहु तुम्ह बेगी ॥
 सुनि लछिमन सीता कै बानी । विरह विवेक धरम निति सानी ॥
 लोचन सजल जोरि कर दोऊ । प्रभु सन कछु कहि सकत न ओऊ
 देखि राम रुख लछिमन धाए । पावक प्रगटि काठ बहु लाए ॥

जौ मन बच क्रम मम उर माहीं । तजि रघुबीर आन गति नार्हीं ॥
तौ कृसानु सब कै गति जाना । मो कहूँ होउ श्रीखंड समाना ॥

छं०—श्रीखंड सम पावक प्रवेस कियो सुमिरि प्रभु मैथिली ।
जय कोसलेस महेस बंदित चरन रति अति निर्मली ॥
प्रतिबिंब अरु लौकिक कलंक प्रचंड पावक महुँ जरे ।
प्रभु चरित काहुँ न लखे नभ सुर सिद्ध मुनि देखहिं खरे ॥१॥
धरि रूप पावक पानि गहि श्री सत्य श्रुति जग बिदित जो ।
जिमि छीरसागर इंदिरा रामहि समर्पी आनि सो ॥
सो राम वाम बिभाग राजति रुचिर अति सोभा भली ।
नव नील नीरज निकट मानहुँ कनक पंकज की कली ॥२॥

दो०—बरषहिं सुमन हरषि सुर बाजहिं गगन निसान ।
गावहिं किंनर सुरबधू नाचहिं चढ़ीं बिमान ॥१०९(क)॥
जनकसुता समेत प्रभु सोभा अमित अपार ।
देखि भालु कपि हरषे जय रघुपति सुख सार ॥१०९(ख)॥

तब रघुपति अनुसासन पाई । मातलि चलेउ चरन सिरु नाई ॥
आए देव सदा स्वारथी । बचन कहहिं जनु परमारथी ॥
दीन बंधु दयाल रघुराया । देव कीन्हि देवन्ह पर दाया ॥
बिस्व द्रोह रत यह खल कामी । निज अघ गयउ कुमारगगामी ॥
तुम्ह समरूप ब्रह्म अविनासी । सदा एकरस सहज उदासी ॥

मीन कमठ सूकर नरहरी । वामन परसुराम बपु धरी ॥
 जब जब नाथ सुरन्ह दुखु पायो । नाना तनु धरि तुम्हई नसायो ॥
 यह खल मलिन सदा सुरद्रोही । काम लोभ मद रत अति कोही ॥
 अधम सिरोमनि तव पद पावा । यह हमरें मन बिसमय आवा ॥
 हम देवता परम अधिकारी । स्वारथ रत प्रभु भगति बिसारी ॥
 भव प्रवाह संतत हम परे । अब प्रभु पाहि सरन अनुसरे ॥

दो०-करि बिनती सुर सिद्ध सब रहे जहँ तहँ कर जोरि ।

अति सप्रेम तन पुलकि बिधि अस्तुति करत बहोरि ॥११०॥

छं०-जय राम सदा सुखधाम हरे । रघुनायक सायक चाप धरे ॥
 भव बारन दारन सिंह प्रभो । गुन सागर नागर नाथ बिभो ॥
 तन काम अनेक अनूप छबी । गुन गावत सिद्ध मुनींद्र कबी ॥
 जसु पावन रावन नाग महा । खगनाथ जथा करि कोप गहा ॥
 जन रंजन भंजन सोक भयं । गतक्रोध सदा प्रभु बोधमयं ॥
 अवतार उदार अपार गुनं । महि भार बिभंजन ग्यानघनं ॥
 अज व्यापकमेकमनादि सदा । करुणाकर राम नमामि मुदा ॥
 रघुवंस बिभूषन दूषन हा । कृत भूप बिभीषन दीन रहा ॥
 गुन ग्यान निधान अमान अजं । नित राम नमामि बिभुं बिरजं ॥
 भुजदंड प्रचंड प्रताप बलं । खल वृंद निकंद महा कुसलं ॥
 बिनु कारन दीन दयाल हितं । छबि धाम नमामि रमा सहितं ॥
 भवतारन कारन काज परं । मन संभव दारुन दोष हरं ॥

सुख मंदिर सुंदर श्रीरमनं । मद मार मुधा ममता समनं ॥
 अनवद्य अखंड न गोचर गो । सवरूप सदा सब होइ न गो ॥
 इति बेद वदंति न दंतकथा । रविआतप भिन्नमभिन्नजथा ॥
 कृतकृत्य बिभो सब बानर ए । निरखंति तवानन सादर ए ॥
 धिग जीवन देव सरीर हरे । तव भक्ति बिना भव भूलि परे ॥
 अब दीनदयाल दया करिऐ । मति मोरि बिभेदकरी हरिऐ ॥
 जेहि ते बिपरीत क्रिया करिऐ । दुख सो सुख मानि सुखी चरिऐ ॥
 खल खंडन मंडन रम्य छमा । पद पंकज सेवित संभु उमा ॥
 नृप नायक दे बरदानमिदं । चरनांबुज प्रेमु सदा सुभदं ॥
 दो०—बिनय कीन्हि चतुरानन प्रेम पुलक अति गात ।

सोभासिंधु बिलोकत लोचन नहीं अघात ॥ १११ ॥

तेहि अवसर दसरथ तहँ आए । तनय विलोकि नयन जल छाए ॥
 अनुज सहित प्रभु बंदन कीन्हा । आसिरवाद पिताँ तव दीन्हा ॥
 तात सकल तव पुन्य प्रभाऊ । जीत्यों अजय निसाचर राऊ ॥
 सुनि सुत बचन प्रीति अति बाढ़ी । नयन सलिल रोमावलि ठाढ़ी ॥
 रघुपति प्रथम प्रेम अनुमाना । चितइ पितहि दीन्हेउ दृढ़ ग्याना ॥
 ताते उमा मोच्छ नहिँ पायो । दसरथ भेद भगति मन लायो ॥
 सगुनोपासक मोच्छ न लेहीं । तिन्ह कहूँ राम भगति निज देहीं ॥
 बार बार करि प्रभुहि प्रनामा । दसरथ हरषि गए सुरधामा ॥

दो०—अनुज जानकी सहित प्रभु कुसल कोसलाधीस ।

सोभा देखि हरषि मन अस्तुति कर सुर ईस ॥ ११२ ॥

Vinay Avasthi Sahib Bhuvan Vani Trust Donations

छं०—जय राम सोभा धाम । दायक प्रनत विश्राम ॥

धृत त्रोन बर सर चाप । भुजदंड प्रबल प्रताप ॥ १ ॥

जय दूषनारि खरारि । मर्दन निसाचर धारि ॥

यह दुष्ट मारेउ नाथ । भए देव सकल सनाथ ॥ २ ॥

जय हरन धरनी भार । महिमा उदार अपार ॥

जय रावनारि कृपाल । किए जातुधान बिहाल ॥ ३ ॥

लंकेस अति बल गर्ब । किए बस्य सुर गंधर्व ॥

मुनि सिद्ध नर खग नाग । हठि पंथ सब कें लाग ॥ ४ ॥

परद्रोह रत अति दुष्ट । पायो सो फल पापिष्ट ॥

अब सुनहु दीन दयाल । राजीव नयन बिसाल ॥ ५ ॥

मोहि रहा अति अभिमान । नहिं कोउ मोहि समान ॥

अब देखि प्रभु पद कंज । गत मान प्रद दुख पुंज ॥ ६ ॥

कोउ ब्रह्म निर्गुन ध्याव । अब्यक्त जेहि श्रुति गाव ॥

मोहि भाव कोसल भूप । श्रीराम सगुन सरूप ॥ ७ ॥

बैदेहि अनुज समेत । मम हृदयँ करहु निकेत ॥

मोहि जानिए निज दास । दे भक्ति रमानिवास ॥ ८ ॥

छं०—दे भक्ति रमानिवास त्रास हरन सरन सुखदायक ।

सुख धाम राम नमामि काम अनेक छबि रघुनायक ॥

सुर बृंद रंजन द्वंद भंजन मनुजतनु अतुलितबल ।

ब्रह्मादि संकर सेव्य राम नमामि करुना कोमल ॥

दो०—अब करि कृपा बिलोकि मोहि आयसु देहु कृपाल ।

काह करौं सुनि प्रिय बचन बोले दीनदयाल ॥११३॥

सुनु सुरपति कपि भालु हमारे । परे भूमि निसिचरन्हि जे मारे ॥
मम हित लागि तजे इन्ह प्राणा । सकल जिआउ सुरेस सुजाना ॥
सुनु खगेस प्रभु कै यह बानी । अति अगाध जानहिं मुनि ग्यानी
प्रभु सक त्रिभुअन मारि जिआई । केवल सकहि दीन्हि बड़ाई ॥
सुधा वरषि कपि भालु जिआए । हरषि उठे सब प्रभु पहिं आए ॥
सुधावृष्टि भै दुहु दल ऊपर । जिए भालु कपि नहिं रजनीचर ॥
रामाकार भए तिन्ह के मन । मुक्त भए छूटे भव बंधन ॥
सुर अंसिक सब कपि अरु रीछा । जिए सकल रघुपति कीं ईछा ॥
राम सरिस को दीन हितकारी । कीन्हे मुकुत निसाचर झारी ॥
खल मल धाम काम रत रावन । गति पाई जो मुनिवर पाव न ॥

दो०—सुमन वरषि सब सुर चले चढ़ि चढ़ि रुचिर बिमान ।

देखि सुअवसर प्रभु पहिं आयउ संभु सुजान ॥११४(क)॥

परम प्रीति कर जोरि जुग नलिन नयन भरि बारि ।

पुलकित तन गदगद गिराँ बिनय करत त्रिपुरारि ॥११४(ख)॥

छं०—मामभिरक्षय रघुकुल नायक । धृत वर चाप रुचिर कर सायक

मोह महा घन पटल प्रभंजन । संसय बिपिन अनल सुर रंजन ॥

अगुन सगुन गुन मंदिर सुंदर । भ्रम तम प्रबल प्रताप दिवाकर ॥

काम क्रोध मद गज पंचानन । बसहु निरंतर जन भन कानन ॥२॥

विषय मनोरथ पुंज कंज बन । प्रबल तुषार उदार पार मन ॥

भव बारिधि मंदर परमं दर । बारय तारय संसृति दुस्तर ॥३॥

स्याम गात राजीव बिलोचन । दीन बंधु प्रनतारति मोचन ॥

अनुज जानकी सहित निरंतर । बसहु राम नृप मम उर अंतर ॥४॥

मुनिरंजन महि मंडल मंडन । तुलसिदास प्रभु त्रास बिखंडन ॥५॥

दो०—नाथ जबहिं कोसलपुरीं होइहि तिलक तुम्हार ।

कृपासिंधु मैं आउब देखन चरित उदार ॥११५॥

करि बिनती जब संभु सिधाए । तब प्रभु निकट विभीषनु आए ॥

नाइ चरन सिरु कह मृदु बानी । विनय सुनहु प्रभु सारंगपानी ॥

सकुल सदल प्रभु रावन मारयो । पावन जस त्रिभुवन विस्तारयो ॥

दीन मलीन हीन मति जाती । मो पर कृपा कीन्हि बहु भाँती ॥

अब जन गृह पुनीत प्रभु कीजे । मज्जनु करिअ समर श्रम छोजे ॥

देखि कोस मंदिर संपदा । देहु कृपाल कपिन्ह कहँ मुदा ॥

सब विधि नाथ मोहि अपनाइअ । पुनि मोहि सहित अवधपुर जाइअ ॥

सुनत वचन मृदु दीनदयाला । सजल भए द्वौ नयन विसाला ॥

दो०—तोर कोस गृह मोर सब सत्य बचन सुनु भ्रात ।

भरत दसा सुमिरत मोहि निमिष कल्प सम जात ॥११६(क)॥

तापस बेष गात कृस जपत निरंतर मोहि ।

देखौं बेगि सो जतन कर लखा निहोरइ तोहि ॥११६(ख)॥

बीतें अवाधि जाउ जो जितत न पावउ बोर ।

सुमिरत अनुज प्रीति प्रभु पुनि पुनि पुलक सरीर ॥ ११६(ग) ॥

करेहु कल्प भरि राजु तुम्ह मोहि सुमिरेहु मन माहिं ।

पुनि मम धाम पाइहहु जहाँ संत सब जाहिं ॥ ११६(घ) ॥

सुनत बिभीषन बचन राम के । हरषि गहे पद कृपाधाम के ॥

बानर भालु सकल हरषाने । गहि प्रभु पद गुन विमल बखाने ॥

बहुरि बिभीषन भवन सिधायो । मनि गन बसन विमान भरायो ॥

लै पुष्पक प्रभु आगें राखा । हँसि करि कृपासिंधु तब भाषा ॥

चढ़ि विमान सुनु सखा बिभीषन । गगन जाइ बरषहु पट भूषन ॥

नभ पर जाइ बिभीषन तबही । बरषि दिए मनि अंबर सबही ॥

जोइ जोइ मन भावइ सोइ लेहीं । मनि मुख मेलि डारि कपि देहीं ॥

हँसे रामु श्री अनुज समेता । परम कौतुकी कृपा निकेता ॥

१०-मुनि जेहि ध्यान न पावहिं नेति नेति कह वेद ।

कृपासिंधु सोइ कपिन्ह सन करत अनेक बिनोद ॥ ११७(क) ॥

उमा जोग जप दान तप नाना मख व्रत नेम ।

राम कृपा नहिं करहिं तसि जसि निष्केवल प्रेम ॥ ११७(ख) ॥

भालु कपिन्ह पट भूषन पाए । पहिरि पहिरि रघुपति पहिं आए ॥

नाना जिनस देखि सब कीसा । पुनि पुनि हँसत कोसलाधीसा ॥

चितइ सबन्हि पर कीन्ही दाया । बोले मृदुल बचन रघुराया ॥

तुम्हरें बल मैं रावनु मारयो । तिलक बिभीषन कहँ पुनि सारयो

निज निज गृह अथ तुम्ह सब जाहूँ । सुमिरहु मोहि हरषहु जनि काहूँ
 सुनत बचन प्रेमाकुल बानर । जोरि पानि बोले सब सादर ॥
 प्रभु जोइ कहहु तुम्हहि सब सोहा । हमरें होत बचन सुनि मोहा ॥
 दीन जानि कपि किए सनाथा । तुम्ह त्रैलोक ईस रघुनाथा ॥
 सुनि प्रभु बचन लाज हम मरहीं । मसक कहूँ खगपति हित करहीं
 देखि राम रुख बानर रीछा । प्रेम मगन नहिं गृह कै ईछा ॥

दो०—प्रभु प्रेरित कपि भालु सब राम रूप उर राखि ।

हरष विषाद सहित चले बिनय विविध विधि भाषि ॥ ११८(क) ॥

कपिपति नील रीछपति अंगद नल हनुमान ।

सहित बिभीषन अपर जे जूथप कपि बलवान ॥ ११८(ख) ॥

कहि न सकहिं कछु प्रेम बस भरि भरि लोचन बारि ।

सन्मुख चितवहिं राम तन नयन निमेष निवारि ॥ ११८(ग) ॥

अतिसय प्रीति देखि रघुराई । लीन्हे सकल विमान चढ़ाई ॥

मन महुँ विप्र चरन सिरु नायो । उत्तर दिसिहि विमान चलायो ॥

चलत विमान कोलाहल होई । जय रघुबीर कहइ सबु कोई ॥

सिंहासन अति उच्च मनोहर । श्री समेत प्रभु बैठे ता पर ॥

राजत रामु सहित भामिनी । मेरु संग जनु घन दामिनी ॥

रुचिर बिमानु चलेउ अति आतुर । कीन्ही सुमन वृष्टि हरषे सुर ॥

परम सुखद चलि त्रिविध बयारी । सागर सर सरि निर्मल बारी ॥

सगुन होहि सुंदर चहुँ पासा । मन प्रसन्न निर्मल नभ आसा ॥

कह रघुवीर देखु रन सीता । लछिमन इहा हत्यो इद्रजीता ॥
हनूमान अंगद के मारे । रन महि परे निसाचर भारे ॥
कुंभकरन रावन द्रौ भाई । इहाँ हते सुर मुनि दुखदाई ॥

दो०—इहाँ सेतु बाँध्यों अरु थापेउँ सिव सुख धाम ।

सीता सहित कृपानिधि संभुहि कीन्ह प्रनाम ॥११९(क)॥

जहँ जहँ कृपासिंधु बन कीन्ह बास विश्राम ।

सकल देखाए जानकिहि कहे सबन्हि के नाम ॥११९(ख)॥

तुरत विमान तहाँ चलि आवा । दंडक बन जहँ परम सुहावा ॥
कुंभजादि मुनिनायक नाना । गए रामु सब कें अस्थाना ॥
सकल रिषिन्ह सन पाइ असीसा । चित्रकूट आए जगदीसा ॥
तहँ करि मुनिन्ह केर संतोषा । चला विमानु तहाँ ते चोखा ॥
बहुरि राम जानकिहि देखाई । जमुना कलि मल हरनि सुहाई ॥
पुनि देखी सुरसरी पुनीता । राम कहा प्रनाम कर सीता ॥
तीरथपति पुनि देखु प्रयागा । निरखत जन्म कोटि अघ भागा ॥
देखु परम पावनि पुनि बेनी । हरनि सोक हरि लोक निसेनी ॥
पुनि देखु अवधपुरी अति पावनि । त्रिविध ताप भव रोग नसावनि
दो०—सीता सहित अवध कहुँ कीन्ह कृपाल प्रनाम ।

सजल नयन तन पुलकित पुनि पुनि हरषित राम ॥१२०(क)॥

पुनि प्रभु आइ त्रिवेनीं हरषित मज्जनु कीन्ह ।

कपिन्ह सहित बिप्रन्ह कहुँ दान बिबिध बिधि दीन्ह ॥१२०(ख)

प्रभु हनुमत्तहि कहौ जुझाई । धरि बहु रूप अवधपुर जाई ॥
 भरतहि कुसल हमारि सुनाएहु । समाचार लै तुम्ह चलि आएहु ॥
 तुरत पवनसुत गवनत भयऊ । तब प्रभु भरद्वाज पहिं गयऊ ॥
 नाना विधि मुनि पूजा कीन्ही । अस्तुतिकरि पुनि आसिष दीन्ही
 मुनि पद बंदि जुगल कर जोरी । चढ़ि विमान प्रभु चले बहोरी ॥
 इहाँ निषाद सुना प्रभु आए । नाव नाव कहँ लोग बोलाए ॥
 सुरसरि नाधि जान तब आयो । उतरेउ तट प्रभु आयसु पायो ॥
 तब सीताँ पूजी सुरसरी । बहु प्रकार पुनि चरनन्हि परी ॥
 दीन्हि असीस हरषि मन गंगा । सुंदरि तब अहिवात अभंगा ॥
 सुनत गुहा धायउ प्रेमाकुल । आयउ निकट परम सुख संकुल ॥
 प्रभुहि सहित बिलोकि बैदेही । परेउ अवनि तन सुधि नहिं तेही ॥
 प्रीति परम बिलोकि रघुराई । हरषि उठाइ लियो उर लाई ॥

छं०—लियो हृदयँ लाइ कृपा निधान सुजान रायँ रमापती ।

बैठारि परम समीप बूझी कुसल सो कर बीनती ॥

अब कुसल पद पंकज बिलोकि बिरंचि संकर सेव्य जे ।

सुख धाम पूरनकाम राम नमामि राम नमामि ते ॥ १ ॥

सब भाँति अधम निषाद सो हरि भरत ज्यों उर लाइयो ।

मतिमंद तुलसीदास सो प्रभु मोह बस बिसराइयो ॥

यह रावनारि चरित्र पावन राम पद रतिप्रद सदा ।

कामादिहर बिग्यानकर सुर सिद्ध मुनि गावहिं मुदा ॥ २ ॥

दो०—समर विजय रघुवीर के चरित जे सुनहि सुजान ।
Vinay Avasthi Sahib Bhawan Yarni Trust Donations

बिजय बिबेक बिभूति नित तिन्हहि देहिं भगवान ॥१२१(क)॥

यह कलिकाल मलायतन मन करि देखु बिचार ।

श्रीरघुनाथ नाम तजि नाहिन आन अधार ॥१२१(ख)॥

मासपारायण, सत्ताईसवाँ विश्राम


इति श्रीमद्रामचरितमानसे सकलकलिकलुषविध्वंसने

षष्ठः सोपानः समाप्तः ।

(लंकाकाण्ड समाप्त)



प्रभुका ऐश्वर्य



अमित रूप प्रगटे तेहि काल ।

जथाजोग मिले सबहि कृपाला ॥

श्रीगणेशाय नमः

श्रीजानकीवल्लभो विजयते

श्रीरामचरितमानस

सप्तम सोपान

(उत्तरकाण्ड)

श्लोक

केकीकण्ठाभनीलं सुरवरविलसद्विप्रपादाब्जचिह्नं
शोभाढ्यं पीतवस्त्रं सरसिजनयनं सर्वदा सुप्रसन्नम् ।
पाणौ नाराचचापं कपिनिकस्युतं बन्धुना सेव्यमानं
नौमीढ्यं जानकीशं रघुवरमनिशं पुष्पकारुढरामम् ॥ १ ॥
कोसलेन्द्रपदकज्जमञ्जुलौ कोमलावजमहेशवन्दितौ ।
जानकीकरसरोजलालितौ चिन्तकस्य मनमृङ्गसङ्गिनौ ॥ २ ॥

कुन्दइ प्रभु अति सुखी भवति मनीषि द्विदम् ।

कारुणीककलकजलोचनं नौमि शङ्करमनज्जमोचनम् ॥ ३ ॥

• दो०—रहा एक दिन अवधि कर अति आरत पुर लोग ।

जहँ तहँ सोचहिं नारि नर कृस तन राम बियोग ॥

सगुन होहिं सुंदर सकल मन प्रसन्न सब केर ।

प्रभु आगवन जनाव जनु नगर रम्य चहुँ फेर ॥

कौसल्यादि मातु सब मन अनंद अस होइ ।

आयउ प्रभु श्री अनुज जुत कहन चहत अब कोइ ॥

भरत नयन भुज दच्छिन फरकत बारहिं बार ।

जानि सगुन मन हरष अति लागे करन बिचार ॥

रहेउ एक दिन अवधि अधारा । समुझत मन दुख भयउ अपारा ॥

कारन कवन नाथ नहिं आयउ । जानि कुटिल किधौ मोहि विसरायउ ॥

अहह धन्य लछिमन बड़भागी । राम पदारविंदु अनुरागी ॥

कपटी कुटिल मोहि प्रभु चीन्हा । ताते नाथ संग नहिं लीन्हा ॥

जौ करनी समुझै प्रभु मोरी । नहिं निस्तार कलप सत कोरी ॥

जन अवगुन प्रभु मान न काऊ । दीन बंधु अति मृदुल सुभाऊ ॥

मोरे जियँ भरोस दृढ़ सोई । मिलिहहिं राम सगुन सुभहोई ॥

बीतैं अवधि रहहिं जौ प्राणा । अधम कवन जग मोहि समाना ॥

दो०—राम बिरह सागर महँ भरत मगन मन होत ।

बिप्ररूप धरि पवनसुत आइ गयउ जनु पोत ॥ १ (क) ॥

Vinay Avasthi Sahib Bhuvan Vani Trust Donations
बैठे देखि कुसासन जटा मुकुट कृस गाति ।

राम राम रघुपति जपत स्रवत नयन जल जात ॥ १ (ख) ॥

देखत हनूमान अति हरषेउ । पुलक गात लोचन जल बरषेउ ॥
मन मँहँ बहुत भाँति सुख मानी । बोलेउ श्रवन सुधा सम बानी ॥
जासु बिरहँ सोचहु दिन राती । रटहु निरंतर गुन गन पाँती ॥
रघुकुल तिलक सुजन सुखदाता । आयउ कुसल देव मुनि त्राता ॥
रिपु रन जीति सुजस सुर गावत । सीता सहित अनुज प्रभु आवत ॥
सुनत बचन बिसरे सब दूखा । तृषावंत जिमि पाइ पियूषा ॥
को तुम्ह तात कहाँ ते आए । मोहि परम प्रिय बचन सुनाए ॥
मारुत सुत मैं कपि हनुमाना । नामु मोर सुनु कृपानिधाना ॥
दीनबंधु रघुपति कर किंकर । सुनत भरत भेंटेउ उठि सादर ॥
मिलत प्रेम नहिँ हृदयँ समाता । नयन स्रवत जल पुलकित गाता ॥
कपि तव दरस सकल दुख बीते । मिले आजु मोहि राम पिरीते ॥
बार बार बूझी कुसलाता । तो कहूँ देउँ काह सुनु भ्राता ॥
एहि संदेस सरिस जग माहीं । करि बिचार देखेउँ कछु नाहीं ॥
नाहिन तात उरिन मैं तोही । अब प्रभु चरित सुनावहु मोही ॥
तव हनुमंत नाइ पद माथा । कहे सकल रघुपति गुन गाथा ॥
कहु कपि कबहुँ कृपाल गोसाई । सुमिरहिँ मोहि दास की नाई ॥

छं०—निज दास ज्यों रघुबंसभूषन कबहुँ मम सुमिरन करयो ।

मुनि भरत बचन बिनीत अति कपि पुलकि तन चरनन्हि परयो ॥

रघुवीर निज मुख जासु गुन गन कहत जग जग नाथ जो ।
काहे न होइ बिनीत परम पुनीत सद्गुन सिंधु सो ॥

दो०—राम प्रान प्रिय नाथ तुम्ह सत्य बचन मम तात ।

पुनि पुनि मिलत भरत सुनि हरष न हृदयँ समात ॥२(क)॥

सो०—भरत चरन सिरु नाइ तुरित गयउ कपि राम पहिं ।

कही कुसल सब जाइ हरषि चलेउ प्रभु जान चढ़ि ॥२(ख)॥

हरषि भरत कोसलपुर आए । समाचार सब गुरहि सुनाए ॥
पुनि मंदिर मँहँ बात जनाई । आवत नगर कुसल रघुराई ॥
सुनत सकल जननीं उठि धाई । कहि प्रभु कुसल भरत समुझाई ॥
समाचार पुरवासिन्ह पाए । नर अरु नारि हरषि सब घाए ॥
दधि दुर्वा रोचन फल फूला । नव तुलसी दल मंगल मूला ॥
भरि भरि हेम थार भामिनी । गावत चलिं सिंधुरगामिनी ॥
जे जैसेहिं तैसेहिं उठि धावहिं । बाल वृद्ध कहँ संग न लावहिं ॥
एक एकन्ह कहँ बूझहिं भाई । तुम्ह देखे दयाल रघुराई ॥
अवधपुरी प्रभु आवत जानी । भई सकल सोभा कै खानी ॥
बहइ सुहावन त्रिविध समीरा । भइ सरजू अति निर्मल नीरा ॥
दो०—हरषित गुर परिजन अनुज भूसुर बृंद समेत ।

चले भरत मन प्रेम अति सन्मुख कृपानिकेत ॥३(क)॥

बहुतक चढ़ीं अटारिन्ह निरखहिं गगन बिमान ।

देखि मधुर सुर हरषित करहिं सुमंगल गान ॥३(ख)॥

Vinay Avasthi Sahib Bhuyan Vapi Trust Donations
राका ससि रघुपति पुर सिधु देखि हरषान ।

बढ़यो कोलाहल करत जनु नारि तरंग समान ॥३(ग)॥

इहाँ भानुकुल कमल दिवाकर । कपिन्ह देखावत नगर मनोहर ॥
सुनु कपीस अंगद लंकेसा । पावन पुरी रुचिर यह देसा ॥
जद्यपि सब बैकुण्ठ बखाना । बेद पुरान विदित जगु जाना ॥
अवधपुरी सम प्रिय नहिं सोऊ । यह प्रसंग जानइ कोउ कोऊ ॥
जन्मभूमि मम पुरी सुहावनि । उत्तर दिसि बह सरजूपावनि ॥
जा मजन ते विनहिं प्रयासा । मम समीप नर पावहिं बासा ॥
अति प्रिय मोहि इहाँ के बासी । मम धामदा पुरी सुख रासी ॥
हरषे सब कपि सुनि प्रभु बानी । धन्य अवध जो राम बखानी ॥
दो०—आवत देखि लोग सब कृपासिंधु भगवान ।

नगर निकट प्रभु प्रेरेउ उतरेउ भूमि बिमान ॥४(क)॥

उतरि कहेउ प्रभु पुष्पकहि तुम्ह कुबेर पहिं जाहु ।

प्रेरित राम चलेउ सो हरषु बिरहु अति ताहु ॥४(ख)॥

आए भरत संग सब लोगा । कृस तन श्रीरघुवीर वियोगा ॥
बामदेव बसिष्ठ मुनिनायक । देखे प्रभु महि धरि धनु सायक ॥
धाइ धरे गुर चरन सरोरुह । अनुज सहित अति पुलकतनोरुह ॥
भेंटि कुसल बूझी मुनिराया । हमरें कुसल तुम्हारिहिं दाया ॥
सकल द्विजन्ह मिलि नायउ माथा । धर्म धुरंधर रघुकुलनाया ॥
गहे भरत पुनि प्रभु पद पंकज । नमत जिन्हहि सुर मुनि संकर अज

परे भूमि नहि उठत उठाए। बर करि कृपासिंधु उर लाए ॥
 स्यामल गात रोम भए ठाढ़े। नव राजीव नयन जल बाढ़े ॥

छं०—राजीव लोचन झवत जल तन ललित पुलकावलि बनी ।
 अति प्रेम हृदयँ लगाइ अनुजहि मिले प्रभु त्रिभुवन धनी ॥
 प्रभु मिलत अनुजहि सोह मो पहिँ जाति नहिँ उपमा कही ।
 जनु प्रेम अरु सिंगार तनु धरि मिले बर सुषमा लही ॥१॥
 बृक्षत कृपानिधि कुसल भरतहि बचन बेगि न आवई ।
 सुनु सिवा सो सुख बचन मन ते भिन्न जान जो पावई ॥
 अब कुसल कौसल नाथ आरत जानि जन दरसन दियो ।
 बूझत बिरह बारीस कृपानिधान मोहि कर गहि लियो ॥२॥

दो०—पुनि प्रभु हरषि सत्रुहन भेंटे हृदयँ लगाइ ।
 लछिमन भरत मिले तब परम प्रेम दोउ भाइ ॥ ५ ॥
 भरतानुज लछिमन पुनि भेंटे । दुसह विरह संभव दुख मेटे ॥
 सीता चरन भरत सिरु नावा । अनुज समेत परम सुख पावा ॥
 प्रभु बिलोकि हरषे पुरबासी । जनित वियोग विपति सब नासी
 प्रेमातुर सब लोग निहारी । कौतुक कीन्ह कृपाल खरारी ॥
 अमित रूप प्रगटे तेहि काला । जथाजोग मिले सबहि कृपाला ॥
 कृपादृष्टि रघुबीर बिलोकी । किए सकल नर नारि विसोकी ॥
 छन महिँ सबहि मिले भगवाना । उमा मरम यह काहुँ न जाना ॥
 एहि विधि सबहि सुखी करि रामा । आगें चले सील गुन धामा ॥

Vinay Avasthi Sahib Bhuvan Vapi Trust Donations
कौसल्यादि मातु सब धाई । निराखि बच्छ जनु धेनु लवाई ॥

छं०—जनु धेनु बालक बच्छ तजि गृहँ चरन बन परबस गई ।

दिन अंत पुर रुख सवत थन हुंकार करि धावत भई ॥

अति प्रेम प्रभु सब मातु भेटीं बचन मृदु बहुविधि कहे ।

गइ बिषम बिपति बियोग भवतिन्ह हरष सुख अगनित लहे

दो०—भेटेउ तनय सुमित्राँ राम चरन रति जानि ।

रामहि मिलत कैकई हृदयँ बहुत सकुचानि ॥६(क)॥

लछिमन सब मातन्ह मिलि हरषे आसिष पाइ ।

कैकइ कहँ पुनि पुनि मिले मन कर छोभु न जाइ ॥६(ख)॥

सासुन्ह सबनि मिली वैदेही । चरनन्हि लागि हरषु अति तेही ॥

देहिं असीस बूझि कुसलाता । होइ अचल तुम्हार अहिवाता ॥

सब रघुपति मुख कमल बिलोकहिं । मंगल जानि नयन जल रोकहिं

कनक थार आरती उतारहिं । बार बार प्रभु गात निहारहिं ॥

नाना भाँति निछावरि करहीं । परमानंद हरष उर भरहीं ॥

कौसल्या पुनि पुनि रघुवीरहि । चितवति कृपा सिंधु रनधीरहि ॥

हृदयँ बिचारति बारहिं बारा । कवन भाँति लंकापति मारा ॥

अति सुकुमार जुगल मेरे बारे । निसिचर सुभट महाबल भारे ॥

दो०—लछिमन अरु सीता सहित प्रभुहि बिलोकति मातु ।

परमानंद मगन मन पुनि पुनि पुलकित गातु ॥ ७ ॥

लंकापति कपीस नल नीला । जामवंत अंगद सुभसीला ॥

हनुमदादि सब बानर बीरा । धरे मनोहर मनुज सरीरा ॥
 भरत सनेह सील व्रत नेमा । सादर सब वरनहिं अति प्रेमा ॥
 देखि नगरवासिन्ह कै रीती । सकल सराहहिं प्रभु पद प्रीती ॥
 पुनि रघुपति सब सखा बोलाए । मुनि पद लागहु सकल सिखाए ॥
 गुर बसिष्ट कुलपूज्य हमारे । इन्ह की कृपाँ दनुज रन मारे ॥
 ए सब सखा सुनहु मुनि मेरे । भए समर सागर कहँ बेरे ॥
 मम हित लागि जन्म इन्ह हारे । भरतहु ते मोहि अधिक पिआरे ॥
 सुनि प्रभु बचन मगन सब भए । निमिष निमिष उपजत सुख नए ॥
 दो०—कौसल्या के चरनन्हि पुनि तिन्ह नायउ साथ ।

आसिष दीन्हे हरषि तुम्ह प्रिय मम जिमि रघुनाथ ॥८(क)॥

सुमन वृष्टि नभ संकुल भवन चले सुखकंद ।

चढ़ी अटारिन्ह देखहिं नगर नारि नर बृंद ॥८(ख)॥

कंचन कलस विचित्र सँवारे । सबहिं धरे सजि निज निज द्वारे ॥
 बंदनवार पताका केतू । सबन्हि बनाए मंगल हेतू ॥
 बीथीं सकल सुगंध सिंचाई । गजमनि रचि बहु चौक पुराई ॥
 नाना भाँति सुमंगल साजे । हरषि नगर निसान बहु बाजे ॥
 जहँ तहँ नारि निछावरि करहीं । देहिं असीस हरष उर भरहीं ॥
 कंचन थार आरतीं नाना । जुवतीं सजें करहिं सुभ गाना ॥
 करहिं आरती आरतिहर कै । रघुकुल कमल बिपिन दिनकर कै ॥

पुर सोभा संपति कल्याण । विगम शेष सारदा बखाना ॥

Vinay Avasthi Sahib Bhuvan Vani Trust Donations
तेउ यह चरित देखि ठगि रहहीं । उमा तासु गुन नर किमि कहहीं

दो०—नारि कुमुदिनीं अवध सर रघुपति बिरह दिनेस ।

अस्त भएँ बिगसत भई निरखि राम राकेस ॥९(क)॥

होहिं सगुन सुभ बिबिधि विधि बाजहिं गगन निसान ।

पुर नर नारि सनाथ करि भवन चले भगवान ॥९(ख)॥

प्रभु जानी कैकई लजानी । प्रथम तासु गृह गए भवानी ॥

ताहि प्रबोधि बहुत सुख दीन्हा । पुनि निज भवन गवन हरि कीन्हा

कृपासिंधु जब मंदिर गए । पुर नर नारि सुखी सब भए ॥

गुर बसिष्ट द्विज लिए बुलाई । आजु सुघरी सुदिन समुदाई ॥

सब द्विज देहु हरषि अनुसासन । रामचंद्र बैठहिं सिंघासन ॥

मुनि बसिष्ट के बचन सुहाए । सुनत सकल विप्रन्ह अति भाए ॥

कहहिं बचन मृदु विप्र अनेका । जग अभिराम राम अभिषेका ॥

अब मुनिवर बिलंब नहिं कीजै । महाराज कहँ तिलक करीजै ॥

दो०—तब मुनि कहेउ सुमंत्र सन सुनत चलेउ हरषाइ ।

रथ अनेक बहु बाजि गज तुरत सँवारे जाइ ॥१०(क)॥

जहँ तहँ धावन पठइ पुनि मंगल द्रव्य भगाइ ।

हरष समेत बसिष्ट पद पुनि सिरु नायउ आइ ॥१०(ख)॥

नवाह्नपारायण, आठवाँ विश्राम

अवधपुरी अति रुचिर बनाई । देवन्ह सुमन बृष्टि झरि लाई ॥

राम कहाँ सेवकन्ह बुलाई। प्रथम सखन्ह अन्हवावहु जाई ॥
 सुनत बचन जहँ तहँ जन धाए। सुग्रीवादि तुरत अन्हवाए ॥
 पुनि करुनानिधि भरतु हँकारे। निज कर राम जटा निरुआरे ॥
 अन्हवाए प्रभु तीनिउ भाई। भगत बछल कृपाल रघुराई ॥
 भरत भाग्य प्रभु कोमलताई। सेष कोटि सत सकहिं न गाई ॥
 पुनि निज जटा राम बिबराए। गुर अनुसासन मागि नहाए ॥
 करि मज्जन प्रभु भूषन साजे। अंग अनंग देखि सत लाजे ॥

दो०—सासुन्ह सादर जानकिहि मज्जन तुरत कराइ ।

दिब्य बसन बर भूषन अँग अँग सजे बनाइ ॥११(क)॥

राम बाम दिसि सोभति रमा रूप गुन खानि ।

देखि मातु सब हरषीं जन्म सुफल निज जानि ॥११(ख)॥

सुनु खगेस तेहि अवसर ब्रह्मा सिव मुनि बृंद ।

चढ़ि बिमान आए सब सुर देखन सुखकंद ॥११(ग)॥

प्रभु बिलोकि मुनि मन अनुरागा। तुरत दिब्य सिंघासन मागा ॥

रवि सम तेज सो बरनि न जाई। बैठे राम द्विजन्ह सिरु नाई ॥

जनकसुता समेत रघुराई। पेखि प्रहरषे मुनि समुदाई ॥

बेद मंत्र तब द्विजन्ह उचारे। नभ सुर मुनि जय जयति पुकारे ॥

प्रथम तिलक बसिष्ट मुनि कीन्हा। पुनि सब विप्रन्ह आयसु दीन्हा ॥

सुत बिलोकि हरषीं महतारी। बार बार आरती उतारी ॥

विप्रन्ह दान विविधि विधि दीन्हे। जाचक सकल अजाचक कीन्हे ॥

Vinay Avasthi Sahib Bhuyan Vani Trust Donations
सिंघासन पर त्रिभुवन साईं। देखि सुरन्ह दुदुभी बजाई ॥

छं०—नभ दुंदुभीं बाजहिं बिपुल गंधर्व किंनर गावहीं ।
नाचहिं अपछरा बृंद परमानंद सुर मुनि पावहीं ॥
भरतादि अनुज बिभीषणांगद हनुमदादि समेत ते ।
गहें छत्र चामर व्यजन धनु असि चर्मसक्ति बिराजते ॥ १ ॥
श्री सहित दिनकर बंस भूषन काम बहु छबि सोहई ।
नव अंबुधर वर गात अंबर पीत सुर मन मोहई ॥
मुकुटांगदादि बिचित्र भूषन अंग अंगन्हि प्रति सजे ।
अंभोज नयन बिसाल उर भुज धन्य नर निरखंति जे ॥ २ ॥

दो०—वह सोभा समाज सुख कहत न बनइ खगोस ।
बरनहिं सारद सेष श्रुति सो रस जान महेस ॥ १२ (क) ॥
भिन्न भिन्न अस्तुति करि गए सुर निज निज धाम ।
बंदी बेष वेद तब आए जहँ श्रीराम ॥ १२ (ख) ॥
प्रभु सर्वग्य कीन्ह अति आदर कृपानिधान ।
लखेउ न काहूँ मरम कछु लगे करन गुन गान ॥ १२ (ग) ॥

छं०—जय सगुन निर्गुन रूप रूप अनूप भूप सिरोमने ।
दसकंधरादि प्रचंड निसिचर प्रबल खल भुज बल हने ॥
अवतार नर संसार भार बिभंजि दारुन दुख दहे ।

जय प्रनतपाल दयाल प्रभु संजुक्त सक्ति नमामहे ॥ १ ॥

तव बिषम माया बस सुरासुर नाग नर अग जग हरे ।

भव पंथ भ्रमत अमित दिवस निसि काल कर्म गुननि भरे ॥

जे नाथ करि करुना बिलोके त्रिविधि दुख ते निबहे ।

भव खेद छेदन दच्छ हम कहूँ रच्छ राम नमामहे ॥२॥

जे ग्यान मान बिमत्त तव भव हरनि भक्ति न आदरी ।

ते पाइ सुर दुर्लभ पदादपि परत हम देखत हरी ॥

बिस्वास करि सब आस परिहरि दास तव जे होइ रहे ।

जपि नाम तव बिनु श्रम तरहिं भव नाथ सो समरामहे ॥३॥

जे चरन सिव अज पूज्य रज सुभ परसि मुनिपतिनी तरी ।

नख निर्गता मुनि बंदिता त्रैलोक पावनि सुरसरी ॥

ध्वज कुलिस अंकुस कंज जुत बन फिरत कंटक किन लहे ।

पद कंज द्वंद मुकुंद राम रमेस नित्य भजामहे ॥४॥

अव्यक्तमूलमनादि तरु त्वच चारि निगमागम भने ।

षट कंध साखा पंच बीस अनेक पर्न सुमन घने ॥

फल जुगल बिधि कटु मधुर बेलि अकेलि जेहि आश्रित रहे ।

पल्लवत फूलत नवल नित संसार बिटप नमामहे ॥५॥

जे ब्रह्म अजमद्वैतमनुभवगम्य मनपर ध्यावहीं ।

ते कहहुँ जानहुँ नाथ हम तव सगुन जस नित गावहीं ॥

करुनायतन प्रभु सदगुनाकर देव यह बर मागहीं ।

Vinay Avasthi Sahib Bhuwan Vani Trust Donations
दो०—सब के देखत वेदन्ह बिनती कोन्ह उदार ।

अंतर्धान भए पुनि गए ब्रह्म आगार ॥१३(क)॥

बैनतेय सुनु संभु तब आए जहँ रघुबीर ।

बिनय करत गदगद गिरा पूरित पुलक सरीर ॥१३(ख)॥

छं०—जय राम रमारमनं समनं । भव ताप भयाकुल पाहि जनं ॥
अवधेस सुरेस रमेस बिभो । सरनागत मागत पाहि प्रभो ॥
दससीस बिनासन बीस भुजा । कृत दूरि महा महि भूरि रुजा ॥
रजनीचर वृंद पतंग रहे । सर पावक तेज प्रचंड दहे ॥
महि मंडल मंडन चारुतरं । दृत सायक चाप निषंग बरं ॥
मद मोह महा ममता रजनी । तम पुंज दिवाकर तेज अनी ॥
मनजात किरात निपात किए । मृग लोग कुभोग सरेन हिए ॥
हति नाथ अनाथनि पाहि हरे । विषया बन पावर भूलि परे ॥
बहु रोग बियोगन्हि लोग हए । भवदंघ्रि निरादर के फल ए ॥
भव सिंधु अगाध परे नर ते । पद पंकज प्रेम न जे करते ॥
अति दीन मलीन दुखी नितहीं । जिन्ह के पद पंकज प्रीति नहीं ॥
अवलंब भवंत कथा जिन्ह के । प्रिय संत अनंत सदा तिन्ह के ॥
नहिं राग न लोभ न मान मदा । तिन्ह के सम बैभव वा बिपदा ॥
एहि ते तव सेवक होत मुदा । मुनि त्यागत जोग भरोस सदा ॥
करि प्रेम निरंतर नेम लिए । पद पंकज सेवत सुद्ध हिऐ ॥
सम मानि निरादर आदरही । सब संत सुखी बिचरंति मही ॥

मुनि मानस पंकज भृगु भजे । रघुबीर महा रनधीर अजे ॥

तव नाम जपामि नमामि हरी । भव रोग महागद मान अरी ॥

गुन सील कृपा परमायतनं । प्रनमामि निरंतर श्रीरमनं ॥

रघुनंद निकंदय द्वंद्वघनं । महिपाल बिलोकय दीन जनं ॥

दो०—बार बार बर सागउँ हरषि देहु श्रीरंग ।

पद सरोज अनपायनी भगति सदा सतसंग ॥१४(क)॥

बरनि उमापति राम गुन हरषि गए कैलास ।

तब प्रभु कपिन्ह दिवाए सब विधि सुखप्रद बास ॥१४(ख)॥

सुनु खगपति यह कथा पावनी । त्रिविध ताप भव भय दावनी ॥

महाराज कर सुभ अभिषेका । सुनत लहहिं नर विरति विवेका ॥

जे सकाम नर सुनहिं जे गावहिं । सुख संपति नाना विधि पावहिं ॥

सुर दुर्लभ सुख करि जग माहीं । अंतकाल रघुपति पुर जाहीं ॥

सुनहिं विमुक्त विरत अरु विषई । लहहिं भगति भति संपति नई ॥

खगपति राम कथा मैं बरनी । स्वमति बिलास त्रास दुख हरनी ॥

विरति विवेक भगति दृढ़ करनी । मोह नदी कहैं सुंदर तरनी ॥

नित नव मंगल कौसलपुरी । हरषित रहहिं लोग सब कुरी ॥

नित नई प्रीति राम पद पंकज । सब कैं जिन्हहि नमत सिव मुनि अज ॥

मंगन बहु प्रकार पहिराए । द्विजन्ह दान नाना विधि पाए ॥

दो०—ब्रह्मानंद मगन कपि सब कैं प्रभु पद प्रीति ।

Vinay Avasthi Sahib Bhuvan Vani Trust Donations

बिसरे गृह सपनेहु सुधि नाहीं । जिमि परद्रोह सत मन माहीं ॥
 तब रघुपति सब सखा बोलाए । आइ सबन्हि सादर सिरु नाए ॥
 परम प्रीति समीप बैठारे । भगत सुखद मृदु बचन उचारे ॥
 तुम्ह अति कीन्हि मोरि सेवकाई । मुख पर केहि विधि करौ बड़ाई ॥
 ताते मोहि तुम्ह अति प्रिय लागे । मम हित लागि भवन सुख त्यागे ॥
 अनुज राज संपति बैदेही । देह गेह परिवार सनेही ॥
 सब मम प्रिय नहिं तुम्हहि समाना । मृषा न कहउँ मोर यह बाना ॥
 सब कें प्रिय सेवक यह नीती । मोरें अधिक दास पर प्रीती ॥
 दो०—अब गृह जाहु सखा सब भजेहु मोहि दृढ़ नेम ।

सदा सर्वगत सर्वहित जानि करेहु अति प्रेम ॥१६॥

सुनि प्रभु बचन मगन सब भए । कोहम कहाँ बिसरि तन गए ॥
 एकटक रहे जोरि कर आगे । सकहिं न कछु कहि अति अनुरागे
 परम प्रेम तिन्ह कर प्रभु देखा । कहा त्रिविधि विधि ग्यान बिसेषा
 प्रभु सन्मुख कछु कहन न पारहिं । पुनि पुनि चरन सरोज निहारहिं
 तब प्रभु भूषन बसन मगाए । नाना रंग अनूप सुहाए ॥
 सुग्रीवहि प्रथमहिं पहिराए । बसन भरत निज हाथ बनाए ॥
 प्रभु प्रेरित लछिमन पहिराए । लंकापति रघुपति मन भाए ॥
 अंगद बैठ रहा नहिं डोला । प्रीति देखि प्रभु ताहि न बोला ॥

दो०—जामवंत नीलादि सब पहिराए रघुनाथ ।

हियँ धरि राम रूप सब चले नाइ पद माथ ॥१७(क)॥

Vinay Aayasthi Sahib Bhuwan Vani Trust Donations
तब अंगद उठि नहि सिर सजल नयन कर जोरि ।

अति बिनीत बोलेउ बचन मनहुँ प्रेम रस बोरि ॥१७(ख)॥

सुनु सर्वग्य कृपा सुख सिंधो । दीन दयाकर आरत बंधो ॥
मरती बेर नाथ मोहि बाली । गयउ तुम्हारेहि कोंछें घाली ॥
असरन सरन विरदु संभारी । मोहि जनि तजहु भगत हितकारी
मोरें तुम्ह प्रभु गुर पितु माता । जाउँ कहाँ तजि पद जलजाता ॥
तुम्हहि विचारि कहहु नरनाहा । प्रभु तजि भवन काज मम काहा ॥
बालक ग्यान बुद्धि बल हीना । राखहु सरन नाथ जन दीना ॥
नीचि टहल गृह कै सब करिहउँ । पद पंकज बिलोकि भव तरिहउँ
अस कहि चरन परेउ प्रभु पाही । अब जनि नाथ कहहु गृह जाही ॥

दो०—अंगद बचन बिनीत सुनि रघुपति करुना सींव ।

प्रभु उठाइ उर लायउ सजल नयन राजीव ॥१८(क)॥

निज उर माल बसन मनि बालितनय पहिराइ ।

बिदा कीन्हि भगवान तब बहु प्रकार समुझाइ ॥१८(ख)॥

भरत अनुज सौमित्रि समेता । पठवन चले भगत कृत चेता ॥
अंगद हृदयँ प्रेम नहिं थोरा । फिरि फिरि चितव राम की ओरा
बार बार कर दंड प्रनामा । मन अस रहन कहहिं मोहि रामा
राम बिलोकनि बोलनि चलनी । सुमिरि सुमिरि सोचत हँसि मिलनी
प्रभु रुख देखि न्निय बहु भाषी । चलेउ हृदयँ पद पंकज राखी ॥

Vinay Avasthi Sahib Bhuvan Vani Trust, Dehradun
तब सुग्रीव चरन गाहि नाना । भीति धिनय कहि हनुमाना ॥
दिन दस करि रघुपति पद सेवा । पुनि तब चरन देखिहउँ देवा ॥
पुन्य पुंज तुम्ह पवनकुमारा । सेवहु जाइ कृपा आगारा ॥
अस कहि कपि सब चले तुरंता । अंगद कहइ सुनहु हनुमंता ॥
दो०—कहेहु दंडवत प्रभु सैं तुम्हहि कहउँ कर जोरि ।

बार बार रघुनायकहि सुरति कराएहु मोरि ॥१९(क)॥

अस कहि चलेउ बालिसुत फिरि आयउ हनुमंत ।

तासु ग्रीति प्रभु सन कही मगन भए भगवंत ॥१९(ख)॥

कुलिसहु चाहि कठोर अति कोमल कुसुमहु चाहि ।

चित्त खगेस राम कर समुझि परइ कहु काहि ॥१९(ग)॥

पुनि कृपाल लियो बोलि निषादा । दीन्हे भूषन वसन प्रसादा ॥
जाहु भवन मम सुमिरन करेहू । मन क्रम बचन धर्म अनुसरेहू ॥
तुम्ह मम सखा भरत सम भ्राता । सदा रहेहु पुर आवत जाता ॥
बचन सुनत उपजा सुख भारी । परेउ चरन भरि लोचन बारी ॥
चरन नलिन उर धरि गृह आवा । प्रभु सुभाउ परिजनन्हि सुनावा
रघुपति चरित देखि पुरवासी । पुनि पुनि कहहिं धन्य सुखरासी
राम राज बैठैं त्रैलोका । हरषित भए गए सब सोका ॥
वयरु न कर काहू सन कोई । राम प्रताप विषमता खोई ॥

दो०—बरनाश्रम निज निज धरम निरत बेद पथ लोग ।

चलहिं सदा पावहिं सुखहि नहिं भय सोक न रोग ॥२०॥

दैहिक दैविक भातिक तापा । राम राज नहि काहुहि व्यापा ॥
 सब नर करहिं परस्पर प्रीती । चलहिं स्वधर्म निरत श्रुति नीती ॥
 चारिउ चरन धर्म जग माहीं । पूरि रहा सपनेहुँ अघ नाहीं ॥
 राम भगति रत नर अरु नारी । सकल परम गति के अधिकारी ॥
 अल्प मृत्यु नहिं कवनिउ पीरा । सब सुंदर सब विरुज सरीरा ॥
 नहिं दरिद्र कोउ दुखी न दीना । नहिं कोउ अबुध न लच्छनहीना ॥
 सब निर्देभ धर्मरत पुनी । नर अरु नारि चतुर सब गुनी ॥
 सब गुनगय पंडित सब ग्यानी । सब कृतग्य नहिं कपट सयानी ॥

दो०—राम राज नभगेस सुनु सचराचर जग माहिं ।

काल कर्म सुभाव गुन कृत दुख काहुहि नाहिं ॥२१॥

भूमि सप्त सागर मेखला । एक भूप रघुपति कोसला ॥
 भुअन अनेक रोम प्रति जासू । यह प्रभुता कछु बहुत न तासू ॥
 सो महिमा समुझत प्रभु केरी । यह बरनत हीनता घनेरी ॥
 सोउ महिमा खगेस जिन्ह जानी । फिरि एहिं चरित तिन्हहुँ रति मानी ॥
 सोउ जाने कर फल यह लीला । कहहिं महा मुनिबर दमसीला ॥
 राम राज कर सुख संपदा । बरनि न सकइ फनीस सारदा ॥
 सब उदार सब पर उपकारी । विप्र चरन सेवक नर नारी ॥
 एकनारि व्रत रत सब झारी । ते मन बच क्रम पति हितकारी ॥

दो०—दंड जतिन्ह कर भेद जहँ नर्तक नृत्य समाज ।

फूलहिं फराहि सदा तर कौनन । रहहि एकै रस प्रसन्नानन ॥
 खग मृग सहज बयर बिसराई । सबन्हि परस्पर प्रीति बढ़ाई ॥
 कूजहिं खग मृग नाना वृंदा । अभय चरहिं बन करहिं अनंदा
 सीतल सुरभि पवन बह मंदा । गुंजत अलि लै चलि मकरंदा ॥
 लता बिटप मागें मधु चवहीं । मन भावतो धेनु पय खवहीं ॥
 ससि संपन्न सदा रह धरनी । त्रेताँ भइ कृतजुग कै करनी ॥
 प्रगटीं गिरिन्ह विविधि मनि खानी । जगदातमा भूप जग जानी ॥
 सरिता सकल बहहिं बर बारी । सीतल अमल स्वाद सुखकारी ॥
 सागर निज मरजादाँ रहहीं । डारहिं रत्न तटन्हि नर लहहीं ॥
 सरसिज संकुल सकल तड़ागा । अति प्रसन्न दस दिसा विभागा ॥
 दो०—बिधु महि पूर मयूखन्हि रबि तप जेतनेहि काज ।

मागें बारिद देहिं जल रामचंद्र कें राज ॥२३॥

कोटिन्ह बाजिमेघ प्रभु कीन्हे । दान अनेक द्विजन्ह कहँ दीन्हे ॥
 श्रुति पथ पालक धर्म धुरंधर । गुनातीत अरु भोग पुरंदर ॥
 पति अनुकूल सदा रह सीता । सोभा खानि सुसील विनीता ॥
 जानति कृपासिंधु प्रभुताई । सेवति चरन कमल मन लाई ॥
 जद्यपि गृहँ सेवक सेवकिनी । बिपुल सदा सेवा विधि गुनी ॥
 निज कर गृह परिचरजा करई । रामचंद्र आयसु अनुसरई ॥
 जेहि विधि कृपासिंधु सुख मानइ । सोइ कर श्री सेवा विधि जानइ ॥
 कौसल्यादि सासु गृह माहीं । सेवइ सबन्हि मान मद नाहीं ॥

उमा रमा ब्रह्मादि वादिता । जगदवा सततमनिदिता ॥

दो०—जासु कृपा कटाच्छु सुर चाहत चितव न सोइ ।

राम पदारबिंद रति करति सुभावहि खोइ ॥२४॥

सेवहिं सानकूल सब भाई । राम चरन रति अति अधिकाई ॥

प्रभु मुख कमल विलोकत रहहीं । कबहुँ कृपाल हमहि कछु कहहीं ॥

राम करहिं भ्रातन्ह पर प्रीती । नाना भाँति सिखावहिं नीती ॥

हरषित रहहिं नगर के लोगा । करहिं सकल सुर दुर्लभ भोगा ॥

अहनिसि विधिहि मनावत रहहीं । श्रीरघुवीर चरन रति चहहीं ॥

दुइ सुत सुंदर सीताँ जाए । लव कुस वेद पुरानन्ह गाए ॥

दोउ बिजई विनई गुन मंदिर । हरि प्रतिबिंब मनहुँ अति सुंदर ॥

दुइ दुइ सुत सब भ्रातन्ह केरे । भए रूप गुन सील घनेरे ॥

दो०—ग्यान गिरा गोतीत अज माया मन गुन पार ।

सोइ सच्चिदानंद घन कर नर चरित उदार ॥२५॥

प्रातकाल सरऊ करि मज्जन । बैठहिं सभाँ संग द्विज सज्जन ॥

वेद पुरान बसिष्ट बखानहिं । सुनाहिं राम जद्यपि सब जानहिं ॥

अनुजन्ह संजुत भोजन करहीं । देखि सकल जननीं सुख भरहीं ॥

भरत सत्रुहन दोनउ भाई । सहित पवनसुत उपवन जाई ॥

बृह्महिं बैठि राम गुन गाहा । कह हनुमान सुमति अवगाहा ॥

सुनत विमल गुन अति सुख पावहिं । बहुरि बहुरि करि विनय कहावहिं ॥

सब केँ गृह गृह होहिं पुराना । राम चरित पावन विधि नावा ॥

Vinay Avasthi Sahib Bhuvan Vani Trust Donations

नर अरु नारि राम गुन गानहि । कराहि दिवस निसि जाति न जानहि
दो०—अवधपुरी बासिन्ह कर सुख संपदा समाज ।

सहस सेष नहि कहि सकहि जहँ नृप राम विराज ॥२६॥

नारदादि सनकादि मुनीसा । दरसन लागि कोसलाधीसा ॥
दिन प्रति सकल अजोड्या आवहि । देखि नगर विरागु विसरावहि
जातरूप मनि रचित अटारी । नाना रंग रुचिर गच ठारी ॥
पुर चहुँ पास कोट अति सुंदर । रचे कँगूरा रंग रंग बर ॥
नव ग्रह निकर अनीक बनाई । जनु घेरी अमरावति आई ॥
सहि बहु रंग रचित गच काँचा । जो बिलोकि मुनिवर मन नाचा
धवल धाम ऊपर नभ चुंबत । कलस मनहुँ रवि ससि दुति निंदत
बहु मनि रचित झरोखा भ्राजहि । गृह गृह प्रति मनि दीप विराजहि

छं०—मनि दीप राजहि भवन भ्राजहि देहरी बिद्रुम रची ।

मनि खंभ भीति बिरंचि बिरची कनक मनि मरकत खची ॥

सुंदर मनोहर मंदिरायत अजिर रुचिर फटिक रचे ।

प्रति द्वार द्वार कपाट पुरट बनाइ बहु बज्रन्हि खचे ॥

दो०—चारु चित्रसाला गृह गृह प्रति लिखे बनाइ ।

रामचरित जे निरख मुनि ते मन लेहि चोराइ ॥२७॥

सुमन बाटिका सबहि लगाई । विविध भाँति करि जतन बनाई ॥

लता ललित बहु जाति सुहाई । फूलहि सदा बसंत कि नाई ॥

गुंजत मधुकर मुखर मनोहर । मारुत त्रिविधि सदा बह सुंदर ॥

छं०—बापीं तदाग अनूप कूप मनोहरायत सोहहीं ।

सोपान सुंदर नीर निर्मल देखि सुर मुनि मोहहीं ॥

बहु रंग कंज अनेक खग कूजहिं मधुप गुंजारहीं ।

आराम रम्य पिकादि खग ख जनु पथिक हंकारहीं ॥

दो०—रमानाथ जहँ राजा सो पुर बरनि कि जाइ ।

अनिमादिक सुख संपदा रहीं अवध सब छाइ ॥२९॥

जहँ तहँ नर रघुपति गुन गावहिं । बैठि परसपर इहइ सिखावहिं ॥

भजहु प्रनत प्रतिपालक रामहि । सोभा सील रूप गुन धामहि ॥

जलज विलोचन स्यामल गातहि । पलक नयन इव सेवक प्रातहि ॥

धृत सर रुचिर चाप तूनीरहि । संत कंज बन रवि रनधीरहि ॥

काल कराल ब्याल खगराजहि । नमत राम अकाम ममता जहि ॥

लोभ मोह मृगजूथ किरातहि । मनसिज करि हरि जन सुखदातहि ॥

संसय सोक निबिड़ तम भानुहि । दनुज गहन घन दहन कृसानुहि ॥

जनकसुता समेत रघुवीरहि । कसन भजहु भंजन भवभीरहि ॥

बहु वासना मसक हिम रासिहि । सदा एकरस अज अविनासिहि ॥

मुनि रंजन भंजन सहि भारहि । तुलसिदास के प्रभुहि उदारहि ॥

दो०—एहि बिधि नगर नारि नर करहिं राम गुन गान ।

सानुकूल सब पर रहहिं संतत कृपानिधान ॥३०॥

जब ते राम प्रताप खगेसा । उदित भयउ अति प्रबलदिनेसा ॥

पुरि प्रकास रहेउ तिहुँ लोका । बहुतेन्ह सुख बहुतम मन सोका ॥

जिन्हहि सोक ते कहउँ बखानी । प्रथम अबिद्या निसा नसानी ॥
 अघ उलूक जहँ तहाँ लुकाने । काम क्रोध कैरव सकुचाने ॥
 विविध कर्म गुन काल सुभाऊ । ए चकोर सुख लहहिं न काऊ ॥
 मत्सर मान मोह मद चोरा । इन्ह कर हुनर न कवनिहुँ ओरा ॥
 धरम तड़ाग ग्यान बिग्याना । ए पंकज विकसे बिधि नाना ॥
 सुख संतोष बिराग विवेका । बिगत सोक ए कोक अनेका ॥
 दो०—यह प्रताप रबि जाकेँ उर जब करइ प्रकास ।

पछिले बाढ़हिं प्रथम जे कहे ते पावहिं नास ॥३१॥

भ्रातन्ह सहित रामु एक वारा । संग परम प्रिय पवनकुमारा ॥
 सुंदर उपवन देखन गए । सब तरु कुसुमित पल्लव नए ॥
 जानि समय सनकादिक आए । तेज पुंज गुन सील सुहाए ॥
 ब्रह्मानंद सदा लयलीना । देखत बालक बहुकालीना ॥
 रूप धरें जनु चारिउ बेदा । समदरसी मुनि बिगत बिभेदा ॥
 आसा बसन व्यसन यह तिन्हहीं । रघुपति चरित होइ तहँ सुनहीं ॥
 तहाँ रहे सनकादि भवानी । जहँ घटसंभव मुनिवर ग्यानी ॥
 राम कथा मुनिवर बहु बरनी । ग्यान जोनि पावक जिमि अरनी ॥
 दो०—देखि राम मुनि आवत हरषि दंडवत कीन्ह ।

स्वागत पूँछि पीतपट प्रभु बैठन कहँ दीन्ह ॥३२॥

कीन्ह दंडवत तीनिउँ भाई । सहित पवनसुत सुख अधिकाई ॥

मुनि रघुपति लनि अतल बिलोकी । अप समान मन सके न सोकी ॥

स्यामल गात सरोरुह लोचन । सुंदरता मंदिर भव मोचन ॥
एकटक रहे निमेष न लावहिं । प्रभु कर जोरें सीस नवावहिं ॥
तिन्ह कै दसा देखि रघुवीरा । खवत नयन जल पुलक सरीरा ॥
कर गहि प्रभु मुनिबर बैठारे । परम मनोहर वचन उचारे ॥
आजु धन्य मैं सुनहु मुनीसा । तुम्हरे दरस जाहिं अघ खीसा ॥
बड़े भाग पाइब सतसंगा । बिनहिं प्रयास होहिं भव भंगा ॥

दो०—संत संग अपवर्ग कर कासी भव कर पंथ ।

कहहिं संत कवि कोविद श्रुति पुरान सदग्रंथ ॥३३॥

मुनि प्रभु वचन हरषि मुनि चारी । पुलकित तन अस्तुति अनुसारी
जय भगवंत अनंत अनामय । अनघ अनेक एक करुनामय ॥
जय निर्गुन जय जय गुन सागर । सुख मंदिर सुंदर अति नागर ॥
जय इंदिरा रमन जय भूधर । अनुपम अज अनादि सोभाकर ॥
ग्याननिधान अमान मानप्रद । पावन सुजस पुरान बेद बद ॥
लग्य कृतग्य अग्यता भंजन । नाम अनेक अनाम निरंजन ॥
सर्व सर्वगत सर्व उरालय । बससि सदा हम कहूँ परिपालय ॥
द्वंद्व बिपति भव फंद विभंजय । हृदि बसि राम काम मद गंजय ॥

दो०—परमानंद कृपायतन मन परिपूरन काम ।

प्रेम भगति अनपायनी देहु हमहि श्रीराम ॥३४॥

देहु भगति रघुपति अति पावनि । त्रिविधि ताप भव दाप नसावनि
प्रनत काम सुरधेनु कलपतरु । होइ प्रसन्न दीजै प्रभु यह बरु ॥

भव बारिधि कुंभज रघुनायक । सेवत सुलभ सकल सुखदायक ॥
 मन संभव दारुन दुख दारय । दीनबंधु समता विस्तारय ॥
 आस त्रास हरिषादि निवारक । विनय विवेक विरति विस्तारक ॥
 भूप मौलि मनि मंडन धरनी । देहि भगति संसृति सरि तरनी ॥
 सुनि मन मानस हंस निरंतर । चरन कमल बंदित अजसंकर ॥
 रघुकुल केतु सेतु श्रुति रच्छक । काल करम सुभाउ गुन भच्छक ॥
 तारन तरन हरन सब दूषन । तुलसिदास प्रभु त्रिभुवन भूषन ॥
 दो०—बार बार अस्तुति करि प्रेम सहित सिरु नाइ ।

ब्रह्म भवन सनकादि गो अति अभीष्ट बर पाइ ॥३५॥

सनकादिक विधि लोक सिधाए । भ्रातन्ह राम चरन सिरु नाए ॥
 पूछत प्रभुहि सकल सकुचाहीं । चितवहिं सब मारुतसुत पाहीं ॥
 सुनी चहहिं प्रभु मुख कै बानी । जो सुनि होइ सकल भ्रम हानी ॥
 अंतरजामी प्रभु सभ जाना । बूझत कहहु काह हनुमाना ॥
 जोरि पानि कह तब हनुमंता । सुनहु दीनदयाल भगवंता ॥
 नाथ भरत कछु पूँछन चहहीं । प्रसन्न करत मन सकुचत अहहीं ॥
 तुम्ह जानहु कपि मोर सुभाऊ । भरतहि मोहि कछु अंतर काऊ ॥
 सुनि प्रभु वचन भरत गहे चरना । सुनहु नाथ प्रनतारति हरना ॥

दो०—नाथ न मोहि संदेह कछु सपनेहुँ सोक न मोह ।

केवल कृपा तुम्हारिहि कृपानंद संदोह ॥३६॥

Vinay Avasthi Sahib Bhuvan Vani Trust Donations

संतन्ह के महिमा रघुराइ । बहु बिधि वेद पुरानन्ह गाई ॥
 श्रीमुख तुम्ह पुनि कीन्हि बड़ाई । तिन्ह पर प्रभुहि प्रीति अधिकाई
 सुना चहउँ प्रभु तिन्ह कर लच्छन । कृपासिंधु गुन ग्यान बिचच्छन
 संत असंत भेद बिलगाई । प्रनतपाल मोहि कहहु बुझाई ॥
 संतन्ह के लच्छन सुनु भ्राता । अगनित श्रुति पुरान बिख्याता
 संत असंतन्हि कै असि करनी । जिमि कुठार चंदन आचरनी ॥
 काटइ परसु मलय सुनु भाई । निज गुन देइ सुगंध बसाई ॥
 दो०-ताते सुर सीसन्ह चढ़त जग बल्लभ श्रीखंड ।

अनल दाहि पीटत घनहिं परसु बदन यह दंड ॥ ३७ ॥

विषय अलंपट सील गुनाकर । पर दुख दुख सुख सुख देखे पर
 सम अभूतरिपु विमद विरागी । लोभामरष हरष भय त्यागी ॥
 कोमलचित दीनन्ह पर दाया । मन बच क्रम मम भगति अमाया
 सबहि मानप्रद आपु अमानी । भरत प्रान सम मम ते प्रानी ॥
 बिगत काम मम नाम परायन । सांति बिरति बिनती मुदितायन ॥
 सीतलता सरलता मयत्री । द्विज पद प्रीति धर्म जनयत्री ॥
 ए सब लच्छन बसहिं जासु उर । जानेहु तात संत संतत फुर ॥
 सम दम नियम नीति नहिं डोलहिं । परुष वचन कबहूँ नहिं बोलहिं
 दो०-निंदा अस्तुति उभय सम ममता मम पद कंज ।

ते सज्जन मम प्रान प्रिय गुन मंदिर सुख पुंज ॥ ३८ ॥

सुनहु असंतन्ह केर सुभाऊ । भूलेहुँ संगति करिअ न काऊ ॥

तिन्ह कर संग सदा दुखदाई । जिमि कपिलहि धालि हरहाई ॥
 खलन्ह हृदयँ अति ताप बिसेषी । जरहिं सदा पर संपति देखी ॥
 जहँ कहँ निंदा सुनहिं पराई । हरषहिं मनहुँ परी निधिपाई ॥
 काम क्रोध मद लोभ परायन । निर्दय कपटी कुटिल मलायन ॥
 बयर अकारन सब काहू सों । जो कर हित अनहित ताहू सों ॥
 झूठइ लेना झूठइ देना । झूठइ भोजन झूठ चबेना ॥
 बोलहिं मधुर वचन जिमि मोरा । खाइ महा अहि हृदय कठोरा ॥

दो०—पर द्रोही पर दार रत पर धन पर अपबाद ।

ते नर पाँचर पापमय देह धरें मनुजाद ॥ ३९ ॥

लोभइ ओढ़न लोभइ डासन । सिखोदर पर जमपुर त्रासन ॥
 काहू की जौं सुनहिं बड़ाई । स्वास लेहिं जनु जूड़ी आई ॥
 जत्र काहू कै देखाहिं बिपती । सुखी भए मानहुँ जग नृपती ॥
 स्वारथ रत परिवार विरोधी । लंपट काम लोभ अति क्रोधी ॥
 मातु पिता गुर बिप्र न मानहिं । आपु गए अरु घालहिं असनहिं ॥
 करहिं मोह बस द्रोह परावा । संत संग हरि कथा न भावा ॥
 अवगुन सिंधु मंदमति कामी । वेद विदूषक परधन स्वामी ॥
 बिप्र द्रोह पर द्रोह बिसेषा । दंभ कपट जियँ धरें सुबेषा ॥

दो०—ऐसे अधम मनुज खल कृतजुग त्रेताँ नाहिं ।

द्वापर कछुक बृंद बहु होइहहिं कलियुग माहिं ॥ ४० ॥

पर दिन मरिस धर्म नहिं भाई । पर पीडा सम नहिं अधमाई ॥

Vinay Avasthi Sahib Bhuwan Vani Trust Donations
निर्णय सकल पुरान बंद कर । कहै तात जनिहि कोचिद नर॥
नर सरीर धरि जे पर पीरा । करहिं ते सहहिं महा भव भीरा॥
करहिं मोहबस नर अध नाना । स्वारथ रत परलोक नसाना ॥
कालरूप तिन्ह कहैं मैं भ्राता । सुभ अरु असुभ कर्म फल दाता॥
अस विचारि जे परम सयाने । भजहिं मोहि संसृत दुख जाने ॥
त्यागहिं कर्म सुभासुभ दायक । भजहिं मोहि सुर नर मुनि नायक
संत असंतन्ह के गुन भाषे । तेन परहिं भव जिन्ह लखिराखे॥

दो०—सुनहु तात माया कृत गुन अरु दोष अनेक ।

गुन यह उभय न देखिअहिं देखिअ सो अविवेक ॥ ४१ ॥

श्रीमुख बचन सुनत सब भाई । हरषे प्रेम न हृदयँ समाई ॥
करहिं विनय अति बारहिं बारा । हनूमान हियँ हरष अपारा ॥
पुनि रघुपति निज मंदिर गए । एहि विधि चरित करत नित नए
बार बार नारद मुनि आवहिं । चरित पुनीत राम के गावहिं ॥
नित नव चरित देखि मुनि जाहीं । ब्रह्मलोक सब कथा कहाहीं ॥
मुनि विरंचि अतिसय सुख मानहिं । पुनि पुनि तात करहु गुन गानहिं
सनकादिक नारदहि सराहहिं । जद्यपि ब्रह्म निरत मुनि आहहिं ॥
मुनि गुन गान समाधि बिसारी । सादर सुनहिं परम अधिकारी ॥

दो०—जीवनमुक्त ब्रह्मपर चरित सुनहिं तजि ध्यान ।

जे हरिकथाँ न करहिं रति तिन्ह के हिय पाषान ॥ ४२ ॥

एक बार रघुनाथ बोलाए । गुर द्विज पुरबासी सब आए ॥

Vipray Avasthi Sahib Bhuvan Vani Trust Donations

बैठे गुर मुनि अरु द्विज सज्जन । बलि बचन भगत भव भजन ॥
 सुनहु सकल पुरजन मम बानी । कहउँ न कछु ममता उर आनी ॥
 नहिं अनीति नहिं कछु प्रभुताई । सुनहु करहु जो तुम्हहि सोहाई ॥
 सोइ सेवक प्रियतम मम सोई । मम अनुसासन मानै जोई ॥
 जौं अनीति कछु भाषौं भाई । तौ मोहि बरजहु भय बिसराई ॥
 बड़ें भाग मानुष तनु पावा । सुर दुर्लभ सब ग्रंथन्हि गावा ॥
 साधन धाम मोच्छ कर द्वारा । पाइ न जेहिं परलोक सँवारा ॥
 दो०—सो परत्र दुख पावइ सिर धुनि धुनि पछिताइ ।

कालहि कर्महि ईस्वरहि मिथ्या दोस लगाइ ॥ ४३ ॥

एहि तन कर फल बिषय न भाई । स्वर्गउ स्वल्प अंत दुखदाई ॥
 नर तनु पाइ बिषय मन देहीं । पलटि सुधा ते सठ बिष लेहीं ॥
 ताहि कबहुँ भल कहइ न कोई । गुंजा ग्रहइ परस मनि खोई ॥
 आकर चारि लच्छ चौरासी । जोनि भ्रमत यह जिव अविनासी ॥
 फिरत सदा माया कर प्रेरा । काल कर्म सुभाव गुन घेरा ॥
 कबहुँक करि करुना नर देही । देत ईस बिनु हेतु सनेही ॥
 नर तनु भव बारिधि कहूँ बेरो । सन्मुख मरुत अनुग्रह मेरो ॥
 करनधार सदगुर दृढ़ नावा । दुर्लभ साज सुलभ करि पावा ॥

सो०—जो न तरै भव सागर नर समाज अस पाइ ।

सो कृत निंदक मंदमति आत्माहन गति जाइ ॥ ४४ ॥

जौं परलोक इहाँ सुख चहइ । सुनि मम बचन हृदयँ हृद गाइइ

सुलभ सुख अमरगि शिबिभरुवामपति मोहि पुतना भुति गाई ॥
 ग्यान अगम प्रत्यूह अनेका । साधन कठिन न मन कहूँ टेका ॥
 करत कष्ट बहु पावइ कोऊ । भक्ति हीन मोहि प्रिय नहिं सोऊ ॥
 भक्ति सुतंत्र सकल सुख खानी । बिनु सतसंग न पावहिं प्रानी ॥
 पुन्य पुंज बिनु मिलहिं न संता । सतसंगति संसृति कर अंता ॥
 पुन्य एक जग महूँ नहिं दूजा । मन क्रम वचन विप्र पद पूजा ॥
 सानुकूल तेहि पर मुनि देवा । जो तजि कपटु करइ द्विज सेवा ॥
 दो०—औरउ एक गुप्त मत सबहि कहउँ कर जोरि ।

संकर भजन बिना नर भगति न पावइ मोरि ॥ ४५ ॥

कहहु भगति पथ कवन प्रयासा । जोग न मख जप तप उपवासा ॥
 सरल सुभाव न मन कुटिलाई । जथा लाभ संतोष सदाई ॥
 मोर दास कहाइ नर आसा । करइ तौ कहहु कहा बिस्वासा ॥
 बहुत कहउँ का कथा बढ़ाई । एहि आचरन बस्य मैं भाई ॥
 बैर न विग्रह आस न त्रासा । सुखमय ताहि सदा सब आसा ॥
 अनारंभ अनिकेत अमानी । अनघ अरोष दच्छ बिग्यानी ॥
 प्रीति सदा सजन संसर्गा । तृन सम विषय स्वर्ग अपवर्गा ॥
 भगति पच्छ हठ नहिं सठताई । दुष्ट तर्क सब दूरि बहाई ॥

दो०—मम गुन ग्राम नाम रत गत ममता मद मोह ।

ता कर सुख सोइ जानइ परानंद संदोह ॥ ४६ ॥

सुनत सुधासम वचन राम के । गहे सबनि पद कृपाधाम के ॥

Vinay Avasthi Sahib Bhuvan Vani Trust Donations

जननि जनक गुर बधु हमार । कृपा निधान प्रान ते प्यारे ॥
 तनु धनु धाम राम हितकारी । सब विधि तुम्ह प्रनतारति हारी ॥
 असि सिख तुम्ह विनु देइ न कोऊ । मातु पिता स्वारथ रत ओऊ ॥
 हेतु रहित जग जुग उपकारी । तुम्ह तुम्हार सेवक असुरारी ॥
 स्वारथ मीत सकल जग माहीं । सपनेहुँ प्रभु परमारथ नाहीं ॥
 सब के बचन प्रेम रस साने । सुनि रघुनाथ हृदयँ हरषाने ॥
 निज निज गृह गए आयसु पाई । बरनत प्रभु बतकही सुहाई ॥
 दो०—उमा अवधवासी नर नारि कृतारथ रूप ।

ब्रह्म सच्चिदानंद घन रघुनायक जहँ भूप ॥ ४७ ॥

एक बार बसिष्ट मुनि आए । जहाँ राम सुखधाम सुहाए ॥
 अति आदर रघुनायक कीन्हा । पद पखारि पादोदक लीन्हा ॥
 राम सुनहु मुनि कह कर जोरी । कृपासिंधु बिनती कछु मोरी ॥
 देखि देखि आचरन तुम्हारा । होत मोह मम हृदयँ अपारा ॥
 महिमा अमिति वेद नहिं जाना । मैं केहि भाँति कहउँ भगवाना ॥
 उपरोहित्य कर्म अति मंदा । वेद पुरान सुमृति कर निंदा ॥
 जब न लेउँ मैं तब विधि मोही । कहा लाभ आगें सुत तोही ॥
 परमात्मा ब्रह्म नर रूपा । होइहि रघुकुल भूषन भूपा ॥

दो०—तब मैं हृदयँ बिचारा जोग जग्य ब्रत दान ।

जा कहूँ करिअ सो पैहउँ धर्म न एहि सम आन ॥ ४८ ॥

ग्यान दया दैव सौरभ साधन हैं करि तुम्हें कहल भुक्ति सजन
आगम निगम पुरान अनेका । पढ़े सुने कर फल प्रभु एका ॥
तव पद पंकज प्रीति निरंतर । सब साधन कर यह फल सुंदर ॥
छूटइ मल कि मलहि के धोएँ । धृत कि पाव कोइ बारि बिलोएँ ॥
प्रेम भगति जल विनु रघुराई । अभिअंतर मल कबहुँ न जाई ॥
सोइ सर्वग्य तग्य सोइ पंडित । सोइ गुन गृह विग्यान अखंडित
दच्छ सकल लच्छन जुत सोई । जाकेँ पद सरोज रति होई ॥

दो०—नाथ एक बर मागउँ राम कृपा करि देहु ।

जन्म जन्म प्रभु पद कमल कबहुँ घटै जनि नेहु ॥ ४९ ॥

अस कहि मुनि वसिष्ठ गृह आए । कृपासिंधु के मन अति भाए ॥
हनूमान भरतादिक भ्राता । संग लिए सेवक सुख दाता ॥
पुनि कृपाल पुर बाहेर गए । गज रथ तुरग मगावत भए ॥
देखि कृपा करि सकल सराहे । दिए उचित जिन्ह जिन्ह तेइ चाहे
हरन सकल श्रम प्रभु श्रम पाई । गए जहाँ सीतल अँवर्राई ॥
भरत दीन्ह निज बसन डसाई । बैठे प्रभु सेवहिं सब भाई ॥
मारुतसुत तब मारुत करई । पुलक वपुषलोचन जल भरई ॥
हनूमान सम नहिं बड़भागी । नहिं कोउ राम चरन अनुरागी ॥
गिरिजा जासु प्रीति सेवकाई । बार बार प्रभु निज मुख गाई ॥

दो०—तेहिं अवसर मुनि नारद आए करतल बीन ।

गावन लगे राम कल कीरति सदा नबीन ॥ ५० ॥

Vinay Avasthi Sahib Bhuvan Vani Trust Donations

मामवलोकिय पकज लीचन । कृपा विलाकिन साच बिमोचन ॥
नील तामरस स्याम काम अरि । हृदय कंज मकरंद मधुप हरि ॥
जातुधान बरूथ बल भंजन । मुनि सजन रंजन अघ गंजन ॥
भूसुर ससि नव वृंद बलाहक । असरन सरन दीन जन गाहक ॥
भुजबल विपुल भार महि खंडित । खर दूषन विराध बध पंडित ॥
रावनारि सुखरूप भूपवर । जय दसरथ कुल कुमुद सुधाकर
सुजस पुरान विदित निगमागम । गावत सुर मुनि संत समागम ॥
कारुनीक व्यलीक मद खंडन । सब विधि कुसल कोसला मंडन ॥
कलि मल मथन नाम ममताहन । तुलसिदास प्रभु पाहि प्रनत जन

दो०—प्रेम सहित मुनि नारद बरनि राम गुन ग्राम ।

सोभासिंधु हृदय धरि गए जहाँ विधि धाम ॥ ५१ ॥

गिरिजा सुनहु बिसद यह कथा । मैं सब कही मोरि मति जथा ॥
राम चरित सत कोटि अपारा । श्रुति सारदा न बरनै पारा ॥
राम अनंत अनंत गुनानी । जन्म कर्म अनंत नामानी ॥
जल सीकर महि रज गनि जाहीं । रघुपति चरित न बरनि सिराहीं ॥
बिमल कथा हरि पद दायनी । भगति होइ मुनि अनपायनी ॥
उमा कहिउँ सब कथा सुहाई । जो भुसुंड़ि खगपतिहि सुनाई ॥
कछुक राम गुन कहेउँ बखानी । अब का कहौं सो कहहु भवानी ॥
मुनि सुभ कथा उमा हरषानी । बोली अति विनीत मृदु बानी ॥

Vinay Avasthi Sahib Bhuvan Vani Trust Donations.
दो०—तुम्हरी कृपा कृपायतन अब कृतकृत्य न मीह ।

जानेउँ राम प्रताप प्रभु चिदानंद संदोह ॥५२(क)॥

नाथ तवानन ससि खवत कथा सुधा रघुबीर ।

श्रवन पुटन्हि मन पान करि नहिं अघात मतिधीर ॥५२(ख)॥

राम चरित जे सुनत अघाहीं । रस विसेप जाना तिन्ह नाहीं ॥
जीवनमुक्त महामुनि जेऊ । हरि गुन सुनहिं निरंतर तेऊ ॥
भव सागर चह पार जो पावा । राम कथा ता कहँ दृढ़ नावा ॥
विषइन्ह कहँ पुनि हरि गुन ग्रामा । श्रवन सुखद अरु मन अभिरामा
श्रवनवंत अस को जग माहीं । जाहि न रघुपति चरित सोहाहीं
ते जड़ जीव निजात्मक घाती । जिन्हहि न रघुपति कथा सोहाती ॥
हरिचरित्र मानस तुम्ह गावा । सुनि मैं नाथ अमिति सुख पावा ॥
तुम्ह जो कही यह कथा सुहाई । कागभसुंडि गरुड़ प्रति गाई ॥
दो०—बिरति ग्यान बिग्यान दृढ़ राम चरन अति नेह ।

बायस तन रघुपति भगति मोहि परम संदेह ॥ ५३ ॥

नर सहस्र महुँ सुनहु पुरारी । कोउ एक होइ धर्म व्रतधारी ॥
धर्मसील कोटिक महुँ कोई । विषय विमुख विराग रत होई ॥
कोटि विरक्त मध्य श्रुति कहई । सम्यक ग्यान सकृत् कोउ लहई
ग्यानवंत कोटिक महुँ कोऊ । जीवनमुक्त सकृत् जग सोऊ ॥
तिन्ह सहस्र महुँ सब सुख खानी । दुर्लभ ब्रह्मलीन बिग्यानी ॥
धर्मसील विरक्त अरु ग्यानी । जीवनमुक्त ब्रह्मपर प्राणी ॥

सब ते सो दुलै सुरसाय । राम भगति रस गति चंद साया ॥
 सो हरिभगति काग किमि पाई । बिस्वनाथ मोहि कहहु बुझाई ॥

दो०—राम परायन ग्यान रत गुनागार मति धीर ।

नाथ कहहु केहि कारन पायउ काक सरीर ॥ ५४ ॥

यह प्रभु चरित पवित्र सुहावा । कहहु कृपाल काग कहँ पावा ॥
 तुम्ह केहि भाँति सुना मदनारी । कहहु मोहि अति कौतुक भारी ॥
 गरुड़ महाग्यानी गुन रासी । हरि सेवक अति निकट निवासी ॥
 तेहिं केहि हेतु काग सन जाई । सुनी कथा मुनि निकर बिहाई ॥
 कहहु कवन बिधि भा संवादा । दोउ हरिभगत काग उरगादा ॥
 गौरि गिरा मुनि सरल सुहाई । बोले सिव सादर सुख पाई ॥
 धन्य सती पावन मति तोरी । रघुपति चरन प्रीति नहिं थोरी ॥
 सुनहु परम पुनीत इतिहासा । जो सुनि सकल लोक भ्रम नासा ॥
 उपजइ राम चरन बिस्वासा । भव निधि तर नर बिनहिं प्रयासा ॥
 दो०—ऐसिअ प्रसन्न बिहंगपति कीन्हि काग सन जाइ ।

सो सब सादर कहिहउँ सुनहु उमा मन लाइ ॥ ५५ ॥

मैं जिमि कथा सुनी भव मोचनि । सो प्रसंग सुनु सुमुखि सुलोचनि
 प्रथम दच्छ गृह तव अवतारा । सती नाम तव रहा तुम्हारा ॥
 दच्छ जग्य तव भा अपमाना । तुम्ह अति क्रोध तजे तब प्राणा ॥
 मम अनुचरन्ह कीन्ह मख भंगा । जानहु तुम्ह सो सकल प्रसंगा ॥
 तब अति सोच भयउ मन मोरें । दुखी भयउँ बियोग प्रिय तोरें ॥

सुंदर बन गिरि सरित तड़ागा । कौतुक देखत फिरउ बेरागा ॥
 गिरि सुमेर उत्तर दिसि दूरी । नील सैल एक सुंदर भूरी ॥
 तासु कनकमय सिखर सुहाए । चारि चारु मोरे मन भाए ॥
 तिन्ह पर एक एक बिटप बिसाला । बट पीपर पाकरी रसाला ॥
 सैलोपरि सर सुंदर सोहा । मनि सोपान देखि मन मोहा ॥
 दो०—सीतल अमल मधुर जल जलज बिपुल बहुरंग ।

कूजत कल रव हंस गन गुंजत मंजुल भृंग ॥ ५६ ॥

तेहिं गिरि रुचिर बसइ खग सोई । तासु नास कल्पांत न होई ॥
 माया कृत गुन दोष अनेका । मोह मनोज आदि अविबेका ॥
 रहे व्यापि समस्त जग माहीं । तेहि गिरि निकट कबहुँ नहिं जाहीं ॥
 तहँ बसि हरिहि भजइ जिमि कागा । सो सुनु उमा सहित अनुरागा ॥
 पीपर तरु तर ध्यान सो धरई । जाप जग्य पाकरि तर करई ॥
 आँव छाँह कर मानस पूजा । तजि हरि भजनु काजु नहिं दूजा ॥
 बर तर कह हरि कथा प्रसंगा । आवहिं सुनहिं अनेक बिहंगा ॥
 राम चरित विचित्र विधि नाना । प्रेम सहित कर सादर गाना ॥
 सुनहिं सकल मति बिमल मराला । बसहिं निरंतर जे तेहिं ताला ॥
 जब मैं जाइ सो कौतुक देखा । उर उपजा आनंद विसेषा ॥

दो०—तब कछु काल मराल तनु धरि तहँ कीन्ह निवास ।

सादर सुनि रघुपति गुन पुनि आयउँ कैलास ॥ ५७ ॥

गिरिजा कहेउँ सो सब इतिहासा । मैं जेहि समय गयउँ खग पासा

अब सो कथा सुनेहु जेहि हतू । गयउ काग पाह खग कुल केतू ॥
 जब रघुनाथ कीन्हि रन क्रीड़ा । समुझत चरित होति मोहि ब्रीड़ा ॥
 इंद्रजीत कर आपु बंधायो । तब नारद मुनि गरुड़ पठायो ॥
 बंधन काटि गयो उरगादा । उपजा हृदय प्रचंड विषादा ॥
 प्रभु बंधन समुझत बहु भाँती । करत विचार उरग आराती ॥
 व्यापक ब्रह्म विरज वागीसा । माया मोह पार परमीसा ॥
 सो अवतार सुनेउँ जग माहीं । देखेउँ सो प्रभाव कछु नाहीं ॥
 दो०—भव बंधन ते छूटहि नर जपि जा कर नाम ।

खर्ब निसाचर बाँधेउ नागपास सोइ राम ॥ ५८ ॥

नाना भाँति मनहि समुझावा । प्रगट न ग्यान हृदय भ्रम छावा ॥
 खेद खिन्न मन तर्क बढ़ाई । भयउ मोहवस तुम्हरिहि नाई ॥
 व्याकुल गयउ देवरिषि पाहीं । कहेसि जो संसय निज मन माहीं ॥
 सुनि नारदहि लागि अति दाया । सुनु खग प्रबल राम कै माया ॥
 जो ग्यानिन्ह कर चित अपहरई । बरिआई विमोह मन करई ॥
 जेहि बहु बार नचावा मोही । सोइ ब्यापी विहंगपति तोही ॥
 महामोह उपजा उर तोरें । मिटिहि न बेगि कहें खग मोरें ॥
 चतुरानन पहि जाहु खगेसा । सोइ करेहु जेहि होइ निदेसा ॥

दो०—अस कहि चले देवरिषि करत राम गुन गान ।

हरि माया बल बरनत पुनि पुनि परम सुजान ॥ ५९ ॥

सुनि विराचरामाहिरि नावा । समुक्षि प्रताप प्रेम अति छावा ॥
मन महुँ करइ विचार विधाता । माया बस कबि कोविद ग्याता ॥
हरि माया कर अमिति प्रभावा । विपुल बार जेहिं मोहि नचावा ॥
अग जगमय जग मम उपराजा । नहिं आचरज मोह खगराजा ॥
तब बोले विधि गिरा सुहाई । जान महेस राम प्रभुताई ॥
बैनतेय संकर पहिं जाहू । तात अनत पूछहु जनि काहू ॥
तहँ होइहि तव संसय हानी । चलेउ बिहंग सुनत विधि बानी ॥
दो०—परमातुर बिहंगपति आयउ तब मो पास ।

जात रहेउँ कुबेर गृह रहिहु उमा कैलास ॥ ६० ॥

तेहिं मम पद सादर सिरु नावा । पुनि आपन संदेह सुनावा ॥
सुनि ता करि बिनती मृदु बानी । प्रेम सहित मैं कहेउँ भवानी ॥
मिलेहु गरुड़ मारग महुँ मोही । कवन भाँति समुझावौं तोही ॥
तबहिं होइ सब संसय भंगा । जब बहु काल करिअ सतसंगा ॥
सुनिअ तहाँ हरि कथा सुहाई । नाना भाँति मुनिन्ह जो गाई ॥
जेहि महुँ आदि मध्य अवसाना । प्रभु प्रतिपाद्य राम भगवाना ॥
नित हरि कथा होत जहँ भाई । पठवउँ तहाँ सुनहु तुम्ह जाई ॥
जाइहि सुनत सकल संदेहा । राम चरन होइहि अति नेहा ॥

दो०—बिनु सतसंग न हरि कथा तेहि बिनु मोह न भाग ।

मोह गएँ बिनु राम पद होइ न दृढ़ अनुराग ॥ ६१ ॥

मिलहिं न रघुपति बिनु अनुरागा । किएँ जोग तप ग्यान विरागा ॥

उत्तर दिसि सुदर गिरि नीला । तह रह काकभुसुडि सुसीला ॥
 राम भगति पथ परम प्रवीना । ग्यानी गुन गृह बहु कालीना ॥
 राम कथा सो कहइ निरंतर । सादर सुनहिं बिबिध बिहंगबर ॥
 जाइ सुनहु तहँ हरि गुन भूरी । होइहि मोह जनित दुख दूरी ॥
 मैं जब तेहि सब कहा बुझाई । चलेउ हरषि मम पद सिरु नाई ॥
 ताते उमा न मैं समुझावा । रघुपति कृपाँ सरसु मैं पावा ॥
 होइहि कीन्ह कबहुँ अभिमाना । सो खोवै चह कृपानिधाना ॥
 कछु तेहि ते पुनि मैं नहिं राखा । समुझइ खग खगही कै भाषा ॥
 प्रभु माया बलवंत भवानी । जाहि न मोह कवन अस ग्यानी ॥
 दो०—ग्यानी भगत सिरोमनि त्रिभुवनपति कर जान ।

ताहि मोह माया नर पावँर करहिं गुमान ॥६२(क)॥

मासपारायण, अट्ठाईसवाँ विश्राम

सिव बिरंचि कहूँ मोहइ को है बपुरा आन ।

अस जियँ जानि भजहिं सुनि माया पति भगवान् ॥६२(ख)॥

गयउ गरुड़ जहँ बसइ भुसुंडा । मति अकुंठ हरि भगति अखंडा ॥
 देखि सैल प्रसन्न मन भयऊ । माया मोह सोच सब गयऊ ॥
 करि तड़ाग मजन जलपाना । बट तर गयउ हृदयँ हरषाना ॥
 बृद्ध बृद्ध बिहंग तहँ आए । सुनै राम के चरित सुहाए ॥
 कथा अरंभ करै सोइ चाहा । तेही समय गयउ खगनाहा ॥

अति आदर खगपति करि कीर्ति धूप वस्त्र वाता पूछि पुष्पाखर दीन्हा ॥
करि पूजा समेत अनुरागा । मधुर बचन तब बोले उ कागा ॥
दो०—नाथ कृतारथ भयउँ मैं तब दरसन खगराज ।

आयसु देहु सो करौँ अब प्रभु आयहु केहि काज ॥ ६३ (क) ॥

सदा कृतारथ रूप तुम्ह कह मृदु बचन खगेस ।

जेहि कै अस्तुति सादर निज मुख कीन्हि महेस ॥ ६३ (ख) ॥

सुनहु तात जेहि कारन आयउँ । सो सब भयउ दरस तब पायउँ ॥
देखि परम पावन तब आश्रम । गयउ मोह संसय नाना भ्रम ॥
अब श्रीराम कथा अति पावनि । सदा सुखद दुख पुंज नसावनि
सादर तात सुनावहु मोही । बार बार विनवउँ प्रभु तोही ॥
सुनत गरुड़ कै गिरा विनीता । सरल सुप्रेम सुखद सुपुनीता ॥
भयउ तासु मन परम उछाहा । लाग कहै रघुपति गुन गाहा ॥
प्रथमहि अति अनुराग भवानी । रामचरित सर कहेसि बखानी ॥
पुनि नारद कर मोह अपारा । कहेसि बहुरि रावन अवतारा ॥
प्रभु अवतार कथा पुनि गाई । तब सिसुचरित कहेसि मन लाई
दो०—बालचरित कहि बिबिधि बिधि मन महँ परम उछाह ।

रिषि आगवन कहेसि पुनि श्रीरघुबीर बिबाह ॥ ६४ ॥

बहुरि राम अभिषेक प्रसंगा । पुनि नृप बचन राज रस भंगा ॥
पुरवासिन्ह कर विरह बिषादा । कहेसि राम लछिमन संवादा ॥
बिपिन गवन केवट अनुरागा । सुरसरि उतरि निवास प्रयागा ॥

वालमीक प्रभु मिलन देखानी । चित्रकूट जिम बस भगवाना ॥
 सचिवागवन नगर नृप मरना । भरतागवन प्रेम बहु बरना ॥
 करि नृप क्रिया संग पुरवासी । भरत गए जहँ प्रभु सुख रासी ॥
 पुनिरघुपति बहु विधि समुझाए । लै पादुका अवधपुर आए ॥
 भरत रहनि सुरपति सुत करनी । प्रभु अरु अत्रि भेंट पुनि बरनी ॥
 दो०—कहि बिराध बध जेहि विधि देह तजी सरभंग ।

बरनि सुतीछन प्रीति पुनि प्रभु अगस्ति सतसंग ॥६५॥

कहि दंडक बन पावनताई । गीध मइत्री पुनि तेहिं गाई ॥
 पुनि प्रभु पंचवटीं कृत बासा । भंजी सकल मुनिन्ह की त्रासा ॥
 पुनि लछिमन उपदेस अनूपा । सूपनखा जिमि कीन्हि कुरूपा ॥
 खर दूषन बध बहुरि बखाना । जिमि सब मरमु दसानन जाना ॥
 दसकंधर मारीच बतकही । जेहि विधि भई सो सब तेहिं कही ॥
 पुनि माया सीता कर हरना । श्रीरघुबीर विरह कछु बरना ॥
 पुनि प्रभु गीध क्रिया जिमि कीन्हि । बधि कबंध सबरिहि गति दीन्हि
 बहुरि विरह बरनत रघुवीरा । जेहि विधि गए सरोबर तीरा ॥

दो०—प्रभु नारद संबाद कहि माहति मिलन प्रसंग ।

पुनि सुग्रीव मितार्ह बालि प्रान कर भंग ॥६६(क)॥

कपिहि तिलक करि प्रभु कृत सैल प्रवरषन बास ।

बरनन वर्षा सरद अरु राम रोष कपि त्रास ॥६६(ख)॥

जेहि विधि कपिपति कीस मढ़ाए । सीता खोज सकल विधि याए ॥

बिबर प्रवेश कीन्ह जेहि भाँती । कपिन्ह बहोरि मिला संपाती ॥
 सुनि सब कथा समीरकुमारा । नाघत भयउ पयोधि अपारा ॥
 लंकाँ कपि प्रवेश जिमि कीन्हा । पुनि सीतहि धीरजु जिमि दीन्हा
 बन उजारि रावनहि प्रयोधी । पुर दहि नाघेउ बहुरि पयोधी ॥
 आए कपि सब जहँ रघुराई । बैदेही की कुसल सुनाई ॥
 सेन समेति जथा रघुवीरा । उतरे जाइ बारिनिधि तीरा ॥
 मिला विभीषन जेहि विधि आई । सागर निग्रह कथा सुनाई ॥

दो०—सेतु बाँधि कपि सेन जिमि उत्तरी सागर पार ।

गयउ बसीठी बीरवर जेहि विधि बालिकुमार ॥६७(क)॥

निसिचर कीस लराई बरनिसि बिबिधि प्रकार ।

कुंभकरन घननाद कर बल पौरुष संघार ॥६७(ख)॥

निसिचर निकर मरन विधि नाना । रघुपति रावन समर बखाना ॥
 रावन बध मंदोदरि सोका । राज विभीषन देव असोका ॥
 सीता रघुपति मिलन बहोरी । सुरन्ह कीन्हि अस्तुति कर जोरी
 पुनि पुष्पक चढ़ि कपिन्ह समेता । अवध चले प्रभु कृपा निकेता ॥
 जेहि विधि राम नगर निज आए । बायस त्रिसद चरित सब गाए ॥
 कहेसि बहोरि राम अभिषेका । पुर बरनत नृपनीति अनेका ॥
 कथा समस्त भुसुंड बखानी । जो मै तुम्ह सन कही भवानी ॥
 सुनि सब राम कथा खगनाहा । कहत बचन मन परम उछाहा ॥

सो०—गयउ मोर संदेह सुनेउँ सकल रघुपति चरित ।

भयउ राम षट् नेह तव प्रसाद बायस तिलक ॥६८(क)॥

मोहि भयउ अतिमोह ग्रसु बंधन रन महुँ निरखि ।

चिदानंद संदोह राम बिकल कारन कवन ॥६८(ख)॥

देखि चरित अति नर अनुसारी । भयउ हृदयँ मम संसय भारी ॥
 सोइ भ्रम अग्र हित करि मै माना । कीन्ह अनुग्रह कृपानिधाना ॥
 जो अति आतप व्याकुल होई । तरु छाया सुख जानइ सोई ॥
 जौ नहिं होत मोह अति मोही । मिलतेउँ तात कवन विधि तोही ॥
 सुनतेउँ किमि हरि कथा सुहाई । अति विचित्र बहु विधि तुम्ह गाई ॥
 निगमागम पुरान मत एहा । कहहिं सिद्ध मुनि नहिं संदेहा ॥
 संत विमुद्ध मिलहिं परि तेही । चितवहिं राम कृपा करि जेही ॥
 राम कृपाँ तव दरसन भयऊ । तव प्रसाद सब संसय गयऊ ॥

दो०—सुनि बिहंगपति बानी सहित बिनय अनुराग ।

पुलक गात लोचन सजल मन हरषेउ अति काग ॥६९(क)॥

श्रोता सुमति सुसील सुचि कथा रसिक हरिदास ।

पाइ उमा अति गोप्यमपि सज्जन करहिं प्रकास ॥६९(ख)॥

बोलेउ काकमसुंड बहोरी । नभगनाथ पर प्रीति न थोरी ॥

सब विधि नाथ पूज्य तुम्ह मेरे । कृपापात्र रघुनायक केरे ॥

तुम्हहि न संसय मोह न माया । मो पर नाथ कीन्हि तुम्ह दाया ॥

तुम्ह निज मोह कही खग साई । सो नहि कछु आचरज गोसाई ॥
नारद भव बिरंचि सनकादी । जे मुनिनायक आतमबादी ॥
मोह न अंध कीन्ह केहि केही । को जग काम नचाव न जेही ॥
तृष्णा केहि न कीन्ह बौराहा । केहि कर हृदय क्रोध नहिं दाहा ॥

दो०—ग्यानी तापस सूर कबि कोबिद गुन आगार ।

केहि कै लोभ बिडंबना कीन्ह न एहि संसार ॥७०(क)॥

श्रीमद ब्रह्म न कीन्ह केहि प्रभुता बधिर न काहि ।

भृगलोचनि के नैन सर को अस लाग न जाहि ॥७०(ख)॥

गुन कृत सन्यपात नहिं केही । कोउ न मान मद तजेउ निबेही ॥
जोवन ज्वर केहि नहिं बलकावा । ममता केहि कर जस न नसावा ॥
मच्छर काहि कलंक न लावा । काहि न सोक समीर डोलावा ॥
चिंता साँपिनि को नहिं खाया । को जग जाहि न व्यापी माया ॥
कीट मनोरथ दारु सरीरा । जेहि न लाग धुन को अस धीरा ॥
सुत वित लोक ईषना तीनी । केहि कै मति इन्ह कृत न मलीनी ॥
यह सब माया कर परिवारा । प्रबल अमिति को बरनै पारा ॥
सिव चतुरानन जाहि डेराहीं । अपर जीव केहि लेखे माहीं ॥

दो०—व्यापि रहेउ संसार महुँ माया कटक प्रचंड ।

सेनापति कामादि भट दंभ कपट पाषंड ॥७१(क)॥

सो दासी रघुबीर कै समुझें मिथ्या सोपि ।

छूट न राम कृपा बिनु नाथ कहउँ पद रोपि ॥७१(ख)॥

जो माया सब जगहि नचावा । जासु चरित लखि काहुँ न पावा ॥
 सोइ प्रभु भूविलास खगराजा । नाच नटी इव सहित समाजा ॥
 सोइ सच्चिदानंद घन रामा । अज विग्यान रूप बल धामा ॥
 व्यापक व्याप्य अखंड अनंता । अखिल अमोघसक्ति भगवंता ॥
 अगुन अदभ्र गिरा गोतीता । सबदरसी अनवद्य अजीता ॥
 निर्मम निराकार निरमोहा । नित्य निरंजन सुख संदोहा ॥
 प्रकृति पार प्रभु सब उर बासी । ब्रह्म निरीह विरज अचिनासी ॥
 इहाँ मोह कर कारन नाहीं । रवि सन्मुख तम कबहुँ कि जाहीं ॥

दो०—भगत हेतु भगवान प्रभु राम धरेउ तनु भूप ।

किणु चरित पावन परम प्राकृत नर अनुरूप ॥७२(क)॥

जथा अनेक वेष धरि नृत्य करइ नट कोइ ।

सोइ सोइ भाव देखावइ आपुन होइ न सोइ ॥७२(ख)॥

असि रघुपति लीला उरगारी । दनुज विमोहनि जन सुखकारी ॥
 जेमति मलिन बिषयबस कामी । प्रभु पर मोह धरहिं इमि स्वामी ॥
 नयन दोष जा कहँ जब होई । पीत बरन ससि कहँ कह सोई ॥
 जब जेहि दिसि भ्रम होइ खगेसा । सो कह पच्छिम उयउ दिनेसा ॥
 नौकारूढ़ चलत जग देखा । अचल मोह बस आपुहि लेखा ॥
 बालक भ्रमहिं न भ्रमहिं गृहादी । कहहिं परस्पर मिथ्यावादी ॥
 हरि बिषइक अस मोह बिहंगा । सपनेहुँ नहिं अग्यान प्रसंगा ॥

मायाबस, मतिमंद, अभागी । कदौं जमनि कबहुनि जिलागी ॥

ते सठ हठ बस संसय करहीं । निज अग्यान राम पर धरहीं ॥

दो०—काम क्रोध मद लोभ रत गृहासक्त दुखरूप ।

ते किमि जानहिं रघुपतिहि मूढ़ परे तम कूप ॥७३(क)॥

निर्गुन रूप सुलभ अति सगुन जान नहिं कोइ ।

सुगम अगम नाना चरित सुनि सुनि मनभ्रम होइ ॥७३(ख)

सुनु खगेस रघुपति प्रभुताई । कहउँ जथामति कथा सुहाई ॥

जेहि विधि मोह भयउ प्रभु मोही । सोउ सब कथा सुनावउँ तोही ॥

राम कृपा भाजन तुम्ह ताता । हरि गुन प्रीति मोहि सुख दाता ॥

ताते नहिं कछु तुम्हहि दुरावउँ । परम रहस्य मनोहर गावउँ ॥

सुनहु राम कर सहज सुभाऊ । जन अभिमान न राखहिं काऊ ॥

संसृत मूल सूलप्रद नाना । सकल सोक दायक अभिमाना ॥

ताते करहिं कृपानिधि दूरी । सेवक पर ममता अति भूरी ॥

जिमि सिसु तन व्रन होइ गोसाई । मातु चिराव कठिन की नाई ॥

दो०—जदपि प्रथम दुख पावइ रोवइ बाल अधीर ।

व्याधि नास हित जननी गनति न सो सिसु पीर ॥७४(क)॥

तिमि रघुपति निज दास कर हरहिं मान हित लागि ।

तुलसिदास ऐसे प्रभुहि कस न भजहु भ्रम त्यागि ॥७४(ख)

राम कृपा आपनि जड़ताई । कहउँ खगेस सुनहु मन लाई ॥

जब जब राम मनुज तनु धरहीं । भक्त हेतु लीला बहु करहीं ॥

तब तब अवधपुरी मैं जाऊँ । बालचरित बिलोकि हरषाऊँ ॥

जन्म मेहोत्सव देखउ जाइ । बरष पाँच तह रहउ लोभाई ॥

इष्टदेव मम बालक रामा । सोभा बपुष कोटि सत कामा ॥

निज प्रभु बदन निहारि निहारी । लोचन सुफल करउँ उरगारी ॥

लघु बायस बपु धरि हरि संगी । देखउँ बालचरित बहुरंगा ॥

दो०—लरिकाई जहँ जहँ फिरहिँ तहँ तहँ संग उड़ाउँ ।

जूठनि परइ अजिर सहँ सौ उठाइ करि खाउँ ॥७५(क)॥

एक बार अतिसय सब चरित किए रघुबीर ।

सुमिरत प्रभुलीला सोइ पुलकित भयउ सरीर ॥७५(ख)॥

कहइ भुंढ सुनहु खगनायक । रामचरित सेवक सुखदायक ॥

नृप मंदिर सुंदर सब भाँती । खचित कनक मनि नाना जाती ॥

बरनि न जाइ रुचिर अँगनाई । जहँ खेलहिँ नित चारिउ भाई ॥

बालबिनोद करत रघुराई । विचरत अजिर जननि सुखदाई ॥

मरकत मृदुल कलेवर स्यामा । अंग अंग प्रति छवि बहु कामा ॥

नव राजीव अरुन मृदु चरना । पदज रुचिर नख ससि दुति हरना ॥

ललित अंक कुलिसादिक चारी । नूपुर चारु मधुर रवकारी ॥

चारु पुरट मनि रचित बनाई । कटि किंकिनि कल मुखर सुहाई ॥

दो०—रेखा त्रय सुंदर उदर नाभी रुचिर गँभीर ।

उर आयत भ्राजत विविधि बाल बिभूषन चीर ॥७६॥

अरुन पानि नख करज मनोहर । बाहु विसाल बिभूषन सुंदर ॥

कंध बाल केहरि दर ग्रीवा । चारुचिबुक आनन छवि सीवा ॥

कलबल बचन अधर अरुनारे । दुह दुइ दसन बिसद बर बारे ॥
ललित कपोल मनोहर नासा । सकल सुखद ससि कर सम हासा
नील कंज लोचन भव मोचन । भ्राजत भाल तिलक गौरोचन ॥
विकट भृकुटि सम श्रवन सुहाए । कुंचित कच मेचक छवि छाए ॥
पीत झीनि झगुली तन सोही । किलकनि चितवनि भावति मोही
रूप रासि नृप अजिर विहारी । नाचहिं निज प्रतिबिंब निहारी ॥
मोहि सन करहिं विविधि विधि क्रीड़ा । बरनत मोहि होति अति ब्रीड़ा
किलकत मोहि धरन जब धावहिं । चलउँ भागि तब पूष देखावहिं ॥

दो० - आवत निकट हँसहिं प्रभु भाजत रुदन कराहिं ।

जाउँ समीप गहन पद फिरि फिरि चितइ पराहिं ॥७७(क)॥

प्राकृत सिसु इव लीला देखि भयउ मोहि मोह ।

कवन चरित्र करत प्रभु चिदानंद संदोह ॥७७(ख)॥

एतना मन आनत खगराया । रघुपति प्रेरित व्यापी माया ॥
सो माया न दुखद मोहि काहीं । आन जीव इव संसृत नाहीं ॥
नाथ इहाँ कछु कारन आना । सुनहु सो सावधान हरिजाना ॥
ग्यान भखंड एक सीतावर । माया बस्य जीव सचराचर ॥
जौं सब कैं रह ग्यान एकरस । ईस्वर जीवहि भेद कहहु कस ॥
माया बस्य जीव अभिमानी । ईस बस्य माया गुनखानी ॥
परबस जीव स्वबस भगवंता । जीव अनेक एक श्रीकंता ॥
मुधा भेद जद्यपि कृत माया । विनु हरि जाइ न कोटि उपाया ॥

दो०—रामचंद्र के भजन बिनु जो चह पद निबान ।

ग्यानवंत अपि सो नर पसु बिनु पूँछ बिषान ॥७८(क)॥

राकापति षोड़स उअहिं तारागन समुदाइ ।

सकल गिरिन्ह दव लाइअ बिनु रबि राति न जाइ ॥७८(ख)॥

ऐसेहिं हरि बिनु भजन खगोसा । मिटइ न जीवन्ह केर कलेसा ॥

हरि सेवकहि न व्याप अबिद्या । प्रभु प्रेरित व्यापइ तेहि बिद्या ॥

ताते नास न होइ दास कर । भेद भगति बाढ़इ विहंगवर ॥

भ्रम तैं चकित राम मोहि देखा । बिहँसे सो सुनु चरित बिसेषा ॥

तेहि कौतुक कर मरमु न काहूँ । जाना अनुज न मातु पिताहूँ ॥

जानु पानि धाए मोहि धरना । स्यामल गात अरुन कर चरना ॥

तव मैं भागि चलेउँ उरगारी । राम गहन कहँ भुजा पसारी ॥

जिमि जिमि दूरि उड़ाउँ अकासा । तहँ भुज हरि देखउँ निज पासा ॥

दो०—ब्रह्मलोक लगि गयउँ मैं चितयउँ पाछ उड़ात ।

जुग अंगुल कर बीच सब राम भुजहि मोहि तात ॥७९(क)॥

सप्ताबरन भेद करि जहाँ लगें गति मोरि ।

गयउँ तहाँ प्रभु भुज निरखि ब्याकुल भयउँ बहोरि ॥७९(ख)॥

मूदेउँ नयन त्रसित जब भयऊँ । पुनि चितवत कोसलपुर गयऊँ ॥

मोहि विलोकि राम मुसुकाहीं । बिहँसत तुरत गयउँ मुख माहीं ॥

उदर माझ सुनु अंडज राया । देखेउँ बहु ब्रह्मांड निकाया ॥

अति बिचित्र तहँ लोक अनेका । रचना अधिक एक ते एका ॥

Vinay Avasthi Sahib Bhuvan Vani Trust Donations

कोटिन्ह चतुरानन गोरसा । अगनित उडगनर बिरजनीसा ॥

अगनित लोकपाल जम काला । अगनित भूधर भूमि बिसाला ॥

सागर सरि सर बिपिन अपारा । नाना भाँति सृष्टि बिस्तारा ॥

सुर मुनि सिद्ध नाग नर किंनर । चारि प्रकार जीव सचराचर ॥

दो०—जो नहिं देखा नहिं सुना जो मनहूँ न समाइ ।

सो सब अद्भुत देखेउँ बरनि कवनि विधि जाइ ॥८०(क)॥

एक एक ब्रह्मांड महुँ रहउँ बरष सत एक ।

एहि विधि देखत फिरउँ मैं अंड कटाह अनेक ॥८०(ख)॥

लोक लोक प्रति भिन्न विधाता । भिन्न विष्णु सिव मनु दिसित्राता

नर गंधर्व भूत बेताला । किंनर निसिचर पसु खग व्याला

देव दनुज गन नाना जाती । सकल जीव तहँ आनहि भाँती ॥

महिसरि सागर सर गिरि नाना । सब प्रपंच तहँ आनइ आना ॥

अंडकोस प्रति प्रति निज रूपा । देखेउँ जिनस अनेक अनूपा ॥

अवधपुरी प्रति भुवन निनारी । सरजू भिन्न भिन्न नर नारी ॥

दसरथ कौसल्या सुनु ताता । विविधरूप भरतादिक भ्राता ॥

प्रति ब्रह्मांड राम अवतारा । देखेउँ बालबिनोद अपारा ॥

दो०—भिन्न भिन्न मैं दीख सबु अति बिचित्र हरिजान ।

अगनित भुवन फिरेउँ प्रभु राम न देखेउँ आन ॥८१(क)॥

सोइ सिसुपन सोइ सोभा सोइ कृपाल रघुबीर ।

भुवन भुवन देखत फिरउँ प्रेरित मोह समीर ॥८१(ख)॥

भ्रमते मोहि प्रह्वडि अनि का । धीते मनहु कल्प सत एका ॥
 फिरत फिरत निज आश्रम आयउँ । तहँ पुनि रहि कछु काल गवाँयउँ ॥
 निज प्रभु जन्म अवध सुनि पायउँ । निर्भर प्रेम हरषि उठि धायउँ ॥
 देखउँ जन्म महोत्सव जाई । जेहि विधि प्रथम कहा मैं गाई ॥
 राम उदर देखेउँ जग नाना । देखत बनइ न जाइ बखाना ॥
 तहँ पुनि देखेउँ राम सुजाना । मायापति कृपाल भगवाना ॥
 करउँ विचार बहोरि बहोरी । मोह कलिल व्यापित मति मोरी ॥
 उभय घरी महँ मैं सब देखा । भयउँ भ्रमित मन मोह विसेषा ॥

दो०—देखि कृपाल बिकल मोहि बिहँसे तब रघुबीर ।

बिहँसतहीं मुख बाहेर आयउँ सुनु मतिधीर ॥८२(क)॥

सोइ लरिकाई मो सन करन लगे पुनि राम ।

कोटि भाँति समुझावउँ मनु न लहइ विश्राम ॥८२(ख)॥

देखि चरित यह सो प्रभुताई । समुझत देह दसा विसराई ॥
 धरनि परेउँ मुख आव न बाता । त्राहि त्राहि आरत जन त्राता ॥
 प्रेमाकुल प्रभु मोहि बिलोकी । निज माया प्रभुता तब रोकी ॥
 कर सरोज प्रभु मम सिर धरेऊ । दीनदयाल सकल दुख हरेऊ ॥
 कीन्ह राम मोहि बिगत बिमोहा । सेवक सुखद कृपा संदोहा ॥
 प्रभुता प्रथम विचारि विचारी । मन महँ होइ हरष अति भारी ॥
 भगत बछलता प्रभु कै देखी । उपजी मम उर प्रीति विसेषी ॥
 सजल नयन पुलकित कर जोरी । कीन्हिउँ बहु विधि विनय बहोरी ॥

Vinay Ayasthi Sahib Bhuvan Vani Trust Donations

दो०-मुनि सप्रम मम बानी देखि दीन निज दास ।

बचन सुखद गंभीर मृदु बोले रमानिवास ॥८३(क)॥

काकभसुंडि मागु बर अति प्रसन्न मोहि जानि ।

अनिमादिक सिद्धि अपर रिधि मोच्छ सकल सुख खानि ८३(ख)

ग्यान विवेक बिरति विग्याना । मुनि दुर्लभ गुन जे जग नाना ॥

आजु देउँ सब संसय नाहीं । मागु जो तोहि भाव मन मोहीं ॥

मुनि प्रभु बचन अधिक अनुरागेउँ । मन अनुमान करन तब लागेउँ

प्रभु कह देन सकल सुख सही । भगति आपनी देन न कही ॥

भगति हीन गुन सब सुख ऐसे । लवन बिना बहु बिंजन जैसे ॥

भजन हीन सुख कवने काजा । अस बिचारि बोलेउँ खगराजा ॥

जौँ प्रभु होइ प्रसन्न बर देहू । मो पर करहु कृपा अरु नेहू ॥

मन भावत बर मागुँ स्वामी । तुम्ह उदार उर अंतरजामी ॥

दो०-अबिरल भगति बिसुद्ध तव श्रुति पुरान जो गाव ।

जेहि खोजत जोगीस मुनि प्रभु प्रसाद कोउ पाव ॥८४(क)॥

भगत कल्पतरु प्रनत हित कृपा सिंधु सुख धाम ।

सोइ निज भगति मोहि प्रभु देहु दया करि राम ॥८४(ख)॥

एवमस्तु कहि रघुकुलनायक । बोले बचन परम सुखदायक ॥

मुनु बायस तैं सहज सयाना । काहे न मागसि अस बरदाना ॥

सब सुख खानि भगति तैं मागी । नहिं जग कोउ तोहि सम बड़भागी

जो मुनि कोटि जतन नहिं लहहीं । जे जप जोग अनल जतन दहहीं ॥

रीझेउँ देखि तारि चतुराई । मगहु भगति मोहि अति भाई ॥
 सुनु बिहंग प्रसाद अब मोरें । सब सुभ गुन बसिहहिं उर तोरें ॥
 भगति ग्यान विग्यान विरागा । जोग चरित्र रहस्य विभागा ॥
 जानव तैं सब ही कर भेदा । मम प्रसाद नहिं साधन खेदा ॥

दो०—माया संभव भ्रम सब अब न व्यापिहहिं तोहि ।

जानेसु ब्रह्म अनादि अज अगुन गुनाकर मोहि ॥८५(क)॥

मोहि भगत प्रिय संतत अस बिचारि सुनु काग ।

कायँ बचन मन मम पद करेसु अचल अनुराग ॥८५(ख)॥

अब सुनु परम विमल मम बानी । सत्य सुगम निगमादि बखानी ॥
 निज सिद्धांत सुनावउँ तोही । सुनु मन धरु सब तजि भजु मोही ॥
 मम माया संभव संसारा । जीव चराचर विविधि प्रकारा ॥
 सब मम प्रिय सब मम उपजाए । सब ते अधिक मनुज मोहि भाए ॥
 तिन्ह महुँ द्विज द्विज महुँ श्रुतिधारी । तिन्ह महुँ निगम धरम अनुसारी ॥
 तिन्ह महुँ प्रिय बिरक्त पुनि ग्यानी । ग्यानिहु ते अति प्रिय विग्यानी ॥
 तिन्ह ते पुनि मोहि प्रिय निज दासा । जेहि गति मोरि न दूसरि आसा ॥
 पुनि पुनि सत्य कहउँ तोहि पाहीं । मोहि सेवक सम प्रिय कोउ नाहीं ॥
 भगति हीन बिरंचि किन होई । सब जीवहु सम प्रिय मोहि सोई ॥
 भगतिवंत अति नीचउ प्राणी । मोहि प्रान प्रिय असि मम बानी ॥

दो०—सुचि सुसील सेवक सुमति प्रिय कहु काहि न लाग ।

भक्ति पुराण कह तोलि असि सावधान सुनु काग ॥८६॥

एक पिता के बिपुल कुमारा । होहिं पृथक गुन सील अचारा ॥
 कोउ पंडित कोउ तापस ग्याता । कोउ धनवंत सूर कोउ दाता ॥
 कोउ सर्वग्य धर्म रत कोई । सब परपितहि प्रीति सम होई ॥
 कोउ पितु भगत बचन मन कर्मा । सपनेहुँ जान न दूसर धर्मा ॥
 सो सुत प्रिय पितु प्रान समाना । जद्यपि सो सब भाँति अयाना ॥
 एहि विधि जीव चराचर जेते । त्रिजग देव नर असुर समेते ॥
 अखिल बिस्व यह मोर उपाया । सब पर मोहि बराबरि दाया ॥
 तिन्ह महुँ जो परिहरि मद माया । भजै मोहि मन बच अरु काया ॥

दो०—पुरुष नपुंसक नारि वा जीव चराचर कोइ ।

सर्व भाव भज कपट तजि मोहि परम प्रिय सोइ ॥८७(क)॥

सो०—सत्य कहउँ खग तोहि सुचि सेवक मम प्रानप्रिय ।

अस बिचारि भजु मोहि परिहरि आस भरोस सब ॥८७(ख)॥

कबहुँ काल न व्यापिहि तोही । सुमिरेसु भजेसु निरंतर मोही ॥
 प्रभु बचनामृत सुनि न अघाऊँ । तनु पुलकित मन अति हरषाऊँ ॥
 सो सुख जानइ मन अरु काना । नहिं रसना पहिं जाइ बखाना ॥
 प्रभु सोभा सुख जानहिं नयना । कहि किमि सकहिं तिन्हहि नहिं बयना ॥
 बहु विधि मोहि प्रबोधि सुख देई । लगे करन सिसु कौतुक तेई ॥
 सजल नयन कछु मुख करि रूखा । चितइ मातु लागी अति भूखा ॥
 देखि मातु आतुर उठि धाई । कहि मृदु बचन लिए उर लाई ॥
 गोद राखि कराव पय पाना । रघुपति चरित ललित कर गाना ॥

सो०—जेहि सुख लागि पुरारि असुभ बेष कृत सिव सुखद ।

अवधपुरी नर नारि तेहि सुख महुँ संतत मगन ॥८८(क)॥

सोई सुख लवलेस जिन्ह बारक सपनेहुँ लहेउ ।

ते नहिं गनहिं खगेस ब्रह्मसुखहि सजन सुमति ॥८८(ख)॥

मैं पुनि अवध रहेउँ कलु काला । देखेउँ बालबिनोद रसाला ॥

राम प्रसाद भगति बर पायउँ । प्रभु पद बंदि निजाश्रम आयउँ ॥

तब ते मोहि न ब्यापी माया । जब ते रघुनायक अपनाया ॥

यह सब गुप्त चरित मैं गावा । हरि मायाँ जिमि मोहि नचावा ॥

निज अनुभव अब कहउँ खगेसा । बिनु हरि भजन न जाहिं कलेसा ॥

राम कृपा बिनु सुनु खगराई । जानि न जाइ राम प्रभुताई ॥

जानैं बिनु न होइ परतीती । बिनु परतीति होइ नहिं प्रीती ॥

प्रीति बिना नहिं भगति दिढ़ाई । जिमि खगपति जल कै चिकनाई

सो०—बिनु गुर होइ कि ग्यान ग्यान कि होइ बिराग बिनु ।

गावहिं बेद पुरान सुख कि लहिअ हरि भगति बिनु ॥८९(क)॥

कोउ बिश्राम कि पाव तात सहज संतोष बिनु ।

चलै कि जल बिनु नाव कोटि जतन पचि पचि मरिअ ॥८९(ख)॥

बिनु संतोष न काम नसाहीं । काम अछत सुख सपनेहुँ नाहीं ॥

राम भजन बिनु मिटहिं कि कामा । थल बिहीन तरु कवहुँ कि जामा

बिनु बिग्यान कि समता आवइ । कोउ अवकास कि नभ बिनु पावइ

विनु तप तेज कि कर बिस्तारा । जल बिनु रस कि होइ संसारा ॥
सील कि मिल बिनु बुध सेवकाई । जिमि बिनु तेज न रूप गोसाँई ॥
निज सुख बिनु मन होइ कि थीरा । परस कि होइ बिहीन समीरा ॥
कवनिउ सिद्धि कि बिनु बिस्वासा । बिनु हरि भजन न भव भय नासा
दो०—बिनु बिस्वास भगति नहिं तेहि बिनु द्रवहिं न रामु ।

राम कृपा बिनु सपनेहुँ जीव न लह बिश्रामु ॥९०(क)॥
सो०—अस बिचारि मतिधीर तजि कुतर्क संसय सकल ।

भजहु राम रघुबीर करुनाकर सुंदर सुखद ॥९०(ख)॥

निज मति सरिस नाथ मैं गाई । प्रभु प्रताप महिमा खगराई ॥
कहेउँ न कछु करि जुगुति बिसेषी । यह सब मैं निज नयनन्हि देखी
महिमा नाम रूप गुन गाथा । सकल अमित अनंत रघुनाथा ॥
निज निज मति मुनि हरि गुन गावहिं । निगम सेष सिव पार न पावहिं
तुम्हहि आदि खग मसक प्रजंता । नभ उड़ाहिं नहिं पावहिं अंता ॥
तिमि रघुपति महिमा अवगाहा । तात कबहुँ कोउ पाव कि थाहा
रामु काम सत कोटि सुभग तन । दुर्गा कोटि अमित अरि मर्दन ॥
सक्र कोटि सत सरिस बिलासा । नभ सत कोटि अमित अवकासा

दो०—मरुत कोटि सत बिपुल बल रवि सत कोटि प्रकास ।

ससि सत कोटि सुसीतल समन सकल भव त्रास ॥९१(क)॥

काल कोटि सत सरिस अति दुस्तर दुर्गं दुरंत ।

धूमकेतु सत कोटि सम दुराधरष भगवंत ॥९१(ख)॥

प्रभु अगाध सत कोटि पताला । समन कोटि सत सारस कराला ॥
 तीरथ अमित कोटि सम पावन । नाम अखिल अघ पूग नसावन ॥
 हिमगिरि कोटि अचल रघुवीरा । सिंधु कोटि सत सम गंभीरा ॥
 कामधेनु सत कोटि समाना । सकल काम दायक भगवाना ॥
 सारद कोटि अमित चतुराई । विधि सत कोटि सृष्टि निपुनाई ॥
 बिष्णु कोटि सम पालन कर्ता । रुद्र कोटि सत सम संहर्ता ॥
 धनद कोटि सत सम धनवाना । माया कोटि प्रपंच निधाना ॥
 भार धरन सत कोटि अहीसा । निरवधि निरुपम प्रभु जगदीसा ॥

छं०—निरुपम न उपमा आन राम समान रामु निगम कहै ।

जिमि कोटि सत खद्योत सम रबि कहत अति लघुता लहै ॥

एहि भाँति निज निज मति बिलास मुनीस हरिहि बखानहीं ।

प्रभु भाव गाहक अति कृपाल सप्रेम सुनि सुख मानहीं ॥

दो०—रामु अमित गुन सागर थाह कि पावइ कोइ ।

संतन्ह सन जस किछु सुनेउँ तुम्हहि सुनायउँ सोइ ॥९२(क)॥

सो०—भाव बस्य भगवान सुख निधान करुना भवन ।

तजि ममता मद मान भजिअ सदा सीता रवन ॥९२(ख)॥

सुनि भुसुंड़ि के वचन सुहाए । हरषित खगपति पंख फुलाए ॥

नयन नीर मन अति हरषाना । श्रीरघुपति प्रताप उर आना ॥

पाछिल मोह समुझि पछिताना । ब्रह्म अनादि मनुज करि माना ॥

पुनि पुनि काम चरन सिरु नाजा । जानि राम सम प्रेम बढ़ावा ॥

Vinay Avasthi Sahib Bhuvan Vani Trust Donations

गुर बिनु भव निधि तरई न कोई । जी विराचि सँकर सम होई ॥
संसय सर्प ग्रसेउ मोहि ताता । दुखद लहरि कुतर्क बहु ब्राता ॥
तव सरूप गारुड़ि रघुनायक । मोहि जिआयउ जन सुखदायक
तव प्रसाद मम मोह नसाना । राम रहस्य अनूपम जाना ॥
दो०—ताहि प्रसंसि बिबिधि विधि सीस नाइ कर जोरि ।

बचन बिनीत सप्रेम मृदु बोलेउ गरुड़ बहोरि ॥९३(क)॥

प्रभु अपने अविबेक ते बूझउँ स्वामी तोहि ।

कृपासिंधु सादर कहहु जानि दास निज मोहि ॥९३(ख)॥

तुम्ह सर्वग्य तग्य तम पारा । सुमति सुसील सरल आचारा ॥
ग्यान विरति विग्यान निवासा । रघुनायक के तुम्ह प्रिय दासा ॥
कारन कवन देह यह पाई । तातसकल मोहि कहहु बुझाई ॥
राम चरित सर सुंदर स्वामी । पायहु कहाँ कहहु नभगामी ॥
नाथ सुना मैं अस सिव पाहीं । महा प्रलयहुँ नास तव नाहीं ॥
मुधा बचन नहिं ईस्वर कहई । सोउ मोरें मन संसय अहई ॥
अग जग जीव नाग नर देवा । नाथ सकल जगु काल कलेवा ॥
अंड कटाह अमित लय कारी । कालु सदा दुरतिक्रम भारी ॥

सो०—तुम्हहि न ब्यापत काल अतिकराल कारन कवन ।

मोहि सो कहहु कृपाल ग्यान प्रभाव कि जोग बल ॥९४(क)॥

दो०—प्रभु तव आश्रम आएँ मोर मोह भ्रम भाग ।

कारन कवन सो नाथ सब कहहु सहित अनुराग ॥९४(ख)॥

Vinay Avasthi Sahib Bhuwan Vani Trust Donations
 गरुड़ गिरा सुनि हरष उ कागी । बाल उ उमा परम अनुरागा ॥
 धन्य धन्य तव मति उरगारी । प्रसन्न तुम्हारि मोहि अति प्यारी ॥
 सुनि तव प्रसन्न सप्रेम सुहाई । बहुत जनम कै सुधि मोहि आई ॥
 सब निज कथा कहउँ मैं गाई । तात सुनहु सादर मन लाई ॥
 जप तप मख सम दम व्रत दाना । बिरति बिबेक जोग विग्याना ॥
 सब कर फल रघुपति पद प्रेमा । तेहि बिनु कोउ न पावइ छेमा ॥
 एहिं तन राम भगति मैं पाई । ताते मोहि ममता अधिकाई ॥
 जेहि तें कछु निज स्वारथ होई । तेहि पर ममता कर सब कोई ॥

सो०—पद्मगारि असि नीति श्रुति संमत सज्जन कहहिं ।

अति नीचहु सन प्रीति करिअ जानि निज परम हित ॥९५(क)॥

पाट कीट तें होइ तेहि तें पाटंबर रुचिर ।

कृमि पालइ सबु कोइ परम अपावन प्राण सम ॥९५(ख)॥

स्वारथ साँच जीव कहूँ एहा । मन क्रम बचन राम पद नेहा ॥

सोइ पावन सोइ सुभग सरीरा । जो तनु पाइ भजिअ रघुबीरा ॥

राम बिमुख लहि बिधि सम देही । कबि कोविद न प्रसंसहिं तेही ॥

राम भगति एहिं तन उर जामी । ताते मोहि परम प्रिय स्वामी ॥

तजउँ न तन निज इच्छा मरना । तन बिनु बेद भजन नहिं बरना ॥

प्रथम मोहँ मोहि बहुत बिगोवा । राम बिमुख सुख कबहुँ न सोवा ॥

नाना जनम कर्म पुनि नाना । किए जोग जप तप मख दाना ॥

कमल जो निज नमोहँ नहँ नाहीं । मैं खगोल भूमि भूमि जग माहीं ॥
 CC-0. Mumukshu Bhawan Varanasi Collection. Digitized by eGangotri

देखेउँ करि सख करम गोशर्हि । सुखी नाम यहँ अवहिं की नाई ॥
सुधि मोहि नाथ जन्म बहु केरी । सिव प्रसाद मति मोहँ न घेरी ॥
दो०—प्रथम जन्म के चरित अब कहउँ सुनहु बिहगेस ।

सुनि प्रभु पद रति उपजइ जातें मिटहिं कलेस ॥९६(क)॥

पूरुब कल्प एक प्रभु जुग कलिजुग मल मूल ।

नर अरु नारि अधर्म रत सकल निगम प्रतिकूल ॥९६(ख)॥

तेहिं कलिजुग कोसलपुर जाई । जन्मत भयउँ सूद्र तनु पाई ॥
सिव सेवक मन क्रम अरु बानी । आन देव निंदक अभिमानी ॥
धन मद मत्त परम बाचाला । उग्रबुद्धि उर दंभ विसाला ॥
जदपिरहेउँ रघुपति रजधानी । तदपि न कछु महिमा तब जानी ॥
अब जाना मैं अवध प्रभावा । निगमागम पुरान अस गावा ॥
कवनेहुँ जन्म अवध बस जोई । राम परायन सो परि होई ॥
अवध प्रभाव जान तब प्रानी । जब उर बसहिं रामु धनुपानी ॥
सो कलिकाल कठिन उरगारी । पाप परायन सब नर नारी ॥

दो०—कलिमल ग्रसे धर्म सब लुप्त भए सदग्रंथ ।

दंभिन्ह निज मति कलिप करि प्रगट किए बहु पंथ ॥९७(क)॥

भए लोग सब मोहबस लोभ ग्रसे सुभ कर्म ।

सुनु हरिजान ग्यान निधि कहउँ कछुक कलिधर्म ॥९७(ख)॥

बरन धर्म नहिं आश्रम चारी । श्रुति विरोध रत सब नर नारी ॥
द्विज श्रुति बेचक भूप प्रजासन । कोउ नहिं मान निगम अनुसासन

मारग सोइ आचहुँ जोइ भागी । वांछित सौइ सोइ पावै ॥
 मिथ्यारंभ दंभ रत जोई । ता कहुँ संत कहइ सब कोई ॥
 सोइ सयान जो परधन हारी । जो कर दंभ सो बड़ आचारी ॥
 जो कह झूठ मसखरी जाना । कलिजुग सोइ गुनवंत बखाना ॥
 निराचार जो श्रुति पथ त्यागी । कलिजुग सोइ ग्यानी सो विरागी ॥
 जाकें नख अरु जटा विसाला । सोइ तापस प्रसिद्ध कलिकाला ॥

दो०—असुभ वेष भूषन धरें भच्छाभच्छ जे खाहिं ।

तेइ जोगी तेइ सिद्ध नर पूज्य ते कलिजुग माहिं ॥९८(क)॥

सो०—जे अपकारी चार तिन्ह कर गौरव मान्य तेइ ।

मन क्रम बचन लबार तेइ बकता कलिकाल महुँ ॥९८(ख)॥

नारि विवस नर सकल गोसाईं । नाचहिं नट मर्कट की नाईं ॥
 सूद्र द्विजन्ह उपदेसहिं ग्याना । मेलि जनेऊ लेहिं कुदाना ॥
 सब नर काम लोभ रत क्रोधी । देव विप्र श्रुति संत विरोधी ॥
 गुन मंदिर सुंदर पति त्यागी । भजहिं नारि पर पुरुष अभागी ॥
 सौभागिनीं विभूषन हीना । विधवन्ह के सिंगार नबीना ॥
 गुर सिष बधिर अंध का लेखा । एक न सुनइ एक नहिं देखा ॥
 हरइ सिष्य धन सोक न हरई । सो गुर घोर नरक महुँ परई ॥
 मातु पिता बालकन्हि बोलावहिं । उदर भरै सोइ धर्म सिखावहिं ॥

दो०—ब्रह्म ग्यान बिनु नारि नर कहहिं न दूसरि बात ।

कौडी लागि लोभ बस करहिं विप्र गुर घात ॥९९(क)॥

Vinay Avasthi Sahib Bhuvan Vani Trust Donations
बादहि सूद्र द्विजन्ह सन हम तुम्ह ते कछु घाटि ।

जानइ ब्रह्म सो बिप्रबर अँखि देखावहिं डाटि ॥९९(ख)॥

पर त्रिय लंपट कपट सयाने । मोह द्रोह ममता लपटाने ॥
तेइ अभेदवादी ग्यानी नर । देखा मैं चरित्र कलिजुग कर ॥
आपु गए अरु तिन्हहू घालहिं । जे कहूँ सत मारग प्रतिपालहिं ॥
कल्प कल्प भरि एक एक नरका । परहिं जे दूषहिं श्रुति करि तरका
जे वरनाधम तेलि कुम्हारा । स्वपच किरात कोल कलवारा ॥
नारि सुई गृह संपति नासी । मूड़ मुड़ाइ होहिं संन्यासी ॥
ते बिप्रन्ह सन आपु पुजावहिं । उभय लोक निज हाथ नसावहिं ॥
बिप्र निरच्छर लोलुप कामी । निराचार सठ वृषली स्वामी ॥
सूद्र करहिं जप तप व्रत नाना । बैठि बरासन कहहिं पुराना ॥
सब नर कल्पित करहिं अचारा । जाइ न बरनि अनीति अपारा ॥

दो०—भए बरन संकर कलि भिन्नसेतु सब लोग ।

करहिं पाप पावहिं दुख भय रुज सोक बियोग ॥१००(क)॥

श्रुति संमत हरि भक्ति पथ संजुत बिरति बिबेक ।

तेहिं न चलहिं नर मोह बस कल्पहिं पंथ अनेक ॥१००(ख)॥

छं०—बहु दाम सँवारहिं धाम जती । बिषया हरि लीन्हि न रहि बिरती
तपसी धनवंत दरिद्र गृही । कलि कौतुक तात न जात कही ॥
कुलवंति निकारहिं नारि सती । गृह आनहिं चेरि निबेरि गती ॥
सुत मानहिं मातु पिता तब लौं । अबलानन दीख, नहीं जब लौं

ससुरारि पिआरि लगी जब त । रिपु रूप कुटुब भए तब तें ॥
 नृप पाप परायन धर्म नहीं । करि दंड बिडंब प्रजा नितहीं ॥
 धनवंत कुलीन मलीन अपी । द्विज चिन्ह जनेउ उधार तपी ॥
 नहीं मान पुरान न बेदहि जो । हरि सेवक संत सही कलि सो ॥
 कबि वृंद उदार दुनी न सुनी । गुन दूषक व्रात न कोपि गुनी ॥
 कलि बारहि बार दुकाल परै । बिनु अन्न दुखी सब लोग मरै ॥

दो०—सुनु खगेस कलि कपट हठ दंभ द्वेष पाषंड ।

मान मोह मारादि मद व्यापि रहे ब्रह्मंड ॥१०१(क)॥

तामस धर्म करहि नर जप तप व्रत मख दान ।

देव न बरषहि धरनीं बए न जामहि धान ॥१०१(ख)॥

छं०—अबला कच भूषन भूरि लुधा । धनहीन दुखी ममता बहुधा
 सुख चाहहि मूढ़ न धर्म रता । मति थोरि कठोरि न कोमलता ॥१॥
 नर पीड़ित रोग न भोग कहीं । अभिमान बिरोध अकारनहीं ॥
 लघु जीवन संबतु पंच दसा । कलपांत न नास गुमानु असा ॥२॥
 कलिकाल बिहाल किए मनुजा । नहीं मानत कौ अनुजा तनुजा ॥
 नहीं तोष बिचार न सीतलता । सब जाति कुजाति भए मगता ॥३॥
 इरिषा परुषाच्छर लोलुपता । भरि पूरि रही समता बिगता ॥
 सब लोग बियोग बिसोक हए । बरनाश्रम धर्म अचार गए ॥४॥
 दम दान दया नहीं जानपनी । जड़ता परबंचनताति घनी ॥

दो०—सुनु ध्यालिहिर कलि कलि बल अवगुन प्रताप

गुनउ बहुत कलिजुग कर बिनु प्रयास निस्तार ॥१०२(क)॥

कृतजुग त्रेताँ द्वापर पूजा मख अरु जोग ।

जो गति होइ सो कलि हरि नाम ते पावहिं लोय ॥१०२(ख)॥

कृतजुग सब जोगी बिग्यानी । करि हरि ध्यान तरहिं भव प्रानी ॥

त्रेताँ विविध जग्य नर करहीं । प्रभुहि समर्पि कर्म भव तरहीं ॥

द्वापर करि रघुपति पद पूजा । नर भव तरहिं उपाय न दूजा ॥

कलिजुग केवल हरि गुन गाहा । गावत नर पावहिं भव थाहा ॥

कलिजुग जोग न जग्य न ग्याना । एक अधार राम गुन गाना ॥

सब भरोस तजि जो भज रामहि । प्रेम समेत गाव गुन ग्रामहि ॥

सोइ भव तर कछु संसय नाहीं । नाम प्रताप प्रगट कलि माहीं ॥

कलि कर एक पुनीत प्रतापा । मानस पुन्य होहिं नहिं पापा ॥

दो०—कलिजुग सम जुग आन नहिं जौं नर कर बिस्वास ।

गाइ राम गुन गन बिमल भव तर बिनिहिं प्रयास ॥१०३(क)॥

प्रगट चारि पद धर्म के कलि महुँ एक प्रधान ।

जेन केन बिधि दीन्हें दान करइ कल्याण ॥१०३(ख)॥

नित जुग धर्म होहिं सब केरे । हृदयँ राम माया के प्रेरे ॥

सुद्ध सत्व समता बिग्याना । कृत प्रभाव प्रसन्न मन जाना ॥

सत्व बहुत रज कछु रति कर्मा । सब बिधि सुख त्रेता कर धर्मा ॥

बहु रज स्वल्प सत्व कछु तामस । द्वापर धर्म हरष भय मानस ॥

Vinay Avasthi Sahib Bhuvan Vani Trust Donations

तामस बहुत रजोगुन थारा । काल प्रभाव विरोध चहु ओरा ॥
 बुध जुग धर्म जानि मन माहीं । तजि अधर्म रति धर्म कराहीं ॥
 काल धर्म नहिं व्यापहिं ताही । रघुपति चरन प्रीति अति जाही ॥
 नट कृत विकट कपट खगराया । नट सेवकहि न व्यापइ माया ॥

दो०—हरि माया कृत दोष गुन बिनु हरि भजन न जाहिं ।
 भजिअ राम तजि काम सब अस बिचारि मन माहिं ॥१०४(क)॥
 तेहिं कलिकाल बरष बहु बसेउँ अवध बिहगेस ।
 परेउ दुकाल बिपति बस तब मैं गयउँ बिदेस ॥१०४(ख)॥
 गयउँ उजेनी सुनु उरगारी । दीन मलीन दरिद्र दुखारी ॥
 गएँ काल कछु संपति पाई । तहँ पुनि करउँ संभु सेवकाई ॥
 बिप्र एक वैदिक सिव पूजा । करइ सदा तेहि काजु न दूजा ॥
 परम साधु परमारथ बिंदक । संभु उपासक नहिं हरि निंदक ॥
 तेहि सेवउँ मैं कपट समेता । द्विज दयाल अति नीति निकेता ॥
 बाहिज नम्र देखि मोहि साई । बिप्र पढ़ाव पुत्र की नाई ॥
 संभु मंत्र मोहि द्विजवर दीन्हा । सुभ उपदेस विविध विधि कीन्हा ॥
 जपउँ मंत्र सिव मंदिर जाई । हृदयँ दंभ अहमिति अधिकाई ॥
 दो०—मैं खल मल संकुल मति नीच जाति बस मोह ।
 हरि जन द्विज देखें जरउँ करउँ बिष्णु कर द्रोह ॥१०५(क)॥
 सो०—गुर नित मोहि प्रबोध दुखित देखि आचरन मम ।
 मोहि उपजइ अति क्रोध दंभिहि नीति कि भावई ॥१०५(ख)॥

Vinay Avasthi Sahib Bhuvan Vani Trust Donations

एक बार गुर लीन्ह बोलाई । मोहि नीति बहु भाति सिखाई ॥
 सिव सेवा कर फल सुत सोई । अबिरल भगति रामपद होई ॥
 रामहि भजहिं तात सिव धाता । नर पावँर कै केतिक बाता ॥
 जासु चरन अज सिव अनुरागी । तासु द्रोहँ सुख चहसि अभागी ॥
 हर कहँ हारि सेवक गुर कहेऊ । सुनि खगनाथ हृदय मम दहेऊ ॥
 अधम जाति मैं बिद्या पाएँ । भयउँ जथा अहि दूध पिआएँ ॥
 मानी कुटिल कुभाग्य कुजाती । गुर कर द्रोह करउँ दिनु राती ॥
 अति दयाल गुर स्वल्प न क्रोधा । पुनि पुनि मोहि सिखाव सुबोधा ॥
 जेहि ते नीच बड़ाई पावा । सो प्रथमहिं हति ताहि नसावा ॥
 धूम अनल संभव सुनु भाई । तेहि बुझाव घन पदवी पाई ॥
 रज मग परी निरादर रहई । सब कर पद प्रहार नित सहई ॥
 मरुत उड़ाव प्रथम तेहि भरई । पुनि नृप नयन किरीटन्हि परई ॥
 सुनु खगपति अस समुझि प्रसंगा । बुध नहिं करहिं अधम कर संगा
 कवि कोविद गावहिं असि नीती । खल सन कलह न भल नहिं प्रीती
 उदासीन नित रहिअ गोसाईं । खल परिहरिअ स्वान की नाई ॥
 मैं खल हृदयँ कपट कुटिलाई । गुर हित कहइ न मोहि सोहाई ॥

दो०—एक बार हरमंदिर जपत रहेउँ सिव नाम ।

गुर आयउ अभिमान तें उठि नहिं कीन्ह प्रनाम ॥ १०६ (क) ॥

सो दयाल नहिं कहेउ कछु उर न रोष लवलेस ।

अति भघ गुर अपमानता सहि नहिं सके महेस ॥ १०६ (ख) ॥

मंदिर माझ भई नभवाना । र हतभाग्य अग्य अभिमानी ॥
 जद्यपि तव गुर कें नहिं क्रोधा । अति कृपाल चित सम्यक बोधा ॥
 तदपि साप सठ दैहउँ तोही । नीति विरोध सोहाइ न मोही ॥
 जौं नहिं दंड करौं खल तोरा । भ्रष्ट होइ श्रुतिमारग मोरा ॥
 जे सठ गुर सन इरिषा करहीं । रौरव नरक कोटि जुग परहीं ॥
 त्रिजग जोनि पुनि धरहिं सरीरा । अयुतै जन्म भरि पावहिं पीरा ॥
 बैठ रहेसि अजगर इव पापी । सर्प होहि खल मल मति व्यापी ॥
 महा बिटप कोटर महुँ जाई । रहु अधमाधम अधगति पाई ॥

दो०—हाहाकार कीन्ह गुर दारुन सुनि सिव साप ।

कंपित मोहि बिलोकि अति उर उपजा परिताप ॥ १०७ (क) ॥

करि दंडवत सप्रेम द्विज सिव सन्मुख कर जोरि ।

बिनय करत गदगद स्वर समुझि घोर गति मोरि ॥ १०७ (ख) ॥

नमामीशमीशान निर्वाणरूपं । विभुं व्यापकं ब्रह्म वेदस्वरूपं ॥

निजं निर्गुणं निर्विकल्पं निरीहं । चिदाकाशमाकाशवासं भजेऽहं ॥

निराकारमोंकारमूलं तुरीयं । गिरा ज्ञान गोतीतमीशं गिरीशं ॥

करालं महाकाल कालं कृपालं । गुणागार संसारपारं नतोऽहं ॥

तुषाराद्रि संकाश गौरं गभीरं । मनोभूत कोटि प्रभा श्रीशरीरं ॥

स्फुरन्मौलि कलोलिनी चारु गंगा । लसद्भालबालेंदु कंठे भुजंगा ॥

चलकुंडलं भ्रू सुनेत्रं विशालं । प्रसन्नाननं नीलकंठं दयालं ॥

Vinay Avasthi Sahib, Bhuvan Vapi Trust Donations

प्रचंडं प्रकृष्टं प्रगल्भं परेशं । अखंडं अजं भानुकाटिप्रकाशं ॥
 त्रयः शूलनिर्मूलनं शूलपाणिं । भजेऽहं भवानीपतिं भावगम्यं ॥
 कलातीतकल्याणकल्पांतकारी । सदा सज्जनानंददाता पुरारी ॥
 चिदानंदसंदोहमोहापहारी । प्रसीद प्रसीद प्रभो मन्मथारी ॥
 न यावद् उमानाथमादारविंदं । भजंतीह लोके परे वा नराणां ॥
 न तावत्सुखं शान्तिं संतापनाशं । प्रसीद प्रभो सर्वभूताधिवासं ॥
 न जानामि योगं जपं नैव पूजां । नतोऽहं सदा सर्वदा शंभुतुभ्यं ॥
 जराजन्मदुःखौघतातप्यमानं । प्रभो पाहि आपन्नमामीशशंभो ॥
 श्लोक—रुद्राष्टकमिदं प्रोक्तं विप्रेण हरतोषये ।

ये पठन्ति नरा भक्त्या तेषां शंभुः प्रसीदति ॥ ९ ॥

दो०—सुनि विनती सर्वग्यसिव देखि बिप्र अनुरागु ।

पुनि मंदिर नभबानी भइ द्विजबर बर मागु ॥१०८(क)॥

जौं प्रसन्न प्रभु मो पर नाथ दीन पर नेहु

निज पद भगति देइ प्रभु पुनि दूसर बर देहु ॥१०८(ख)॥

तव माया बस जीव जड़ संतत फिरइ भुलान ।

तेहि पर क्रोध न करिअ प्रभु कृपासिंधु भगवान ॥१०८(ग)॥

संकर दीनदयाल अब एहि पर होहु कृपाल ।

साप अनुग्रह होइ जेहिं नाथ थोरेहीं काल ॥१०८(घ)॥

एहि कर होइ परम कल्याणा । सोइ करहु अब कृपानिधाना ॥

बिप्र गिरा सुनि परहित सानी । एवमस्तु इति भइ नभबानी ॥

जदपि कोन्ह एहि दारुन पापा । मे पुनि दोन्ह कोप करि सापा ॥
 तदपि तुम्हारि साधुता देखी । करिहउँ एहि पर कृपा बिसेषी ॥
 छमासील जे पर उपकारी । ते द्विज मोहि प्रिय जथा खरारी ॥
 मोर श्राप द्विज व्यर्थ न जाइहि । जन्म सहस अवस्य यह पाइहि ॥
 जनमत मरत दुसह दुख होई । एहि स्वल्पउ नहिं व्यापिहि सोई ॥
 कवनेउँ जन्म मिटिहि नहिं ग्याना । सुनहि सूद्र मम बचन प्रवाना ॥
 रघुपति पुरीं जन्म तव भयऊ । पुनि तैं मम सेवाँ मन दयऊ ॥
 पुरी प्रभाव अनुग्रह मोरें । राम भगति उपाजिहि उर तोरें ॥
 सुनु मम बचन सत्य अब भाई । हरितोषन व्रत द्विज सेवकाई ॥
 अब जनि करहि बिप्र अपमाना । जानेसु संत अनंत समाना ॥
 इंद्र कुलिस मम सूल बिसाला । कालदंड हरि चक्र कराला ॥
 जो इन्ह कर मारा नहिं मरई । बिप्र द्रोह पावक सो जरई ॥
 अस बिबेक राखेहु मन माहीं । तुम्ह कहँ जग दुर्लभ कछु नाहीं ॥
 औरउ एक आसिषा मोरी । अप्रतिहत गति होइहि तोरी ॥

दो०—सुनि सिव बचन हरषि गुर एवमस्तु इति भाषि ।

मोहि प्रबोधि गयउ गृह संभु चरन उर राखि ॥१०९(क)॥

प्रेरित काल बिधि गिरि जाइ भयउँ मैं ब्याल ।

पुनि प्रयास बिनु सो तनु तजेउँ गएँ कछु काल ॥१०९(ख)॥

जोइ तनु धरउँ तजउँ पुनि अनायास हरिजान ।

सिख राखी श्रुति नाति अरु मै नाहि पावो कृस ।
 Vinay Avasthi Sahib Bhuvan Vaidi Trust Donations

एहि बिधि धरेउँ बिबिधि तनु ग्यान न गयउ खगेसा ॥ १०९ (घ) ॥

त्रिजग देव नर जोइ तनु धरउँ । तहँ तहँ राम भजन अनुसरउँ ॥
 एक सूल मोहि बिसर न काऊ । गुर कर कोमल सील सुभाऊ ॥
 चरम देह द्विज कै मैं पाई । सुर दुर्लभ पुरान श्रुति गाई ॥
 खेलउँ तहँ बालकन्ह मीला । करउँ सकल रघुनायक लीला ॥
 प्रौढ़ भएँ मोहि पिता पढ़ावा । समझउँ सुनउँ गुनउँ नहिं भावा
 मन ते सकल बासना भागी । केवल राम चरन लय लागी ॥
 कहु खगेस अस कवन अभागी । खरी सेव सुरधेनुहि त्यागी ॥
 प्रेम मगन मोहि कछु न सोहाई । हारेउ पिता पढ़ाई पढ़ाई ॥
 भए कालवस जब पितु माता । मैं बन गयउँ भजन जनत्राता ॥
 जहँ जहँ बिपिन मुनीस्वर पावउँ । आश्रम जाइ जाइ सिख नावउँ ॥
 बूझउँ तिन्हहि राम गुन गाइ । कहहिं सुनउँ हरषित खगनाहा ॥
 सुनत फिरउँ हरि गुन अनुवादा । अव्याहत गति संभु प्रसादा ॥
 छूटी त्रिविधि ईषना गाढ़ी । एक लालसा उर अति बाढ़ी ॥
 राम चरन बारिज जब देखौ । तब निज जन्म सफल करि लेखौ ॥
 जेहि पूँछउँ सोइ मुनि अस कहई । ईस्वर सर्व भूतमय अहई ॥
 निर्गुन मत नहिं मोहि सोहाई । प्रगुन ब्रह्म रति उर अधिकाई ॥

दो०—गुर के बचन सुरति करि राम चरन मनु लाग ।

रघुपति जस गावत फिरउँ छन छन नव अनुराग ॥ ११० (क) ॥

मेरु सिखर बट छाया मुनि लोमस आसनि ।

देखि चरन सिरु नायउँ बचन कहेउँ अति दीन ॥११०(ख)॥

मुनि मम बचन बिनीत मृदु मुनि कृपाल खगराज ।

मोहि सादर पूँछत भए द्विज आयहु केहि काज ॥११०(ग)॥

तब मैं कहा कृपानिधि तुम्ह सर्वग्य सुजान ।

सगुन ब्रह्म अवराधन मोहि कहहु भगवान ॥११०(घ)॥

तब मुनीस रघुपति गुन गाथा । कहे कछुक सादर खगनाथा ॥

ब्रह्मग्यान रत मुनि विग्यानी । मोहि परम अधिकारी जानी ॥

लागे करन ब्रह्म उपदेसा । अज अद्वैत अगुन हृदयेसा ॥

अकल अनीह अनाम अरूपा । अनुभव गम्य अखंड अनूपा ॥

मन गोतीत अमल अविनासी । निर्विकार निरवधि सुखरासी ॥

सो तैं ताहि तोहि नहिं भेदा । बारि बीचि इव गावहिं बेदा ॥

बिबिधि भौंति मोहि मुनि समुझावा । निर्गुन मत मम हृदयँ न आवा ॥

पुनि मैं कहेउँ नाइ पद सीसा । सगुन उपासन कहहु मुनीसा ॥

राम भगतिं जल मम मन मीना । किमि बिलगाइ मुनीस प्रबीना ॥

सोइ उपदेस कहहु करि दाया । निज नयनन्हि देखौं रघुराया ॥

भरि लोचन बिलोकि अवधेसा । तब सुनिहउँ निर्गुन उपदेसा ॥

मुनि पुनि कहि हरिकथा अनूपा । खंडि सगुन मत अगुन निरूपा ॥

तब मैं निर्गुन मत कर दूरी । सगुन निरूपउँ करि हठ भूरी ॥

Vinay Avasthi Sahib Bhuvan Vani Trust Donations

सुनु प्रभु बहुत अवग्या किए । उपज क्रोध ग्यानिन्ह के हिऐ ॥

अति संघरषन जाँ कर कोई । अनल प्रगट चंदन ते होई ॥

दो०-बारंबार सकोप मुनि करइ निरूपन ग्यान ।

मैं अपने मन बैठ तब करउँ विविधि अनुमान ॥१११(क)॥

क्रोध कि द्वैत बुद्धि बिनु द्वैत कि बिनु अग्यान ।

मायाबस परिछिन्न जड़ जीव कि ईस समान ॥१११(ख)॥

कबहुँ कि दुख सब कर हित ताकें । तेहि कि दरिद्र परस मनि जाकें

परद्रोही की होहिं निसंका । कामी पुनि कि रहहिं अकलंका ॥

बंस कि रह द्विज अनहित कीन्हें । कर्म कि होहिं स्वरूपहि चीन्हें ॥

काहू सुमति कि खल सँग जामी । सुभ गति पाव कि परत्रिय गामी

भव कि परहिं परमात्मा बिंदक । सुखी कि होहिं कबहुँ हरि निंदक ॥

राजु कि रहइ नीति बिनु जानें । अघ कि रहहिं हरि चरित बखानें

पावन जस कि पुन्य बिनु होई । बिनु अघ अजस कि पावइ कोई ॥

लाभु कि किछु हरि भगति समाना । जेहि गावहिं श्रुति संत पुराना ॥

हानि कि जग एहि सम किछु भाई । भजिअ न रामहि नर तनु पाई ॥

अघ कि पिसुनता सम कछु आना । धर्म कि दया सरिस हरि जाना ॥

एहि विधि अमिति जुगुति मन गुनऊँ । मुनि उपदेस न सादर सुनऊँ

पुनि पुनि सगुन पच्छ मैं रोपा । तब मुनि बोलेउ बचन सकोपा ॥

मूढ़ परम सिख देऊँ न मानसि । उत्तर प्रतिउत्तर बहु आनसि ॥

सत्य बचन बिस्वास न करही । बायस इव सबही ते डरही ॥

सठ स्वपच्छ तव हृदयँ विसाला । सपदि होहि पच्छी चंडाला ॥

लीन्ह श्राप मैं सीस चढ़ाई । नहिं कछु भय न दीनता आई ॥

दो०—तुरत भयउँ मैं काग तब पुनि मुनि पद सिरु नाइ ।

सुमिरि राम रघुवंस मनि हरषित चलेउँ उड़ाइ ॥११२(क)॥

उमा जे राम चरन रत बिगत काम मद क्रोध ।

निज प्रभुमय देखहिं जगत केहि सन करहिं बिरोध ॥११२(ख)॥

मुनु खगेस नहिं कछु रिषि दूषन । उर प्रेरक रघुवंस बिभूषन ॥

कृपासिंधु मुनि मति करि भोरी । लीन्ही प्रेम परिच्छा मोरी ॥

मन बच क्रम मोहि निज जन जाना । मुनि मति पुनि फेरी भगवाना

रिषि मम महत सीलता देखी । राम चरन बिस्वास बिसेषी ॥

अति विसमय पुनि पुनि पछिताई । सादर मुनि मोहि लीन्ह बोलाई

मम परितोष बिबिधि बिधि कीन्हा । हरषित राममंत्र तब दीन्हा ॥

बालकरूप राम कर ध्याना । कहेउ मोहि मुनि कृपानिधाना ॥

सुंदर सुखद मोहि अति भावा । सो प्रथमहिं मैं तुम्हहि सुनावा ॥

मुनि मोहि कछुक काल तहँ राखा । रामचरितमानस तब भाषा ॥

सादर मोहि यह कथा सुनाई । पुनि बोले मुनि गिरा सुहाई ॥

रामचरित सर गुप्त सुहावा । संभु प्रसाद तात मैं पावा ॥

तोहि निज भगत राम कर जानी । ताते मैं सब कहेउँ बखानी ॥

रामभगति जिन्ह कें उर नाहीं । कबहुँ न तात कहिअ तिन्ह पाहीं

निज कर कमल परसि मम सीसा । हरषित आसिष दीन्ह मुनीसा ॥

राम भगति अविरल उर तोरें । बसिहि सदा प्रसाद अब मोरें ॥

दो०—सदा राम प्रिय होहु तुम्ह सुभगुन भवन अमान ।

कामरूप इच्छामरन ग्यान बिराग निधान ॥११३(क)॥

जेहिं आश्रम तुम्ह बसब पुनि सुमिरत श्रीभगवंत ।

व्यापिहि तहँ न अबिद्या जोजन एक प्रजंत ॥११३(ख)॥

काल कर्म गुन दोष सुभाऊ । कछु दुख तुम्हहि न व्यापिहि काऊ

राम रहस्य ललित विधि नाना । गुप्त प्रगट इतिहास पुराना ॥

बिनु श्रम तुम्ह जानब सब सोऊ । नित नव नेह राम पद होऊ ॥

जो इच्छा करिहहु मन माहीं । हरि प्रसाद कछु दुर्लभ नाहीं ॥

सुनि मुनि आसिष सुनु मतिधीरा । ब्रह्मागिरा भइ गगन गँभीरा ॥

एवमस्तु तव वच मुनि ग्यानी । यह मम भगत कर्म मन बानी ॥

सुनि नभगिरा हरष मोहि भयऊ । प्रेम मगन सब संसय गयऊ ॥

करि विनती मुनि आयसु पाई । पद सरोज पुनि पुनि सिरु नाई ॥

हरष सहित एहिं आश्रम आयउँ । प्रभु प्रसाद दुर्लभ बर पायउँ ॥

इहाँ बसत मोहि सुनु खग ईसा । बीते कल्प सात अरु बीसा ॥

करउँ सदा रघुपति गुन गाना । सादर सुनहिं बिहंग सुजाना ॥

जब जब अवधपुरीं रघुबीरा । धरहिं भगत हित मनुज सरीरा ॥

तब तब जाइ राम पुर रहऊँ । सिसुलीला बिलोकि सुख लहऊँ ॥

पुनि उर राखि राम सिसुरूपा । निज आश्रम आवउँ खगभूपा ॥

कथा सकल मैं तुम्हहि सुनाई । काग देह जेहिं कारन पाई ॥

कहिउँ तात सब प्रस्न तुम्हारी । राम भगति महिमा अति भारी ॥

दो०-ताते यह तन मोहि प्रिय भयउ राम पद नेह ।

निज प्रभु दरसन पायउँ गए सकल संदेह ॥११४(क)॥

मासपारायण, उन्तीसवाँ विश्राम

भगति पच्छ हठ करि रहेउँ दीन्हि महारिषि साप ।

मुनिदुर्लभ बर पायउँ देखहु भजन प्रताप ॥११४(ख)॥

जे असि भगति जानि परिहरहीं । केवल ग्यान हेतु श्रम करहीं ॥
 ते जड़ कामधेनु गृहँ त्यागी । खोजत आकु फिरहिं पय लागी ॥
 सुनु खगेस हरि भगति बिहाई । जे सुख चाहहिं आन उपाई ॥
 ते सठ महारिषि बिनु तरनी । पैरि पार चाहहिं जड़ करनी ॥
 सुनि भसुंडि के बचन भवानी । बोलेउ गरुड़ हरषि मृदु बानी ॥
 तव प्रसाद प्रभु मम उर माहीं । संसय सोक मोह भ्रम नाहीं ॥
 सुनेउँ पुनीत राम गुन ग्रामा । तुम्हरी कृपाँ लहेउँ विश्रामा ॥
 एक बात प्रभु पूँछउँ तोही । कहहु बुझाइ कृपानिधि मोही ॥
 कहहिं संत मुनि बेद पुराना । नहिं कछु दुर्लभ ग्यान समाना ॥
 सोइ मुनि तुम्ह सन कहेउ गोसाई । नहिं आदरेहु भगति की नाई ॥
 ग्यानहि भगतिहि अंतर केता । सकल कहहु प्रभु कृपा निकेता ॥
 सुनि उरगारि बचन सुख माना । सादर बोलेउ काग सुजाना ॥
 भगतिहि ग्यानहि नहिं कछु भेदा । उभय हरहिं भव संभव खेदा ॥
 नाथ मुनीस कहहिं कछु अंतर । सावधान सोउ सुनु बिहंगबर ॥

पुरुष प्रताप प्रबल सब भाँती । अबला अबल सहज जड़ जाती ॥

दो०—पुरुष त्यागि सक नारिहि जो विरक्त मति धीर ।

न तु कामी विषयाबस बिमुख जो पद रघुवीर ॥११५(क)॥

सो०—सोउ मुनि ग्याननिधान मृगनयनी बिधु मुख निरखि ।

बिबस होइ हरिजान नारि बिष्णु माया प्रगट ॥११५(ख)॥

इहाँ न पच्छपात कछु राखउँ । वेद पुरान संत मत भाषउँ ॥

मोह न नारि नारि कैं रूपा । पन्नगारि यह रीति अनूपा ॥

माया भगति सुनहु तुम्ह दोऊ । नारि बर्ग जानइ सब कोऊ ॥

पुनि रघुवीरहि भगति पिआरी । माया खलु नर्तकी बिचारी ॥

भगतिहि सानुकूल रघुराया । ताते तेहि डरपति अति माया ॥

राम भगति निरुपम निरुपाधी । बसइ जासु उर सदा अबाधी ॥

तेहि बिलोकि माया सकुचाई । करि न सकइ कछु निज प्रभुताई ॥

अस बिचारि जे मुनि बिग्यानी । जाचहिं भगति सकल सुख खानी ॥

दो०—यह रहस्य रघुनाथ कर बेगि न जानइ कोइ ।

जो जानइ रघुपति कृपाँ सपनेहुँ मोह न होइ ॥११६(क)॥

औरउ ग्यान भगति कर भेद सुनहु सुप्रबीन ।

जो सुनि होइ रामपद प्रीति सदा अबिछीन ॥११६(ख)॥

सुनहु बात यह अकथ कहानी । समुझत बनइ न जाइ बखानी ॥

ईस्वर अंस जीव अविनासी । चेतन अमल सहज सुख रासी ॥

सो मायाबस भयउ गोसाईं । बँध्यो कीर मरकट की नाई ॥

जड़ चेतनहि ग्रंथि परि गई । जदपि मृषा छूटत कठिन्हई ॥
 तब ते जीव भयउ संसारी । छूट न ग्रंथि न होइ सुखारी ॥
 श्रुति पुरान बहु कहेउ उपाई । छूट न अधिक अधिक अरुझाई ॥
 जीव हृदयँ तम मोह विसेषी । ग्रंथि छूट किमि परइ न देखी ॥
 अस संजोग ईस जब करई । तबहुँ कदाचित सो निरुअरई ॥
 सात्त्विक श्रद्धा धेनु सुहाई । जौं हरि कृपाँ हृदयँ बस आई ॥
 जप तप व्रत जम नियम अपारा । जे श्रुति कह सुभ धर्म अचारा ॥
 तेइ तृन हरित चरै जब गाई । भाव बच्छ सिसु पाइ पेन्हाई ॥
 नोइ निवृत्ति पात्र विस्वासा । निर्मल मन अहीर निज दासा ॥
 परम धर्ममय पय दुहि भाई । अवटै अनल अकाम बनाई ॥
 तोष मरुत तब छमाँ जुड़ावै । धृति सम जावनु देइ जमावै ॥
 मुदितौं मथै विचार मथानी । दम आधार रजु सत्य सुबानी ॥
 तब मथि काढ़ि लेइ नवनीता । विमल विराग सुभग सुपुनीता ॥

दो०—जोग अगिनि करि प्रगट तब कर्म सुभासुभ लाइ ।

बुद्धि सिरावै ग्यान घृत ममता मल जरि जाइ ॥ ११७ (क) ॥

तब बिग्यानरूपिनी बुद्धि बिसद घृत पाइ ।

चित्त दिआ भरि धरै दृढ़ समता दिअटि बनाइ ॥ ११७ (ख) ॥

तीनि अवस्था तीनि गुन तेहि कपास तें काढ़ि ।

सो०-एहि बिधि लेस दीप तेज रासि बिग्यानमय ।

जातहिं जासु समीप जरहिं मदादिक सलभ सब ॥११७(घ)॥

सोहमस्मि इति वृत्ति अखंडा । दीप सिखा सोइ परम प्रचंडा ॥
 आतम अनुभव सुख सुप्रकासा । तब भव मूल भेद भ्रम नासा ॥
 प्रबल अबिद्या कर परिवारा । मोह आदि तम मिटइ अपारा ॥
 तब सोइ बुद्धि पाइ उँजिआरा । उर गृहँ बैठि ग्रंथि निरुआरा ॥
 छोरन ग्रंथि पाव जौं सोई । तब यह जीव कृतारथ होई ॥
 छोरत ग्रंथि जानि खगराया । बिघ्न अनेक करइ तब माया ॥
 रिद्धि सिद्धि प्रेरइ बहु भाई । बुद्धिहिलोभ दिखावहिं आई ॥
 कल बल छल करि जाहिं समीपा । अंचल बात बुझावहिं दीपा ॥
 होइ बुद्धि जौं परम सयानी । तिन्ह तन चितवन अनहित जानी ॥
 जौं तेहि बिघ्न बुद्धि नहिं बाधी । तौ बहोरि सुर करहिं उपाधी ॥
 इंद्री द्वार झरोखा नाना । तहँ तहँ सुर बैठे करि थाना ॥
 आवत देखहिं बिषय बयारी । ते हठि देहिं कषाट उघारी ॥
 जब सो प्रभंजन उर गृहँ जाई । तबहिं दीप बिग्यान बुझाई ॥
 ग्रंथि न छूटि मिटा सो प्रकासा । बुद्धि विकल भइ बिषय बतासा ॥
 इंद्रिन्ह सुरन्ह न ग्यान सोहाई । बिषय भोग पर प्रीति सदाई ॥
 बिषय समीर बुद्धि कृत भोरी । तेहि बिधि दीप को बार बहोरी ॥
 दो०-तब फिरि जीव बिबिधि बिधि पावइ संसृति क्लेश ।

हरि माया अति दुस्तर तरि न जाइ बिहगोस ॥११८(क)॥

Vinay Avasthi Sahib Bhuvan Vani Trust Donations
कहत कठिन समुझत कठिन साधित कठिन बिबेक ।

होइ घुनाच्छर न्याय जौं पुनि प्रत्यूह अनेक ॥११८(ख)॥

ग्यान पंथ कृपान कै धारा । परत खगेस होइ नहिं बारा ॥
जो निर्विघ्न पंथ निर्वहई । सो कैवल्य परम पद लहई ॥
अति दुर्लभ कैवल्य परम पद । संत पुरान निगम आगम बद ॥
राम भजत सोइ मुकुति गोसाईं । अनइच्छित आवइ बरिआई ॥
जिमि थल बिनु जल रहि न सकाई । कोटि भाँति कोउ करै उपाई ॥
तथा मोच्छ सुख सुनु खगराई । रहि न सकइ हरि भगति बिहाई ॥
अस बिचारि हरि भगत सयाने । मुक्ति निरादर भगति लुभाने ॥
भगति करत बिनु जतन प्रयासा । संसृति मूल अबिद्या नासा ॥
भोजन करिअ तृपिति हित लागी । जिमि सो असन पचवै जठरागी ॥
असि हरि भगति सुगम सुखदाई । को अस मूढ़ न जाहि सोहाई ॥

दो०—सेवक सेव्य भाव बिनु भव न तरिअ उरगारि ।

भजहु राम पद पंकज अस सिद्धांत बिचारि ॥११९(क)॥

जो चेतन कहँ जड़ करइ जड़हि करइ चैतन्य ।

अस समर्थ रघुनायकहि भजहिं जीव ते धन्य ॥११९(ख)॥

कहेउँ ग्यान सिद्धांत बुझाई । सुनहु भगति मनि कै प्रभुताई ॥
राम भगति चिंतामनि सुंदर । बसइ गरुड़ जाके उर अंतर ॥
परम प्रकास रूप दिन राती । नहिं कछु चहिअ दिआ घृत बाती ॥
मोह दरिद्र निकट नहिं आवा । लोभ बात नहिं ताहि बुझावा ॥

Vinay Avasthi Sahib Bhuvan Varri Trust Donations
 प्रबल आविद्या तम मिट जाई । हरिहि सकल सलम समुदाई ॥
 खल कामादि निकट नहिं जाहीं । बसइ भगति जाके उर माहीं ॥
 गरल सुधासम अरि हित होई । तेहि मनि बिनु सुख पाव न कोई
 व्यापहिं मानस रोग न भारी । जिन्ह के बस सब जीव दुखारी ॥
 राम भगति मनि उर बस जाकें । दुख लवलेस न सपनेहुँ ताकें ॥
 चतुर सिरोमनि तेइ जग माहीं । जे मनि लागि सुजतन कराहीं ॥
 सो मनि जदपि प्रगट जग अहई । राम कृपा बिनु नहिं कोउ लहई ॥
 सुगम उपाय पाइवे केरे । नर हतभाग्य देहिं भटभेरे ॥
 पावन पर्वत बेद पुराना । राम कथा रुचिराकर नाना ॥
 ममीं सज्जन सुमति कुदारी । ग्यान विराग नयन उरगारी ॥
 भाव सहित खोजइ जो प्राणी । पाव भगति मनि सब सुख खानी
 मोरें मन प्रभु अस बिस्वासा । राम ते अधिक राम कर दासा ॥
 राम सिंधु घन सज्जन धीरा । चंदन तरु हरि संत समीरा ॥
 सब कर फल हरि भगति सुहाई । सो बिनु संत न काहूँ पाई ॥
 अस बिचारि जोइ कर सतसंगा । राम भगति तेहि सुलभ बिहंगा ॥
 दो०—ब्रह्म पयोनिधि मंदर ग्यान संत सुर आहिं ।

कथा सुधा मथि काढ़हिं भगति मधुरता जाहिं ॥१२०(क)॥

विरति चर्म असि ग्यान मद लोभ मोह रिपु मारि ।

जय पाइअ सो हरि भगति देखु खगेस बिचारि ॥१२०(ख)॥

पुनि सप्रेम बोलेउ खगराऊ । जौं कृपाल मोहि ऊपर भाऊ ॥

नाथ मोह निज सेवक जानी । संत प्रसन्न मन कहहु बखानी ॥
 प्रथमहि कहहु नाथ मतिधीरा । सब ते दुर्लभ कवन ॥
 बड़ दुख कवन कवन सुख भारी । सोउ संछेपहि कहहु विचारी ॥
 संत असंत मरम तुम्ह जानहु । तिन्ह कर सहज सुभाव बखानहु
 कवन पुन्य श्रुति विदित बिसाला । कहहु कवन अघ परम कराला ॥
 मानस रोग कहहु समुझाई । तुम्ह सर्वग्य कृपा अधिकाई ॥
 तात सुनहु सादर अति प्रीती । मैं संछेप कहउँ यह नीती ॥
 नर तन सम नहिं कवनिउ देही । जीव चराचर जाचत तेही ॥
 नरक स्वर्ग अपवर्ग निसेनी । ग्यान विराग भगति सुभ देनी ॥
 सो तनु धरि हरि भजहिं न जे नर । होहिं विषयरत मंद मंद तर ॥
 काँच किरिच बदलें ते लेहीं । कर ते डारि परस मनि देहीं ॥
 नहिं दरिद्र सम दुख जग माहीं । संत मिलन सम सुख जग नाहीं ॥
 पर उपकार वचन मन काया । संत सहज सुभाउ खगराया ॥
 संत सहहिं दुख पर हित लागी । पर दुख हेतु असंत अभागी ॥
 भूर्ज तरु सम संत कृपाला । पर हित निति सह बिपति बिसाला
 सन इव खल पर बंधन करई । खाल कढ़ाइ बिपति सहि मरई ॥
 खल विनु स्वारथ पर अपकारी । अहि मूषक इव सुनु उरगारी ॥
 पर संपदा बिनासि नसाहीं । जिमि ससि हति हिम उपल बिलाहीं ॥
 दुष्ट उदय जग आरति हेतू । जथा प्रसिद्ध अधम ग्रह केतू ॥
 संत उदय संतत सुखकारी । बिस्व सुखद जिमि इंदु तमारी ॥
 परम धर्म श्रुति विदित अहिंसा । पर निंदा सम अघ न गरीसा ॥

हर गुर निंदक दादुर होई । जन्म सहस्र पाव तन सोई ॥
 द्विज निंदक बहु नरक भोग करि । जग जनमइ वायस सरीर धरि ॥
 सुर श्रुति निंदक जे अभिमानी । रौरव नरक परहिं ते प्रानी ॥
 होहिं उलूक संत निंदा रत । मोह निसा प्रिय ग्यान भानु गत ॥
 सब कै निंदा जे जड़ करहीं । ते चमगादुर होइ अवतरहीं ॥
 सुनहु तात अब मानस रोगा । जिन्ह ते दुख पावहिं सब लोगा ॥
 मोह सकल व्याधिन्ह कर मूला । तिन्ह ते पुनि उपजहिं बहु सूला ॥
 काम बात कफ लोभ अपारा । क्रोध पित्त नित छाती जारा ॥
 प्रीति करहिं जौं तीनिउ भाई । उपजइ सन्यपात दुखदाई ॥
 विषय मनोरथ दुर्गम नाना । ते सब सूल नाम को जाना ॥
 मगना दादु कंडु इरषाई । हरष विषाद गरह बहुताई ॥
 पर सुख देखि जरनि सोइ छई । कुष्ट दुष्टता मन कुटिलई ॥
 अहंकार अति दुखद डमरुआ । दंभ कपट मद मान नेहरुआ ॥
 तृष्णा उदरवृद्धि अति भारी । त्रिविधि ईषना तरुन तिजारी ॥
 जुग विधिज्वर मत्सर अबिबेका । कहँ लगि कहौं कुरोग अनेका ॥

दो०—एक व्याधि बस नर मरहिं ए असाधि बहु व्याधि ।

पीड़हि संतत जीव कहँ सो किमि लहै समाधि ॥ १२१ (क) ॥

नेम धर्म आचार तप ग्यान जग्य जप दान ।

भेषज पुनि कोटिन्ह नहिं रोग जाहिं हरिजान ॥ १२१ (ख) ॥

एहि विधि सकल जीव जग रोगी । सोक हरष भय प्रीति बियोगी ॥

Vinay Avasthi Sahib Bhuvan Vani Trust Donations

मसकहि करइ बिरंचि प्रभु अजहि मसक ते हीन ।

अस बिचारि तजि संसय रामहि भजहि प्रबीन ॥१२२(ख)॥
श्लोक—बिनिश्चितं वदामि ते न अन्यथा वचांसि मे ।

हरिं नरा भजन्ति येऽतिदुस्तरं तरन्ति ते ॥१२२(ग)॥

कहेउँ नाथ हरि चरित अनूपा । व्यास समास स्वमति अनुरूपा ॥
श्रुति सिद्धांत इहइ उरगारी । राम भजिअ सब काज विसारी ॥
प्रभु रघुपति तजि सेइअ काही । मोहिसे सठ पर ममता जाही ॥
तुम्ह विग्यानरूप नहिं मोहा । नाथ कीन्हि मो पर अति छोहा ॥
पूँछिहु राम कथा अति पावनि । सुक सनकादि संभु मन भावनि ॥
सत संगति दुर्लभ संसारा । निमिष दंड भरि एकउ बारा ॥
देखु गरुड़ निज हृदय विचारी । मैं रघुवीर भजन अधिकारी ॥
सकुनाधम सब भाँति अपावन । प्रभु मोहि कीन्ह बिदित जग पावन
दो०—आजु धन्य मैं धन्य अति जद्यपि सब बिधि हीन ।

निज जन जानि राम मोहि संत समागम दीन ॥१२३(क)॥

नाथ जथामति भाषेउँ राखेउँ नहिं कछु गोइ ।

चरित सिंधु रघुनायक थाह कि पावइ कोइ ॥१२३(ख)॥

सुमिरि राम के गुन गन नाना । पुनि पुनि हरष भुसुंड़ि सुजाना ॥

महिमा निगम नेति करि गाई । अतुलित बल प्रताप प्रभुताई ॥

सिव अज पूज्य चरन रघुराई । मो पर कृपा परम मृदुलाई ॥

अस सुभाउ कहूँ सुनउँ न देखूँ । अति सम लेखउँ

Vinay Avasthi Sahib Bhuvan Vani Trust Donations
गिरिजा सत समागम सम न लाभ कछु अन ।

बिनु हरि कृपा न होइ सो गावहिं वेद पुरान ॥ १२५ (ख) ॥

कहेउँ परम पुनीत इतिहासा । सुनत श्रवन छूटहिं भव पासा ॥
प्रनत कल्पतरु करुना पुंजा । उपजइ प्रीति राम पद कंजा ॥
मन क्रम बचन जनित अध जाई । सुनहिं जे कथा श्रवन मन लाई ॥
तीर्थाटन साधन समुदाई । जोग विराग ग्यान निपुनाई ॥
नाना कर्म धर्म व्रत दाना । संजम दम जप तप मख नाना ॥
भूत दया द्विज गुर सेवकाई । विद्या विनय विवेक बड़ाई ॥
जहँ लगि साधन वेद बखानी । सब कर फल हरि भगति भवानी ॥
सो रघुनाथ भगति श्रुति गाई । राम कृपाँ काहूँ एक पाई ॥

दो०—सुनि दुर्लभ हरि भगति नर पावहिं बिनहिं प्रयास ।

जे यह कथा निरंतर सुनहिं मानि बिस्वास ॥ १२६ ॥

सोइ सर्वग्य गुनी सोइ ग्याता । सोइ महि मंडित पंडित दाता ॥
धर्म परायन सोइ कुल त्राता । राम चरन जाकर मन राता ॥
नीति निपुन सोइ परम सयाना । श्रुति सिद्धांत नीक तेहिं जाना ॥
इ कवि कोविद सोइ रनधीरा । जो छल छाड़ि भजइ रघुबीरा ॥
धन्य देस सो जहँ सुरसरी । धन्य नारि पतिव्रत अनुसरी ॥
धन्य सो भूपु नीति जो करई । धन्य सो द्विज निज धर्म न टरई ॥
सो धन धन्य प्रथम गति जाकी । धन्य पुन्य रत मति सोइ पाकी ॥
धन्य घरी सोइ जब सतसंगा । धन्य धन्य द्विज भगति अभंगा ॥

Vinay Avasthi Sahib Bhuvan Vani Trust Donations

दो०—सो कुल धन्य उमा सुनु जगत पूज्य सुपुनीत ।

श्रीरघुबीर परायन जेहि नर उपज बिनीत ॥१२॥

मति अनुरूप कथा मैं भाषी । जद्यपि प्रथम गुप्त करि राखी ॥
 तव मन प्रीति देखि अधिकारि । तब मैं रघुपति कथा सुनाई ॥
 यह न कहिअ सठही हठसीलहि । जो मन लाइ न सुन हरि लीलहि ॥
 कहिअ न लोभिहि क्रोधिहि कामिहि । जो न भजइ सचराचर स्वामिहि ॥
 द्विज द्रोहिहि न सुनाइअ कबहूँ । सुरपति सरिस होइ नृप जबहूँ ॥
 राम कथा के तेइ अधिकारी । जिन्ह कैं सत संगति अति प्यारी ॥
 गुर पद प्रीति नीति रत जेई । द्विज सेवक अधिकारी तेई ॥
 ता कहँ यह विशेष सुखदाई । जाहि प्रानप्रिय श्रीरघुराई ॥

दो०—राम चरन रति जो चह अथवा पद निर्बान ।

भाव सहित सो यह कथा करउ श्रवन पुट पान ॥१२८॥

राम कथा गिरिजा मैं बरनी । कलि मल समनि मनोमल हरनी ॥
 संसृति रोग सजीवन मूरी । राम कथा गावहिं श्रुति सूरी ॥
 एहि महुँ रुचिर सत सोपाना । रघुपति भगति केर पंथाना ॥
 अति हरि कृपा जाहि पर होई । पाउँ देइ एहिं मारग सोई ।
 मन कामना सिद्धि नर पावा । जे यह कथा कपट तजि गावा ॥
 कहहिं सुनहिं अनुमोदन करहीं । ते गोपद इव भवनिधि तरहीं ॥
 सुनि सब कथा हृदय अति भाई । गिरिजा बोली गिरा सुहाई ॥

श्रीरामायणजीकी आरती

आरति श्रीरामायनजी की ।

कीरति कलित ललित सिय पी की ।

गावत ब्रह्मादिक मुनि नारद ।

बालमीक विग्यान विसारद ।

सुक सनकादि सेव अरु सारद ।

बरनि पवनसुत कीरति नीकी ॥ १ ॥

गावत बैद पुरान अष्टदस ।

छओ सास्त्र सब ग्रंथन को रस ।

मुनि जन धन संतन को सरबस ।

सार अंस संमत सबही की ॥ २ ॥

गावत संतत संभु भवानी ।

अरु घटसंभव मुनि विग्यानी ।

व्यास आदि कबिबर्ज बखानी ।

कागभुसुंड़ि गरुड के ही की ॥ ३ ॥

कलि भल हरनि बिषय रस फीकी ।

सुभग सिंगार मुक्ति जुबती की ।

दलन रोग भव मूरि अमी की ।

तात मात सब बिधि तुलसी की ॥ ४ ॥

Vinay Avasthi Sahib Bhuvan Vani Trust Donations

Vinay Avasthi Sahib Bhuvan Vani Trust Donations

Vinay Avasthi Sahib Bhuvan Vani Trust Donations